

江苏省通志 稿古迹志

繆荃孙

文硕阁

wenshuoge.com

目录

关于我们	3
序	5
第一卷 江宁府	6
第二卷 苏州府 松江府	45
第三卷 常州府 镇江府	95
第四卷 淮安府 扬州府 徐州府 太仓州 海州 通州	123
第五卷 历代城郭官廨	166

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

旧草古迹，属于地理，今以过繁，爰为分析。宁郡最盛，八代所遗；苏郡次之；余郡所载，亦不为少。古初已有，吴晋而后，不可胜原。都邑、城戍、宫殿、府寺、楼台、亭苑、津梁、第宅，凡似此者，甲于各省。清代有者，已入建置；朱明以前，则胥入此。古志所见，或出传闻。词人所歌，每感凭吊。冢墓之列，尚寻蔓草。陵寝所在，多剩荒烟。前序有云：旧基遗制，足补史宸，名园胜地，兹亦附载。今并同之，分券以代，不区门类。凡卷五。

第一卷 江宁府

建业都城 在上元县秦淮北五里。《三国志·吴志》：孙权，字仲谋。建安十四年，刘备表权行车骑将军，领徐州牧。十六年，权徙治秣陵。明年，改秣陵为建业，筑城，周围二十里十九步。晋元帝南渡，改名建康。自后，宋、齐、梁、陈常都此处。城门，初悉用洛阳旧名。《建康实录》云：都门三重。外重六门：宣阳、广阳、津阳、清明、建阳、西明也。后增置十二门。南四门，最西曰陵阳，后改为广阳；正门曰宣阳；稍东曰开阳，后改津阳，东曰清明。东面二门，南曰东阳，北曰建春，后改建阳。西二门，南曰闾阖，北曰西明。北四门，西曰大夏，中曰玄武，齐时改曰宣平；稍东曰广莫，陈改北捷；最东曰延喜。又自晋以来，秦淮南北两岸设篱门五十六所，谓之郊门。又有国门，梁天监中作，在越城东南，亦曰望国门。又建康县，在上元县治南。《太平寰宇记》云：古建康县，初置在宣阳门内，晋咸和二年毁，移入苑城。六年又徙出宣阳门外御街西，今建初寺门路东。

西都(今江宁府) 《南唐书》：先主姓李，唐宗室裔也。杨行密以乞徐温乃姓徐，名知诰。吴天祚三年，改元昇元，以建康为西都。

应天府(今江宁府)

明《南畿志》：洪武元年，太祖改元，集庆路为应天府，建都。

江乘城

在上元县北五十里。《史记》：始皇三十七年，自会稽还，过吴从江乘渡，即此。

湖熟城 在上元县丹阳乡，去县五十里淮水北，在旧江宁县东南七十里。《汉书·王子侯表》：湖熟镇顷侯胥行江都易王子，元朔元年正月丁卯封。

石头城 在上元县石城门西北。《金陵志》云：周显王三十八年，楚城石头曰金陵邑。汉建安十七年，吴改为石头城。《丹阳记》云：吴时土坞，后因山加甃为城，因江为池，地形最为险固。

冶城 在上元县治西。《金陵古今图考》云：春秋时，金陵未有城邑，惟石头东有冶城，相传夫差铸剑于此。《南畿志》云：孙吴冶铸之所在，宋天庆观，即今朝天官。《雅游编》云：晋孝武建冶城寺，安帝以寺为苑，旁有卞将军墓，谢安、王羲之同登处，亦曰冶亭。宋义熙十一年，刘钟领石头戍记事屯冶亭是也。别有东冶亭，史称王导迁冶于县东七里，盖东冶也。

金城 在上元县东北三十五里，相传孙吴所筑。《至正金陵新志》云：上元县金陵乡，旧名金城戍。晋太元八年，谢安劳师于金城，即此，或称琅邪城。咸康初桓温为琅邪内史，镇金城。《齐书》云：南琅邪本治金城，永明中移白下。戚氏以为金

城即句容之琅邪城是也，今句容县有琅邪乡。

台城 在上元县治北玄武湖侧。《舆地纪胜》云：一曰苑城，本吴后苑城也。晋咸和中作新宫，遂为宫城。下及梁陈，宫皆在此。晋、宋时谓朝廷禁省为台，故谓宫城为台城。城周六里百一十步，有门六：南曰大司马，东曰万春、曰东华，西曰西华、曰大汤，北曰承明。又自晋以后，宫门初不立阙，至梁天监七年，始立石阙二于端门外。陆倕为铭。《南都志》云：今四十八卫以南，天津桥大街以北，即台城故处。梁陆倕《石阙铭》有序：昔在舜格文祖，禹至神宗，周变商俗，汤黜夏政，虽革命殊乎因袭，揖让异于干戈，而晷纬冥合。天人启基，克明峻德，大庇生民，其揆一也。在齐之季，昏虐君临，威侮五刑，怠弃三正，刑酷然炭，暴逾膏柱，民怨神怒，众叛亲离，踏地无归，瞻乌靡拯，于是我皇帝拯之。乃操斗极，把钩陈，翼百神，禋万福，龙飞黑水，虎步西河，雷动风驱，天行地止，命旅致纯云之应，登坛有降火之祥。龟筮协从，人祗响附，莫不援旗请奋，执锐争先。夏首凭固，庸岷负阻，协彼离心，抗兹同德，帝赫斯怒。秣马训兵，严鼓未通，凶渠泥首，弘舸连舳，巨舰接舳，铁马千群，朱旗万里，折简而禽庐九，传檄以下湘罗。兵不血刃，士无遗镞，而樊邓威怀，巴黔底定。于是流汤之党，握炭之徒，守以樊离，战同枯朽，革车近次，师营商牧如云，士女冠盖相望。扶老携幼一旦咸集，壶浆塞野，簞食盈途，似夏民之附成汤，殷士之归周武。安老怀少，伐罪吊民，农不迁业，市无易贾，八方人计，四陕奉图，羽檄交驰，军书狎至，一日二日，非止万几，而尊严之度不讐于师旅，渊默之容无改于行阵。计如投水，思若转规，策定帷幄，谋成几案。曾未浹辰，独未授首，乃焚其绮席，弃彼宝衣，归璇台之珠，反诸侯之璧。指麾而四海隆平，下车而天下大定，拯兹涂炭，救此横流，功均天地，祥分光岳。于是仰协三灵，俯从亿兆，受昭华之玉，纳龙叙之图，类帝禋宗，光有神器，升中以祀群望，摄袂而朝诸夏。布教都畿，班政方外，谋协上策，刑从中典。南服绥耳，西羁反舌，剑骑穹庐之国，同川共穴乏人，莫不屈膝交臂，厥角稽颡，开凿万里，攘地千都。幕南罢障，西河无警。于是治定功成，还安远肃，忘兹虎骇，息此狼顾。乃正六乐，治五礼，改章程，创法律。置博士之职，而著录之生若云，开集雅之馆，而款关之学如市。兴建庠序，启设郊邱，一介之才必记，无文之典咸秩，于是天下学士靡然向风。人识廉隅，家知礼让，教臻侍子，化洽期门。区宇义安，方面静息，役休务简，岁阜民和。历代规模，前王典故，莫不芟薶剪截，允执厥中，以为象阙之制。其来已远，春秋设旧章之教，经礼垂布宪之文，载记显游观之言。周室书树阙之梦，北荒明月，西极流精，海岳黄金，河庭紫贝。苍龙玄武之制，铜雀铁凤之工，或以听穷省冤，或以布治悬法，或以表正王居，或以光崇帝里。晋氏寝弱，宋历透迟，礼经旧典，寂寞无记，鸿规盛烈，湮歿罕称，乃假天阙于牛头，托远图于博望，有欺耳目，无补宪章。乃命审典之官，还明中之士，陈圭置臬，瞻星揆地，兴复表门，草创华阙。于是岁次天纪，月旅太簇，皇帝御天下之七载也。构兹盛则，兴此崇丽，方且趋以表敬，观而知法。物睹双碣之容，人识百里之典，作范垂训，赫矣壮乎！爰命下臣式铭盘石，其辞曰：惟帝建国，正位辨方。周营洛浹，汉启歧梁。居因业盛，文以化光。爰有象阙，是惟旧章。青盖南泊，黄旗东指。

。悬法无闻，藏书弗纪。大人造物，龙德休否，建此百常，兴兹双起。伟哉偃蹇，壮矣崔巍。旁映重叠，上连翠微。布教方显，浹日出辉。悬书有附，委篋知归。郁屈重轩，穹隆反宇。形耸飞栋，势超浮柱。色法上圆，制模下矩。周望原隰，俯临烟雨。前宾四会，却背九房。北通二轍，南凑五方。暑来寒往，地久天长。神哉华观，永配无疆。

西州城 在上元县治，晋扬州刺史治所，王导所创也。及会稽王道子领扬州，居东府，故以此为西州。城西则冶城，东则运渚。胡三省《通鉴注》云：扬州治所在台城西，故谓之西州。

怀德城 在上元县钟山乡。东晋，为琅邪国人随帝过江者置。《建康志》云：怀德县旧置于宫城南七里，建初寺前路东。后改为费县，移于宫城西北三里。宋大明七年，改置于江浦县西。

临沂城 在上元县东三十八里独石山，北临大江，今摄山之西白常山即其地。晋咸康元年分江乘县置。自晋至宋，常为南琅邪郡治。齐移郡治于白下，县属焉。陈末废。按琅邪，又常治金城，见金城条。

宣武城 在上元县西北九里，宋沈庆之筑。孝武阅武于其地，亦谓武帐冈。

檀城 在上元县东四十里。《舆地志》云：在金华桥东，本谢玄别墅，太傅谢安与奕棋所胜者。宋属檀道济，故名。《建康志》云：在墅城东八里，地图谓之城子墅。今清风乡有城子村，在黄城桥之西，即其地。

白下城 在上元县西北十八里，本名白石陂。晋咸和三年，陶侃讨苏峻，从部将李根之计，筑垒于此。张敦颐《六朝事迹编类》云：白下本江乘之白石垒也，齐武帝以其地负山带江，因移南琅邪郡治焉，亦名琅邪城。唐武德九年，改金陵为白下县，移治白下故城。今靖安镇北有白下城故基，属金陵乡。胡氏《通鉴注》云：盖即金之龙湾。

同夏城 在上元县东长乐乡。《建康实录》云：梁武帝生于同夏里，大同元年置县，因城焉。胡氏《通鉴注》：梁武以三桥旧宅为光宅寺，在同夏里。

韩滉五城 唐德宗狩梁州，韩滉观察江东，乃筑石城，自京口至土山。

南唐都城 在上元县，杨吴顺义中筑。初六朝旧城在北，去秦淮五里，及徐温改筑近南。西据石头，南接长干，东至白下桥，北临珍珠河，设东西二水门，贯淮水于城中。内有子城，周西里，是为金陵府城。南唐因之建都。宋初置昇州治。陆游笔记云：李璟所作都城，高三丈，因江山为险固，濠堑重复，可坚守。至绍兴间已二

百余年，所损不及十之一。

旧紫金城 在上元县，明都城东偏，当钟山之阳。去宋元东城外二里，其西安门以北宫墙，即都城故址，东出青溪桥处也。皇城前与正阳门对，曰洪武门。内承天门、端门，左东长安门，右西长安门。承天门之前东近北曰东华门。内东上南门，东上北门。西近北曰西华门。内西上南门，西上北门。北曰玄武门。内北上东门，北上西门。近子城东曰左阙门，西曰右阙门。大内六门：正中曰午门，左曰左掖，右曰右掖，东曰东安，西曰西安，北曰北安午门内曰奉天门。左小门曰东角，右小门曰西角，东西隅有东西角楼。东角南曰左顺，西角南曰右顺。清圣祖有御制金陵旧紫金城怀古诗。附：明郑晋恭跋《第一林泉》后：嘉靖乙巳年闰正月二十四日，户部湖广司郎中臣郑普、兵部车驾司郎中臣程秀民、户部云南司郎中臣张邦瑞，以部命赴内科填销出入之数。其日天和景晴，相与循宫墙，望旧阙苑林花园者，我太祖高皇帝时游息之所也。内宫监太监张宣适率人扫除其中，因得入观之：修竹千竿，老树百余本，土山一堆，环湖石数层，上有御亭一屋，仅数楹，旁立“第一林泉”一石。又一石刻“龙穴”二小字，中有龙形。无奇花怪石、崇台、深沼以为乐。因慨然有感于吾高皇之垂训立国，其俭质类如此。乃因张宣幕刷一幅，置之静斋，使穷邑委巷之人或得与观之，庶知我国家所以长久者，固有在也。臣普谨题。按苑外花园郡志失载，今据此文，当在旧紫禁城内，然遗迹不可考矣。存此文，以志明太祖之俭质云。

建康府治 在上元县，即南唐都城内子城也。《金陵古今图考》云：宋开宝八年复昇州，仍以宫为州治。天禧二年，升江宁府，封寿春郡王为昇王，建康军节度使。建炎三年，改为建康府。绍兴三年，徙府治于东锦绣坊。

行御史台治 在上元县大中街北。宋初为转运司署。绍兴三年，改为建康府治。元至元二十三年，为行御史台治。明太祖入金陵，建军府于此，后为吴王宫。东沿青溪，西接古御街，后阻内桥东虹旧渚。皇城既建，遂称此为旧内，今独存周垣。

阳都废县 在上元县故临沂境，东晋侨置。宋大明中省入临沂，又即邱废县亦晋侨置，宋元嘉中省入阳都。《南史》云：齐高帝曾祖俊为即邱令，即此。

晋太社太稷坛

在上元县古都城宣阳门外，晋元帝立。《金陵志》云：在旧江宁县东二里。

晋北郊坛 在上元县城北。《宋礼志》云：晋成帝立，在覆舟山南。太祖以其地为乐游苑，移于西。后以其地为北湖，又移于湖塘西北。其地卑湿，又移于白石村东。其地又为湖，乃移于钟山北东道，西与南郊相置。后罢白石东湖，北郊复旧处。

宋耕坛 在上元县东郊十五里。宋元嘉二十年，度宫之辰地八里之外，整置千亩，

开阡陌，立先农坛、御耕坛。梁普通三年，移藉田于建康，北岸别有祈年殿。

明天地坛 在上元县洪武门外。明《洪武京城图志》云：太祖以王者父天母地，无异祀理，乃建坛于此，合而祀之。坛制辟四门，缭朱垣，内复为垣，围列坛中。上为大祀殿，前为斋宫。今废。

吴太初宫 在上元县，即孙策故府。《江表传》云：吴赤乌十年，诏以建业宫材柱细小，徙武昌宫材瓦，更缮治之，名曰太初宫。晋渡江，即以此为府舍，即位称建邺宫。

吴昭明宫 在上元县。后主甘露二年六月，起新宫于太初宫东。大开苑囿，起土山，作楼观，饰以珠玉。又凿城北渠，引后湖水流入宫内，巡绕堂殿，穷极伎巧。有赤乌殿，吴主亲见赤乌，遂改元，因以名殿。

吴南宫 在上元县，旧江宁县治北二里。吴太子宫，宋置欣乐宫，即此地。旧《通志》云在台城南。

晋永安宫 在上元县，吴东宫也。《宫苑纪》云：在台城东华门外。安帝立，何皇后居此，谓之永安宫。桓玄拆其材木入西宫，以其地为射圃。

晋建康宫 在上元县台城。晋咸和七年宫成，名曰建康，亦曰新宫。

宋亲蚕宫 在上元县台城西白石垒。宋大明三年，立皇后亲蚕宫于西郊。《上元县志》云在钟山乡阁婆寺前纱市。

宋未央宫 在上元县。景和元年，以东府城为未央宫，石头城为长乐宫，北邸为建章宫，南长杨宫。

齐青溪宫 在上元县东二里。《齐武帝纪》云：宋元嘉十七年生于建康青溪宅，永明元年筑青溪旧宫，即故宅也，遗址仅存。

梁金华宫 在上元县青溪东，去台城三里，大同中筑。《陆襄传》云：昭明太子蔡妃所居，以襄为家令，知金华宫事。

陈安德宫 在上元县城南。《建康志》云：在宣阳门外直西，即都城西南角。宣帝为文帝皇后筑。隋平陈，移江宁县治于此。明年复罢，中有池，人谓安德宫池。

南唐宫 在上元县内桥北。宋为建康府治。高宗绍兴二年，修为行宫。元至元五年，拆故宫材木输之大都，遗址仅存。

明故宫 在上元县旧紫禁城内，正值古燕雀湖之地。左顺门内殿曰文华，右顺门内殿曰武英。奉天门内大殿为奉天殿，东曰文楼，西曰武楼。大殿左为中左门，右为中右门，后为华盖殿，后谨身殿。殿后乾清宫，宫后坤宁宫。宫左右二殿曰柔仪，曰春和，清圣祖有御制再过明故宫诗。

晋太极殿 在上元县建康宫内，正殿也。晋初造，以十二间，象十二月。至梁武帝，改置十三间，以象闰。山谦之《丹阳记》云：太极殿，周制路寝，秦汉曰前殿。徐广《晋记》云：谢安作新宫，造太极殿，缺一梁，忽有梅木流至石头城下，因取为梁。殿成，画梅花于其上，以表嘉瑞。附：陈徐陵《太极殿铭》并序：夫紫盖黄旗，扬都之王气长久。虎踞龙蟠，金陵之地体贞固。天居爽垲，太寝尊严，高应端门，仰模营室，归于有德。譬彼河图，传我休明，义同商鼎。太极殿者，法亘象元，王者之位以尊。左平右城，天子之堂为贵。往朝煨烬，多历年所，世道隆平，宜其修复。监军邹子度故称，即日忽有一大樟木从流来泊，在后渚岸，嵯峨容与，若汉水之仙槎，摇漾波涛，似新亭之龙刹。孤拔灵山，允彰天贶。昔梁氏承圣，将图缮修，定之方中，亟兴师旅。揆之以日，辄有灾故。是知秦人所止，实高祖而为宫。吴都佳气，乃元皇而斯宅。千栌赫弈，万拱峻赠。植缘芰而动微风，舒丹莲而制流火。甘泉远望，观正殿之峥嵘。函谷遥看，美皇居之佳丽。信可以齐三光而示宇宙，会万国而朝诸侯。爰命微臣乃为铭曰：雍畴相望，参差未央。偃仰回顾，崔巍德扬。高扞太乙，正睹瑶光。峨峨灵柱，赫赫流樟。美矣宫室，嘉哉今日。御康垂旒，当朝靖蹕。乐备韶夏，礼兼文质。帝旅无喧，王旗斯谧。肃肃卿士，邕邕丞弼。汉座雕屏，周人槛楹。城隅有勒，殿省皆铭。况复皇寝，宜昭国经。方流典训，永树天廷。沈炯《太极殿铭》并序：臣闻在天成象，紫宫所以昭著。在地成形，赤县居其区宇。太极殿者，资两仪之意焉。大壮显其全模，土圭测其正景。周曰路寝，汉称前殿。虽名号参差，其实一也。主匕未明求衣，日旰忘食。隳乐坏礼，造次留稗，汉陛秦除，莫不葺复。而此殿兴造，累岁未成。外遘戎祝，内忧民力，劬劳深虑，荏苒移时。至陈永定，六合既清，五礼稍备，雕楹玉鸟、华棖壁珰，揆之有日。而犹一柱，梗楠豫章，地沦外寇，楚材晋用，非复我求。既而新亭前江有流查甚壮，盘根错节，枝叶葱蒨，津人以闻，正堪时用。于是将作受诏，各官奉职，百工并作。屡降乘舆，匠石磨砻，必经天旨。俭而不固，泰而不奢，亿兆填填而乐成也。曾未数旬，焕然云构。昔晋朝缮造，文杏有阙，梅梁瑞至，画以梅花。自是迄今又获神物，即樟树焉。殿之某间即某柱是也。铭曰：轩辕狭堂，夏后卑宫。文来质往，蹇产弥崇。体制八都，开兹万户。灼烁雄梁，徘徊大庑，璧宵悬卿云昼聚，岂伊闾阳飞来应柱。嘉辰令月，新寝告成。青槐赤棘，郎将司兵，翠被负康，百辟公卿。钟鼓八佾，箫韶九成。庸臣再拜，天子万龄。

清暑殿 在上元县台城内，晋孝武帝造。殿前重楼复道，通华林园，爽垲奇丽，虽暑月常有清风，因以为名。宋大明五年，鸱尾中生嘉禾，一株五茎，遂改为嘉禾殿。

宋玉烛殿、灵和殿

在上元县台城内，皆宋孝武帝造。又有含章殿，即寿阳公主梅花黠额处。

紫极殿 在上元县，宋明帝造。珠帘绮柱，江左所未有。

齐风华殿、寿昌殿、灵曜殿 在上元县，皆齐内殿。《齐书》云：永明十一年，武帝诏，谓此三殿皆亲制，得奢俭之中，谨勿坏去。

神仙殿、永寿殿、王寿殿

在上元县。齐永元中，别为三殿，以居潘妃，即凿金莲花贴地处。

梁重云殿 在上元县，梁武帝建于华林园。《隋志》云：殿前置铜浑仪，是刘曜光初六年孔廷所造，何承天以为张衡所造。

五明殿 在上元县台城内。梁武帝时，有四人来建康里，鹑衣蹑履，貌可七十已，经年无人识者。帝召人仪贤堂，始汤沐，解御服衣之。昭明一见如故旧，曰为四公子，帝更加重焉，移入五明殿。大同末，魏崔敏来聘，敏博瞻儒释，知天文医术，帝选十人于此殿推论三教、百家、六籍、五运九十余日。敏丧神呕血归，未及竟而卒。《事类记》云：四人姓名蜀闾、杰、越、仇，难敏者仇也。

披香殿

在上元县台城内。庾子山赋“宜春苑中春已归，披香殿里著春衣”，指此。

光华殿 在上元县台城。梁武帝大通中，施与草堂寺，取珠贝直百万，以其地起重阁。又有宝云、惠输二殿，武帝皆以施寺。

陈求贤殿 在上元县台城内，陈建，后主沈皇后所居。

铜螭署 在上元县台城。铜螭本洛阳故物，晋平姚秦迁此。

龙首仓 在上元县石头城，亦谓之石头津仓。《金陵记》云：吴置仓城在苑城中，亦曰苑仓，即东晋以后之太仓。

通天观 在上元县华林园。《金陵故事》云：晋孝武帝讲《孝经》于此，仆射谢安侍坐，尚书陆纳侍讲，黄门侍郎谢石、吏部侍郎袁宏执经，丹阳尹王琨读句，论者荣之。宋元嘉中重建。

元风观 在上元县旧都城宣阳门外，东晋建武元年建。

迎风观 在上元县建康宫西。宋孝武大明年建玄武观在上元县玄武湖上，宋时建。陈江总有玄武观待宴。

齐云观 在上元县台城内，陈建。后主令采木湘州，拟造正寝，行至牛渚硖尽歿。既而渔人见于海上，复起齐云观。

落星楼 在上元县东北古临沂县前。吴时山上置三层楼，桢高故以此名。有星落墩，即建楼处。《吴都赋》注云：楼在建邺东北十里。

烽火楼 在上元县石头城西南最高处。晋温峤入讨苏峻，直指石头，峻登烽火楼，望见军容有惧色，谓左右曰：吾本知温峤能得众也。

入汉楼 在上元县。晋义熙八年，于石头城南起高楼，加累入于云霄，连堞带于积水，名曰入汉楼。

景阳楼 在上元县，宋精锐中军寨内。元嘉二十二年，修广华林园，筑景阳山，始造景阳楼。大明元年，楼出紫云，状如烟，诏改为变云楼。《宫苑记》云：齐武帝置钟景阳楼，宫人闻钟声并起妆饰。

青漆楼 在上元县台城。《齐书》云：世祖兴光楼上施青漆，时人谓之青漆楼。

朝日、夕月二楼 在上元县华林园内。梁武帝于景阳山东起通天观，观前又起重阁，上曰重云殿，下曰光严殿，前当阶起二楼，左曰朝日，右曰夕月，阶道绕楼数转。

观稼楼 在上元县城东二十五里，梁武帝建。

百尺楼 在上元县。南唐《宫类说》云：唐主于宫中作高楼，召群臣观之，众皆叹美。萧俨曰：恨楼下无井耳。唐主问其故，对曰：以此不及景阳楼。

阅江楼 在上元县。明太祖欲建此楼于狮子山，已而不果，自为之记。附明太祖《阅江楼记》：朕闻昔圣君建造，必询于贤而后兴。噫，圣人之心幽哉！朕尝存之于心，虽万千之学犹不能仿。今年役囚者，建阅江楼于狮子山，自谋将兴，朝无人谏者。抵期而上天垂象，责朕以不急。即日惶惧，乃罢其工。试令诸职事妄为《阅江楼记》，以试其人。及至以记来献，节奏虽有不同，大意比比皆然，终无超者。朕特假为臣言而自尊，不觉迷而满章，故序云：洪武七年二月二十一日，皇帝坐东皇阁，询臣某曰：就城西北龙湾狮子山扼险而拒势，朕欲作楼以壮之，雄伏遐迩，名曰“阅江楼”。虽楼未造而先为之记。臣某谨拜稽首而言曰：臣闻古人之君天下，作宫室以居之，深高城隍以防之，此王公设险之当为，非有益而不兴。土阶三尺，

茅茨不翦，诚可信也。皇帝神谋妙算，人固弗及，乃有狮子山扼险拒势之地。将欲命工，臣请较之而后举。且金陵之形势岂不为华夏之魁。何以见之？昔孙吴居此而有南土，虽奸操忠亮卒不能擅取者，一由长江之天堑，次由权德以沾民。当是时宇内三分，劲敌岂小小哉，犹不能侵江左，岂假阅江楼之拒势乎？今也皇上声教远被遐荒，守在四方，道布天下，民情效顺，险已固矣，又何假阅江楼之高扼险而拒势欤？夫宫室之广，台榭之兴，不急之务，土木之工，圣君之所不为。皇上拨乱反正，新造之国，为民父母，协和万邦，彼愚夫愚妇无有谤者，实臣之愿也。臣虽违命，文不记楼，安得不拜手稽首，以歌陛下纳臣款而敛兴造，息元元于市乡。乃为歌曰：“天连循环，百物贞颁，真人立命，四海咸安。臣歌圣德，齿豁鬓斑，亿万斯年，君寿南山。”宋濂《阅江楼记》：金陵为帝王之州，自六朝迄于南唐，类皆偏据一方，无以应山川之王气。逮我皇帝定鼎于兹，始足以当之。由是声教所暨，罔间朔南，存神穆清，与天同体。虽一豫一游，亦可为天下后世法。京城之西北有狮子山，自卢龙蜿蜒而来，长江如虹，蟠绕其下。上以其地雄胜，诏建楼于巔，与民同游观之乐，遂赐嘉名为“阅江”云。登览之顷，万象森列，千载之秘，一旦轩露，岂非天造地设，以俟大一统之君而开千万世之伟观者欤！当风日清美，法驾幸临，升其崇椒，凭栏遥瞩，必悠然而动遐思。见江汉之朝宗，诸侯之述职，城池之高深，关扼之严固，必曰：此朕栉风沐雨，战胜攻取之所取也。中夏之广，益思有以保之。见波涛之浩荡，风帆之上下，番舶接踵而来廷，蛮琛联肩而入贡，必曰：此朕德绥威服，覃及内外之所及也。四夷之远，益思有以柔之。见两岸之间，四郊之上，耕人有炙肤皲足之烦，农女有采桑行馐之勤，此朕拔诸水火而登之衽席者也。万方之民，益思有以安之。触类而推，不一而足。臣知斯楼之建，皇上所以发舒精神，因物兴感，无不寓其致治之思，奚止阅夫长江而已哉！彼临春结绮，非不华矣，齐云落星，非不高矣，不过乐管弦之淫响，藏燕赵之艳姬，一旋踵间而感慨系之矣。臣不知其为何说也。虽然，长江发源岷山，委蛇七千余里而始入海，白涌碧翻。六朝之时，往往以之为天堑。今则南北一家，视为安流，无所事乎战争矣。然则果谁乏力欤。逢掖之士有登斯楼而阅斯江者，当思圣德如天，荡荡难名，与神禹疏凿之功，同一罔极。忠臣报上之心，其有不油然而生耶？臣不敏，奉旨撰记，故上推宵旰图治之功者，勤诸贞珉，他若流连光景之辞，皆略而不陈惧褻也。

延祚阁 在上元县冶城后冈上。宋太始中建延祚寺，因以名阁。

三阁 在上元县台城。陈至德二年建，曰临春、曰结绮、曰望仙。在华林园光昭殿前，高数十丈并数十间，窗牖、户壁、栏楹之类皆沉檀为之。又饰以金玉，间以珠翠，外施珠帘，内设宝帐。阁下积为山，引水为池，植以奇树，杂以花药。

涵虚阁 在上元县，南唐建于后湖，即凭虚阁，金陵四十景曰“凭虚听雨”。

青溪阁 在上元县东北青溪上。本梁江总故宅，宋为段约之宅。有亭曰“割青”。

征虏亭 在上元县。《丹阳记》云：太元中，谢安为征虏将军，立此亭故名。胡氏《通鉴注》：在方山南，自玄武湖头大路东出征虏亭。《建康志》谓在石头坞东。误。

甘露寺 在上元县城北五里钟山乡。陈太建七年闰九月，甘露降于乐游苑，诏于苑内覆舟山立亭。《舆地志》云：宋元嘉中，移晋北郊坛出外，以其地为北苑。更造楼观于覆舟山上。陈天嘉中，更加修葺，立甘露寺。

白下亭 在上元县，驿亭也。唐李白诗“五月金陵西，祖余白下亭”。宋王安石诗“门前秋水可扬舲，有意西寻白下亭”。是亭在府西也。安石诗又有“东门白下亭，摧辔蔓寒葩”之句。似又在府东，意驿亭钱送，东西各有亭耳。

翠微亭 在上元县清凉山巅。南唐时建，宋乾道间毁，绍熙中复建，淳祐己酉陈绮兴而大之。遗址如砥。

不受暑亭 在上元县清凉寺后。南唐避暑宫内有是亭，宋马光祖重建。

红罗亭 在上元县，《古今诗话》云南唐后主建。四面栽红梅，作艳曲歌之。景定志作罗江亭。

望湖亭 在上元县鸡笼山上，南唐时建，遗址存。

金山亭 在上元县宋行宫内，苏颂重建。王安石《怀府园》诗有“常忆小金山下路，绿荷深处见游鑿”之句。

忠孝亭 在上元县冶城卞壺墓侧。南唐即其基作“忠贞”亭。宋庆历三年，叶清臣以其父忠子孝，改为“忠孝”亭。

半山亭 在上元县城北宋王安石故园。元丰七年，安石请舍宅为寺，宋神宗赐额“报宁”。亭因距钟山主峰七里，距南唐城东门亦七里故名。

此君亭 在上元县华藏寺，宋王安石与弟咏竹于此。

郭文举书台 在上元县。《宋志》云：天庆太乙殿即文举读书处。《金陵故事》谓文举为王导所重，筑台于冶城以处之。

望耕台 在上元县白上村。宋文帝尝登此台，以观公卿亲推之礼。

日观台 在上元台城内。《祥符图经》云：宋司天台也。

通天台 在上元县台城内，宋大明七年建。

昭明书台

在上元县有二：一在钟山定林寺后北亭峰上，亦名太子岩；一在湖熟镇。

独足台 在上元县旧宫城内。陈后主时有一鸟独足上台，以喙画地。书云“独足上高台，茂草化为灰。欲知我家处，朱门傍水开”。后迁洛阳，果赐第水旁。

南唐月台 在上元县子城东北。南唐李氏因城作台望月，人呼为月台。

观象台 在上元县鸡鸣山之巔。元至正元年建，明改为钦天台。山侧有北极阁，清康熙二十三年圣祖南巡御书“旷观”二字，建亭勒石。三十八年，赐御书“欣然有得”四字额。又御书阴长生诗，临宋臣米芾帖刻石。

中堂 在上元县古都城宣阳门外，或谓之南皇堂。六朝时，建康有警，多以亲贵出顿中堂。《晋纪》云：孝武以太学在秦淮南，去台城悬远，权以中堂为太学释奠。《金陵志》云：吴建中堂，每岁暮习元会议于此。

仪贤堂 在上元县宣阳门内，吴建。本名延贤堂，宋元嘉三年帝临听讼，自是每岁三讯，皆以此堂，因名听讼堂。梁天监六年，改名仪贤，察孝廉秀士于此。

乐贤堂 在上元县台城内，晋肃宗为太子时建。

宣猷堂 在上元县，晋置。后在梁东宫，《梁纪》云：修饰国学，增广生员，立五馆，置五经博士，皇太子宣城王亦于是堂读释老。《萧子显传》云：谢朓出守建安，于宣猷堂宴饯赋诗，用十五剧部。《陈姚察传》云：察年十三即引于宣猷堂听讲论难，为儒者所称。

武帐堂 在上元县幕府山武帐岗上。宋文帝建，元嘉二十一年，宴于此堂，将行，敕诸子且勿食，至会所赐饌。日旰，食不至，皆有饥色。上曰：汝曹少长丰逸，不见百姓艰难，今使汝曹识有饥苦，知以节俭期物。

澄心堂 在上元县南唐宫左，后主建，为藏书撰述之所也。后主有巧思，制澄心堂纸，时甚珍之。

有美堂 在上元县宋行宫内，旧为府治。

周颐草堂 在上元县钟山北，颐隐居之所。后出为海盐令，舍宅为草堂寺。孔德璋作《北山移文》。

郑侠读书堂 在上元县清凉寺。侠随父宦江宁，读书于此。惟冬至元日归省，有“漏随书卷尽，春逐酒瓶开”之句，王安石深赏之。

戏彩堂 在上元县转连司堂后。宋喜定八年，真德秀葺而名之。马光祖、王野皆公门下士，宝祐中，同持节于此，新其堂，刻石识之。

清如堂

在上元县青溪绿波桥北，马光祖建。取“御翰中一清如水”之语名之，梁椅为记。

大本堂 在上元县，明洪武初为太子诸王授经之所。延四方耆儒于其中，公侯子弟皆就学也。

是仪宅 在上元县台城西。《吴志》云：仪为人俭约，不治产，宅甚卑陋。邻家起大屋，大帝望见，问左右，以仪家对。大帝曰：仪俭必非，及问，果他宅，其见信如此。

陶璜宅 在上元县石头坞，其地名陶家渚。

王导宅 在上元县乌衣巷，南临骠骑航。晋江左初立，琅邪诸工居乌衣巷。导使郭璞筮之，云：吉，无不利，子孙繁衍。

郗鉴宅 在上元县青溪上。

谢玄宅 在上元县土山。地名康乐坊，旁有谢玄走马路。

杜姥宅 在上元县城南掖门外。晋成帝杜后母裴氏立第于此，世谓杜姥宅。

宋明帝旧宅 在上元县青溪中桥北，后改为湘宫寺。

建平王刘宏宅

在上元县鸡笼山。宏笃好文籍，文帝宠爱殊常，为立第，尽山水之美。

檀道济宅 在上元县青溪。

谢灵运宅 在上元县康乐坊故居，灵运有还故园诗。

刘面力宅 在上元县钟山蒋庙东北，名东山园。《南史》云：面力经始钟岭之南，以为栖息。聚石蓄水，仿佛邱中，朝士雅素者多往游之。

齐竟陵王萧子良宅，在上元县钟山西，子良有行宅诗。

刘宅 在上元县青龙山之前，《南史》云：宅近檀桥，瓦屋数间，上皆穿漏，学徒敬慕，不敢指斥，呼为青溪。竟陵王子良表武帝为立馆，以檀桥地给之。

明僧绍宅 在上元县摄山。齐永明七年，僧绍舍宅为寺，即今栖霞寺。

梁武帝旧宅 在上元县城东十五里长乐乡。《南史》云：帝以宋大明元年，生于秣陵同夏里三桥宅，后舍故宅为光宅寺。

沈约宅 在上元县钟山之麓，名东田。《南史》云：约迁尚书令，名誉虽隆重，而居处俭素，立宅东田，尝为《郊居赋》。

伏挺宅

在上元县城东北。《南史》云：居宅在潮沟，于宅讲《论语》，听者满朝。

韦载宅 在上元县治实山下，《南史》云载于江乘县之北筑室，屏绝人事，不出篱门者十载。

江总宅 在上元县青溪侧，相传鹫峰寺即其故址。《金陵故事》云：南朝鼎族多夹青溪，江令宅尤占胜地，宋时为段约宅。

孙场宅 在上元县青溪，其西即江总宅。《南史》云：场家穿筑，极林泉之美。宾客填门，轩盖不绝，后主频幸其宅。

王昌龄宅 在上元青溪。

冷朝阳宅 在上元县白下门外，韩翃有送朝阳还宅诗。

顾况宅 在上元县。皇甫湜《顾况集序》云：以文人仕，佐作，为众所排。起屋茅山，飘然若将续古之仙，以寿终。庆元志云：顾著作山房在葛蒲潭。

宋齐邱宅 在上元县古国子监巷。

南唐李建勋宅

上元县青溪上。建勋有草堂闲兴诗，赐号钟山公。妻德长公主，亦自号钟山老媪。

徐铉宅 在上元县。《舆地纪胜》云：在栖霞寺西，园池甚盛，中有来贤亭。今陶庄即其地，宋裴迪有“结亭意在留贤者，谁慕清风为驻留”之句。

杨德逢宅 在上元县城东北隅，德逢号湖隐先生。

蔡宽夫宅 在上元县青溪，宋贡院基是其地。《南窗记谈》云：宽夫治地青溪南，疏地深数尺见釜镬交错仆压，知为前代人居也。

招隐馆 在上元县草堂寺侧，宋为雷次宗筑。

商飏馆 在上元县蒋祠西南，去城十五里。一名九日台。齐武帝永明五年九日，出商飏馆登高以宴群臣。

士林馆 在上元县台城西，梁武帝建。《梁书·张绾传》云：城西开士林馆，聚学者，绾与石衡、朱异、太府卿贺琛递述制旨《礼记》《中庸》义。

青溪小姑沉水处 旧有祠，在金陵闸。相传汉秣陵尉蒋子文遇难，小姑挟二女投青溪死，明万历间改为节烈祠。小姑，蒋侯第三妹也。

昭文斋 在上元县钟山，王安石读书定林庵，米芾榜其斋曰“昭文”。

高斋 在上元县宋行宫内，叶清臣建。

书斋 在上元县东北钟山楼下，马光祖命周应合修志处。有学斋在其中。

箴笼轩 在上元县城西北铁塔寺王安石读书处。

桂林苑 在上元县北落星山之阳。《吴都赋》云：数军实于桂林之苑。

别苑 在上元县冶城。一名西园，晋王导移冶出石头，以其地为西园，成帝幸司徒府西园，即此。

太元中立寺 以冶城为名。元兴三年，桓玄以寺为别苑。

乐游苑 在上元县城东北八里，晋之芍药园也。义熙中，刘裕筑垒即此处。宋元嘉中，为乐游苑。《太平寰宇记》云：在覆舟山南。

上林苑 在上元县鸡笼山东归善寺后。宋大明三年筑，初名西苑，梁改为上林。其地有古池，俗呼为马塘，亦曰饮马池。其西有望宫台。

青林苑 在上元县篱门亭，路枕后湖。

芳林苑 在上元县古湘宫寺前。《太平寰宇记》云：亦名桃花苑，齐高帝改青溪宫为之。永明五年，禊饮于此。王融《曲水诗序》云：载怀平浦乃眷芳林。谓此。

方山苑 在上元县方山侧湖熟西北。方山顶四方，上有池水，齐武帝于此筑苑焉。

芳乐苑 在上元县建康子城北，南齐筑。

博望苑 在上元县城东，齐文惠太子所立。沈约《郊居赋》云：昔储王之旧苑，实博望之余基。

北苑 在上元县城北，南唐筑。徐铉、徐锴、汤悦皆有《北苑侍宴诗》。

谢公墅 在上元县土山，唐温庭筠有《谢公野歌》。

王骞墅 在上元县钟山。《南史》云：骞有墅八十余顷，与诸宅及故旧共佃之，尝谓人曰：我不如郑公业，有田四百顷而食不周，以此为愧。

华林园 在上元县台城内，本吴旧宫苑。中有天渊池。《世说新语》云：晋简文帝在华林园谓左右曰，会心处不必在远，翛然林木便有濠濮间趣，觉鸟兽禽鱼自来相亲。

东篱门园 在上元县东府篱门内，即乌榜村何居东篱门园。豫章何疑命驾造园，从后门避、去。竟陵王子良闻之曰：豫章王尚望尘莫及，吾当望岫息心。园有卞忠贞冢，点置花冢侧，每饮必举酒酌之。

沈约郊园 在上元县钟山下。约有憩郊园与谢朓唱和诸诗。

古东园 在上元县东冶亭侧。面东有堂，一曰钟山，以尽得钟山之胜。有亭二，南曰“见墩”，见谢安旧墩也。北曰“草移”，取孔德璋《北山移文》也。宋乾道五年，与东亭并创。

养种园 在上元县城东。宋南渡为行宫，养种花木于内，中有姬春堂、玉雪堂、清华堂。又有亭二，曰“怀洛”，曰“芳润”。

玄圃 在上元县台城北，齐文惠太子筑。《舆地志》云：圃内有明月观、宛转廊、徘徊桥。《梁书》云：昭明太子立馆于圃，以延朝士。番禺侯轨盛称宜奏女乐，太子不答，惟咏左思《招隐诗》“何必丝与竹，山水有清音”，轨大惭。

青溪园亭 在上元县旧治。溪西自百花洲入，临水小亭曰放船。入门有四望亭，榜

曰“天开图画”。环以四亭，曰“玲珑池”、曰“玻璃顷”、曰“金碧堆”、曰“锦绣段”。其东有桥，曰“镜中桥”。东为青溪庄，南有万柳堤，榜曰“溪光山色”。北有亭临水，曰“撑绿”。其径前曰“添竹”、后曰“香远”。尚友堂西扁曰“香世界”。先贤祠之东有亭，曰“花神仙”。清如堂南绿波桥，西有亭曰“众芳”、曰“爱青”，其东又曰“割青”。青溪阁之南、清风关之北有桥，曰“望花随柳”。其中有亭曰“心乐”，其前曰“一川风月”。自清风关东折而北，亭出溪东二，曰“看竹”、曰“苍雪”。其后则为静庵，庵后有石亭，曰“最高”。山后跨梁，陟径为堂二，前曰“闲暇”、后曰“近民”。诸亭惟“割青”为旧，余皆马光祖所建。宋改清溪园为小西湖，今废。

五马渡，在上元幕府山前，晋元帝与诸王渡江处。时有五马浮渡江，一马化为龙之谣。后人建化龙亭于其地，亦名五马亭。

乌榜村 在上元县天庆观西。《庆元志》云：初立西州城未有篱门，树乌榜而已，故以名村。

射雉场 在上元县东二十里。《六朝事迹编类》云：齐置五百所，皆以七宝装翳。

燕雀湖 在上元县，《祥符图经》云：城东二里、昭明墓侧。湖周二里，流入青溪。宋元时为白荡湖，一名前湖，寻堙。相传明代宫殿正值其处。或曰故玄武门外有水一泓，其遗迹也。

覆杯池

在上元县东北台城中。晋元帝以酒废政，王导谏之，帝因覆杯池中以为戒。

善泉池 在上元县东北台城东。一名九曲池，梁昭明太子凿。芙蓉池，在上元县西，唐李德裕有《游金陵芙蓉池记》。

长命洲 在上元县石头城前。梁武帝日市鹅、鸭、鸡、豚之属放生于此，置户十家，以谷粟喂养，以洲为长命洲。

梦笔驿 在上元县东冶亭，即江淹梦还郭璞笔处。

鸡鸣埭 在上元县。《六朝事迹编类》云：齐武帝早游钟山，射雉至此，鸡始鸣。是在青溪西南。又按《齐书·裴后传》载：帝幸琅琊城事，其埭又当近北，今清化市是其处，二埭皆当时所历。

贺若弼垒 在上元县二十里。隋平陈，贺若弼过江，于蒋山龙尾筑垒。

韩擒虎垒 在上元县石头城西。有平陈碑，薛道衡作。

谢公墩 在上元县治城北二里。其形起伏曲折，实城西北胜地，相传谢安所尝登也。《吹剑录》云：荆公宅乃谢宅所居地，有谢公墩。公赋诗云：“我名公字偶相同，我宅公墩在眼中，公去我来墩属我，不应墩姓尚随公”。

邀笛步 在上元县青溪桥右。王徽之邀桓伊吹笛处。

青溪栅 在上元县城东。

藏冰井 在上元县覆舟山。《宫苑记》云：宋孝武大明中凿，上有凌室，六朝每岁藏冰于此。

龙天王井 在上元县台城前。

景阳井 在上元县景阳楼下，一名胭脂井。

应潮井 在上元县。《酉阳杂俎》云：蒋山有应潮井在半山间，俗传与江湖相应，尝有破船朽板自井中出。

元和井 在上元县郡圃，石栏刻“元和五祀”四字。

同泰寺石 在上元县台城，本梁同泰寺。杨吴顺义中，置千福院，院前有石四，各高丈余，云此陈三品石也。宋政和中，取入汴京，置延福宫，王安石为之铭。

到公石 在上元县。《庆元志》云：梁到溉家有僵石，长丈六尺，武帝命昇华林园置宴殿前。迎石之日，倾都纵观，谓之到公石。

金华石 在上元县。本金华宫中石，高九寸，引手可举，至赵宋犹存今府治。

三国吴大帝蒋陵

在上元县钟山之阳孙陵冈上。步皇后合葬于此，宣太子登亦祔葬。

晋元帝建平陵、明帝武平陵、武帝兴平陵、哀帝安平陵 皆在上元县鸡笼山。

康帝崇平陵 在上元县钟山。

穆帝永平陵 在上元县幕府山。

简文帝高平陵、孝武帝隆平陵、安帝休平陵、恭帝冲平陵 并在上元县钟山西南。

南北朝宋武帝初宁陵 在上元县钟山西南。

文帝长宁陵 在上元县钟山东南，相近初宁陵，袁皇后祔。

少帝陵 在江宁县南郊坛。

明帝高宁陵 在上元县幕府山阳。

孝武帝景宁陵 在江宁县岩山，文穆皇后祔。

太后修宁陵 在江宁县岩。

宋两废帝陵 在江宁县南郊坛西。

齐明宣沈太后陵 在上元县幕府山，俗称国婆岭。

文惠太子陵 在上元县查磬山夹石。

明钦刘皇后陵 在上元县淳化镇北。

梁昭明太子安宁陵 在上元县夹石，与齐文惠太子陵相并。

文宣阮太后陵 在江宁县通望山。

孝元帝陵 在江宁。按陈天嘉元年诏：梁孝元遭罹多难，灵柩播越，朕曾经北面有异常伦，遣使迎接，已次近路，江宁既是旧茔，宜即安卜。车旗礼章，悉用梁典，依魏楚汉献帝故事。

陈高祖万安陵 在上元县城东三十五里崇里乡，石兽二尚存，俗名石马冲。

文帝永宁陵 在上元县雁门山北。

明太祖孝陵 在上元县钟山之阳。与高皇后合葬，懿文太子之夜祔焉。清定鼎后，置守陵太监二名，兵四十名。圣祖南巡，诣陵亲祭，并书“治隆唐宋”四字勒碑，有御制《过明太祖陵有感》诗。

周越王冢 在句容县大横山下。

左伯桃、羊角哀墓 在溧水县南四十五里仪凤乡孔镇南大驿路西。(二人俱战国时燕人，同入楚。粮少，伯桃并粮与羊角哀，自入空树中饿死。哀至楚，为上大夫，言于王备礼葬之。后伯桃见梦于哀，哀开冢，从伯桃死，遂并葬焉。按战国时楚自郢迁陈，又自陈迁寿春，二人自燕往楚，不应渡江而南，此处有墓，误也。因旧志相仍，姑存而辨之。附明徐彦《古义士左伯桃、羊角哀墓赞》：羊角哀、左伯桃为死友，闻楚王贤，往见之。道遇雨雪，计不俱全，乃并衣粮与角哀，自入树中死。赞曰：生则两死，死则一生，含笑入树，何友非身。树既摧残，墓亦灭没，先生之神，独耀今昔。仰止高风，愧此隙末，予立贞珉，匪捍樵牧。)

楚项羽墓 在江浦县乌江。(按汉高祖以鲁公礼葬羽于谷城。事见《史记》，此不当有墓，因旧志相传姑存之。)

汉司徒甄邯墓 在玄武湖侧。刘宋张永开湖，遇古冢，得铜斗有柄，文帝以访何承天，曰此亡新威斗，三公亡皆赐之。一在冢内，一在冢外，后启更得一斗，有石铭“大司徒甄邯之墓”。

三国吴折冲将军甘宁墓 在上元县直渎山下。

丞相张悌墓 在江宁县板桥西。

仙翁葛元墓 在句容县西南一里。

晋荆州都督山简墓 在上元县覆舟山之阴乐游苑内。

骠骑将军温峤墓 初葬豫章，朝廷追思之，为造大墓还葬上元县幕府山阳。

尚书令卞壸墓 在上元县西。二子盼、昞祔葬。义熙间，盗伐其墓，壸鬓须苍白，面如生，手爪达手背，安帝赐钱修之。

丞相王导墓 在上元县幕府山，西对石灰山。

祭酒颜含墓 在上元县靖安里。曾孙延之铭，十四代孙真卿重书立石。

宁朔将军竺瑶墓 在张阵湖，有二碑。

司空陆玩墓 在上元县鸡笼山。给兵千人，置守冢七十家。子尚书令纳亦葬此山。一云葬吴县鸡笼山。

丹阳尹刘惔墓 在江宁县。七世孙显仕梁，为平西府谘议参军，亦祔焉。

丞相谢安墓 在江宁县南梅冈。

长史王濛墓 在江宁县高亭洁。

洗马卫玠墓 在江宁县新亭东。

句漏令葛洪墓 在句容县。

骠骑将军纪瞻墓 在句容县东南二十五里。

南北朝宋临川郡守谢灵运墓 在上元县本业寺。南唐保大中，孙喜尝建碑。

冥漠君墓 彭城王义康修东府城，得古冢，改葬东冈，命谢惠连为文祭之，不知其名遂立此号。

法曹参军谢惠连墓 在上元县宣义乡，与本业寺相近。

雍州刺史宗慆墓 在石泉里。

尚书仆射刘穆之墓 在江宁县。元嘉二十五年，车驾经穆之墓，诏致祭。

徐州刺史吉翰墓 在江宁县吉山。

齐海陵王昭文墓 沈括《梦溪笔谈》云：庆历中金陵人得方石，濯之，乃知齐海陵王墓，谢朓撰志铭并书。

居士明僧绍墓 在府东北摄山。

尚书令柳世隆墓 在上元县倪塘。世隆晓术数，于倪塘创墓，每往常坐一处，及卒墓工图墓，正取其坐处焉。

彭城郡丞刘墓 在上元县青龙山。

豫章王嶷墓、竟陵王子良墓 并在江宁县。

梁吴平忠侯景墓 在上元县花林寺。

始兴忠武王肖儋墓 在上元县黄城村。

临川靖惠王肖宏墓 在上元县北城乡。

安成康王肖秀墓 在上元县甘家巷。

建安敏侯肖正立墓 在上元县淳化镇西。

司徒王僧辩墓 在上元县方山东南。僧辩为陈高祖所害，父子七人同瘞一穴。宣帝天嘉中，故吏卫卿许亨请以家财造墓葬之。

豫州刺史裴邃墓

在上元县光宅寺西。梁大同初旱蝗，松柏尽雕，邃墓如旧，当时异之。

南康简王肖绩墓 在句容县西北十五里。

诸王侍读陶弘景墓 在句容县东南雷平山。

陈贵妃张丽华墓 在府城西南赏心亭侧。

尚书仆射周弘正墓 在句容县东三十五里。

唐颜尚书墓 在句容县后颜村。旧谓真卿墓，非也。考鲁公上世多葬金陵，延之子竣等皆历尚书。

侍郎刘太真墓 在溧水县北三十五里。

双女坟 在溧水县南旧招贤馆侧。唐溧水尉崔致远憩招贤馆中，为诗吊此坟，因感梦，知二女乃宣城张氏，天宝六年同葬此。

贞晦先生陈融墓 在六合县堂邑乡。

南唐平章事张居咏墓 在江宁县金陵乡。

中书侍郎韩熙载墓 在江宁县梅冈。

散骑常侍徐铉墓 在句容县政仁乡。

庆王弘茂墓 在高淳县南十里。弘茂元宗第二子也。

宋员外郎王益墓 在上元县钟山。益安石之父，曾巩有墓铭。

司空王安石墓

在上元县钟山半山寺后。弟秘阁校理安国、右丞安礼墓，并在江宁。

太子宾客谢涛墓 在上元县土山。

侍郎叶祖洽墓 在上元县雁门山。

都统制王德墓 在观音门外，傅雱撰碑。

待制张孝祥墓 在上元县城东北清果寺侧。孝祥侨寓建康，卒葬于此。

节度使王玮墓 在上元县棠梨山。

团练使盛新墓 在上元县武冈山。

节度使王鉴墓 在上元县竺山。

赠节度使李邕墓 在上元县青龙山。邕临江人，知真定府，金兵破城，不屈而死。

通判杨邦乂墓 在江宁县聚宝门外。绍兴中，九言撰碑。

防御使张保墓 在江宁县松林庄。

待制李琮墓 在江宁县板桥西龙口山。

通判秦钜墓 在江宁县移忠寺侧，子浚浸并祔。

先儒尹起莘墓 在江宁县印塘村。

参政魏良臣墓 在溧水县西南九十里。

尚书俞卓墓 在溧水县西琛山十五里。

明中山王徐达墓 在上元县钟山之阴。

开平王常遇春墓、岐阳王李文忠墓、东瓯王汤和墓 并在上元县钟山。

蕲国公康茂才墓 在上元县幕府山。

东邱郡侯花云墓

在上元县南五十里水桥。洪武七年，以衣冠与夫人郜氏合葬，宋濂为墓碑。

江国公吴良墓、海国公吴祜墓、滕国公顾时墓、安陆侯吴复墓、许国公王志墓、芮国公杨璟墓、汝南侯梅祖墓、静城先生陈遇墓、太常寺卿吕本墓
并在上元县钟山。

都御史丁璿墓 在上元县崇礼乡。

尚书王敞墓 在上元县土山。

尚书梁材墓 在上元县白山。

都御史金泽墓在上元县钟山冈。

尚书顾璘墓 在上元县彭城山。

侍郎李乔墓 在上元县黄练冈。

都督张可大墓 在上元县侯家塘。

太仆卿言大墓 在上元县邵村。

监丞黄居中墓 在上元县官山。

张贤妃墓 在江宁县牛首山东。高帝妃荆宪王之母，谥恭靖顺妃。

李顺妃墓 在江宁县吉山东北，亦高帝妃。

韩宪王松墓 在江宁县安德乡。高帝第二十子，俗呼韩府山。

驸马梅殷墓 在江宁县牛首山。殷汝南侯思祖从子，尚宁国公主。恭谨有谋，能骑射，为总兵官镇守淮南。靖难兵起，殷悉心防御，使人招之，割其耳鼻，令之报命。及成祖即位召至京。永乐三年为都督谭深、指挥赵曦所诬害，殷自投水死。有麾下口外人瓦刺辉发其事，成祖特命斩二人。辉即自经死，葬殷墓侧。

驸马李祺墓

在江宁县祝厘寺西南。尚临安公主。永乐初不朝，赐死江浦，后合葬于此。

驸马胡观墓 在江宁县牛首山下。尚南康公主。靖难兵起，拒战死。

驸马张麟墓 在江宁县七里铺东。尚福清公主。

驸马尹清墓 在江宁县雨花台南。尚含山公主。

驸马谢达墓 在江宁县安德乡。尚汝阳公主。

驸马沐昕墓 在江宁县泰北乡。尚常宁公主。

宁河王邓愈墓 在江宁县西山之原。

黔宁王沐英墓 在江宁县长泰北乡。

虢国公俞通海墓 在江宁县聚宝山。

越国公胡大海墓 在江宁县城南十五里。

梁国公赵德胜墓 在江宁县乌石冈。

郢国公冯国用墓 在江宁县凤西乡。

陕国公郭子兴墓 在江宁县聚宝山。

营国公郭英墓 在江宁县聚宝山。

沂国公金朝兴墓 在江宁县太平门外。

当涂县男王恺墓 在江宁县雨花台侧。

夏国公顾成墓 在江宁县安德门外普化寺北。

蔡国公徐忠墓 在江宁县城南十五里。

郢国公宋晟墓 在江宁县聚宝门外。

平江侯陈瑄墓 在江宁县大山之原。

安远侯柳升墓 在江宁县安德乡。

隆平侯张信墓 在江宁县朱门山。

忻城伯赵彝墓 在江宁县凤台门东。

瑞安侯王源墓 在江宁县聚宝门外凤台街。

丰城侯李彬墓 在江宁县吉山东南。

尚书唐铎墓 在江宁县南十五里。铎凤阳人，赐葬于此。

总制孙炎墓 在江宁县聚宝山。

太常卿杜安道墓 在江宁县安德街东。

赠高阳郡侯韩成墓 在江宁县吉山。

文学博士方孝孺墓 在江宁县聚宝山侧。孝孺磔死，都督廖镛拾遗骸葬之。见郑晓《吾学编》。或云其门人王徐辈收葬；或云土人窃葬。万历十九年，礼部主事汪应蛟、汤显祖为文立石表其墓。尚书王弘海、赵用贤竖坊祠祀之。三十三年，处士徐鲸复捐资修墓。

淳泥国王墓 在江宁县石子冈。永乐中来朝，卒，赐葬于此。

太常卿康爵墓 在江宁县新亭南。

学士张益墓 在江宁县凤西乡西库村。

尚书周瑄墓 在江宁县安德乡。

太医院使蒋用文墓 在江宁县西乡塘下山。

尚书童轩墓 在江宁县凤台冈。

尚书倪谦墓 在江宁县新亭乡。

尚书倪岳墓 在江宁县新亭乡堰墓村。

尚书唐瑄墓 在江宁县唐家山。

都御史张琮墓 在江宁县凤西乡。

尚书王以方芹墓 在江宁县白山。

侍郎俞纲墓 在江宁县聚宝门外禾山南。

尚旧翟瑄墓 在江宁县新亭乡。

都御史陈镐墓 在江宁县凤西乡。

太仆卿陈沂墓 在江宁县安德门外岔山口。

尚书吴文度墓、副都御史倾璘墓、郎中王銮墓 并在江宁县石子冈。

太仆少卿王韦墓 在江宁县吉山。

给事中鲁昂墓 在江宁县耿涧村。

佥事徐完墓 在江宁县小留山。

布政使吴彦华墓 在江宁县新亭乡。

孝子龙景华墓 在江宁县凤西乡。

御史沈越墓 在江宁县石子冈。

侍郎吴自新墓 在江宁县铜山乡。

副使顾国辅墓 在江宁县女山。

太常卿许谷墓 在江宁县安德门外。

修撰焦竑墓 在江宁县皮家库。

侍郎顾起龙墓 在江宁县云台山。

侍郎朱之蕃墓 在江宁县牛首山前。

大学士程国祥墓 在江宁县安德门外北山。

检讨汪伟墓 在江宁县射乌山，妻耿氏祔。

督学佥事王芝瑞墓 在江宁县仙鹤观侧。

侍郎殷迈墓 在江宁县湖堰村。

诸生杨希淳墓 在江宁县牛首山。

尚书曹莪墓 在句容县箭塘山。

知府李茂功墓 在句容县西门外大墅村。

尚书李思诚墓 在句容县张王庙东。

太仆寺卿张谏墓 在句容县福胙乡。

尚书齐泰墓 在溧水县青丝洞。

郎中庄录墓 在江浦县定山。

昌平伯杨洪墓 在六合县竹镇。

太常少卿黄宏墓 在六合县灵岩山。

清大学士熊赐履墓 江宁县聚宝门外。赐履孝感人。

尚书王弘祚墓 在句容县茅山。弘祚云南人。

侍郎李敬墓 在六合县龙山。

副使徐必达墓 在江宁县建业乡。

越城 在江宁县聚宝门外报恩寺西，《宫苑记》云：周元王四年，越范蠡所筑。《图经》云：城周围二里八十步，在秣陵县长干里。《建康志》：在江宁县尉廨后，遗址犹存，人呼为越台。

秣陵城 在江宁县东南五十里秦县。《建康实录》云：在故台城南八里是也。《宋书》云：本治去京邑六十里，今名故治村，即今秣陵关也。又汉有秣陵国。《汉书·王子侯表》：秣陵侯缠，江都易王子，元朔元年正月丁卯封。

白马城 在故江宁县北三十里。《金陵故事》云：吴时烽火台二所，一在石头左，一在白马城。

丹阳郡城在江宁县东南。《太平寰宇记》云：郡城在今长乐桥东一里，周一顷，有东、南、北三门。《南畿志》云：今在武定桥东南有长乐庵。盖自东城角之内外皆是郡治。

江宁故城 在江宁县西南六十里。《宋书》云：晋太康初，分秣陵立临江县。寻更名江宁，其治临江滨，南为江宁浦。隋开皇十年，移于冶城，故城始废。今有江宁县，置驿。

东府城 在江宁县旧皇城西安门外，淮青桥东，南临淮水。晋会稽王领扬州，宅在州东，故曰东府。《舆地志》云：东府城，安帝时筑。宋以后常为宰相府第，每建康有事，必置兵守，此亦谓之东城，梁末毁。陈天嘉末，徙府治府东三里齐安寺，西临淮水。

王含五城 在江宁县东南二十五里。晋太宁初，王敦党王含、钱凤自栅塘西置五城。宋大明五年，使刘延孙于五城受封版。《南畿志》云：在丹阳郡城之东。

集庆路治 即今江宁县治。《我陵古今图考》云：元至元十一年，即建康府治开省。十四年。更立建康路。十六年，徙治于西锦绣坊大军库内，后迁徙不常。睚历二年，改名集庆。附明陈沂《余陵历代互见图考》：历代城邑变置，若不可悉辨。然钟山自东北而迤邐于西南，大江自西南而环抱于东北，覆舟阻其后，聚宝当其前，青龙石碇掖其左，石头三山踞其右，秦淮横其中。考诸汉以后郡城，皆在淮水之南，六朝宫城皆在淮水之北，而近于覆舟。楚秦隋唐之城，皆在淮水西北而据于石头。杨吴以后之城，皆跨淮水之南北而近于聚宝。国朝因山距淮，尽乎四极，以是据方辨位，庶几可得矣。按六朝宫城，正门曰大司马门，南对都城之宣阳门二里，宣阳门南对朱雀门五里。台省相望为御街，朱雀门临淮水上朱雀航北。今考镇淮桥东南桐树湾，当是朱雀航所。中正街府军营内小桥，当是宣阳门处。直出北口西华门西大街，当是大司马门处。国学成贤街南口，当是宫后平昌门处。珍珠河正在宫内。成贤街外号以东、直抵西十八卫之后，当为都之北城。宋上元县西细柳营直北，当为东城。武学以北，当为西城。其规模大略可见。南唐之宫，前临内桥，东升平桥，西尽大市桥，北尽小虹桥，为子城之限。宋行宫即此内桥南直抵镇淮桥，此则南唐之御街也。志云镇淮桥即朱雀桥者，盖萧梁时移航于此，遂名。旧航之处，唐所谓长乐渡也。南渡长乐一里，抵东城角内外，皆丹阳郡城之基。又东西近倪唐。乃晋王含五城。又南，当是古扬州治清凉寺地，以至石头山脊，为楚金陵邑城。又北，为唐韩混五城。少东南，则隋蒋州城。又东则冶城，今朝天宫处。又西抵下街，有西州桥，即西州城地。唐上元县城亦是其处，皆石头之麓，相去不远。南循三山水关内下浮桥北，为赏心亭。少西，为折柳亭。出水关，中街水环绕处，当为白

鹭洲。洲之上今普惠寺，当是李白酒楼。绕南，城角高处，即升元阁旧基。稍北，高阜皆凤凰台。少西，即建初寺。寺西，即杏花村。聚宝门外为长干，向西为越城。少南为秣陵城，东南为国门。转东至通济跨城处，当为东府城。大中桥东畔为白下亭。长安街西口，当为宋永安门。北抵竹桥之侧，当为金华宫。六朝城后今国学处，为玄圃。小教场西门内，为上林苑。将台处，当为乐游苑。蒋庙之西南，当为商飏馆。西北，为亲蚕宫。此皆可因据而互见者也。

吴南郊坛 在江宁县。宋《礼志》云：孙权太元元年，祭南郊，今秣陵县南十余里郊中是也。晋氏南迁，立南郊于已地。宋大明三年，移郊北于牛头山西，在宫之午地。后以旧地为吉祥，移迁本处。梁武帝南郊坛，在今城东南，与楼湖近。

晋雩坛 在江宁县，晋穆帝永和中，立于南郊旁。天监九年移于城东藉田之域内。

陈方明坛

在江宁县娄湖侧。陈宣帝太建十年立，临坛分遣大使，颁盟誓以御周人。

晋太庙 在江宁县秦淮西，晋中宗立。宋以后仍之。《通典》谓庙门北有竹叶文石，元嘉中得之，陆澄云晋武帝郊禘石也。

宋明堂 在江宁县乐游苑南，宋大明五年立。其墙宇规制一如太庙，十有二间，以应期数。梁天监中修筑。

孙楚酒楼

在江宁县城西。《焦竑集》云：孙子荆酒楼遗址，在今石头城莫愁湖侧。

芙蓉楼 在江宁县，旧名北楼，在丹阳城北。

东南佳丽楼 在江宁县，建康志云在银行街。今县治基旧为赏心楼，宋景定元年马光祖重建，改曰东南佳丽楼。

伏龟楼 在江宁县城上东南隅。宋景定元年，马光祖增创八十八间。

层楼在

江宁县，建康志云在府治右南厢花街。宋咸淳中，万石重建，榜曰“江淮奇观”。

南楼 在江宁县城西南，近何尚之宅，即跃马。

十六楼 在江宁县。《金陵琐事》云：在城内者曰南市、曰北市，在聚宝门外之西者曰来宝，东曰重译，在瓦屑坝者曰集贤、曰乐民，在西关中街北者曰鹤鸣，在西

关中街南者曰醉仙，在西关南街者曰轻烟、曰淡粉，在西关北街者曰柳翠、曰梅妍，在石城门外者曰石城、曰讴歌，在清凉门外者曰清江、曰鼓腹。在洪武中建以为行人憩息游观之所，并以处官妓焉，今尽毁。

瓦官阁 在江宁县城西南隅瓦官寺。《舆地纪胜》谓梁所建，邵思《雁门野说》云晋哀帝时造。一说晋时陆地生莲，因掘得瓦棺，莲从僧舌底出，始建寺，遂名阁。高二百四十尺，《运历图》云瓦官寺阁西南久倾，因风自正。唐狄仁杰宴此，有“云散便凝千里望，日斜常占半城阴”之句，坐客尽惊。吴顺义中改为吴兴阁，南唐昇元初改为昇元阁。

新亭 在江宁县城南十五里。《丹阳记》云吴所立。晋隆安中，司马恢之徙创今地。《王导传》云，过江诸人，每至暇日辄相邀出新亭饮宴。宋孝武帝讨邵柳，元景将前军，潜至新亭依山筑垒。帝于新亭即帝位，改为中兴亭。

劳劳亭 在江宁县西南。按《寰宇记》，劳劳山上有亭七间，名曰新亭，吴所筑。中名临沧观，亦谓之劳城。《舆地纪胜》云：新亭在江宁十里，俯近江都，今名劳劳亭。《舆地志》云：新亭垒上有望远楼，宋时改曰临沧观，即劳劳亭故基，是新亭与劳劳亭一处。又按建康志，新亭垒在城西南十二里，垒石存其亭，乾道五年，留守史正志即故基重修。又临沧观，在今城南顾家塞大路东，据此似又是两处。

东冶亭 在江宁县。晋太元中置亭于汝南湾东南，西临淮水，为士大夫饯行之所。《南史》云，王裕之辞尚书令东归，车驾幸东冶饯送，即此。宋乾道中，史正志重建。景定中，马光祖又新之，益以知稼、瑞麦二亭。

白鹭亭 在江宁县城西。《舆地纪胜》云：赏心亭西有白鹭亭，下瞰白鹭洲。宋景定元年，马光祖重建。苏轼赠王益柔诗有“红鸾骖乘青鸾驭，却讶此洲名白鹭”之句，题名于此亭柱石。

赏心亭 在江宁县西下水门城上，下临秦淮，尽观览之胜。宋丁谓建，《方舆胜览》云，谓始典金陵，陛辞，真宗出袁安《卧雪图》付谓曰：卿到金陵，可选一绝景处张此图。谓遂张于赏心亭。景定元年亭毁，马光祖复建。又有临淮亭，亦丁谓建，后名朝宗观。

览辉亭

在江宁县凤凰台侧保宁寺后。有宋熙宁三年残碑，苏辙有《和孔武仲览辉亭诗》。

三山亭 在江宁县石城西对三山。

练光亭 在江宁县保宁寺。黄庭坚尝题云“练光亭”。极是登临胜处。

折柳亭 在江宁县赏心亭下。张咏建，为祖饯之所。

风亭 在江宁县折柳亭东，叶清臣建。咸淳乙丑，马光祖复创台，缭以花竹，游者舣舟，以为览胜处。相近有佳丽亭，马亭建。清水亭，在江宁县城南三十里。

二水亭

在江宁县下水门城上，与赏心亭相对。宋乾道五年，留守史正志因修筑城壁重建。

木龙亭

在江宁县西南七十里。旧传有香木浮水而上，士人迎之以为亭，又号木牛亭。

木末亭 在江宁县聚宝门外雨花台北梅冈之东。高出林表，旁有方孝孺祠，祠南为先生墓，北有景清祠。

周处台亭 江宁县城东南隅蟒蛇仓后，亦名子隐台。《晋书》云：处仕晋为东观左丞，曾读书于此。附宋梅挚《周孝侯台记》：府志东南有故台基，曰周处，图志亡之，都人称之。登而四望，江山表里，与陈迹概见，豁如也。按西晋史，处字子隐，义兴阳美人，弱冠好驰骋，不修细行，州里患之，自知为众所恶，慨然有改励之志。里人以三害切讽，于是射虎、斩蛟。往见陆云，具以诚告。云曰，古人学道，贵朝闻夕死，君前途尚可，第患志不立，何患不彰。遂退而向学有文，言必信，行必谨。如是期年，州府交辟，仕吴为东观左丞。吴平入洛，累迁郡太守，率有善状，擢御史中丞。凡所纠正劾，不避权贵，卒树功名，没世远耀。噫！天地至大，根一气，陶万化，未始无过。阴阳寒暑小有缪，则从而改之，卒归大顺，而况于人乎！古圣贤，本天地之性以修其性，亦未尝讳过。后之人，不独讳之而已，抑又从而文之。自底悔吝，良可嗟惜。惟子隐少而逞，长乃自悟，一旦翻然，去恶即善，遂为名世忠贤，可不重乎。则中人所稟，因物染迁，为时诖误，德有小眚，言有小疵，未甚于子隐之害于乡，而又何惮乎改为哉？余因表是台，新是堂，非止卜高明之居，夸游览之胜，而与民同乐，亦将有激于世云。

凤凰台 在江宁县保宁寺后。南宋元嘉十六年，秣陵王见三异鸟，文彩五色，众鸟附翼群集，时谓之凤。乃置凤凰里，起台于山因名。按《宫苑记》，又有凤凰楼。《金陵志》云：台与楼皆彭城王义康所建，宋淳熙中留守范成大重建，更榜曰凤凰台。

雨花台 在江宁县城南三里聚宝山上。俯瞩城阙，万家烟火，与远近云峰相乱，遥望大江如带。《方輿胜览》云：梁武帝时，云光法师讲经于此，天雨花，故名。山麓为梅冈，清圣祖有御制雨花台诗。

范蠡宅 在江宁县治长干里。《丹阳记》云，蠡居长干里古越城中。

张昭宅 在江宁县治。《丹阳记》云，大长干道西有张子布宅，对瓦官寺门，今来宾桥西南小桥即张侯桥也。

张悌宅 在城南板桥。

陆机宅 在江宁县秦淮之侧。《金陵故事》云二陆读书堂，带秦淮，屏钟山，最为幽邃。后机入洛，作《怀旧居赋》，即此。

纪瞻宅 在江宁县乌衣巷。《晋书》云。瞻厚自奉养，馆宇崇丽，园池竹石为一时之盛，元帝尝幸其宅，即进骠骑将军，即其宅为骠骑府，遂名。其府侧浮桥，曰骠骑航。

谢尚宅 在江宁府竹格渡北。永和四年，尚舍宅造庄严寺，宋改名谢镇西寺。《金陵志》云，金斗门桥北东岸是其地。

谢安宅 在江宁县乌衣巷口秦淮之南。《祥符图经》云：安居骠骑航之侧，桓玄欲以安宅为营。谢混曰，召伯之仁犹惠及甘棠，文靖之德更不保五亩宅耶？玄惭而止。

谢万宅 在江宁县长乐桥丹阳郡城旁，今桐树湾东。

吴隐之宅 在江宁县城东南五里，今双桥门内。隐之为广州刺史还，数亩小宅篱垣仄陋，内外茅堂六间，妻子不免寒露。

顾恺之宅 在江宁县瓦官寺东北。恺之建层楼作画，风雨寒暑不下笔，必天气晴朗乃登楼染毫，即去梯，妻子罕见。

何尚之宅 在江宁县南涧寺侧，城南落马涧是也。

谢几卿宅 在江宁县东南十八里古白杨巷之古井。几卿免官家居，朝中交游者载酒从之，客常满座。

沈庆之宅 在江宁县城东南十里今上方桥左右。《南史》云：庆之居清明门外，有宅四所，屋宇甚丽。又有园舍在娄湖，庆之一夜携子孙徙居之，以宅还官。悉移亲戚中表于娄湖，列门同阊焉。

萧坦之宅 在江宁县城，东傍秦淮，旧东府城之东。

王僧虔宅 在江宁县禁中里马粪巷，与乌衣子弟分枝居焉。

谢宅 在江宁县。有脚疾，角巾乘小车，就席华林园。明旦，乘舆出幸宅，宴语尽欢。请自还迎母，许之。临发，舆驾临幸，赋诗饯别。又到都，敕材官起府于旧宅。

范云宅 在江宁县城东南，临秦淮。梁何逊有《经范将军三桥故宅》诗。

到溉宅 在江宁县，东临秦淮。

伏曼容宅

在江宁县西南瓦官寺东。设高座于听事，有宾客辄升座为讲说，生徒数十百人。

张洎宅 在江宁县秦淮北岸，为南唐参政时赐第。

韩熙载宅 在江宁县城南。南唐故事云，居朱雀门外戚家山。

孙晟宅 在江宁县凤台山丁冈垅之间。韩熙载见门巷卑陋，曰：湫隘若此，岂称为相第耶？明年果拜相。

李琮宅 在江宁县江宁镇桥西。琮尝手植槐数株，至元末犹存。

陈遇宅 在江宁县。遇字中行，世居江宁，明洪武初以荐召见，询以国计，称旨。命之官，不就，帝称中行先生，尝以厩马赐归第，三幸其宅。

张益宅 在江宁县聚宝门内，正统初赐第。

倪谦宅 在江宁县铁作坊。所居列肆皆铁工，见公起，辄止之，曰：吾与汝同居为乡里，毋因吾而妨汝工。至再四，咸称公为长者。

吴澄寓宅 在府南门内篴街，旧名竹街。有江东书院，吴学庐讲学于此。

颜之推故居 在江宁县长千里颜家。（见之推《观我生赋》注）

横江馆 在江宁县赏心亭侧。马光祖创，以待四方宾客，非白诗中之横江馆也。

南轩 在江宁县保宁寺。宋张浚开府时，其子读书于保宁寺方丈小室，号南轩。真德秀建南轩先生祠于天禧寺方丈后。

南苑 在江宁县瓦官寺东北。宋明帝时，张永请南苑，即此。梁改名建兴。

娄湖苑 在江宁县新亭乡光宅寺。齐武帝永明元年，望气者言娄湖有王气，帝乃筑青溪旧宫，作娄湖苑以压之。

灵邱苑 在江宁县新林界。齐武立，梁天监中以其地为法王寺。

江潭苑 在江宁县城西南新林。梁大同九年立，亦名王游苑。

乌衣园 在江宁县城南乌衣巷之东，王谢故居也。旧有堂，额曰“来燕”。马光祖拓而新之，一时称盛。

绣春园 在江宁县旧社坛东。宋端平三年，高定子复筑，有记。

瞻园 在江宁县大功坊明魏国公徐达赐第内。西偏竹石卉木，为金陵园亭之冠。赐第之南曰“南园”。又有万竹园在城西南隅，与瓦官寺近。东园在武定桥东城下，与回光寺近，明武宗于此设钓移日。西园在城内西南，近骠骑仓，有古松高可三丈，相传宋仁宗为昇王时手植以赐陶道士者。下覆二名一曰“紫烟”，一曰“鸡冠”，宋梅挚有诗，马光祖有铭，明朱之蕃题曰“六朝松石”，未知何据。

莫愁湖园 在江宁县三山门外里许。园中有楼，徐达别业也。

同春园 在江宁县城西南隅。明王世贞《金陵诸园记》称此园与徐达园并盛。

息园 在江宁县淮清桥东北，明尚书顾璘造。有楼曰“见远”。

逸园 在江宁县驯象门街南。明太保王以旂别圃也。敞庐三楹，乃未遇时所构，及贵，不加修饰，绕以竹树而已。

市隐园 在江宁县武定桥东。明姚鸿胪元白所创。

快园 在江宁县武定桥东。明徐霖所筑。中有晚静阁，长洲文徵明书台，曰“振衣”，刻名人题咏于上。又丽藻堂，乔宇题。

括园 在江宁县大功坊东巷内。旧为徐魏公达别业，后归周亮工。堂前老栝两株，赵宦光题额。左峙一巨峰，沈周、吴宽、钱福皆有镌题。

古御街 在江宁县。吴时自宫门南出朱雀门七八里，府寺相属。晋成帝因吴苑城筑新宫，正中曰宣阳门，南对朱雀门，相去五里。夹道开御沟，植槐柳。梁武帝克齐，焚其奢淫异服六十二种于御街，人亦号为衣街。

乌衣巷 在江宁县秦淮南，近朱雀桥。晋渡，王导、谢安居此巷。时谓其弟子为乌衣诸郎，《丹阳记》云：吴时乌衣营处所。

马粪巷 在江宁县禁中里。《南史》云僧虔以来，门风多宽恕，兄弟子侄皆笃实谦和。时人号马粪诸王为长者。

朱雀航 在江宁县，晋置，即吴之南津桥也。桥在宫城朱雀门南，亦谓之南航，又曰大航。秦淮诸航，此为之最也。《舆地志》云：自石头东至运渚，总二十四航，而朱雀与竹格、骠骑、丹阳谓之四航。宁康元年，诏除丹阳、竹格等四航税是也。今聚宝门内镇淮桥，即朱雀遗址。

麾扇渡 在江宁县朱雀航之左。晋永兴中，陈敏据建业，军临大航岸，顾荣以白羽挥之，其军自溃，因以名渡。

桃叶渡在江宁县秦淮、青溪合流处。王献之爱妾名桃叶，渡名因此，今为利涉桥。

长干里 在江宁县。《舆地纪胜》云：建康南五里有山冈，其间平地，民庶杂居，有大长干、小长干、东长干并是地名。小长干在瓦官寺，西南有大江。又天禧寺在城南门外，始名长干寺，宋改名乃大长干也，今报恩寺大道。《吴都赋》延属注云：江东谓山间为干，建业之南，其地平衍，故号为长干。

新洲 在江宁县金陵乡，去城四十里。《南史》云：宋武帝微时，伐荻新洲，今薛家洲是其地。

舟子洲 在江宁县近镇淮桥。梁天监十二年，以朱雀门东北淮水纡曲，数有水患，又舟行旋冲太庙湾，乃凿通之，中央为此洲。诸郡秀士上计者，憩止于此。《金陵记》云：洲在城南隅，周围七里，当朱雀航长乐渡之间。今废。

临江驿 在江宁县北，临大江，旧县名，因以名驿。

方山埭 在江宁县东南四十五里。吴赤乌八年，使陈勋于方山立埭，号方山埭。《梁书》沈璃传云：方山埭高峻，冬月公私行侣以为艰难。帝使璃行治之，乃开四洪，断行客，就作三日立办。

南埭 在江宁县东水门。王安石赠段约诗“闻君更欲通南埭，割取钟山一半青”。正对旧青溪阁。

秦淮栅 在江宁县即栅。唐吴时夹淮置栅，梁天监中作两重栅，皆施行马。至南唐时，置栅依旧。

朱年陇 在江宁县南六十七里。年生齐末，遭乱母亡，庐墓终日负薪，有白兔紫芝生陇上，至今名其居为孝感里。

保宁古井 在江宁县东骁骑右卫仓内。深数十丈，中极宽阔，以四大铁人承之，水甘美，大旱不涸。

天禧寺义井 在江宁县南报恩寺侧。天圣中，唐文遇命寺僧可政凿。

响井 在江宁县西南陶吴镇。以纱帛蒙其上，磬之作鼓声，投以瓦砾则作钟磬声。

玉兔泉 在江宁县学宫内。宋时有人逐兔至此，掘地得泉，因名。刘基有铭。

秦淮石 在江宁县。宋太祖建国四年，改元乾德。先是浚秦淮得此石，有“大宋乾德四年”六字。考据辅公祐，此伪号。石出适值是时，人以为符谶云。

孝武路太后修宁陵 在江宁县严山孝武陵东南。

前废帝陵 在江宁县南郊坛西。

句容侯国 今隶江宁府句容县。《汉书·王方侯表》：句容哀侯党长，定王子，元光六年七月乙巳封。

竹里城 建康志云在句容县北六十里东阳镇东。齐永元二年，张佛护等拒崔慧景时所筑，胡氏《通鉴注》谓即建康竹筱镇，在行宫东北三十里许。二说不同。

东梧园宫

在句容县西。乾道志云，王别馆有梧楸成林。《古乐府》云，吴宫秋，吴王愁。

义台 在句容县西南隅唐孝子张常洵旌表之所。

易并堂 在句容县治中堂后。宋淳祐间，张榘改建冰玉轩，赵时侃为令，尝请于朝均民赋税，榘其婿也。因记曰，晋人语云：妇翁冰清，女婿玉润，非敢自谓玉润继冰清也，将以远挹前言，近瞻往行云尔。

许长史宅 在句容县雷平山西北，南有井，后为观。

大业垒 在句容县北，晋郗鉴屯京口所筑，与曲阿废号为三垒。胡氏曰大业里名在丹阳县北。

仁威垒 在句容县白羊门内。《南史》云：梁承圣初周弘让为仁威将军，城句容以居，曰仁威里。

沸井 在句容县东三十里。闻人声则沸，否则已。《异苑》所云，句容延陵季子庙前有井尝沸，是也。

陶弘景井 在句容县茅山华阳宫前。

古赖国城 在溧水县。《左传》：昭公四年，楚伐吴，围朱方，遂灭赖。楚子欲迁许于赖，使斗围龟与公子弃疾城之而还。

杜城 在溧水县南十二里，隋大业末杜伏威屯军于此。

竹城 建康志云：在溧水县东南七十里，新志谓在高淳县东六十里。今固城渡有竹城圩，未详孰是。宋周邦彦诗“竹城何檀栾，层翠分雉堞。王封尽四塹，同有岁寒节”。似因竹名城也。

二李亭 在溧水县惠政桥北。宋庐山李常父为尉时，与兄弟野夫读书所，后名双玉，今名意李亭。又怀白亭，在县城隍庙后。

寒光亭 在溧水县。下瞰梁湖。

董永读书台 在溧水县治西。

蔡邕读书台 在溧水县太虚观东北。吴顾雍传云：邕以内宠恶之，乃潜走吴会稽十二年。抱朴子云：邕到京东得《论衡》，后与诸儒论，顿异察之，见枕中秘，果异书也。

上方井 在溧水县西二十里上方寺中。上刻字，云唐贞元记。

古桂 在溧水县城东察院内。一本九干，传是六朝时所植，林古度为之赋。

古固城 在高淳县。建康志云：古固城春秋时吴筑，在今溧阳之西溧水县界，周七里余。故址尚存，亦名平陵城。新志谓在高淳县南三十里，即固城镇。《胜公庙记》谓即吴濑渚县地。

皇姥城 在高淳县东南六十里。

开化城 在高淳县南五十里。《寰宇记》云：开化城在固城东，去溧水县九十里，

即溧水旧县。

薛城 在高淳县西十五里。俗传元末有邢光辅者，筑此以御寇，明初以城来归。今遗址尚存，林木繁茂，为游览之所。

炼丹台 在高淳县东二十里谈溪渡口。旧传许旌阳炼丹处。又有茅城，在县南二十里，相传三茅炼丹处。

周瑜宅 在高淳县西二十里。周氏世居于此，以砖为垣，周一里，遗址犹存。

魏良臣宅 在高淳县东十里南塘铺。今有南塘井，其旁即宅址。

曹城 在江浦县西南三十五里，相传曹操所筑。

黄龙城 在江浦县西南六十里，和阳旧志云在乌江。山如伏龙，因城此以断脉。

临滁废郡 在江浦县，梁末置。《舆地纪胜》云：古临滁郡在清流县东南三十五里之葛城，俗呼为罗城。明初割属江浦。新志云有东西葛城，东葛城在今县西北三十五里，西葛城在县西北四十里。

项王亭 在江宁县乌江镇。附唐李德裕《项王亭赋并序》：丙辰岁孟夏，予息驾乌江，晨登荒亭，旷然远览。因睹太尉清河公刻石，美项氏之材，叹其屈于天命。且曰“困阨之时，生计非萧张所出”。予以为不然矣。自古聪明神武之主，未尝不庆天顺人以定大业。项氏纵火咸阳，失秦中之固，迁主灾裔，伤义士之心，违天违人，霸业隳矣。汉皆反是，故能成功。据秦遗业，东制区夏，数败于外，常有关中，为旧主缟素，以义动天下。虽项氏犹存，而王业基矣。若乃螳屈鸿门，龙潜天汉，始降志于一人，终伸威于四海，则萧张之计，亦不远乎？余尝论之，汉祖犹龙，项氏如虎，龙虽困而能变不测，虎虽雄而其力易摧。一神一鸷，宜乎复绝。然舡舟不渡，留骓报德，亦可谓知命矣。自汤武以干戈创业，后之英雄莫高项氏。感其伏剑此地，因作赋以吊之曰：登彼高原，徘徊始曙，尚识舡舟之岸，焉知系马之树。望牛渚以怅然，临乌江而不渡，想山川之未改，嗟斯人之何据。思项氏之人关，按秦图之割据，恃八千之剽疾，弃百二之险固，咸阳不留，王业已去，将衣锦于旧国，遂扬旌而东顾，虽未至于阴陵，谁不知其失路。耻沐猴之丑诋，乃烹韩而洩怒。谓天命之何欺，何伯王之不误。嗟乎！楚声即合，汉围已布。歌既阕而甚悲，酒盈樽而不御。当其盛也，天下侯伯，自我而宰制。及其衰也，帐中美人，寄命而无处。季数遁而不亡，羽一败而终仆，岂非独任于威力，不由于智虑？追昔四顾之下，风烟将暮，大宅雷奋，重瞳电注，叱汉千骑，如猎狐兔。谢亭长而依然，愧父兄矣不渡，即伏剑而已矣。彼群帅之犹惧，虽霸业之无成，亦终古而独步。周视陈迹，缅然如素，听乔木之悲风，感高秋之零露。因献吊于兹亭，庶神明之可遇。

张籍宅 在江浦县乌江镇。

卓锡泉 在江浦县东北二十里定山寺内。梁时僧达摩宴坐石岩，思西域水以锡，卓石遂得泉。

棠邑故城

在六合县北。春秋时楚之棠邑，汉为侯国。高祖功臣表，棠邑安侯陈婴。

吴王城 在六合县姜家渡西，吴主权分兵屯守处。

瓜步城 在六合县瓜步山侧。齐建元初，徙齐郡治瓜步，仍置临淄县为治。

胡墅城

在六合县东三十里。滨江，南对石头城。梁敬帝初，陈霸先夜袭军断其运道即此。

瓦梁城 在六合县姜家渡西瓦堰堰上，北齐瓦梁郡也，即吴王城故基。南唐时，于涂水上立东西瓦梁城。宋尝修故城，开四门。今余址尚存。

晋王城 在六合县宣化镇。隋晋王广伐陈筑此，对石头城。

盘城 在六合县盘城山侧，有宋步军司庄及寨。

方山废县 在六合县东方山下，齐周时所置。开皇四年，省方山县入六合。

魏行宫 在六合县瓜步山上，太平真君十一年建。

隋行宫 在六合县东四十里方山上。隋置方山府，曾以此为行宫。

六峰亭 在六合县南，远对定山六峰。

读书堂 在六合县横山前，世传昭明曾读书于此。

纸务 在六合县。南唐主好蜀纸，得蜀工，始行境内，惟六合之水与蜀水同，遂于扬州置纸务。今浮桥南之一带尚呼为纸坊。

第二卷 苏州府 松江府

苏州府

吴大城 今府治是。《汉书·志》云吴本国周太伯所邑，《元和郡县志》云阖闾自梅里始迁都于此。《吴地记》云寿梦始别筑城，为宫室于平门西北二里。周敬王六年，阖闾使子胥筑大城，亦曰阖闾城。城周四十七里，郭周六十八里。辟陆门八，水门八。《吴都赋》所谓通门二八水道陆衢是也。西北曰阊门，又曰昌门，亦名破楚门，伐楚出此门；西曰胥门，《吴地记》谓本伍子胥宅，因名；西南曰盘门，《吴地记》云水陆萦回，故谓之盘，又名蟠门，刻木作蟠龙以镇越；东南曰蛇门，《吴郡志》云在巳方，故名。又曰越在巳地吴作木蛇北向，示越属吴也；东曰匠门，本名干将门。《吴地记》云吴王使干将铸剑于此，后讹为匠门；又东曰娄门，《吴郡志》云秦娄县所值，又谓之醪，即今昆山也；东北曰齐门，《越绝书》曰阖闾伐齐大克，取齐女为质子，为造齐门。又《吴越春秋》云阖闾为太子波聘齐女，女少，思齐而病，乃起北门，名曰望齐；北曰平门，《吴地记》云子胥平齐，大军从此出，故名；东北三里有巫咸坟，亦曰巫门。此所谓八门也。又匠门南三里有葑门，《续图经》云当作封门，取封禺之山以为名。葑门相近有赤门，在城正南，今犹有赤门湾；又东南有鲂鳄门。此三门皆非八门之数。至宋惟存阊、胥、盘、葑、齐、娄六门，水陆共十二。淳熙后胥门水陆俱塞。元初城郭尽毁，至正中复缮完，仍辟水陆门十一，惟独胥无水门。清圣祖有御制吴阊诗、至阊门诗。隋开皇间，杨素徙于古城西南横山之东，俗所谓新郭也。唐初复故，又曰罗城，作亚字形，中有大河，三横四直。

吴小城 在长洲县。即子城，在大城内。《吴越春秋》云：子胥筑小城，周十里，不辟东门，以绝越也。《越绝书》云：小城周十二里，门三，水门二。楚封春申君于吴，因城吴故墟以为都邑。元末张士诚入据，建太尉府，后曰王府，今俗称王府基是也。

麋湖城 在长洲县北五十里，《越绝书》云阖闾所置。又巫门外有麋湖西城，越宋王城也。《吴越春秋》云平门外麋湖西城者，麋王城也。又有太公城、章祈城，并在县东北。《姑苏志》云章祈疑即，在今二十二都。

居东城

在长洲县界。《越绝书》云：阖闾所游也，去县二十里。刘昭注讹为居巢城。

鸭城 在长洲县匠门外东南二十五里沙里中。《太平寰宇记》云：吴王养鸭所也。东五里有豨巷，是畜猪之处。又东二里有豆园，吴王养马处。

摇城 在长洲县东南二十八里，吴王子居焉，后越王摇居之，今其地名大姚。

酱醋城 在长洲平门西三里，汉刘濞筑。

东宫、路西宫 在长洲县，阖闾所建。《越绝书》云：东宫周一里二百七十步，路西宫周一里二十六步。

南城营 在长洲县干将乡长乐里。

吴宫 在长洲县长洲苑东南五十里，吴王别宫也。陆龟蒙《吴宫词序》云：甫里之乡曰吴宫。今有吴宫乡。

长洲苑 在长洲县太湖北岸，阖闾游猎处，《图经》云在县西南七十里，孟康日以江水洲为苑。韦昭云在吴县东。《吴都赋》“佩长洲之茂苑”，即此。汉吴王濞嗣葺吴苑，极一时之盛。枚乘所云“上林不如长洲之苑”，是也。《元和郡县志》谓长洲县取此立名。

初阳楼 在郡治池上。唐皮日休诗“危楼新制号初阳”。

齐云楼 在郡治后子城上，即古月华楼。《吴地记》云唐曹恭王所建，白居易有《齐云楼晚望》诗。今名飞云阁。

西楼 在长洲县子城西门上，更名观风楼。白居易诗“风月万家河两岸，笙歌一曲郡西楼”。

五砚楼 在长洲枫桥袁又恺旧居。

谏草楼 在长洲县。清处士姜实节构，为其父贞毅先生塚之影堂。楼东有思敬居、改过轩、巾箱阁，为实节读书处。

竹柏楼 在长洲县枫镇西跨塘。乾隆中，袁寿阶母韩氏守节处。

劲节楼 在长洲县枫桥北。道光间，徐子云德源母陆氏守节抚孤处。

凝翠楼 在长洲县横山北西跨塘。隐士徐政与文徵明、王宠辈结吟社于此。后陈敦复新之，更名菑园。

剑楼 在长洲县石公山。一名风弄，俗称一线天。

怀劬阁 在长洲南园，清孝子丁宏度建。

池光亭 在长洲县郡宅后，即北亭，唐刺史白居易命名。《吴郡志》云：亭后有醑醢洞，郡守沈揆名之。

沧浪亭 在长洲县郡学东南，《石林诗话》云钱氏广陵王元璪别圃也。宋庆历间，苏舜钦得之，作亭曰“沧浪”。后为章惇家所有，绍兴后归韩蘄王世忠，俗名韩王园。附宋苏舜钦《沧浪亭记》：余以罪废无所归，扁舟南游旅馆于吴中，始僦舍以处。时盛夏蒸燠，土居皆褊狭不能出气，思得高爽虚辟之地，以舒所怀，不可得也。一日过郡学东，顾草树郁然，崇阜广木不类乎城中，并水得微径于杂花修竹之间。东趋数百步有弃地，纵广亘五六十寻，三面皆水也。缸之南其地益阔，旁无民居，左右皆林木，相亏蔽。访诸旧老云：钱氏有国，近戚孙承佑之池馆也。坳隆胜概，遗意尚存，余爱而徘徊，遂以钱四万得之。构亭北埼，号沧浪焉。前竹后水，水之阳又竹无穷极。澄川翠干，光影会合于户亭间，尤与风月为相宜。余时榜小舟，幅巾以往。至则洒然忘归，觴而浩歌，踞而仰笑。野老不至，鱼鸟共乐。形骸既适，则神不烦。观听无邪，则道以明。返思向之汨汨荣辱之场，日与锱铢利害相磨戛，隔此真趣不亦鄙哉！噫，人固动物，情横于内而性佚于外，寓于物而后遣，寓久则溺，以为当然。非胜是而易之，则悲而不开。惟仕宦溺人为至深，古之才哲君子，有一失而至于死者多矣，是未知所以自胜之道。余既废而获斯境，安于冲旷，不与众驱，因之复能见乎内外得失之源。浩然有得，笑傲万古，尚未能忘其所寓，故用是以为胜焉。

四照亭 在长洲县北东圃，《吴郡志》云宋王涣建。为屋四合，各植花石，随时之宜。《负暄野录》云，庆元中，赵不会客，问名亭所自，铜陵主簿姚行简对曰：《山海经》云“招摇之上其光四照”。《华严经》云“无量宝树普庄严，华焰成轮光四照”。又云“光云四照常圆满”。今四面皆花故名。赵极称赏。

秀野亭

在长洲县城北，宋侍读叶道卿所居，《吴郡志》云绍兴三十一年郡守洪遵建。

黄堂 在长洲县鸡陂之侧，《郡国志》云楚春申君子假君所建。后太守居之，数失火，涂以雄黄，遂名黄堂。天下郡治名黄堂，仿此。或曰春申君姓黄，因此得名。

木兰堂 在长洲县，又名木兰院。《岚齐录》云：唐刺史张博于堂前植木兰，花盛开宴客，陆龟蒙后至，博连浮以大白，索诗。陆云：“洞庭波浪渺无津，日日征帆送远人。”甫得二句，不觉颓然，他客莫知其旨。陆稍醒，援笔续之云：“几度木兰舟上望，不知原是此花身。”一时惊为绝唱。

双莲堂 在长洲县木兰堂东，旧芙蓉堂也。至和初，吕处约以双莲花开易名。

三贤堂 在长洲县木兰堂左。《南畿志》云：思贤亭祀韦应物、白居易、刘禹锡。

绍兴中重建，改为堂。

凝香堂 在长洲县思贤亭西。临北池，西南有章云亭，绍兴间洪遵命名。

招隐堂 在长洲县画锦坊，郡人胡元质所居谿溪堂也。对峙三石甚奇，传是镇蜀时移来之物。

三瑞堂 在长洲县枫桥，宋孝子姚淳所居。苏轼诗有“枫桥三瑞皆目见”之句。盖其先墓，有甘露、灵芝、瑞麦之异。

宋叶参少卿七桧堂

在长洲县天庆观东。叶尝守吴，既谢事，因居焉，作此堂以佚老。

中隐堂 在长洲县大酒巷。宋都官员外郎分司南京龚宗元所作，取白乐天诗句名之。与屯田员外郎程适、太子中允陈之奇日娱文酒，吴人谓之三老。又有都官书院在虎邱，为宗元读书处。

闲贵堂 在长洲县醋坊桥东。本萧氏双节堂，为周虎所得，遂易今名。后有台，环以古桂数千本，名曰凌霜。宅东有陂陀，立亭其上曰“已高”。

静乐堂 在长洲县乌鹊桥南，宋知郡孔元忠所居。有楼储书万卷，叶适以诗赠之。

五柳堂 在长洲县临顿里，宋山阴主簿胡稷言所居，陆龟蒙故址也，稷言弃官归隐于此。子峰又取“老杜宅舍如荒村”句命名“如村”。孙进士百能知江山县请老，复筑堂曰“宜休”云。

万华堂 在资寿寺后，宋蓝师稷提刑所居。植牡丹至三千株，多得洛中名品。师稷字叔诚，开封人。

顾仁效 阳山草堂 在长洲县阳山下，王文恪鳌有记。

遂仪堂

在北察院前，明曹文明妻张节妇居宅。鹿城王元懋书额，子咸阳令应表明末殉难。

聚坞草堂 在聚坞山，明蔡忠恪公懋德所构，中有赐笏楼。

南垞草堂 在尧峰胡巷南，明吴公绅所筑。

万卷堂 在长洲县带城桥南，侍郎史正志所居。

如意堂 在长洲县清嘉坊，明杜琼奉母之堂也。庭生嘉草，以如母意，故以名堂。徐有贞记之。

谢鸥草堂 在齐门外，永昌王文恪公六世孙武别业。

阳山草堂

在长洲县，去浒墅可数里。花木翳然，修竹万挺，明山人岳岱结隐其中。

冯煖宅 在长洲县弹铗巷。唐人云有坟在侧，碑刻犹存，煖即客齐孟尝君之门弹铗而歌者也。

范蠡宅 在长洲县太湖包山。任昉《述异记》云：洞庭湖上有钓洲，蠡尝乘舟至此遇风，止钓于上，刻字记焉。

皋伯通宅 在长洲县阊门内皋桥，梁鸿于庀下赁舂之所。

丁令成宅 在长洲县阳山，有丹井存焉。

顾训宅 在长洲县百口桥东。汉时人，五世同居，聚族百口，因所居名桥。

陆绩宅 在长洲县临顿里。门有巨石，绩罢郁林太守，归无所装，取石以镇。舟人慕其廉，号郁石。数传至龟蒙，世保其居。龟蒙《幽居赋》云：地接虎邱，门临鹤市。

皮日休宅 在长洲县皮市街。日休为苏州从事时所居，与陆龟蒙晨夕唱和。

琴高宅 在长洲县交让渚法海寺西。

戴颙宅 在长洲县，即今北禅寺。《姑苏志》云：唐司勋郎中陆湾尝居之，有花桥水阁，见白乐天寄冯御史诗。后为北禅寺。又皮陆北禅寺联句云“敲蒸何处避，来人戴颙宅”是也。

王珣宅 在长洲县日华里，即今景德寺。

陈之奇宅 在长洲县阊门，人呼为陈君子宅。

魏了翁宅 在长洲县南宫坊。宋端平间，都督江淮，理宗赐第吴中，复亲书“鹤山书院”四大字赐之。即今巡抚治所。

元绛宅 在长洲县带城桥东。绛尝参大政，归老于是邦，知州章岵表为袞绣坊。宋淳熙初，都丞徐本中葺居之。

郑虎臣宅 在长洲县舞鹤桥东。居第甚盛，号郑半州。宋末杀贾似道于木棉庵者。

郑所南宅 在长洲县乐桥东修坊巷。

元周上卿宅 在长洲县濂溪坊。尝作存心丹，于市南卖药，一异人过其庐，语终日，至暮留宿，时方雪积已半尺，人见其屋赫然有光赤，屋上雪独不聚，授以秘术竟委蜕云。

杨循吉宅 在长洲县南濠。致政后，居支硎山南峰，曰南峰隐居。

文徵明宅

在长洲县德爱桥，其父林所构，即停云馆也。徵明孙震孟宅，又在宝林寺东。

周顺昌宅 在长洲县阊门外林家巷。

姚希孟宅 在长洲县中街路。

顾元振元新宅 在长洲县碧凤坊。

彭仁简先生琬宅 在长洲县葑门内苏家巷西，有志矩斋。先生年七十时，所名以自励者也。子侍讲定求命工写志矩斋读尽图。南昀草堂定求所葺，曾孙兵部尚书启丰辟新第于苏家巷东。自大学士文敬公以来，世居巷西旧宅。其先世康熙中，御书唐人诗，御制至阊门作诗赐在籍侍讲。雍正中，御书“东涧野泉添碧沼，南园夜雨长秋蔬”联句赐修撰彭启丰。咸丰中，御书“其难其慎匡弼和衷”匾额，御笔山水赐大学士彭蕴章。今俱谨藏于家。

孙祭酒岳颁赐第 在长洲县竹缘桥。康熙四十一年，圣祖特敕织造大理寺卿李煦，即北新局址营建，御笔其堂曰“墨云”。

百宋一廛

在长洲县悬桥，黄主政丕烈藏书处。又有茺圃在王洗马巷，丕烈举孝廉后葺。

潘太传第 在长洲县钮家巷，即顾汾凤池园西偏。孙郎中仪凤即居宅对岸筑养园，归安吴云有记。

蜗庐 在长洲县城北，宋中书舍人程俱所居。俱政和间，自监舒州茶场上书，论时

政不合，来吴葺小屋，号“蜗庐”。

西室 在长洲县，宋王伯起所居。独处一廛，匾曰“西室”，日焚香燕坐其中。

老相公衙 在长洲县干将坊。元参政周伯琦使吴，被留，张氏构此馆之，衙极壮丽。今犹仍其旧名。

吴国故馆 在长洲县。旧传吴国故馆凡三：升月馆在带城桥东，乌鹊馆在乌鹊桥，江枫馆在渴乌巷。又有全吴、通波、临顿、龙门、升羽等馆。升月馆至宋犹存。

五湖田舍 在长洲县大姚村，白阳山人陈淳所居。

石楼精舍 在弹山南，明赵宦光篆书“石楼”二字。以前为万峰台，旧有七十二峰阁，登临极胜。今已废，然春梅、夏笋、秋桂、冬茶犹占四时佳景焉。

华林园 在长洲县。《吴地记》云在华林桥。又平昌里有华池，龙潭里有石龙，皆阖闾故迹。

南园 在长洲县府学旁，吴越广陵王元璩帅吴时所置。园相近有元璩别宅。又有东庄，亦名东墅，元璩子文奉所创。

西园 有二：一在长洲县，《吴郡志》云在郡圃之西，唐时所建，今为教场；一在吴县西城桥夏驾河上，明王鏊别墅。文徵明有西园游集诗。

梅都官园 在长洲县西，祝慆《野录》云：梅挚晚年卜筑沧浪之旁，与苏舜钦为邻。今犹称其地为梅家园。

郭氏园

在长洲县饮马桥西南，本郭云大夫所居。有池号“小沧浪”。今为巡抚院后圃。

拙政园 在长洲县娄门内大弘寺西，明侍御王献臣筑(按《明史》，王献臣吴人，进士，擢御史。长洲县志、府志亦均作王献臣，旧志作宪臣，恐误，今据改)。后归里中徐氏。清海宁陈相国之遴得之。中有连理宝珠山茶，花开时烂红夺目。相国谪塞外，此园入官，为驻防将军府，又为兵备道馆，既而为吴三桂婿王永宁所有，复籍官。康熙十八年，改苏、松、常道新署。苏松常道缺裁，散为民居。后归蒋氏，名曰复园。又归海宁查比部世倓，复归平湖吴氏。咸丰庚申，为太平天国忠王李秀成王府，城复归官。同治十年改为八旗奉直会馆。

五亩园 在长洲县，介阊、齐两门之中，汉时为张长史植桑地。宋熙宁间，梅宜义

筑亭居之，子子明判杭州，苏轼尝寄诗，有“仙人子真后，还隐吴门市，不惜十年力，治此五亩园”之句。园中有灵芝石、丈人峰诸奇石。

郡圃 在长洲县郡治后。旧多楼亭，宋建炎中毁。端平初，张嗣古补葺，易名“同乐园”。嘉定中，綦奎复立四小亭，其芍药坛每岁花开，太守宴客号为芍药会。

凌处士庄 在长洲县由姑山北，唐韦庄有诗。

就隐 在长洲县华山。宋绍兴间，张廷杰所葺，周必大《游山记》云：汉卿既得华山就隐，剏剔严窰，疏导泉源，佳花美木，四时皆有奇观。

石书隐 在长洲县，俞琰所居，因自号石硐。中有咏春斋、端居室、盟鸥轩，皆琰孙贞木作。

小洞庭 在长洲县齐门外，刘珏累石为山，号小洞庭。徐有贞为之记。

鹤市 在长洲县阊门内，《吴越春秋》云，夫差葬女胜玉，舞白鹤于市，聚观者以殉葬。《越绝书》云，杀生以送死。今故市巷东有舞鹤桥。

专诸巷 在长洲县阊门内，旧传专诸所居，今为石塔庙。

临顿 在长洲县东，吴王尝逐东夷顿军于此，故名，今呼为临顿桥。《大明一统志》云：或云陆龟蒙尝居于此。

鸡陂墟 在长洲县娄门外二十里，《越绝书》云吴王畜鸡所也。

蠡口 在长洲县齐门北，相传范蠡泛五湖出此。《大明一统志》云，在长洲县界，一名蠡塘。

花谿 在长洲县定跨桥北。青霞居士顾凝远筑别馆间亭，颇极幽胜。

交让渚 在长洲县子城北。《续图经》云：渚因陆慧晓与张融并宅，其间有池，池上有杨柳二株。何点叹曰此池便是醴泉，此水便是交让，渚因以名。今湮为民居，仅污池丈余，立交让祠于此。又有交让巷，俗讹为甘将巷。

禁蛙池 在长洲县北禅寺东。天泉禅寺说法，取池中一蛙，点其颌，群蛙遂无声。其地至今不产蛙。

石幢 在长洲县城北数里，唐徐浩书，郡守陈师锡徙置府第。乡人夜过河上者多见

鬼物，乃相与请于州复置旧处，怪遂绝。

大石峰 在阳山，怪石丛出山腰，上建佛庐精舍，皆架严壁。吴文定宽称东南一奇，与史鉴、沈周诸人吟咏其地。

商相巫咸墓

在常熟县虞山，子贤亦葬此。宋王愉为县令，尝修其墓。仲雍墓亦在虞山。

周吴子章墓、先贤言偃墓并在常熟县虞山。齐女墓在虞山，吴太子所娶齐女也。

周吴王夫差墓 在长洲阳山。先贤澹台灭明墓，在长洲县澹台旁湖。庆忌墓，在长洲县齐门外，今云庆坟。

晋庐江太守阚臻墓 在长洲县齐门东北二里，今名阚村墓。

梁公主墓

在长洲县乘鲤坊，即法尼寺后大土邱。相传梁武帝女出降郡人孙，寺即 故宅。

唐平章事陆贄墓 在长洲县齐门外六里官河之西，地名陆墓，相传陆宣公葬此故名。宋淳熙间，有于墓旁得遗刻，与所传合。或谓贄生于嘉兴，宝华寺乃其故宅，自贬忠州别驾，卒即藁葬其地，今忠州至虚观三十步是其葬处。又谓贄已归葬，而忠州特虚设耳。

宋龙图大学士滕元发墓 在长洲县阳山栗坞，苏轼有志铭。元发东阳人，帅真定河东，治边凜然，威行西北。 签书枢密王伦墓，在长洲县阳山大石坞。伦字正道，莘县人，宰相旦族孙，使金，留六载不遣还，欲以为转使，不受，使人缢杀之。子述与从兄遵间入金境，得伦骨以归，官给葬事。

尚书郑起潜墓、会稽尉郑虎臣墓，俱在阳山。 安抚使魏克愚墓在阳山栗坞。

元七姬墓 在府城东北隅潘氏后园。七姬者，淮张左丞潘元绍之妾，段、程、翟、徐、卞、罗、彭其氏也。明兵围苏州，姬等虑有不虞，义不受辱，皆自经死。克志其墓。 提举葛应雷墓在长洲县望墅墩。

明起居注陈瞭墓 在长洲县阳山东。 尚书郁新墓在阳山西麓。 赞善王𠬪墓、侍讲王珽墓，在长洲县阳山凤凰峰下。尚书俞士悦墓，在长洲县白莲桥内陈庵西。都御史朱纨墓，在长洲县射渎桥北。

高士沈周墓，在长洲县相城西牒字圩，王鏊撰志。

尚书袁洪愈墓在葑门外。大学士王锡爵墓在来凤桥西。

员外周顺昌墓，在长洲县白莲泾马家墩。 侍郎周诏墓在长洲县小茅山。

祭酒陈仁锡墓在长洲县射渎。少詹徐沂墓在长洲县阳山。

清处士金后明墓在长洲县瓜山。孝子金焕墓，在长洲县一都七图翔字圩。孝子金瑞凤墓在长洲县象山。孝子戈宙襄墓，在长洲县七都七图义字圩。义士六十三人冢，在长洲县恩顾山下。义士，系咸丰庚申五月殉难者。贞烈赵文龙女淑英墓，在长洲县浒关渔庄。蒋近光妻汪节妇墓，在长洲县虎邱长泾。

巫陂城 在元和县东十五里，《越绝书》云：阖闾所置，诸侯远客离城也。又有陂溪城，阖闾所置殿宫也。

相城 在元和县东北五十里。相传子胥初筑城时，先于此相地，垒土而城之，下湿乃止，故名。

鸿城 在元和县治东娄门外，相传故越王城也。

阳城 在元和县东北三十里。环绕有湖，曰阳城湖。

后城、堵城 并在元和县东南数十里。堵城疑即赭城，今尹山乡有堵城里。

陈公楼 在元和县虎邱山。宋王琬《记略》：隆兴二年四月，敷文陈公镇吴兴，避暑虎邱寺，创楼其山。

虎邱阁 在元和县。《辍耕录》云：平江虎邱阁版上一窍，当日色晴朗时，以掌大白纸承其影，则一寺之形胜悉见，而顶反居下。明文徵明有诗。

醒心亭 在元和县葑门内。水中有土阜对峙，号曰浮墩。宋熙宁间曹素建亭，其地有双松参天，今放生池即其处。

和靖读书台 在元和县虎邱山，宋尹焞读书处。后人绘像祀之，为和靖书院。

澹台灭明宅 《吴地记》：宅隐为湖，曰澹台海。《史记》：灭明南游至江。《索隐》注谓吴国东南有澹台海，即其遗迹。

韩雍宅 在元和县葑门内。雍既贵，归吴治宅。溪流环绕，曰葑溪草堂。时与徐有贞、祝显、冯定、刘珏为葑溪联句。

孙武子宅 在元和县枫桥西南孙武子桥侧。

陈丞相宅 在元和县东禅教寺。吴赤乌间，其宅生瑞莲，遂舍为寺。

齐何求宅 在元和县虎邱山。弟点胤亦隐此。

宋袁襄简公珣宅 在元和县东吴乡蛟龙浦之赭墩。珣官京西提刑按察使，从高宗南渡，保障东南，因家焉。

宋吕浩叟宅 在元和县虚邱，曰乐寿堂。浩叟尝使元军，抗词不屈，宋亡授淮东宣慰使，不就，隐此。

元袁易宅 在元和县蛟龙浦之赭墩。有静春堂，学者称静春先生。子平江教授泰复建福源山房。

柯九思宅 相传在元和县城东胭脂桥。

叶唐夫宅 先生生明洪武间，家元和县江村桥。

邢量宅 在元和县葑门外，今名邢家衡。从孙参亦居此，后弃去，诛茅于野。或云一在虎邱西者，为参读书所居。

钱邦彦宅

在元和县望信桥西七塔寺前巷，今名钱衡前。嘉靖戊戌，巡抚张凤为建尚书坊。

严纳宅 在元和县南仓桥西积庆寺前巷，今名严衙前。文靖筑室于兹，命长子中翰治居之，治子贡士桓构困学斋，读书其中。

陈仁锡宅 在元和县葑门内下塘。中有远耀堂、白松堂(白松河南轩胜台，故公奉使册周藩王，以白松制带赠之，取以名堂)。又有别墅，在孔副使巷，曰无梦园。中有息浪、见龙峰诸胜。康熙辛酉，次公尔兴重修，旁有又一村。

居节宅 在元和县虎邱山堂。

清徐波宅 在元和县悬桥巷。明季，弃家人鄞山读书，以其宅与外孙许眉叟。有圆峤仙馆，精雅宏敞。子陶村太史集家居不仕，以著书自娱。曾孙大铤杜门授徒。又营来鹤亭、碧梧龕诸胜。后归诸生祝寿眉，葺为琢圉别业。

汪琬宅 在元和县阊门外陆宅巷。有城西草堂，旁为苕华书屋。又有别业在虎邱，曰邱南小隐。中有乞花场山光塔影楼，今为编修祠。

尤侗宅

在元和县新造桥。有鹤栖堂，圣祖御书赐额，园曰“亦园”，有揖青亭、水哉轩。

韩莼宅 在元和县娄门内直街。明万历中，莼祖黄岩知县治，始居此。有开云堂、寒碧斋、绀雪斋。兵燹后，莼重修筑，圣御题有怀堂额赐焉。

张检讨大受宅 在元和县新学东。大受乡举后，久不第，读书于此。韩宗伯莼题其居曰“孝廉船”。又有读书亭潮生阁，其地近古匠门，又称匠门书屋。

沈德潜宅 在元和县阔街头巷。有教忠堂，内悬御赐匾额。又有九赉阁，在葑门外竹墩庄，赐序、赐诗，并佛龕供御赐金佛。其为早年所居者曰“竹啸轩”，在木渎。

王氏两世双节宅 在元和县唯亭上塘季泾桥西，即今关帝庙。王时亨妻张氏，弟用俊妻张氏，孙家琛妻孙氏、家琦妻陈氏所居。子孝子岫、孙孝子家瓚亦居。此后家瓚舍宅建庙。

有竹居 在元和县相城，明高士沈周宅。

姑苏馆 在元和县盘门内西城下，大德间改为驿。

塔影园 即海涌山庄，在元和县虎邱便山桥南数武。上林苑录事文肇祉所筑，后顾苓更名云阳草堂，中有倚竹山房、松风寝照、怀亭诸胜。

墨池园 在元和县葑门内。相传苏文忠公曾洗砚于此，明时孔副使营构为园，中有碧涟亭、苏公署榜，后归李氏。

洽隐园 在元和县显子巷，少微真人韩馨隐居于此。康熙间毁，同治中于其地建程忠烈公祠、淮军昭忠祠、安徽会馆。

蒋氏塔影园 俗呼蒋园，在元和县虎邱东南隅，蒋重光所筑，有宝月廊、香草亭、浮苍阁、随鸥亭诸胜。园本程氏故居，蒋氏有之，盖袭塔影之名，而非旧址也。嘉庆二年，任太守兆珩即塔影园改建白公祠，中有思白堂、怀杜阁、仰苏楼。

何仔园 在元和县尹山。种植甚繁，牡丹尤盛，宋周必大尝游之，见《南归录》。

网师园 在元和县葑门内阔阶头巷。宋廉访宗元所居，后归太仓瞿氏，同治中归李廉访鸿裔，易名曰苏东邻。

东庄 在元和县葑门内，明吴宽夫孟融所治。中有十景，为一时名胜。

唐韦应物山庄 在元和县吴淞江南。常放舟吟诗于此，故名吟浦。

韩氏山庄 在虎邱，明韩襄毅公雍别业，今废。

罗隐庵

在元和县葑门外甫里北隅。隐以龟蒙愿与之游，因结庵于此，后为魏了翁别业。

山塘小隐 在元和县虎邱，明行人姜垓寓舍。垓与兄采明亡卜隐虎邱，与叶襄、金俊明、任大任诸宿老相过从。

梅花墅 在元和县甫里。明秘书许元祐所构，选地百亩，瀦水垒石，擅一时之胜，今为海藏庵。

白公堤 在元和县阊门外虎邱山塘，白居易筑。

石井泉 在剑池藏经阁后。《煎茶水记》载刘伯刍论水七等，以虎邱石井为第三。或又传陆羽品定。

点头石 在元和县虎邱山。晋竺道生说法，石为点头，今有悟石轩。

周吴王阖庐墓 在元和县虎邱山剑池。

申公巫臣墓，在元和县匠门外，一云在巫门外。吴将孙武墓在巫门外。干将墓在匠门外。匠门本名干将门，因干将葬此故名，后讹为匠。干将与其妻莫邪俱善铸剑。

汉三老顾综墓 在元和县娄门外。

尚书朱穆墓，在元和县娄门东南二里，与顾综墓相直。

三国吴孙王墓 在元和县盘门外。孙王谓吴大帝父坚，母吴夫人及兄策也。晋元康中吴令谢询表求置守冢者五人，修护扫除，诏从之。附询表：臣闻成汤革夏而封祀，武王入殷而建宋。春秋征伐，则晋修虞祀，燕祭齐庙。夫一国为一人兴，先贤为后愚废，诚仁圣所哀悼而不忍也。故三代敦继绝之德，春秋贵柔服之义。昔汉高受命，追存六国，凡诸绝邦，一时并祀。亲与项羽对争存亡，逮羽之死，乃以公葬，若使羽位承前绪。世有哲王，一朝力屈，全身从命，则楚高不堕，有后可冀。伏惟大晋应天顺民，武成止戈，西戎有好序之人，京邑开吴蜀之馆，兴灭加乎万国，继绝接于百世，虽三王弘道，商周称仁，洋洋之美，未足以喻。是以孙氏虽家失吴祚，而族蒙晋荣，子孙量才，比肩取进，怀金侯服，佩青千里，当时受恩，多有过望。

。臣闻春雨润木，自叶流根，鸱鸢恤功，爱子及室，故天有罔极之恩，圣有绸缪之惠。追惟吴伪武烈皇帝，遭汉室之弱，值乱臣之强，首倡义兵，先众犯难，破董卓于阳人，济神器于甄井，威振群牧，名显往朝。桓王才武，弱冠承业，招百越之士，奋鹰扬之势，西赴许州，将迎幼主，虽元勋未终，然至忠已著。夫家积义勇之基，世传危扶之业，进为殉汉之臣，退为开吴之主。而蒸尝绝于三叶，园陵残于薪采，臣窃痛之。伏见平吴之初，明诏追录先贤，欲封其墓，愚谓二君并宜应出。故举劳则力输先代，论德则惠存江南，正刑则罪非晋寇，从坐则异代已轻。若列先贤之数，蒙诏书之恩，裁加表异，以宠亡灵，则人望克厌，谁曰不宜。二君私人，多在墓侧，今为平民，乞差五人，蠲徭役，使四时修护颓毁，扫除莹垄，永以为常。

明卢熊《孙王墓辩》：古汉豫州刺史孙坚、妻吴夫人及其子会稽太守策三墓，并在盘门外三里，即今齐升院东南面，势据古蛇门，正与府治相向。《祥符图经》云：孙坚墩，俗称为孙王墓。按《吴书》坚死于初平三年，年三十七。策死于建安五年，年二十六。吴氏死于建安七年，合葬坚墓。黄龙元年，权追尊坚为武烈皇帝，庙曰始祖，墓曰高陵。吴氏为武烈皇后，策为长沙桓王。太元元年八月朔，风拔高陵松柏，石碑动。《晋阳秋》云，惠帝元康中，吴令河东谢询表为孙氏二君置守冢五人，修护扫除，有诏从之。其文张俊所作，今载《文选》。陆广微亦云，盘门东北二里有吴武烈皇帝并长沙桓王等三墓。前志云，宋政和六年，村民发墓，其砖侧皆有“万岁永藏”四篆字，得金玉奇器甚多。有东西银杯，初若粲花，良久化为腐土。并金搔头十数枚，金握背二，悉皆如新。一瓦薰炉如近世陆墓所制略似，而箱底灰炭犹存。碑石断缺，仅余“中平年”三字，州将遽命掩之，所得古物尽归朱勔家。洪伯《乌香谱》亦略载此事，即杨友夔所赋孙豫州墓者是也。洪氏三庚志云：盘门外大冢，绍兴二年秋雨愤圯。牧童入其间，得铜器数种，持卖于市。乡人往视圯处，盖其隧道，有石刻篆书云“大吴长沙桓王之墓赤乌三年”凡十二字。知府沈揆亟命掩塞，仍立石表其所为记。袁席之云：策死，距赤乌三年已四十载，岂非权称制之久复改葬乎？所得之器，滕藏一小镜，其背有铭十四字。一铜小麟镇纸，无款识，以遗席之。嘉靖中，墓旁土中又得唐孙德琳墓志，云开元十年窆于十四代祖吴武烈皇帝陵东南平地。又按《丹阳图经》载：高陵在县西练塘乡吴陵港，熊以传记证之。当是坚葬曲阿，后迁于吴，史不及详载尔。滕所记，谓绍康中提举常平詹体仁尝命其属表之，题曰“先贤墓”。徐谊属成考订，止从俗称孙王墓。盖据陈寿说，破敌葬曲阿。及言策之薨，其将周瑜、鲁肃皆赴丧，独指此为伯符之墓，亦未及谢询所表，不审三坟同域，故论说纷纭，自相抵牾。在政和知为豫州之墓，在绍兴知为长沙桓王之墓，皆不能质诸传记，以求其说。地亦尝为官窑，故旧志不复详究矣。因备载始末，传诸好事，仍录古今文词如左云。

越骠骑将军顾荣墓 在元和县黄天荡南。

唐法曹参军张从师墓 在元和县虎邱山西。

天随子陆龟蒙墓，在元和县甫里，旁有白莲寺。真娘墓，在元和县虎邱山，临水

。唐李绅诗序云；真娘吴之妓人，歌舞有名，死葬虎邱寺前，墓多花草。幽独君墓，在虎邱山北。大历十三年，虎邱寺有鬼题诗隐于壁间，云“幽明虽异路，平昔忝工文。欲知潜寂处，山北有孤坟”。莫详姓氏，故称为幽独居。

元参谋杨椿墓 在元和县虎邱山西华里。

明侍郎李墓在元和县陈公乡。侍郎刘墓在元和县袁公巷。

待诏文徵明墓，在元和县武乡花泾桥

詹事姚希孟墓，在娄门外下雉渚西，金泾堰北。

处士顾麒墓，在元和县匠门塘，杨果志。

五人墓，在虎邱山塘。五人者，颜佩韦、杨念如、马杰、沈扬、周文元也。

葛贤墓 在虎邱山塘。贤原名成，万历中，内监孙隆私设税务，市人咸怨，成倡众拏阉党，焚其家，税由是止。系十余年，遇赦得释，人呼为葛将军。

清大学士宋德宜墓 在元和县唯亭后。检讨张大受墓在元和县娄门外。

潘文恭公世恩墓，在元和县二十三都贵字圩谭经桥北，附赠大学士奕基兆。

诗人王昙墓在元和县虎邱山。金氏五节墓，在元和县北街石皮街百花庵后。五节烈为金宝书妻节孝徐氏、金廷桂妻汪氏、浙江巡检金文栋妻吴氏、汪氏女四宝、吴氏子云章，均系咸丰庚申殉难。

定错城 在吴县吴市西，属小城，北至平门。汉荆王刘贾筑。

鱼城 在吴县西南十五里横山下。《吴地记》云吴王养鱼处。《续图经》云：盖吴王控越之地，宜为吴城，方言吴鱼同音，故讹称鱼。周益公《南归录》云，鱼城在田间，基厚而方，高二丈，博倍之。为田二十亩，土极细，故久不坏。

苦酒城 在吴县鱼城西南二十里。《吴郡志》谓长老云，吴王筑以酿酒。又有酒醋城，《吴地记》云在胥门西南三里。

储城 在吴县胥门南三里，吴王储粮处。

马城、鹿城 俱在吴县洞庭西山，阖闾豢养之所。

石城 在吴县西灵岩山。《吴越春秋》谓阖闾兴筑石城，注云吴之离宫，越王献西子于是。

酒城 在吴县坛塘旁。一名檀城，夫差祭子胥处。临祭劝酒，故名酒城。《祥符图经》云在吴县东南三十五里大江边。一名陌城。

卫王城 在吴县西南界相近。又有舸城，或曰柯城。

越城 在吴县胥门外西南十八里石湖旁。越湖伐吴，筑此以逼之。城堞仿佛具在，高者犹丈余。

干城 在吴县马安溪上，越干王之城也。

马税城 在吴县洞庭西山。《震泽编》云马税为梁左金将军，将顿军于此，陈帝伐之，积水陷城。遗迹犹存。

阖闾城 在吴县，《越绝书》云在高平里。

馆娃宫 在吴县西三十里。《吴地记》云，阖闾城西有砚石山，上有馆娃宫。今灵岩寺即其地。《吴都赋》云幸乎吴娃之馆。

浒墅 在郡西二十五里。《祥符图经》云：秦始皇求吴王剑，白虎蹲于邱上，遂西走二十五里，而失剑不能得。地裂为池，因名其地曰虎醪。唐讳虎，钱氏讳嚬，故改浒墅。

响履廊 在吴县灵岩山。相传吴王建廊，以梗梓藉地而虚其下，令西施与宫人步履绕之则响故名。今灵岩寺图照塔前小斜廊即其址。

敌楼 在吴县白塔桥南，规制如枫桥。《方輿纪要》云：嘉靖三十四年，官军自跨塘桥追倭贼，歼之于此。盖是楼建筑在任环平倭时，里人为保存古迹时加修缮，以其址有白塔桥，亦木渎十景之一也。枫桥敌楼建置与木渎同时，亦名铁铃关。

采娱阁 在吴县木渎山塘。清孝子周灏筑，以为其父游盼之所，沈德潜题额。

环山阁 在吴县木渎西街，清王在东故居。

望亭 在吴县西境。吴先主所立，谓之御亭。隋开皇九年，置为驿。唐常州刺史李袭誉改今名。

金阊亭 在吴县阊门外。唐陆龟蒙谓梁鸿墓，在金阊亭下一里是也。

浴日亭

在吴县阳山顶。每年九月三十日，郡人登此，观日月同升，间亦有云海之奇。

流杯亭 在吴县女婿坟西二百步。《吴地记》云阖闾三月三日游乐之地。

吴会亭 在吴县织里桥北。

胥屏亭，在吴县。《吴地记》：在花山东二里，吴王阖闾置。《图经》记：汉初有陆烈，字伯元，为令。既卒，吴人思之，迎其丧，葬于胥亭，子孙遂为吴县人。

怡泉亭 在吴县殷家弄。里人冯怡泉与殷心抑为友，尝以百金存殷所，而冯没无子，殷为起井亭，四周皆石兰，即以“怡泉亭”三字颜之，为行人游憩之所。事在崇祯三年。

姑苏台 在吴县西三十里姑苏山，一名胥台。《越绝书》云：阖闾起姑苏台，三年聚材，五年乃成，高见三百步。《续图经》云：越王得神木一双，大二十围，长五十寻。雕画文章，饰以白璧黄金，献于吴王，王乃起此台。盖基于阖闾，而成于夫差云。

郊台 在吴县横山东麓石湖之滨。《大明一统志》云吴王祀葬于此。今坛遣之形尚存。

琴台 在吴县西二十五里灵岩山上。台东为走马街。

射台 在吴县西南横山。《吴越春秋》云：射台于安平里。任昉《述异记》云吴王射台柱础皆伏龟，《越绝书》云射台二，一在华池平昌里，一在安阳里。

般若台 在吴县西二里，晋穆侯何准舍宅建。其东北有般若桥，今呼为朱明寺桥。

墨佐君坛 在吴县缥缈峰北一里。汉延平元年，墨佐君于此求仙。

毛公坛 在吴县洞庭西山，汉刘根得道处。今有石坛、丹井在神景观旁。根既成仙，身生绿毛，人或见之，故名。

三卯堂 在吴县东洞庭山查湾。明贺泰建，成化癸卯举人，泰祖廉中永乐癸卯榜，父元忠成化辛卯榜，故以名堂。

香雪草堂 在吴县邓尉山，潘侍讲遵祁筑。堂西隙为西圃堂，东有小阁，藏宋杨逃禅四梅花卷，颜曰“西梅阁”。

易老堂 在吴县西洞庭西。李弥大知平江府，罢政归居此。

汉蔡经宅 在吴县朱明寺西。《神仙传》云，后汉王方平得道过吴，住蔡经宅，今蔡仙乡是其隐处。《大明一统志》云在胥门。

葛洪宅 在吴县西洞庭绿石山下，洪于此立坛炼丹。

朱买臣宅 在吴县穹窿山，相传寺基其故址也。

三国吴夫人宅 在吴县，孙权之母所居，即府城开元寺基。

周瑜宅 在吴县雍熙寺西。建安三年，孙策为瑜治第于吴，今所称周将军巷是也。

晋陆玩宅 在吴县，灵岩山寺其故居也。

何准宅 在吴县西朱明寺桥。宅舍为寺，般若台即其故址。

唐李嘉祐宅 在吴县姑苏台侧。嘉祐罢兖州刺史居此。见僧皎然酬李员外诗。

宋闾邱孝终宅 在吴县马步桥北。苏轼谪黄州，孝终为太守，往来甚密，轼尝云苏有二邱，不到虎邱，即到闾邱。今犹名闾邱巷。

范仲淹义宅 在吴县。元《楼钥记》云：范氏自唐时居于灵芝坊，今在雍熙寺之后。皇祐中，文正公访求宗族，买田千亩，作义庄以赡之。宅有二松，堂曰“岁寒”，阁曰“松风”。因广其居为义宅。中更兵毁，五世至良器，始悉复故地。周一千四百八十丈，结屋十楹，寢复旧观。附宋钱公辅《义田记》：范文正公，苏人也。平生好施与，择其亲而贫疏而贤者咸施之。方贵显时，于其里中置负郭当稔之田千亩，号曰“义田”，以养济群族之人。日有食，岁有衣，嫁娶凶丧有赡。择族之长而贤者一人主其计，而时其出纳焉。日食人一升，岁衣人一缣，嫁女者五十千，取妇者三十千，再嫁者三十千，再娶者十五千，葬者如再娶之数，葬幼者十千。族之聚者九十口，岁入粳稻八百斛，以其所入给其所聚，沛然有余而无穷。仕而家居官者罢弗给。此其大较也。初公之未贵显也，尝有志于是矣，乃力未之逮者二十年。既而为西帅，乃参大政，于是始有禄赐之入而终其志。公既歿，后世子孙修其业，承其志，如公之存也。公虽位高禄厚，而贫终其身，歿之日身无以为殓，子无以为丧，惟以施贫活族之仁，遗其子而已。昔晏平仲敝车羸马以朝，陈桓子觴之日，是隐君之赐也。晏子曰：自臣之贵，父子族无不乘车者，母之族无不足于衣食者，妻之族无冻馁者，齐国之士待臣以举火者三百余人，如此而谓隐君之赐乎？彰君之赐乎？于是齐侯以晏子之觴觴桓子。余尝爱晏子之好仁，齐侯知贤，而桓子服义也。又爱晏子之仁有等级，而言有次第也。先父族，次母族，次妻族，而后及于疏远之贤。孟子曰“亲亲而仁民，仁民而爱物”，晏子为近之。今观文正公之义田，贤如平仲，其规模远举又疑过之。呜呼！世之都三公位，享万钟禄，其邸第之雄，车舆之饰，声色之多，妻孥之富，止乎一己而已。而族之人不得其门而入岂少也哉，况于施贤乎？其下为卿，为大夫，为士，廩稍充，奉养厚，止乎一己而已。而族之人操壶瓢为沟中瘠者又岂少哉，况于他人乎？是皆公之罪人也！公之忠义满朝廷，事业满边陲，

功名满天下，后必有史官书之者，余可略也，独高其义，因以遗其世云。

贺铸宅 在吴县。铸字方回，越人，卜居于府东升平桥，尝作吴趋曲。黄庭坚诗云：解道江南断肠句，只今惟有贺方回。

范成大宅 在吴县西范村北。中有重奎堂，奉宋孝宗御书。又有石湖别墅，因越来溪故城为亭榭，内有天镜阁，孝宗赐御书“石湖”二大字。周必大题壁云：紫薇舍人别墅，登临之胜甲于东南。

丁谓宅

在吴县吴王郊台后丁家山下。大中祥符九年，谓为苏州节度，真宗为治第。

程师孟宅 在吴县南园旁。公少而轩辟，有才志。因过隙地，右开元、瑞光二寺，左南园，尝曰：此可以为宅也。及稍显，遂得其地卜居焉。知州晏知止赠诗云：衣冠虽盛皆侨寄，青琐仙郎独我乡。盖公实吴人也，晏公又名其地曰画锦坊。

高启宅 在吴县吴城东北。

徐有贞宅

在吴县治北。盖自谪所归此，号天全翁，建堂曰“天全”。后为祝允明所居。

陈镒宅 在吴县东北铁瓶巷。镒以师保致政归，作小园，辟地得蔡襄所书画锦堂石碑，复有芝产于堂柱间，人以是为完名全节之徵。

二卢宅 在吴县石湖中。卢雍、卢襄兄弟所居，有芝秀堂，见李东阳铭。

王敬臣宅 在吴县兵马司桥东，今称大儒巷。

徐洵宅 在吴县吴趋坊。宅后有二株园，洵读书处也。

明吴宽宅 在吴县乐桥西尚书巷，巷之得名以此。旧有园亭久废。庚申兵燹后，归顾方伯文彬，因其址筑为怡园，并拓旁地建立家祠义庄焉。

王鏊宅 在吴县东洞庭山。又得月亭在湖滨。

刘纘宅 在吴县定光讲寺西。曾孙中允城亦居此。今犹名刘家浜。

徐缙宅 在吴县西洞庭山堰下，有介福堂。公致仕归，构以奉母。

袁帙宅 在吴县宝林寺东，子学宪尊尼亦居此。帙晚年居横塘，有列岫楼，俯临河山之胜。又构黄山草堂。

王守贡士宠宅 并在吴县南濠。宠有越溪庄，在石湖山中。有采芝堂、御风亭、小隐阁，后垣即越城废址。

皇甫汭宅 在吴县三太尉桥北。汭有月驾园，在县治西北麒麟巷，后为词人钱允言寓。有亭沼林石之胜。

申时行宅 在吴县黄鹂坊桥东，中有宝纶堂。后裔孙继揆筑蓬园，中有来青阁，魏禧为之记。飞云泉在申衙前。先为景德寺，后改学道书院，再改为兵备道署，又废而为申文定公宅。乾隆间刑部侍郎蒋揖居之，后归太仓毕尚书沅，继为孙建威伯宅。道光末归汪氏为耕荫义庄。(或云即宋时乐圃)

缪国维宅 在府治西北太平桥之南，其子孙世居之。清康熙间参政孙侍讲彤于宅旁构志圃，以奉亲。其中有双泉草堂、白石堂(石旧在郡治双瑞堂，为唐刺史白公遗物。有宋嘉定庚辰郡守綦奎镌宅，见彤自为志圃记。先是申文定公时行营南园，郡守以石归之，至是得之申公孙惟宁云)红画亭、梅洞、莲子湾诸胜。

清宋德宜宅

在吴县黄鹂坊桥东，有凝远堂。公子大业为翰林侍读时，圣祖仁皇帝御书赐额。

宋骏业宅 在西百花巷，有静永堂。骏业为兵科给事时，圣祖仁皇帝御书赐额。

何焯宅 在吴县金狮子巷。中有赉研斋，以尝得陶隐居赉研故名。

王鸣盛宅 在吴县洞泾桥。中有颐志堂，鸣盛晚岁著书于此。

陈揆一宅

在吴县桃花坞杨树园。舍北叠石疏池，中筑室曰藕舫，藕舫南有南埭草堂。

周隐遥庐 在吴县西洞庭山。《仙传拾遗》云：周隐遥洞庭道士，自云角里先生之孙。学太阴炼形术，死六年更生，十六年又死如前，更七年复生，如是三度。附唐令狐楚《周先生住山记》：先生姓周氏。名隐遥，字息元，宗其道者号为太元先生。汝南人也。抱天和冲淡之气，含至精洁朗之质，玉冷泉润，松高鹤间，韬精守道，冥得真契。谷神既存而长守，元关无键而不开。贞元初，游苏州吴县之包山林屋洞。秋八月，始于洞西得神景观。讯其居者，曰距此数里，世传毛公坞。毛公道成罗浮，居山三百余岁，有弟子七十二人，聚石为坛，遗迹犹存。尔能勤求，吾请导之，既行而萝蔡迷路，不知所往。先生瞑目久之，逢一物焉，双眸尽碧，毛色紫而

本白，高数尺余，随而行之，视乃鹿也，须臾乃跪止，若有所告，先生默记之而还。至十九年冬，刳木须茅，奠厥攸居，得异石一方，上有虫蠹，验之即毛公镇地符也。既而凿户牖以为窠，有鹤衔弄冠裳戏舞于庭。砌后得一井，香白滑甘，溢为白泉。其旁得石池焉，深广袤丈，阳验阴伏，湛如也。初先生尝息于洞之南门中，神化恍惚，往往失其所在。遇好风日，亦来人间。将至，必先之以云鹤。其弟子洒扫香室，俄而至矣。嗟乎！先生之体同乎无体矣，不以昼夜更动息，不以寒暑易纤厚，不食而甚力，走及奔马，全乎气者也。虽饮而无漏，止如灵龟，外乎形者也。鹿以导步，神柔异物也。符以存视，道契先躅也。井泉去厉，昭乎仁也。池水不枯，齐其虑也。仙云灵鹤之验，去来仿佛之状，其必神行而智知乎。余叔服膺先生之门，二纪于兹，录先生本起命为记，凝神遐想，直而不遗。元和十三年八月华州刺史兼御史中丞令狐楚记。

汎香居 在吴县邓尉吾家山，或作马驾山。清时，里人陈玉亭建。依林傍，窗楞阑槛，制同湖舫，为看梅最盛处。汪琬题其额曰“云壑藏舟”。

梅福隐居 在吴县。《姑苏志》云在西市坊铁瓶巷口。

张籍故居 在吴县胥门。籍赠陆畅诗有“胥门旧宅今谁住”句。

甦香室 在吴县东洞庭山通德里，郑茂讷建，茂讷字理斋，旧宅有母施氏手栽桂树，宅不戒于火，桂亦焦死，理斋听夕抚桂而泣。逾年复花，因颜其室曰“甦香”。

休寓室 在吴县洞庭西山。宋建炎间，知府孙覿罢政侨居。

灵岩山馆 在吴县灵岩山。两湖总督镇洋毕沅筑。中有御书楼、九曲廊、澄怀观、画船、云壑、砚石山房诸胜。嘉庆间，归虞山蒋氏，咸丰中兵毁。

抚松观

在吴县桃花坞。乾嘉间，姚逸亭所居，藏碑版甲吴中。有奇松一株，明代物也。

寒山别业 在吴县支硎山，明高士赵宦光所居。

石湖别业 明高士张献翼寄傲之所，中有稽花斋。

思翁别业 在宝华山坞，明董其昌读书处。

复轩 在吴县黄村，处士章宪，贮书之所。其后圃又有清旷堂，咏归、清秘、遐观三亭，各题以诗。

西坞书舍

在吴县东洞庭山。明贺宪副元忠庐墓，构此读书。中有亭馆，植松竹花卉甚茂。

梧桐园

在吴县馆娃宫侧，夫差园也。一名鸣琴川，《乐府》云：梧宫秋、吴王愁。

辟疆园 在吴县，晋时顾辟疆之园也。唐顾况尝假以居，郡守赠诗曰：辟疆东晋日，竹树有名园，年代多更主，池塘复裔孙。又陆龟蒙诗云：吴之辟疆园，在昔胜概敌。前闻富修竹，复说纷怪石。不知清景在，尽付任君宅。盖又为任晦宅也。

范家园 在吴县雍熙寺后，范周所居，有石刻三大字。

绿水园 在吴县织里桥西。明高启序云：吴城南陬有曰朱家园者，父老言宋朱勔故墅也。庐山陈寅氏得之，更名曰绿水，以园中有池，且用杜子美诗语也。

真适园 在东洞庭王鏊别墅。

归田园 在吴县东北，明司寇王心一家园。中有兰雪堂、泛红轩、竹香廊诸胜。

乐饥园 在灵岩山麓，韩璟即明司寇王元珠秀墅园改建，是升治隐园。文钞乐饥园记云：园为一枝园，在阊门概桥，段玉裁居于此，中有经韵楼。

慕家花园 在吴县黄鹂坊桥南。康熙间巡抚慕天颜所筑，后归河南人绍兴太守席春，其后毕尚书沉割其半。今归刘氏，易名遂园。

悟园 在吴县木渎下沙塘。乾隆初邑人陶筑别墅。

一榭园 在斟酌桥。任太守兆桐构薛文清公祠废址改筑，后为孙观察星衍所得，改名忆啸园。

壑舟园 在吴县洞庭东山，明王文恪公仲兄盘所筑。盘隐居不仕，取藏舟于壑之意，以名其园，后废。裔孙金增奕组购朱氏之缥缈楼，仍名壑舟。

水木明瑟园 在上沙。初，吴江高士徐介白隐居于此，郡人陆穉增拓之，遂为胜地。后为毕秋帆尚书营兆地。

遂初园 在吴县木渎镇。清康熙间，吉安太守吴铨字容斋所筑，中有补间堂，后为葛氏有。咸丰间，归洞庭西山徐氏。

耐久园 在皋峰之麓，双泉老人缪彤所筑。

药圃 在吴县重元寺。唐末，僧元达年逾八十，好种名药，多自远方致之，皮日休过访，题诗以赠。

乐圃 在吴县清嘉坊北，朱长文所居，故钱氏金谷园也。长文自为之记。附宋朱伯原《乐圃记》：大丈夫用于世，则尧吾君虞吾民，其膏泽流乎天下，及乎后裔，与夔契并其名，与周召偶其功；苟不用于世，则或渔或筑、或农或圃。劳乃形、逸乃心，友沮溺、肩绮季，追严郑、蹑陶白，穷通虽殊，其乐一也，故不以轩冕肆其欲，不以山林丧其节。孔子曰：乐天知命故不忧。颜子在陋巷不改其乐，可谓至德也已。余尝以乐名圃，其谓是乎！始钱氏时，广陵王元璩者实守姑苏，好治林圃，因隙地而营之，为台、为沼，今城中遗址颇有存者，吾圃亦其一也。钱氏去国，圃为民居，更数姓矣。庆历中，余家祖母吴夫人始构得之，先大父与叔父或游焉、或学焉，每良辰美景则奉板舆以观于此。厥后稍广西壩以益其地，凡广逾三十亩，余尝请营之以为先大父归老之地。熙宁之末，新筑外垣尽覆之瓦，方将结宇，而亲年不待，既孤而归，于是遂卜居焉！月葺岁增，今更数载，虽敝屋无华，荒庭不甃，而景趣质野。若在岩谷，此可尚也。圃中有堂三楹，堂旁有庑，所以宅亲党也。堂之南又为堂三楹，名之曰“邃径”，所以讲论六艺也。邃径之东又有米廩，所以容岁储也。有鹤室所以畜鹤也。有蒙斋所以教童蒙也。邃径之西北隅有冈，命之曰“见山冈”。上有琴台，西隅有永斋，此余尝拊琴赋诗于此，所以名云。见山冈下有池，水入于坤维，跨流为门。水由门萦纡曲引，至于冈侧东为溪薄于巽隅。池中有亭，曰“墨池”，余尝集百氏妙迹于此而展玩也。池岸有亭，曰“笔溪”，其清可以濯笔。溪旁有钓渚，其静可以垂纶也。钓渚与邃径堂相直焉，有三桥。渡溪而南出者谓之昭隐寺池，至于墨池亭者谓之幽兴。循冈北走，度水至于西圃者，谓之西碕。西圃有草堂，草堂之后有华严庵。草堂西南有土而高者谓之西邱，其木则松、桧、梧、桐、黄檗、冬青、椅桐、桤柳之类。柯叶相蟠，与风飘飏，高或参云，大或合抱，或直如绳，或曲如钩，或曼如附，或偃如傲，或参如鼎足，或并如钗股，或圆如盖，或深如幄，或如蛻虬卧，或如惊蛇走，名不可以尽记，形不可以殫书也。虽霜雪之所摧压，飚霆之所击撼，槎枿摧折而气象未衰。其花卉则春繁秋孤，冬苞夏蒨，珍藤幽花高下相映，兰菊猗猗，蒹葭苍苍，碧蘚覆岸。慈筠列砌，药录所收，雅记所载，得之不为不多。桑柘可蚕，麻苧可缉，时果分蹊，嘉蔬满畦，标梅况李，剥枣断瓠，以娱宾友、约亲属，此其所有也。余于此圃朝而诵羲文之易，孔氏之春秋，索诗书之精微，明礼乐之度数，夕则泛览群史，历观百氏，考古人是非，正前史得失。当其暇也，曳杖逍遥，陟高临深，飞翰不惊，皓鹤前引，揭厉于浅流，踟躇于平皋，种木旧园，寒耕暑耘，虽三事之位、万锺之禄，不足以易吾乐也。然余观群动无一物非空者，安可拘于此以自傲耶？异日子春之疾瘳，向平之累遣，将扁舟桴海，遨游山岳，莫知其所终极。虽然，此圃者，吾先光禄之所遗，吾致力于此者久矣，岂能忘情哉。凡吾众弟若子若孙尚克守之，毋颓尔居，毋伐尔林，学于斯，是亦足以为乐矣，余岂能独乐哉！昔戴颙寓居，鲁圣归隐，遗迹迄今犹存。千载之

后吴人犹当指此相告曰：此朱氏之故圃也。元丰三年十二月记。

隐圃 在吴县灵芝坊，宋枢密蒋堂所筑。堂两守苏，因家焉。自赋隐圃十二咏，绘为图。皇祐间，圃中溪馆产灵芝，知州李仲偃集宾僚赋诗为寿，因立灵芝坊。

适适圃 在吴县乐圃坊内，即古乐圃地。明申时行所筑，中有赐闲堂。

宁极斋 在吴县饮马桥，宋郡人方士姚安世所居。安世能诗文，亦辨博，自号丹元子。元祐末，往来京师，与王定国游，自言日接上清诸仙。苏子瞻一见奇之，以为异人，又称其诗有谪仙风采，屡赠以诗。

萧萧斋 在吴县木渎。明诗人黄习远所构，申文定为之题额。

邓尉山庄 在吴县光福，刑部郎中海宁查世倌购得徐达耕渔轩故址，复扩治之。有御书楼、思贻堂、竹居等处。今改建一仁养堂。

寒碧山庄 在吴县城西花步里，刘观察恕即明徐 同 卿泰时东园故址建。园之东北有东园弄，聚奇石为十二峰。同治十三年，改建二程夫子祠，其外园归盛方伯康，改名留园。园有奇石，日冠云峰。张相国之万得之以赠康者。

天平山庄 明范参议允临所筑，在其先文正公高祖柱国丽水丞隋墓侧。清乾隆七年，前大同知府范瑶与参议曾孙兴禾、兴谷重葺之，更名赐山，山半有白云亭。

虹隐山房 在吴县木渎虹桥堍，徐士元故宅。高庙四次巡幸，词臣随扈必信宿于此。刘石庵相国曾两寓之，手书程子四箴以赠士元。因写虹隐山房图合装成卷，子孙世宝焉。

竹坞山房 在穹窿山南之竹坞，明文文肃公读书处。国变后，点隐居于此。

春草闲房 在卧龙街西双林巷，清金孝章所构书斋也。孝章高蹈不仕，日与四方名流歌咏其中，以终其身。乾隆初，里人郭黻雯即其故址重新之，沈德潜为之记。今为吴大澄宅。

支遁庵 在南峰，古号支硎山，晋高僧支遁尝居此。剡山为龛，甚宽敞。相传有村妇生子于中庵，顶遂中裂。道林又尝放鹤于此，今有亭基。道林喜养骏马，今有白马，饮马处也。庵旁石上有马足，云是道林飞步马迹。

菰芦小隐 在吴县东洞庭山，明隐士金德甫所居。

筠谷 在吴县西馆桥西，宋待制荣薳所居，自号筠谷。知临安，引年乞辞，上以琉璃壶贮丹桂花，且绘之便面题诗二十八字，并金带为赐，复书“筠谷”二大字。宠其归。

桃花坞 在吴县城西北隅。《南畿志》云：在阊门内北城下，宋时为枢密章棨别业，后为蔬圃，明唐寅于其地筑桃花庵，庵中有梦墨亭。

吴市 在吴县，春申君辟两城以为市。

胥口 《吴地记》云在姑苏山北三十二里，因胥山得名。《吴郡志》云在木渎西十里，出太湖之口，上有胥山，舟出口则水光接天，洞庭东、西山峙银涛中景物胜绝。周必大游山记云太湖东旁两山对峙，南曰胥山，北曰香山，中有水，曰胥口。

南村 在吴县越家溪西吴山下，寺簿庐瑑所居，匾曰吴中第一林泉。

东村 在吴县凤凰山南一里，县志云东园公所居园。明葛一龙诗：“曾闻东园公，住此不复出。年年开白花，犹是汉时橘。”

干隧 在吴县西北。《战国策》云越王以散卒三千擒夫差于干隧，《史记正义》云干隧在万安山西南一里。

头即里

在吴县洞庭西山，汉里先生所居。《史记·正义》云太湖中洞庭山西南有禄里村。

夏驾湖 在吴县西城下。吴王寿梦避暑驾游于此，故名。今城下犹存外濠，即运河也。有湾亦名夏驾。

女坟湖 在吴县西北六里，相传阖闾葬女处，以水绕坟因名，白居易诗：女坟湖北武邱西是也。

百花洲 在吴县西城下胥、盘二门之间，《大明一统志》云在姑苏山上。

采香径 在吴县香山旁。《吴郡志》云吴王种香于香山，使美人泛舟于此采之。又名简泾，一水直如矢也。

吟浦 在吴县吴淞江南韦应物山庄，韦尝放舟吟咏于此，故名。

锦帆泾 在吴县盘门内，《南畿志》云即旧子城濠也。世传吴王尝作锦帆以游。宋嘉定间，郡守赵彥楠疏此以通连河。

采莲径

在吴县东南运河之阳。《南畿志》云上有采莲泾，桥下可通舟，传是种莲故处。

香水溪 在吴县西南吴故宫，俗传西施浴处。一云吴王宫人洗妆于此，故又呼为脂粉塘。古诗云“安得香水泉，濯郎衣上尘”，即此。

越来溪 在越城东南，与石湖通。相传越侵吴自此入，故名。溪上有越城桥。

练渎 在吴县太湖鸿雁山之西。旧传吴王所开以练兵，王充《论衡》云阖闾尝试士于五湖之侧。

木渎 为吴邑首镇，其名始见于元丰《九域志》。相传昔时吴王得贡神木，将筑姑苏台，积材三年。

连沟塞渎 木渎之名由此始。其地有十景，曰：法云古松、白塔归帆、南山晴雪、斜桥分水、虹桥晚照、下沙落雁、山塘榆荫、灵岩晚钟、姜谭渔火、西津望月。

石射棚

在吴县灵岩山百步街之前。有石鼓，大者三十围，小者半之。又有石马，如人骑。

可盘湾 在吴县西洞庭山下。《洞庭记》云。吴王游太湖，顿军于此，曰此可盘桓也，遂名。

消夏湾 在洞庭西山缥缈峰之南湾。旧传吴王避暑处。

走狗塘 在吴县西南跨塘桥。《越绝书》云，阖闾走犬长洲，即此。雉塘，在吴县练渎西一里。《吴郡志》云，晋琅邪王彪女于此为雉所惊，固禁之，雉遂绝，故名。

洞庭西山西小湖寺 有一池，池中水能与太湖波涛同涌，故名小湖。唐乾符中，有沈香观音像泛湖来寺，僧供奉之。草绕佛足，投之小湖，生千叶莲花。

投龙潭 在吴县龟山下。《林屋纪遗》云，嘉定初民采藻于此，猎吴越王所投金龙玉简。简以银制，长九寸，篆文隐然，填以朱漆。题云太岁壬戌，时宋建隆二年也。

白马 在吴县南二十五里，《大明一统志》云晋僧支遁养马处。

顾家青山 在吴县大石左麓，顾元庆贮书所也。山中名胜有八。

悟道泉 在洞庭东山天衣禅院。《震泽编》云，昔雪窦演法，有天衣禅师于此汲水供众，折担悟道，故名。

越公井 在吴县上方山治平寺中。唐广明元年修，记云隋开皇十年越国公杨素筑城，穿此井，其径一丈，有奇石栏，如屏绕之，上有刻字。

柳毅井 在吴县洞庭东山道旁，相传其地即橘社，毅与龙女寄书处。

周孝子井 在西大营门。同治癸亥，吴兴程烈女季玉殉节其中，易名孝烈泉。

罗汉松 在吴县洞庭山福源泉寺，旧传萧梁时植。

古松 在吴县天平山狮子岩下，自地崛起，甚怪。正中一干耸拔如幢，延袤二亩，号眠松。张即之书“卧云”二字匾之，谓即范文正读书处。

周王僚墓 在吴县岵嵒山。

吴女墓 在吴县阊门外，吴王阖闾女也。

专诸墓，相传在吴县盘门内伍员庙侧。 要离墓，在吴县阊门南傍城。

汉蜀郡太守张康墓 俗名凤凰墩，在吴县界。按张康不见载籍，唐宰相表载蜀郡太守张睦，康或即睦也。 高士梁鸿墓，在吴县要离墓西。

议郎皋伯通墓，在吴县胥门外，号伯通塾(府志塾作墩)。 都尉陆烈墓，初为吴令，后为豫章都尉，吴人思之，迎葬于胥亭。或云墓在长洲县秦余杭山。

三国吴郁林太守陆绩墓 在吴县阳抱山。 将军朱桓墓在吴县横山。

丞相步墓，在吴县东北三里。

晋司空何充墓 在吴县岵嵒山东一里。 东曹掾张翰墓，在吴县横山东五里。

南北朝宋青州刺史郁泰元墓 或谓今元墓山即其地。泰元性仁恕，葬曰燕数千啣土，今冢犹高大异他坟，村乡岁时祭祀，见苏冢墓记。

齐太常陆倕墓

在吴县绶山乡。墓石，从子襄为序，湘东王绎为铭，普通六年立。

雅儿墓，在吴县至德乡，湘东太守张济女也，今讹雅宜山。

梁黄门郎陆云公墓 在吴县横山，俗称陆墓山，旧图经讹为陆云墓非。 公主墓，在长洲县乘鲤坊，即法尼寺后大士邱。相传梁武帝女出降郡人孙塲，寺即塲故宅。

陈黄门侍郎顾野王墓 在吴县楞伽山下。 干将军墓在吴县东洞庭山俞坞。
莫厘将军墓，在吴县东洞庭山灵祐庙前。

唐鸾台侍郎颜崇墓 在吴县泰伯庙西。 宰相陆象先墓在光福山西。
节度使归融墓，在吴县城西二十余里。 尚书姚绍之墓在吴县西五里。
宰相范履永墓，在天来山左麓，仲淹远祖。

五代吴越广陵王钱元璪墓 在吴县横山，其子中吴军节度使文奉墓亦在此。

宋驸马石端礼及陈国长公主墓 在吴县横山法云寺，公主哲宗女。 范氏祖墓，在
吴县天平山三让原。仲淹曾祖梦龄、祖赞时、父墉并葬于此，俱赠官太师，今称三
太师墓。又范直方纯仁之孙、正己纯礼之子，二墓俱相近。 参政范仲淹墓，在吴
县天平山麓(按仲淹葬于河南尹樊里万安山下，见欧阳修所撰神道碑，此处俗称谓衣
冠墓)。 尚书李堪墓在至德乡洞泾西。 节度使郑戩墓在横山感慈坞。
学士叶清臣墓在横山宝华寺旁。 待制沈起墓在长山乡三顾原。
侍郎蒋堂墓在横山鲁坞。 侍郎陈质墓在华山。
同知枢密滕康墓、廉靖处士滕晟墓，并在吴县华山。 正字朱长文墓在支硎山。
给事中程师孟墓，在横山下，苏舜钦铭。 集贤校理林暨墓在横山。 赠特进卢文
秀墓、太子宾客卢革墓、直学士卢秉墓、学士卢法原墓，俱在吴县穹窿山。
学士钱藻墓在天平山。 三司副使沈师道墓，在天平寺西，赵忭志。
学士范良器墓在楞伽山下。 尚书范之柔墓在燕巢山。
太子中舍旁珣墓在蒸山。 学士徐林墓在灵岩山。
制置使胡元质墓在吴县横山。
蕲王韩世忠墓，在吴县灵岩山西麓。高宗御书墓碑，碑大而方厚，甚阔。
节度使赵希怱墓在穹窿山。 参政范成大墓在天平山上沙村。
参政范定子墓在包山。 签书枢密魏了翁墓在高景山金盆坞。
处士王楸木墓在吴县横山。

元参政王都中墓 在吴县金井坞，欧阳元撰神道碑。按都中福宁州人，父积翁宣论
日本遇害，世祖悯焉，赐平江田八千亩，宅一区。都中年十七授平江路治中，多异
政，历仕四十余年，政事之名闻天下。 魏国公宁玉墓在横山丹霞坞。
先儒俞琰墓在盘门外尹山乡。
处士王鉴墓，在灵岩乡横山。至正二十六年有司买山营葬，陈基志。 儒士邵光祖
墓、耿烨墓、姚辨墓，俱在邓尉山。光祖字弘道，饶州人。烨字叔昭，辨字叔雅，
郡人。皆笃学无嗣，先后死无所归，郡士徐达佐收葬。
先儒陈深墓在灵岩乡朱墩。
照磨陈训、徵士陈廉墓，在天平山，陈基志。待制于文传墓在阊门西雁荡村。
编修朱德润墓在吴县阳抱山。

明武毅将军蔡良瑞墓 在吴县西洞庭山，即祇园寺旧址。
检讨陈继墓在横山茶坞。 尚书杨翥墓在吴山长旗岭下。
尚书滕德懋墓在吴县横山。 尚书金问墓在吴县横山。
少保陈镒墓在吴山西麓。 武功伯徐有贞墓在吴县贞山
都御史韩雍墓，在吴县雅宜山奇禾岭。修撰施槃墓在吴县东洞庭山。
侍郎孔镛墓在吴县九龙山。
少卿马绍荣墓在吴县楞伽山。尚书吴宽墓在吴县苕山。
大学士王鏊墓在东洞庭梁家山。
大学士顾鼎臣墓在吴县潭山。都御史毛珵墓、都御史陈璘墓，并在华山。
解元唐寅墓在吴县横塘王家村。侍郎徐缙墓在吴县灵岩山。
尚书徐学谟墓在吴县弹山。 尚书杨成墓在吴县吴山。
都御史盛应期墓在吴县九龙山感慈坞。 尚书刘纓墓在吴县羊肠岭。尚书董份墓，
在吴县青芝山。份乌程人，其墓有游观之胜。 侍郎韩世能墓在吴县岐龙山。
大学士申时行墓在吴县吴山。 侍郎毛堪墓在天池山。
高士赵宦光墓在吴县寒山。 徵士王樾登墓在白马。
通政徐如珂墓在吴县跨塘。 参议范允临墓在吴县清流山。
尚书申用懋墓在吴县化岩山西。 都御史蔡懋德墓，在吴县妙明山西。
知州孙士美墓在吴县。士美青浦人，官深州殉难。

清侍讲尤侗墓 在吴县官山坞。
都御史慕天颜墓，在吴县穹窿山。天颜静宁人，卒葬此。
吏部尚书吴一蜚墓在吴县凤凰山。 刑部尚书徐乾学墓在吴县光福镇西，
礼部尚书韩菼墓在吴县。 侍郎顾藻墓在官山坞。 佾事申穉墓在吴县长山乡。
侍讲学士何焯墓在尧峰北麓。
孝子唐肇虞墓，在吴县吴山桃花坞二都二十七图。 翰林院编修繆
曰芑墓，在吴县皋峰山北饮马池上。
赠通奉大夫工部侍郎乡饮大宾顾俊章墓，在吴县穹窿山下三家村。
孝子朱墓，在五都六图伤任圩，孝子莆田令岳寿祔。
太仆寺少卿严虞惇墓，在吴县穹窿山福泉坞，祔其祖信阳州知州泽兆。
翰林院编修杨绳武墓，在吴县吴山下郁阳官圩。
徵君惠栋墓，在吴县倪家巷土桥头。 处士彭绩墓在吴县九龙坞。
赠通奉大夫孝子顾墓在北坞。子广西布政使济美祔。
兵部侍郎蒋元益墓在吴县二十二都五图龙山。 两湖总督毕沅墓在吴县上沙。
进士彭绍升墓，在吴县下二十都二图师字圩。孝子顾廷楷墓在吴县弹山。
孝子沈仁业墓，在吴县远祖杰竺山墓次。 孝子蔡来信墓在灵岩山下陆家村。
内阁学士钱棨墓在香山嘴九曲港口。 山东按察使石韞玉墓在西磧山。 刑部侍郎
韩葑墓，在香山小晏岭下祖墓西。文学顾广圻墓，在一云山东麓神台墩下。
布衣钮树玉墓在东山古坞山麓。 孝子杨有贞及妻孝妇唐氏墓在吴山麓。
孝子褚逢椿墓在福寿山北麓。 两代孝子、赠

日讲起居注官、翰林院撰文吴仁荣子恩熙墓，在十一都四图寒山邻下。
孝子吴其相墓，在吴县一都十五图花山下。徵士陈免墓在上沙。
礼部侍郎吴钟骏墓，在画船浜，谕葬。孝子程宗海墓在西跨塘南。右中允冯桂芬墓在吴县北竺坞。节妇贝后祚妻陈氏墓在奈子圩。
烈妇袁七妻陈氏墓在吴县香山塘村。顾烈妇墓在吴县东山黄泥礪。
沈烈妇墓在吴县武山。节母袁永安、侧室韩孺人墓，在吴县玄墓山奉慈坞。
贞节王叔基聘室赵氏墓，在吴县渔庄桥。
增贡生吴重熙妻烈妇朱氏墓，在吴县五都四图九龙坞亭子头。
孝女陆吴氏墓，在吴县支硎山南峰下。吴氏为孝子恩熙女。
褚孝女墓在吴县凤凰池。徐烈女墓在东湖沙。

娄县故城 在昆山县治东，吴子寿梦所筑。《吴地记》云，长洲东百里秦时古礪，王莽改为娄。《吴郡志》云，娄县今谓之昆山县，县东北三里有村曰娄县，盖故县所。《三国志·张昭传》：魏黄初三年封昭由拳侯，后孙权改封娄侯。《陆逊传》：建安二十四年进封为娄侯。

南武城 在昆山县西北。《汉书》娄县注云：有南武城，吴王阖闾起以御越者。《越绝书》云：娄北武城，去县三十里。今为乡。

金城 在昆山县东三里，相传吴王所筑，基址犹存。

东城 在昆山县东三百步。《南畿志》云：今桥巷犹以东城名，耕者于东寺后多得古城砖及铜箭镞。

西鹿城 在昆山山下，有卜将军庙碑云葬于昆山西鹿城。

巴城 在昆山县西十八里，其地有巴王冢、巴城湖。

雉城 在昆山县西北十八里，今雉城湖即其地。

昆山旧县 即今治，在郡东七十里，本汉娄县地。《吴地记》云：地名全吴，水名新阳，梁大同初置昆山县，因县界昆山为名。

信义旧县 在昆山县西二十里。《太平寰宇记》云：梁天监六年，以娄县地分置。《旧唐书》志云：梁分信义县置昆山县，取县界山名，今昆山信义村即其故址。

范公亭 在昆山县荐严寺后圃，宋参政范成大读书寺中，游息于此，遂名。

四贤堂 在昆山县治。宋李衡为御史，与谏官王希吕相继论张说不报，给事中莫济

不书敕，直学士周必大不草制，四人同时去国。布衣庄治赋四贤诗以纪之，后衡孙潜作堂于家，画四贤像并祀之。

喜廉堂 在昆山县治。宋陈世昌自郡守召对，理宗有一廉可喜之语，因名其堂。

半隐堂 在昆山县治，宋莫仲宣所筑。又有西园，其别墅也。韩侂胄当国，仲宣闲居十年，号西园居士。

玉山草堂 在昆山县西界溪，上元顾德辉筑，颜名玉山佳处。附元杨维桢《玉山草堂》记：昆山隐君顾仲瑛氏，其家世在昆之西界溪上。既与其弟为东西第，又稍为园池别墅治屋庐其中。名其前之轩曰“桃源”，中之室曰“芝云”，东曰“可诗斋”，西曰“读书舍”，后之馆曰“碧梧翠竹”，亭曰“种玉”。合而称之，则曰玉山佳处也。余抵昆，仲瑛必居余佳处所，且求志榜屋颜。按郡志，昆山县华亭陆氏祖所窆，生机云，时人因以玉出昆而名山。昆邑山本号马鞍，出奇石似玉，烟雨晦冥，时有佳气如蓝田焉，故人亦呼曰“玉”，又曰“昆”。而仲瑛氏之居，去玉山甚远矣，奚以佳名哉？山之佳，在去山之外者得之，山中之人未知也。如唐之终南，隐者与司马道人指山之佳，身固在山数百里之外也，虽然终南之佳，终南之隐者未知也。借佳为捷仕之径，千古惭德。至于今，山无能掩焉，若仲瑛氏之有仕才而素无仕志，幸有先人世禄生产，又幸遭逢盛时，得与名人韵士日相优游于山西之墅。以琴樽文赋为吾弗迁之乐，则玉山之佳，非仲瑛氏不能领而有之，与终南隐者可以辨其佳之诬不诬矣！

卫泾宅 在昆山县石浦。其第有友顺堂，宋宁宗书额。

叶盛宅 在昆山县东城桥西，内有篆竹堂。

顾鼎臣宅 在昆山县鳌枫桥。

归有光宅 在昆山县酒坊桥南。

卢熊隐居 在昆山县治西南鹿城。

问潮馆 在昆山县西驷马桥下。《吴郡志》云，昆山虽近江湖，自古无潮汐。宋绍兴间，有道人云：潮过夷亭，出状元。是时潮忽大至，知县叶子强乃筑问潮馆于水滨。明年，邑人卫泾魁天下。

北园 在昆山县漳潭，陈氏园也。石湖范成大书额，东浦黄简为记。

乐庵 在昆山县圆明村，宋李衡归老之地。

乌夜村 在昆山县城南，晋穆帝何皇后父淮寓此。产后之夕，有群乌夜惊于村落，自后有乌夜鸣，必邀恩赦。

寒翠石 在昆山县顾德辉玉山草堂前，德辉自撰拜石坛记。

宋仁宗御书碑 在昆山县清真观内，即放生池碑也。县令项公泽跋。

阴阳柏在昆山县永怀寺内，高丽国所进。高宗以赐王绶，绶种于寺大殿左右，高与殿齐，左花则右实，右花则左实。遇仙树，在昆山县信义村。宋龚猗遇异人，为植银杏，后繁衍至七十余颗，乡人称曰过仙树。

唐卜将军墓 在昆山县西鹿城乡。尝有人得断碑，其略云：将军姓卜，名珍，字文超，西河人。伟异有大志，敬宗时纪纲顿委，藩镇骚然，将军奋孤忠，勋业为世所重，宝历中卒，葬此。

五代吴越秘书郎姜希业墓 在昆山县姜里村凤凰墩下。明嘉靖中，村人取土得石，志云：希业字可大，吴中人也。仕吴越为观察巡官，以秘书省校书郎，宋乾道中卒，葬此。

宋参政王绶墓 在昆山县童桥南。侍御史王葆墓，在昆山县东南新漕里。孝子周津墓，在昆山县小虞浦杨巷村。侍御史李衡墓，在昆山县东南圆明村。陈墓，在昆山县五保湖水中，当锦溪之口有墩，相传宋高宗之妃陈氏葬此。处士刘过墓在昆山县马鞍山东。太师卫泾墓，在昆山县东南石浦镇。

元高士顾阿瑛墓在昆山县。训导郭翼墓在马鞍山之阴。高士顾权墓在马鞍山北麓。

明太常黄子澄墓 在昆山县马鞍山阳。子澄死后，子彦修潜充县里正，收骸骨藏焦山，至洪熙元年乃葬于此。邑人侍郎刘珽为志，万历初裂出于土，载遇难事甚详。孝子陆安墓，在昆山县荐岩寺南，烈妇钟氏祔。处士张伯英墓，在昆山县川乡萧野之西原。尚书顾礼墓在昆山县马鞍山北麓。侍郎刘珽墓在马鞍山麓。布政盛颐墓在昆山县北。太常夏，在昆山县东南迎钟浦。处士龚谔墓在昆山县儒学后。府尹高敞墓在昆山县东南门外。侍郎叶盛墓在昆山县南湓渚里。孝子支琮墓在昆山县虞家巷。侍郎周广墓在昆山县东北蔚州村。府尹柴奇墓在昆山县庙墩。副都李宪卿墓在昆山县一保。侍郎顾章志墓在昆山县六保。知县张振德墓，在昆山县东南蔡巷村。

度城 在新阳县东南七十里，相传为黄巢所筑，旁有度城湖。

颜县城、瓦浦城 并在新阳县东南，皆古经所载。

虹月楼 本名红月楼，在新阳县通阅桥西。元人朱君璧善画，尝作紫雾龙宫图，十年始就，妙入神品。末年兵乱，君璧抱图坐楼中，遥望虹气贯月，疑有至宝，踪迹而至，裂之而去。杨铁崖易其名曰虹月楼，并记。

郑氏园 在新阳县马鞍山前，宋郑竦所筑，叶梦鼎题曰“玉山佳处”。

明侍郎虞祥墓 在新阳县南金涧里。

尚书周伦墓，在新阳县县新洋江东车塘里。寺丞归有光墓在新阳县治金涧里。

扈城

在常熟县北五里石城东。《南畿志》云世传吴王建离宫扈跸故名。今有扈城村。

石城 在常熟县北王里，《越绝书》云阖闾所置美人离城也。《吴地志》云：越献西施于吴王，王择虞山北麓以石甃城，为游乐之所。今其地有石城里。

九里城 在常熟县北九里福山塘东岸，直九折塘口。世传吴王牧马于此，俗呼拦马城，有洗马池，今存。

莫城 在常熟县东南十二里，相传莫邪铸剑处，亦谓之剑城，又谓之莫邪城，《太平寰宇记》云汉莫宠筑以壮海防者。

海虞旧城 在常熟县治，东晋太康四年分吴之虞乡立县。

利城 在常熟县北。《舆地志》云，晋元帝以海虞北境之土山立利城，以处流民。

陶城 在常熟县东三十里，相近阊城郭城，而陶城尤大，与莫城等。合县境共有十二城，盖唐广明中诏诸州州县于村堡置城，集民自卫。

金凤城

在常熟县西北四十八里，唐天祐中吴越所筑，在金凤山下，故名，即金福山城址。

尚墅城 在常熟县北十八里，张士诚入福山港修此城以屯兵。

南沙废县 在常熟县西北三十里。宋书志云，本吴县司监都尉署，吴时名沙中。《琴川志》云，东晋分海虞县置南沙，咸康七年立以为乡。今县西北五十里濒江奚浦一带地，犹名南沙乡。

海阳废县 在常熟县北。萧齐置海阳县，属毗陵郡。盖今县东北滨海之地。

兴国废县 在常熟县东四十五里，梁置。

救虎阁 在常熟县兴福寺左。旧传宋僧彦偁为虎拔箭，故以名阁。其桥名伏虎。

雅集亭 在常熟县治东，县令计宗道偕名流觞咏处，沈周为绘雅集园。

城南佳趣堂 在常熟县虞山东芝溪上。《南畿志》云，邑人虞子贤尝得朱子和张忠献《城南佳趣杂咏》真迹，遂筑堂焉。

巫咸宅 在常熟县虞山，《越绝书》云：虞山巫咸所居。

言公宅 在常熟县治北子游巷。《吴地记》云宅有圣井二，旁有浣纱石，梁时为太子萧正德持去，巷东有言子桥。

夏统宅 在常熟县崇德山，相传晋处士夏统所居。

大公石室 在常熟县虞山东二里。室凡十所，《中吴纪闻》谓太公隐东海居此。

鹿园 在常熟县北七十里，世传吴王参鹿所。

拂水山庄，在常熟县岩湾东，钱谦益所构。中有耦耕堂、明发堂及花信楼、秋水阁、朝阳榭、红豆庄诸名胜。

东皋 在常熟县东。明少参瞿汝悦之别业。子式耜增浣溪草堂、贯清堂诸胜。

小辋川 在常熟县虞山之麓山塘泾南，明御史钱岱创。取王摩诘辋川诸胜，绘景十二于聚远楼东壁，人呼小辋川。

空心潭 在常熟县兴福寺潭上，有通幽轩，皆以常建诗得名。

沁雪石 在常熟县鸥波亭前，海虞县旧署也。有二石：一镌“沁雪”二字，赵孟八分书。钱允言得之，沈周绘图，系以诗；一曰“垂云”，史不可考。

宋郎中陆綰墓 在常熟县破山。防御使周虎墓在常熟县邵家湾。观察使周兴裔墓，在常熟县虞山积善乡。兴裔字克振，道州人敦颐四世孙，以和州观察使扈跸南渡，建炎三年授武功大夫，镇守沿海，死节常熟之福山，赐葬于此，子孙悉祔焉。司徒参军姚嘉言墓在常熟县河阳山。

龙图虞衡墓，在当常熟县顶山白龙祠左。孝子周容墓在虞山北麓报慈里。丞相曾怀墓在虞山兴福寺北。

元万户徐瑄墓在常熟县邵舍。郎中陈基墓在常熟县凤凰山。

明给事中黄钺墓在常熟县报慈里。都御史吴讷墓在报慈里。知府鱼侃墓在报慈里。学士李希润墓在常熟县宋家湾。贤良方正邓彦章墓在北外。尚书程宗墓在常熟县邵家湾。员外程式墓在报慈里，式死土木之难，衣冠葬此。尚书李杰墓在常熟县兴福寺北。都御史章律墓在虞山朱家湾。御史蒋钦墓，在常熟县西山，墓上松皆北向。知县唐天恩墓在虞山东麓。侍郎陈瓚墓在常熟县桃源涧。尚书瞿景淳墓在常熟县宝岩。侍郎徐恪墓在常熟县北门外。大学士严讷墓在常熟拂水岩下。侍郎赵用贤墓在常熟县罗墩。知县王铁墓，在常熟县拂水岩之麓。铁顺天人，筑城御倭死难。

清学士钱谦益墓 在常熟县虞山拂水岩下。修撰孙承恩墓在常熟县河阳里。尚书翁叔元墓在常熟县仁塘里。知县于宗尧墓，在虞山西麓。宗尧常令，有善政，民至今思之。

鵝城 在昭文县东北十五里。隋大业末，诏村坞皆筑城自保，此其故址也。又有朗庄，亦在县境。

极目亭 在昭文县西最高峰上。宋时建，米芾书额，后改名达观亭。万历中，以形家言更名辛峰亭。

朗吟亭 在昭文县丹井东北。明永乐中，道士林复真建，邑令傅良玉记有“季簏有几年不到朗吟亭，亭上风光学倍增”之句。

凌虚堂 在昭文县。《琴川志》云，致道观西北岭上有凌虚堂，下瞰平湖，先名望湖，后易今名，盖取“仲殊凌虚万象闲”之句也。

影娥川 在昭文县治，东晋有见仙娥泛舟者，故名，琴川发源于此。

兴贤池 在昭文县乾元宫。宋庆定中，浚池得石刻“兴贤池”三大字。

昭明洞天

在昭文县乾元宫后。相传徐神翁栖息于此，俗呼仙人洞。其上有篆刻四字。

雪井 在昭文县虞山乾元宫旁。宋元祐，申元道南游，其师徐神翁诫之曰：逢虞则止，无雪则开。遂构井于虞山无雪之处，故名。

丹井 在昭文县治虞山南岭下。明宋濂铭序云：梁天监初，汉天师十二代孙张道裕来隐其下，建招真之地，凿丹井焉。宋淳熙中，道士李正则浚井，得藏丹石，緘启之，化为双红鸽飞入尚湖。迨年井且废，莫知其所，周尊师元真穷日力寻获之，重加以甃，构亭覆上，时洪武元年也。

七星桧 在昭文县致道观，相传梁天监中物。奇古特甚，今尚存其三，余则庆历中补植者。沈周绘三株图。

汉孝子黄香墓

在昭文县梅里镇。宋乾道初，人于此得古碑，舁归家，有光怪，弃之昆承湖中。

清少詹归允肃墓 在昭文县双泾。

前宫、后宫、西宫 在吴江县沈张湖之西，皆吴王夫差离宫也。今村名犹沿其旧。

吴江亭 在吴江县东门外，唐时建。宋县令赵令即其址建如归亭，以待使客，叶清臣为记。朱鹤龄《文类》云：松江亭即古松陵驿，古亭即驿，后人则别置一亭于江上，为游观之所。

鲈乡亭 在吴江县，宋熙宁中县令林肇建，盖取陈瓘“秋风斜日鲈鱼乡”之句。

垂虹亭 在吴县长桥上，宋庆历中县令李问建。杨备诗“松陵雨过船头望，一道青虹两岩头”。

顾野王宅，在吴江县三里桥西，野王著书处也。后人立庙祀之，今名顾墟。

顾荣宅 在吴江县南荒浦村。陆龟蒙诗注云：陆云为荣赠妇诗“我在山川阳，子居五湖阴”是也。今为永定寺。

万玉清秋轩 在吴江同里镇，元宁昌别墅，张可观为绘图。

漫庄 在吴江县，宋处士顾禧所居。禧弃官高隐，乡人重之。

臞庵 在吴江县淞江之滨，《南畿志》云王份故居。圉江湖以入圃，有兴间堂、烟雨阁、聚远楼。

盘野 在吴江县，宋状元黄由之别墅，宁宗赐名。内有墨、庄、胡夫人真迹，三清阁、共乐堂，由自作诗。

小潇湘

在吴江县长桥南，元宁伯让所居。林、亭、台、沼，烟雨时可入画图，故有是名。

南村 在吴江县绮川，元末隐士张铸所居。

睡龙湾 在吴江县黄家溪，相传宋高宗南渡时驻蹕于此，有泉涌出因名。

松陵 即今吴江县治。《吴越春秋》云越追吴入于江阳松陵是也。

斗鸡栏 在吴江县长桥北，相传陆龟蒙养鸭于此。一名鸭漪亭。

仙人洞 在吴江县东门外仙里桥下。深黑莫测，旧传通太湖，约七十里可出林屋洞，宋陈昉于此仙去。

明御史周宗建墓 在吴江县二十七都。

吴城 在震泽县界，今吴淞村。

望仙亭 在震泽县平望镇，相传唐张志和于此仙去。

褚家林亭 在震泽县之西，见《松陵倡和集》。

陆孝子故居 在震泽县，宋陆十七所居，宝祐中，郡守赵汝历旌其门。

震泽别业 在震泽县，唐陆龟蒙所构。朱鹤龄《文类》云：先生所居一在临顿桥，一在甫里，一在震泽镇。集中自遣诗多震泽别业所作，有云“更感卞峰颜色好，绕云才散便当门”。

定轩

在震泽县，宋杨绍云所居。有桃源洞，广数亩，异石林立，刘爚、真德秀曾游此。

汉会稽太守严助墓 在震泽县东南百里，今名严墓村。

明尚书吴洪墓、尚书吴山墓、孝子吴璋墓 俱在震泽县梅里。

尚书周用墓，在震泽县旧十八都西。

清大学士金之后墓 在震泽县。

松江府

华亭侯国 在华亭县。《三国志·陆逊传》建安二十四年封华亭侯。

阖闾城 在华亭县南六十五里夹江，又有城二，相传阖闾所筑以备越。《汉书志》注云：娄县有南武城，阖闾所起以备越，当即此城。

袁松城

在华亭东三十五里，旧图经云晋左将军袁崧筑此以备孙恩。又名筑耶城，疑即此。

前京城 在华亭县东八十五里，萧梁析娄县地置，近浙江海盐县东北境。

白苎城

在华亭县南十里，俗名白苎汇。《大明一统志》云：地生野苎，周围如城。

烽楼 在华亭县东南，《太平寰宇记》云吴时望海处。

折桂阁 在华亭县尉厅。宋李夔以右文殿修撰谪华亭，生子纲于此，又呼相公阁。

三贞堂 在华亭县东，明成化间旌中书舍人张骏家为三贞之门，因以名堂。三贞者，骏母胡氏、世母瞿氏、杨氏也。

玉恩堂 在华亭县西普照寺右，明太仆林景昉宅。后有翼文阁，高敞可眺九峰，其上藏书数万卷。

终慕堂 在华亭县南龟蛇庙左。明张璃自名其居，寓思亲也，钱溥作记。

占星堂 在华亭县北艾家桥东，明宗伯唐文献宅，今为学士沈荃宅。二公俱谥文恪，郡人以为美谈。

陆机宅 在华亭县谷阳门内，今普照寺。相传寺为陆氏园亭，后舍为寺。

柳约宅 在华亭县北。今柳家巷。

顾野王宅

在华亭县亭林镇北。有湖曰顾亭湖，南有林曰顾亭林，今宝云寺其址也。

钱溥宅 在华亭县东三里汀西。

陆树声宅 在华亭县西南沙家桥。

徐阶宅 在华亭县南门内。今督帅府。

冯恩宅 在华亭县薰漕厅旁。

谷阳园 在华亭县西湖上，宋朱之纯退休地。

北花园

在华亭县通波门外。其西即采花泾，其北为夜游泾，皆以园得名。今废为丛冢。

适园 在华亭县北，明尚书陆树声别墅。

芝园 在华亭县东北马寺西，明何三畏所构，中有观濠堂、歌风馆诸胜。

孙家园 在华亭县披云门外，明孙克弘墅。今遗有坊柱，而读书楼危峙将圯，奇石卧荆棘中。

傲园 在华亭县南，明翰林孔目何良俊别业。园有四友斋，谓维摩诘、庄周、白居易与良俊而四。

熙园 在华亭县积善桥左，明光禄丞顾正心别墅。附明张宝臣记：昔胜国时，玉峰顾仲瑛氏园池甲天下，至今人能追其桃溪金粟菊田之室之美，宛在眉睫，则铁史如椽之记存焉尔。吾松顾氏熙园脍炙海内，凡结绶宦游携筇云集者，靡不载酒相过，恣情搜讨，以为江左之丽瞩、遐之夸谈。今秋观潮浦口，适集兹园，得详览焉，遂为之记。园距东郭三里许，面水而门，门内为四美亭。启左扉而北，落落长杉，潇潇疏竹，夹植径中。行数十武而危楼翼然，榜曰“熙园”，是园之启途也。东入山径，苍苔碧藓，似武陵道中。折而北，俯仰盘旋，陡入深壑，嵌空中，时闻淙淙声，疑山背有龙湫焉。复折而南，逾峻岭、下层峦，豁然天门开，则流觞曲水在其下。驾水为听莺桥，花时趺坐，睨盈耳，可当数部鼓吹。倚桥面南而临者，芝云堂也。其阳则奇峰万叠，古树千章，苍茫云际。而下则华沼一曲，荷香十里，恍忆太液池头。好事者每欲穷其幽致，则入西麓、出东隅，如登九折坂。入五溪洞，快石咙、林薄阴翳、幽崖晦谷、隔离天日。自午达晡，始得穿窬出，客外坐方饥疲欲卧而出者争目眩汗浹，魂摇摇不得吐一语也。噫，奇观哉！其阴则菌阁药房，霓连云蔓，复道相属，行者每失故步。商周之鼎彝，唐宋之图画，纷披闾骈其中，不可更仆数，则主人安神思道之所，非酌霞枕香之友弗能到也。凭楼西眺，旋台飞观，隐隐树杪间，冠以玉树琼花罨映下方，令人可望不可即。堂之左为长廊响屐，隔岸土阜蜿蜒。

蛭，杂植梅杏桃李，春华烂发，白雪红霞弥望极目，又疑身在众香国矣。绕廊而北，渡飞虹桥，桥平广滑泽，可坐邀月。大士阁兀立桥畔，题曰“水月如来”。稍东为池上亭。又东渡板桥为与清轩，前临广池，灏漾潢漾，绣尾银鳞，出没无算，巨者赍浪飞涎。客至举纲击鲜，称快事。遥睇南岸，皓望绮疏，隐现绿杨碧藻中，其壶瀛宫阙，幻落尘界乎！繇是陟彼北下，平冈逶迤，高梧修竹荫蔽左右。西达齐青阁，北望平畴绿净，款乃四起，人疑下有朱陈村，第少鸣鸡吠犬耳。阁前周绕广除，可驰骏足。对面翠屏壁立，峭萼郁盘。玄裳之客、斑衣之友，时游娱其上。累数级下，依水而屋，雕栏绣楹，虹飞霞属，歌声时出帘箔中，则小秦淮也。南遵回廊数十盘，鼻间微闻旃檀气，则罗汉堂峙焉。堂供簿伽像三，傍列五百应真，金碧庄严，钟梵俱设。堂后小阁三楹，藏贝叶书甚富。时倩高缙翻阅，铎声琅琅出牖外，俨然古招提也。当前一巨石，高十丈余，四面玲珑，真襄阳谱中物。初得是石，未有盘，载至泖泾舟覆石沈，牵挽而出先得盘，次乃得石，合之，其旧偶也。珠还剑合，独神千古哉！构堂时掘地得古铁缸，大可容十斛，今以作焚炉，亦异物也。堂左经关壮缪祠，度灌锦梁，并步虚廊，寻石窦而出，则为芝云堂之右，旷然广庭，而园之观止矣。是园也，石第一，水第二，亭台花木桥梁之属第三。梓泽平泉遐哉邈矣。以余耳目所睹记，如娄水之王，锡山之邹，江都之俞，燕台之米，皆近代名区。顾有其巨丽者，不必有其间旷；有其清秘者，不必有其广平。盖清宇先生掷数十万金钱，救两邑疮痍，其胸次真可吞云梦八九，故规模位置轶前哲无两。而嗣君原之文孙元庆大雅亢宗，又皆以绘事擅长，胸臆间具有邱壑，增修点缀，俱从虎头笔端、摩诘句中出之，宜其胜绝一代也。余不揣芜陋，聊述梗概如此，岂能若铁史之铺飏乎？

东庄 在华亭县车墩东，明孙承恩别业。有读书堂，丛桂、吸月、悠然三亭，聊壁池、玉虹轩、翠云屏、香雪林诸胜。

一峰小隐 在华亭县北柳家巷，黄可望隐居处。今福泉庵是其遗址。

凤山书屋 在华亭县东，明朱应祥读书处。旁有点易台、洗心亭诸胜。

乐琴书处 在华亭县东北，明学士沈度所居。

云窝

在华亭县东，明太学生张正宗讲学授徒之所。著有《大学说》，门人侯荇为之传。

小湖 在华亭县西城湖，已湮涸。谷阳门内德风桥有堤，泽汇城下疑其遗迹。

水陆池 在华亭县兴圣寺。昔有龟数枚，闻讲经声则缘砌而上，讲罢则去，后以其地为棠溪书院，池在院中。

吴王猎场 在华亭县东南。旧图经云：吴王猎所有五茸，茸各有名，在华亭县谷东。又云：陆逊生此，子孙常所游猎，后人呼陆机茸，今其地为桑陆。

读书堆 在华亭县亭林宝云寺后，陈顾野王读书于此。堆高数丈横亘数十亩，林樾苍然。野王墨池在其侧。

罗汉井 在华亭县南禅寺。《大明一统志》云：宋崇宁中，僧普愿凿井得罗汉像，故名。井泉甘冽。

五色泉 在华亭县西湖道院内《大明一统志》云：相传葛稚川炼丹湖上，丹成投水中，后常涌五色泉，士人见者必擢高第。

黄耳冢 在华亭县南二里。旁有普宁寺，俗讹黄泥寺。《述异记》云：陆机有快犬曰黄耳，慧黠，解人语，机仕洛，为书置竹筒，系犬颈，犬能往还驰报。犬死葬其村南一百步，曰黄耳冢云。刘贡父诗话又以黄耳为仆。

石幢 在华亭县署。地有涌泉，云是海眼，大中十三年立此镇之。

吕公樟 在华亭县北道堂内。相传宋时有回先生过此，手植樟一株于云堂后。数年复来，问章公何在？时樟已枯瘁，乃取瓢中药一丸瘞根下，樟复荣，每叶俱有瓢痕，人始悟吕仙也。

汉颍川太守陆閼墓 在华亭县西北四十里。

三国吴大司马陆抗墓、尚书陆瑁墓、左丞相陆凯墓俱在府城外。
海盐侯陆祗墓在华亭县昆山。

晋左光禄大夫陆晔墓在府城西四十里。平原内史陆机墓，在华亭县西北二十五里。又青浦县治北三十里有高邱，旧传云陆丞相墓。明嘉靖间，士人见墓上有一金蛇，盗伐其冢，得古器甚多。后闻于官，悉捕治，命封其茔地。

唐朝散郎顾谦墓 在北亭乡崧子里。

五代前蜀丞相潘葛妻李氏墓 在潘店北杏泾之左。碑上有“天汉四年葬”五字。按：潘葛为丞相，不见五代史，天汉仅一岁，何忽称四年，时松江为吴境，何以葬此。殊不足信。

元义士夏椿墓 在华亭县细林山。

明尚书张璠墓、尚书张悦墓、尚书孙承恩墓 俱在华亭县盘龙塘。
修撰钱福墓在府东华阳桥。 太常卿夏衡墓在府城南彭家庄。
赠大学士徐鼐墓在景家堰西。 尚书顾清墓在唐桥。
太仆卿沈恺墓在北城濠土。 侍郎徐陟墓在府城西南。
尚书陆树声墓，在北城濠北，子刑部侍郎彦章祔。
寺丞冯恩墓，在古浦塘，子通判旌表孝子行可祔。
给事中杨允绳墓在叶谢河西。 副使周思兼墓在蔡成泾。
布政莫如忠墓在华亭县御史泾。 尚书唐文献墓在府城北。
赠金都御史杨枢墓，在任淇浜，徐阶铭。
副使杨道亨墓，在修竹乡，太仓王世贞铭。
副使龚恺墓，在御溪东，陆树声志铭。 太仆卿林景旻墓在府城外。
赠侍郎董体仁墓在望海塘。 太学士钱龙锡墓在府城外。 侍郎董传策墓在新河。

清总兵张仕杰墓 在华亭县三十九保。仕杰西安人，入籍华亭。

胥浦城 在娄县西四十里，相传梁大通间筑，以城接胥浦故名。

秦始皇驰道 在娄县西北昆山南四里。相传有大路西通吴城，即驰道也。《輿地志》云始皇东游至会稽句章经此。贾山至言云：秦始皇驰道遍天下，南极吴楚，此其一也。按昆山南四里即古浦塘，然则驰道即塘之岸也。山之北，又有秦皇走马塘。

小蓬台 在娄县，元末杨维桢寓楼也。踞百花潭上，明贝琼为志。别有拄颊楼、草元阁。阁近迎仙桥西北，明成化间犹存。附贝琼志记：按东方朔《三岛记》，蓬莱在东海北，周五千里。秦皇遣徐福往求不死药，至辄有风引帆而返，俗疑其妄。会稽为东南大郡，旧称小蓬莱，则以其地似之也。铁崖杨先生族出会稽，而老于松上，即七者寮之东偏，葺楼一所颜曰“小蓬台”，示不忘越也。台俯大川，别二支，其一南流，其一北折而东，中汇为百花潭。有三石梁跨川上，南曰“金鳌”，北曰“铁龙”，东曰“玉虹”。是松之胜毕效于兹。而为小蓬台所有，江云海雨、山红野绿、举在几席之下，则视会稽之蓬莱大小不同其超乎埃，不啻真在云气中矣。先生晨兴披鹤氅，冠铁冠，燕坐其上，客至不下台，好事者就见之，相与高谈大噱。或出桃核杯酌酒，酒半，取铁笛作长短弄，旁若无人，观者以为谪仙人也。琼惟先生早擢高第，宰天台，后去而客钱塘、姑苏者久之。州郡兵起，往依元帅刘九九于建德。九败，挈家东下，松之通守顾逖具舟楫迎之。盖去会稽三十年而息于是，非蓬莱而蓬莱矣。

光节堂 在娄县西吉丽桥南。明福建参政任勉之致仕归，杨士奇赠以“登科、致仕、恩荣、始终”八大字，周忱为刻石树堂下。

七松草堂 在娄县西，张氏别墅。水木清美，老松七株，尤奇古，故名。

二陆草堂 在娄县千山，即今之圆智寺，陆机与弟云读书处。

南村草堂 在娄县泗泾北，元陶宗仪耕读之所。

顾清宅 在娄县东。

秀甲园 在娄县秀野桥北，清少傅王文恭项龄别墅。康熙乙酉，圣祖南巡，临幸其地，时藤花盛开，御赐“蒸霞”二大字。越岁复幸园中秋水轩，项龄绘图记恩。

锡金园 在娄县谷阳门外，尚书王鸿绪别墅。康熙乙酉，圣祖南巡幸之，赐御书“松竹”二大字匾额。丁亥，复驻蹕焉，鸿绪有诗恭纪。

小山招隐 在娄县小横山下，元孙稷别业。有仙圣馆、凝翠轩诸胜。

云间洞天 在娄县东南里仁坊，宋参政钱良臣园。《南畿志》云：今钱家巷其遗址也，有御书“云汉”“昭回”之阁及东岩堂。巫山下十二峰、观音岩、桃花洞、雪窗云榭、来禽渚、流杯亭、桃蹊、杏村、龟巢橘坞、明月湾、檐卜林诸胜，后渐废。明成化间，郡守輦数峰置署圃，至今存焉。

平原村 在娄县机山下，陆机曾为平原内史故名。

养鱼池 在娄县西，晋陆瑁养鱼处，《大明一统志》云：一名瑁湖。

唳鹤滩 在娄县西三里，《大明一统志》云在养鱼池旁。旧有亭，今废为接官厅。

八角井 在娄县西南，与张泾桥近。其水通海，相传岁旱投铁筒于中能致雨，俗谓陆氏外厨井。《大明一统志》云在陆氏宅旁。

瑞光井 在娄县西南超果寺西庑下，《大明一统志》云：宋太平兴国中，僧庆依奉吴越钱王宫中观音像至松，像舒祥光如虹贯于此井，因名。后复睹金镬之异，邦人病者多汲饮焉。东一井尤甘冽。

石鱼

在娄县干山之巔，相传风雨时每化去，其胁有泉，游人掬以颧面，云能明目。

汉卢江太守陆康墓 在娄县西北二十里。

三国吴丞相陆逊墓 在娄县西北二十三里。

晋西阳亭侯陆监墓 在娄县。

元三高士墓 在娄县干山东麓。三高士者，杨维桢、陆居仁、钱维善也。
贞素先生曹知白墓，在娄县千山，子永祔。 兰溪知州章梦贤墓在崧宅里。
夏世泽墓在娄县订贤乡。 松江训导王文泽墓在娄县横云山。

明御史袁凯墓 在东门外贤游泾。 宜城伯卫炳墓在府城内北禅寺右。
赠尚书张瑄墓在城南龟蛇庙侧。 府尹吴玘墓在府东六磊塘。
布政夏寅墓在娄县西白龙潭。 都御史唐珣墓在娄县北荷祥泾。
给事中张承宪墓在娄县天马山东南。
给事中夏时墓，在娄县古浦塘，陆树声志铭。
太常寺卿张明正墓在泖港吴泾，太仓王锡爵铭。
知府彭应麟墓在浦南龙溪，徐阶铭。 谕德张以诚墓在朱桥镇。
布政使杜乔林墓在娄县二里泾。
张烈妇姚氏墓，在娄县天马山之阳，董其昌书碣。 御史徐宗鲁墓在娄县秀野桥。

清娄县令李复兴墓 复兴滨州人，留葬钟贾山。
太子太保尚书张祥河墓，在娄县四十三保二十二图。

双寿堂

在奉贤县菑泾，明光禄少卿周详奉亲之所。尝迎养京邸亦揭是名。缙绅题咏甚富。

曲水草堂 在奉贤县百曲港上。明宣德末，姚蒙与弟临隐居之所。

卫泾宅在奉贤县萧塘，今为崇福寺。按泾生于萧塘，后乃迁石浦，居民尝于古井得巨砖无数，皆有卫仲英三字。仲英肤敏之子，与泾为从兄弟也。

阅耕轩 在奉贤县南桥镇，明参政陈贞父士杰田居，方孝孺有阅耕轩诗序。

司马庄 在奉贤县白沙里，明张辅别业，张弼有记。

古冈身 在奉贤县西南，曰沙冈、竹冈、紫冈，南属于海，北抵松江，长百里。入土数尺皆螺蚌壳，世传海中涌三浪而成，其地高阜，宜菽麦。《吴郡图经》云：滨海之地，冈阜相属，谓之冈身，此天所以限沧溟而全吴人也。

三女冈 在奉贤县南桥。旧图经云吴王葬三女于此，《枢要》云葬妃于此。相近有明行寺，今寺北二里有高冈，是其处。

三国吴宛陵侯诸葛瑾墓

在奉贤县坍石桥西。雍正九年，知县舒慕芬于其地得残碑因重为立石。

元朱柯墓 在奉贤县横泾。

明四隐墓 在奉贤县陶宅。杨仁寿、李障、华瑾，一人逸姓名。
祭酒陈询墓在奉贤县瑶泾。 侍郎蔡汝贤墓在奉贤县望河泾。

清处士王光承墓 在奉贤县蔡家桥。

金山城 在金山县。旧图经云：周康王南游筑此城镇大海，南接金山，故名。又相传吴越钱氏筑此为戍守处。

鲁般殿 在金山县洙泾法忍寺，相传为般所造。齐柱累栴为脊，鸟雀不栖，殿庭双柏亦甚，古云般所植。病心者掇其皮煮服之。今萎。

不碍云山楼 在金山县张溪，元杨谦隐居处。附元杨维桢记：余尝北渡扬子记金山之胜，而不知松之南又有所谓大金小金出没于云海之中，如壶峤之在弱流外也。至正九年春，余抵松之张溪，溪之东有大族为杨竹西氏居之，南扁其楼曰不碍云山。竹西宴于楼之上，窗户四辟，万顷之云，两鳌之岛，皆自献于眉睫之下。竹西风日佳时，岸巾楼上，手挥五弦之余，与一、二解人谈至理。既以八窗无碍者辟于目，复以八荒无碍者洞于心，云山之观尽矣备矣。竹西恍然若有得，起举酒而自歌曰：“海之云兮油油，雨我田兮有秋。海之山兮离离，障我流兮东之”。又歌曰，“云之动兮跼跼，吾与云动兮，动而不迁。山之静兮层层，吾与山静兮，静而不停”。并录其歌，以为记。

乐全堂 在金山县泖泾，元黄宗武宅。附元虞集记：华亭黄君宗武隐居长泖之湾，植耕桑乎衍沃，艺卉木乎幽胜。上以奉乎百岁之父母，下以长其奕叶之子孙，优游焉。诵诗读书于太平之日，盖厚德之致也。而时未有闻焉，其季子璋举进士，贡于京师，而大夫士始知其家有所谓乐全之堂者，皆欣然称道之。璋来求文以为记。夫黄氏之乐如前所云者，信乎其可谓全也。己亲之寿也，身之康也，子之文也，甘旨之充也，藏修游息之有所也。遭夫时之无虞而不见外事，将天锡之以全也与。噫，求全焉则志荒，有其全则意肆，善保其全者，知止而不自足者也，长泖之乐盖如是乎！若夫圣遇之所至，与天地同流而无所亏欠间断，而后乐生焉，是又全而乐者也。璋归，试诵余言于家庭之间乎？

来德堂 在金山县，元末吕良佐、杨维桢作记。

瑞芝堂 在金山县，明卫指挥西宁宅。有芝生楣间，因名。张弼作记。

秦望山庄，在金山县张堰西，清尚书王日藻别墅。亭台树石为郡南胜区。

柘湖 在金山县新连盐河北，东邻徐浦塘、张堰。《大明一统志》云：湖中有小山生柘树，因名。秦时有女子入湖为神。

鸚鵡洲 在金山县界海中金山下。山北古海盐洲，后沦为海。元末湖 契北岸，下瞰桥井，犹见一碑曰“鸚鵡洲界”。

钓滩 在金山县洙泾。《大明一统志》云在府城南三十里，唐船子和尚垂纶之地。今为法忍寺，又有松泽四亭，是其维舟咏歌处。

周公墩 在金山县捍海塘外墩，距金山城不十里，当潮势奔猛处。疑古人所筑以戍兵防海者，或因周康王金山城得名。又有白茅墩、逢陈墩，皆旧烽堠。

元处士殷澄墓 在金山县胥浦乡，杨维桢铭。

明怀远将军侯端墓 在金山县秦山麓。主事徐三重墓在金山县三保。

金都御史陆树德墓在金山县秀州塘。

通政使许乐善墓在金山县吕冈泾。大学士方岳贡墓在金山县掘挞泾。

清尚书王日藻墓 在金山县寒字圩。大学士王项龄墓在金山县宙字圩。

太常少卿高层云墓在金山县张堰。

丹凤楼 旧在上海县天妃宫内。后楼毁，明秦嘉楫修拓城楼，因以旧额移置其上，即以为丹凤楼云。

归雁亭 在上海县城东。元费用和畜双白雁及二雏于园池，以环着其足，后去而复还，毛羽光洁，足环俨然，时构园适成因名。

讲经台

在上海县静安寺。宋嘉定间，寺僧仲依筑土台，聚其徒讲习于此。遗址犹存。

三寿堂 在上海县城南。明潘恩年八十时，华亭徐阶、嘉兴吴鹏咸以同榜来称寿，宴于堂，故名。

勤织堂

在上海县城东，明蒋性中作堂以奉母。母以生平勤织教之，性中拜受，遂以名堂。

后乐园 在上海县黄浦东澳，明陆深宅。

豫园 在上海县城内，明潘方伯允端别墅。中有玉华堂，允端藏父恭定公恩所宝奇石，曰玉玲珑者，故以名堂。

笔议轩 在上海县何溪，元末彭汝器评《宋史》之所。

古村居 在上海县城南，明曹迪隐居之所。中有清概轩、瓢乐山房、宝古斋。

芦子渡 在上海县静安寺西旧沪渎旁。俗呼为芦子城，亦晋虞潭防海寇处。

文翠洲 在上海县界黄浦中。元末始广寻丈，后延袤至数十亩，王逢携里叟门生共登，适鸣雉群集，作诗纪之，因名。

沪渎垒 在上海县，旧有东西二城，尽于江。《吴郡志》云：松江东泻海为沪海，亦曰沪渎，渎旁有垒，晋虞潭所筑。《通鉴》云：隆安四年，吴国内史袁崧筑，以备孙恩。

涌泉 在上海县静安寺前。昼夜腾沸，甃井作亭其上，后亭废、井湮于港中。又有绿云洞，僧寿宁栖息之所。桧竹桐柏，层阴叠翠，落人衣帽，游者疑为华阳小有之境。赵孟颜之，杨维桢为记。

赤乌碑 在上海县旧静安寺。吴赤乌中，天竺僧创重元寺，勒碑纪事。宋祥符间，敕名静安。嘉定中迁寺，而碑没于江。元钱岳诗云“悲凉断刻三江里，想像雄文六代前”。又有陈朝桧，唐陆龟蒙、皮日休有重光寺双桧诗即此。宋政和中，朱勔绘图以进，中使取之，雷碎其一。而殿石者尚存，后寺迁亦没。

元秦裕伯墓 在上海县二十一保。

明詹事陆深墓 在上海县黄浦东。副都御史唐瑜墓在上海县周泾北。

大理寺卿王霁墓在上海县陆家浜。右通政赵灼墓在上海县五里桥。

侍郎顾彧墓在上海县二十二保。孝子顾文敏墓在上海县西门。

侍郎张电墓在上海县淡井里。都御史潘恩墓在上海县陈泾。

大学士徐光启墓在上海县徐家汇。光禄少卿顾从礼墓在上海县日赤桥北。

侍郎董羽宸墓在上海县。

都察院佥事俞汝为墓，在上海县龙华寺西，长洲文震孟铭。

清侯氏节孝阡 在上海县圆沙。尚书张照墓，在横泾，门人沈德潜铭。

副都御史陆锡熊墓在上海县二十七保四图。

户部主事赠光禄寺少卿赵文哲墓，在上海县二十二保十七图。

尚夷斋

在南汇县鹤沙里。元末朱听作诗好奇，杨维桢名其斋曰“尚夷”，以规之，有铭。

石笋滩 在南汇县界下沙捍海塘外，到海三十余里。每二三丈辄有石如笋，植立沙中，潮汐至此分流，又名分水港。

鹤陂 在南汇县下沙镇，其地产鹤，俗又呼鹤窠。

晋左将军袁崧墓 在南汇县长人乡。崧为贼害，其下李祥收骨归葬。

宋诗人储泳墓 在南汇县周浦镇。

元孝子徐诚墓 在南汇县长人乡。转连使瞿霆发墓在南汇县下沙。

清总督施维翰墓 在南汇县闸港。

赠工部侍郎叶映榴墓在南汇县。侍郎张集墓在南汇县北四灶，太仓王掞铭。

工科给事中曹一士墓在南汇县横沔上。

来青楼、揽辉楼 在青浦县青龙江上，俱元都水监任仁发延赏之所。杨维桢诗云“大江如龙入海口，青山似凤来云间”。

翡翠碧云楼 在青浦县杜村，元杜元芳构。以其庙出林表，故名。中贮书万卷，下有苍碧湾及竹深荷净、晴好、雨奇诸斋轩，凡七十二所。其别业在东南云林，池尤胜。

知乐亭 在青浦县大小蒸之间。宋邵桂子凿池养鱼，筑亭其上，以知者乐水、知鱼之乐二义名之。

醉眼亭 在青浦县青龙江上，宋僧行中无悔所筑。苏轼名之，有诗。

升仙台 在青浦县青龙江隆福寺前。有石刻云王可交仙坛，遗迹具存。

心远堂 在青浦县钟贾山寿安寺。山人钟子鸣先世与贾姓同隐寿安山中，人以钟贾名其山。此堂疑钟此遗迹，栖雪楼半云亭皆名胜。

厚堂 在青浦县蒸溪，元曹知白居。虞集有记。

居竹书堂 在青浦县元曹和甫宅。方回记，赵孟书。今碑石在府学内。

乐静堂 在青浦县蒸溪，元教授曹泽之休坐处。又有园亭曰“息影”，泽孙植竹千竿，颜曰“居竹”。元方回有记，赵孟书碑，在府学内。泽之从孙知白筑古斋厚堂等八十余所，虞集有记。

孔宅 在青浦县治北九里。宋淳熙间，居民浚河得碑，云天宝六年黄池县令朱氏葬于昆山县全吴乡孔子宅之西南。其地有夫子庙，在慧日院侧。院僧疏庙隙渠，得宝玉六事，璧三，环二，簪一，今藏县库。旧图经云：夫子未尝适吴，以阙里谱系考之，孔子二十二代孙潜，后汉太子少傅避地会稽，遂为郡人。二十九代滔梁海盐令，三十二代嗣哲隋吴郡主簿，三十四代贞隋苏州长史。意孔氏子孙有侨寓宦游于吴而遂居此者，即所居立先圣庙耳。今庙侧又有梁纥庙，其为子孙奉祀之地明矣。所瘞璧、簪、环、珮之属，真孔堂之遗宝，得非葬先圣衣冠宝璧于是地乎？其旁有宰我墩、颜渊井，则因孔宅之名而迁合附会者也。宅后侵于慧日院，今在孔宅经北，夫子庙在泾南，相去颇远，梁纥庙西去益远，疑后人改作也。康熙乙酉春，圣祖南巡，赐御书“圣迹遗徽”四字扁额。又“泽衍鲁邦四海人均化育，裔分吴会千秋世永烝尝”对联。

袁崧宅 在青浦县泗泾塘崧宅镇。晋隆安中，崧为郡太守，子孙遂居于此。今其地曰崧子里，水曰崧塘。

西园 在青浦县富林，明曹泰别业。

安雅斋 在青浦县，元教谕曹庆孙藏修地。

万卷轩 在青浦县青龙江，元庄肃聚书其中。

三味轩 在青浦县，元张麒以菰米、莼菜、鲈鱼三味奉亲，故名。附元张维贞记：松江之集贤乡有隐者张氏曰麒，字国祥，自幼清修谦谨，长称鞠躬君子，丁兵变，晦迹祥泽，日与古渔老樵为山水伴。人劝之仕，则曰：余世力农，素非食肉人也。且藩服尚武，又非吾仕之时，子独不闻吾步兵之仕乎？出赴齐王问辟，秋风改衣，径决去。捷如脱兔，不顷刻留，卒不与沓禄者同铁镬。而甘藜者，乃故乡菰饭、莼羹、鲈绘三味而已耳。余幸不违亲于异乡千里外，田有菰米无歉年，水有莼菜鲈鱼无馐岁。日以三味为吾菽水之奉，而余以覃吾宾友，其乐充然也，奚以仕为？故颜其轩曰“三味”，虽大贵人方丈食前，五鼎九牢不以易也。东维叟舟过通波塘，麒不远水陆程，延致于三味所。治酒食，张桐弄竹为叟欢。叟兴酣，为秋声琴，抚鹤南操以高之。辞曰“骥北逝兮鹤南旋，松之庐兮八世其延。鲈有段兮菰有田，羹我莼苽兮酿我泽泉。诵有书兮歌有弦，归与归与，乌知金罍之瘁口兮，玉笋梗咽。

就麓山居 在青浦县西佘山，明施绍莘别业。

白石山寮，在青浦县东佘山，明徵君陈继儒栖隐处。

悟溪精舍

在青浦县表龙江上，元江阴王逢避地之所。中有萝日山房、冥鸿亭、小草轩。

骆驼墩 在青浦县簪山北，又呼落弹墩。相传宋理宗妃林氏葬此。

绫锦墩 在青浦县盘龙江上，元钱全袞种桑之所。全袞尝于此修郡志，并韵书。

十井 在青浦县钟贾山寿安寺。环有十井，水极清冽，盖十道庵遗迹也。

沈光碑

在青浦县青龙镇胜果寺。有鬼自称有汉烈士沈光书迹刻石，宋许尚谓之鬼书。

试剑石 在青浦县北簪山东壁，相传干将试剑于此。一石中剖，宛如剑截。

汉濮阳王墓

在青浦县小蒸西四里。(按《汉书》，无濮阳王，且不应在此，存疑俟考。)

宋赠太子少保朱承进墓 在青浦县佘山。 将仕郎卫公佐墓在青浦县佘山。

乐静先生曹泽之墓在青浦县小蒸。

元卫谦墓 在青浦县佘山。 江夏公费墓在青浦县陆宝原。

宣慰副使任仁发墓在青浦县骆驼墩。

明侍郎王钟墓、训导邵亨贞墓、尚书钱溥墓、府丞朱孔昉墓 并在青浦县佘山。

知府张弼墓在青浦县凤凰山。 大理卿朱奎墓在青浦县佘山。

张节妇姚氏墓在青浦县凤凰山。

杨烈女墓，在青浦县淀山寺侧，华亭知县郑友元立传。

徵士陈继儒墓在青浦县佘山。 学士沈度墓在青浦县薛山西麓。

清侍郎沈荃墓 在青浦县朱家庄。 河南巡抚胡宝珠墓在青浦县兰笋山。

第三卷 常州府镇江府

常州府

毗陵 今常州武进县。《王国志·朱治传》：黄武元年，封毗陵侯。

武进旧城 在武进县西北七十里千秋乡，吴大帝改丹徒为武进。南兰陵故城，在武进县西北。晋太兴元年，萧整自兰陵过江，居武进之东城里。时寓居江左者，皆侨置本土加以南名，始置南兰陵郡及兰陵县。《南畿志》云：府北八十里万岁镇西南。姑幕城，在武进县西南六十里。东晋侨置于晋陵南境。今有大姑小姑二城。

鼓城 在武进县东北二里德泽乡。有方圆二城，东西相对。或作虎城，《南畿志》作古城。又县北有韩城，《南畿志》云：五代时，有韩王筑此。县北三十里有酬城，又北十五里有禄城，皆五代时戍守处。

傅洛城 在武进县西北九十里，今通江乡傅庄即其地。《祥符图经》作博洛城。

南东莞故郡 在府南境，东晋侨置于晋陵南。

南彭城故郡 在府境，晋元帝时分武进置。

晋陵故县，即今武进县治。吴延陵邑，季札所封。汉为毗陵县，晋怀帝时改为晋陵。《大明一统志》云：即今公馆。

毗陵宫在府东南十五里夏城镇。隋大业间，敕十郡兵匠于郡东南创宫苑。周十二里，内为离宫十六，环以清流，荫以嘉木，拟于洛阳西苑，而奇巧遇之。今自城而东南，冈阜环列，地形高昂，即其遗址。

陈氏书楼 在武进县奔牛镇。梁武帝素与陈文表善，帝即位，授以官，不受，愿归教子，敕建是楼居之。

红梅阁 在武进县古荐福寺，相传薛道光与张叔修炼于此。

香泉亭 在武进县牛郎桥下。有井泉香冽，能愈病。宋苏轼建，今圯，“坡仙遗迹”匾额尚存。

东山亭 在武进县荆溪馆前。唐大历中，郡守独孤及建，韦夏卿记。

多稼亭 在郡治内子城西北隅。宋乾道间，郡守晁子健建，张栻为之记。《大明一

统志》：宣德中重修。

荣赐亭 在武进县状元桥西南。宋大观三年，会试天下贡士，独毗陵五十有三人，诏褒之，赐州守徐申爵一级。申遂立坊于桥南曰“进贤”，建亭曰“荣赐”。

琴台 在武进县伯牙渚。一室空洞，虚应有声，若琴。相传伯牙于此鼓琴，弃琴渚中，渚产琴鱼，弦徽悉备。

金牛台 在武进县奔牛镇西五里。《舆地志》云：汉时，有金牛出山东石池，到曲阿，人棚断其道，牛骤奔，故名。齐高帝尝与萧顺之登此。

留瓠堂 在武进县安德门内，明天顺间徐王南《所居。猷尝遇一道士，奉之甚虔。王南《贫，道士以囊金留其家而去，数年未尝解其囊。道士义之，投一瓠而别曰：“冬来无蔬，剖而食之”。及剖得医方一卷，试之辄应，遂大富，乃名其室。

宣嘉堂 在武进县旧晋陵县治东。宋大观间，县令李景得古壁，有篆文曰“位至公卿，功冠天下令名宣扬，万姓嘉昌”。字画奇古，遂以名堂。

梅庵 在武进县。明宫谕赵琬筑，杨士奇、周忱、商辂皆有记。薛瑄颜其堂曰“桃李先芳。”

李仆射宅 在武进县罗墅西北，齐尚书李安民居此，倚马石犹存。

陈氏别业 在武进县徐墅西。宋通判陈炤别墅，手植古桧，大数十围，今名陈墅。

万岁街 在武进县阜通镇，梁武帝故里。

天子路 在武进县万岁镇西。旧传秦始皇游此，或曰齐高帝出镇东城，及为天子，后人呼为天子路。

孝义里 在武进县通吴门外孝仁乡，梁孝子余齐民所居。宋避熙陵讳，改曰“孝义”，即以名乡。

钟村 在武进县西北三十五里，相传钟子期所居。

孝感渚

在武进县漏湖西。旧传晋王祥孙俊封永世侯，尝居此陵，追慕祖德，故以名渚。

古毗陵驿

在武进县天禧桥东枕漕渠。以通荆溪，一名荆溪馆。宋高宗车驾幸金陵，常经此。

八角井 在武德县卧龙桥下，明沙世荣所凿。时大旱，居民饮浊水辄病，世荣掘井供众饮，一方赖之，呼为沙氏义井。又阳湖县东明寺亦有八角井，味甚芳冽。相传明天启间，有龙从井出。

沸井 在武进季子庙前。

独孤桧 在郡圃，唐郡守独孤及所植。

木棉 在武进县金牛墩亭上，大数围、挺无枝叶。高宗纯皇帝南巡，召善绘者图之，莫能肖。刮其皮，则夹岸房屋、人物皆映其中。

临川里

在武进县。宋王安节殉难于此。其四世孙自临川来，居此守墓。今坊额犹存。

汉刺史刘繇墓 在府北滨江。史称繇卒于豫章，孙策载其丧还葬。
谏议大夫蔡邕墓在武进县。

晋琅琊王墓 在府城西五里运河南，即今所祀之琅琊王神也。
隋司徒陈仁杲墓，在府陈湾山，相传山以墓得名。

宋忠定张寿墓 在府境，元被发。知州许琮墓，在马迹山大墅湾。琮子季玉年十八，登乾道二年进士，擢知制诰，以忤权贵，谪知汾州，尽心民事，人颂之。又有探花许必胜墓，亦在马迹山，琮之后也。

宋直龙图阁邹浩墓 在青山门外，地名林庄，墓道在直街西。浩崇宁中归自岭表，政和初卒，葬此。嘉定间，郡守胡卫命教授赵琳即墓建庵，给田贍祀事。附元脱脱木儿复修邹忠公墓诗序：至正庚寅冬，常之监郡太守率寮属祭道乡先生邹忠公之墓，士君子莫不赋诗以颂休德，俾予题其端。予惟道乡先生实故宋之忠臣，当元符间，正言极谏，务去奸邪，以清弊政，而整纲常。言弗见施，谴黜不悔，载诸史传，赫赫犹在人耳目，万世祀之，不可泯也。自元兵平宋，迄今百余年，松楸净尽，地亦在村氓渔牧寒烟野草间，独遗冢存焉呼！可悯也。问之监守是郡者，未尝一至而访其事，日往月来，其不没于耕犁者几希矣。今二公以内朝之硕臣，出莅兹邦未逾年，政平人和，凶遁奸革，既底于理，而又崇学校之教，访前贤之迹，百废具兴，行前人之所未行，于是郡人谢子兰乃上邹事以请，二公乐从之，即归墓田籍于学。至是，具牲帛亲抵于郊以祭，为之伐秽榛、剪奥草、立华表以耸瞻视，求断碑而获遗文，则久荒之墓复蔚然于林庄矣。及归，仍命构祭亭、树松柏、立石以记。若二公者，非有忠君之盛心，恶能举忠臣之坠典哉！遂不辞而书其实，用达于廊庙得人者。

宋都统王安节墓 在府城西关内，四世孙伯玛祔，江西进士，以其殉节于此，乞改教于常，因家焉。 兵部钱治墓，在武进县旌孝乡北原，欧阳修表墓。
参政张守墓，在武进县朱夏墅。

知县邵文炳墓。在武进县魏村镇北。文炳知于潜，有循政。敕建墓莹。

元参政陈祖仁墓 在武进县蠡河东，学士李时勉志。

明陶将军墓 在府元妙观前，明初战歿葬此。 赞善陈济墓在府茶山路西。
御史钱一本墓在武进县。 都御史唐顺之墓，在武进县陈渡村。
御史王章墓在武进县安善乡。

清大学士吕宫墓 在武进县缪贤坝。 户部尚书赵申乔墓，在武进县栖鸾乡。
编修张惠言墓，在武进县循理乡塘北桥。

胥城

在阳湖县永胜西乡上店西，东晋时侨置莒县于此。《南畿志》云：旧传子胥所筑。

淹城 在阳湖县延政乡。《越绝书》云：毗陵县南城，故淹君城也。其城三重，周广十五里。今外城多圯，内濠亦湮，而内城、中城屹然。中濠、外濠广可十五丈。
又留城在淹城东五里，相传吴王囚越质子淹留于此，故名。

青城 在阳湖县阜通镇。南有圆坛，西有方坛，盖萧齐以兰陵为汤沐邑，置此为郊祀所。稍西即兰陵城也。

避暑宫 在阳湖县马迹山之内间湾，世传吴王阖闾避暑处。《大明一统志》云：有井名阖闾井。

洗马桥 在阳湖县迎春桥南。《祥符图经》云：隋陈司徒洗马于此。

正素坊 在阳湖县学河前，宋郡守徐申建，以张黼赐号正素处士得名。

舣舟亭 在阳湖县文成坝，宋苏轼至常系舟处。清乾隆二十二年，高宗南巡，郡人即故址筑行宫，为驻蹕所。

横山堂 在阳湖县横山麓。宋胡修简宗愈归老，作堂横山，故名。

顾山人草堂 在阳湖县横山。唐沈佺期有过横山顾山人草堂诗。

凝露堂

在府治后。唐独孤及守郡时，有甘露降，宋绍兴间，郡守郑作肃因建堂名之。

城东书堂 在阳湖县夹城图，宋杨文靖讲学处。先是周恭先讲学于此，从游者众，不能容，复创城西书堂，其弟子孚先主之。文靖至，乃皆让席，师事焉，后建为文靖祠。

陆龟蒙宅 在阳湖县飞云岭。

杨龟山故宅

在阳湖县陈湾张山南慈云庵内。清道光元年，复龟山书院，设栗主祀之。

何墅 在阳湖县坂上东三里许，以何之元隐居得名，子孙遂家焉。

桃园

在阳湖县会龙桥南，旧名桃源。春时桃花盛开，延袤数里，游人四集，拟武陵焉。

邱家园 在阳湖县大墅，明初邱梢工故居。明太祖征陈友谅，梢工泊岸侧，友谅舟过，顺流追之，以此就殒，不受封，日求一醉，上命光禄寺给之，常醉卧屋角上，后不知所终。

龚巷 在阳湖县十六都四图。明洪武初，龚明任山西徐沟县主簿，卒，妻石氏奏夫贫不能归槨。上许驰驿归，且表其第曰：“龚巷门闾，”仍著令凡秩卑官贫者得请乘驿。

孙学士山庄 在阳湖县古竹西寝山麓。由麓至耿湾十里，临湖壁立，又名十里山庄。宋孙覿筑园于此，遗址犹存。

顾坡 在阳湖县化被王庙旁，以顾恺之得名，或云即其宅。

剑井

在阳湖县永丰东乡。《风土纪》云：葛仙翁驻鹤地，有剑跃入水，白虹亘天。

赵氏义井 在阳湖县。元时，郡人赵云乡凿以济渴者。凡八：一在正素坊北。一在新坊桥东街侧。一在元丰桥八字尖。一在天井巷。一在曹家巷。一在天禧桥北。一在拱直道院前。

葛井 在阳湖县云居院东。相传为抱朴子炼丹井，不竭。

子胥试剑石

在阳湖县耿湾岭。相传子胥誓师处，有石中分为两，云子胥试剑石。观音石高二丈许，在陈氏园后，移置郡庙。清咸丰间庙毁，此石仅存。

灵石 在阳湖县惠化乡占石村古祠前。石形如柱。旧传有取之者，风霆大震遂止。

文石 在阳湖县东直街隋司徒庙，后移置县学明伦堂前。清康熙三十二年，郡守于琨甃石作台。

天庆观画龙 在阳湖县东门直街寥阳殿壁，题姑苏道士李怀仁笔。世传怀仁酒豪，尝呼龙松江山，狎而观之，以此画入神品。一日大醉，睨殿壁，索墨汁数斗，立就双龙，观者辟易。

太平寺画水 在阳湖县东门直街弥陀殿壁。郡人徐友画。清济贯河，一笔起西北隅，萦绕数十丈，疑若飞涛腾涌。

晋将军曹横墓

在阳湖县横山冲虚观。宋县令潘洞得巨砖，有“咸康八年右将军散骑常侍”字。

南唐将军柴克宽墓 在阳湖县柴墅。

宋太守李余庆墓 在阳湖县横山。侍郎张铸墓在阳湖县许村。

侍郎孙覿墓，在阳湖县毛家桥之西。

枢密胡宿墓，在阳湖县万安乡。欧阳修志铭。教授周孚先墓，在阳湖县安上乡殷坂。弟恭先亦葬此。明郡守李嵩立碣，墓侧有祠。

侍郎霍端友墓，在阳湖县千墩，孙覿志。

尚书下长卿墓，在阳湖县永胜西乡。学士蔡戡墓，在阳湖县壶公山。古忠义冢，在阳湖县孝仁乡周巷西北。宋德祐乙亥，毗陵被兵，白骨盈野。元至正间，判官郑云翼收瘞万计。有龚绾作记，赵孟烦书。

明尚书王俱墓、都御史王沂墓，俱在阳湖县三保桥。

尚书白昂墓，在阳湖县定安里，大学士李东阳志铭。

尚书周金墓在阳湖县者塘。谢应芳墓在阳湖县横山南。

尚书孙慎行墓，在阳湖县东门外金樁里。巡抚许鼎臣墓在阳湖县青龙桥。

巡抚刘熙祚墓在阳湖县南湫。尚书陈洽墓，在阳湖县三桥东南，大学士曾棨志。

知府陈实衣冠墓，在阳湖县通吴门外，邵宝有遗爱邱记。

孝子宋有稷墓，在阳湖县新塘乡下浦。隐士邱梢公墓，在阳湖县迎春乡小墅。

清工部侍郎周清原墓 在阳湖县江村。 副都御史徐元洪墓在阳湖县滬湖滨。
布政使赠太仆卿吴炤墓，在阳湖县迎春乡耿湾。
御史管世铭墓，在阳湖新塘乡陈湾山。 赵氏忠节墓，在阳湖中右乡古村。咸丰十年，教谕赠道銜赵起闾门殉难，邻人举诸尸瘞园中西北隅。

阖闾城，在无锡县西南四十五里富安乡，近太湖。《越绝书》云：伍员取利浦及黄渚土筑阖闾城。

范蠡城 在无锡县西十里。《舆地志》云：越伐吴时，范蠡所筑。《吴地志》云：在古历山西，今谓斗城，犹存故址。

黄城即春申君城 在无锡县西十二里，俗谓之黄斗城。《史记》云：楚徙封黄歇于江东，因城故吴墟，以自为都邑，即此。《后汉郡国志》注：春申君城在无锡。

新安城

在无锡县东南三十里。元初，置新安巡司于此。至正中，张士诚筑城为屯兵之所。

春申涧 亦名黄公涧，在无锡县望湖阁之西。旧有春申君祠，见陆羽《惠山寺记》。山半有大石，镌“卧云”二字，邵宝所书。

溪山胜概楼 在无锡县，元华模建，郑元祐书额。

望湖亭 在无锡县西北。唐李绅建，以望芙蓉湖，后改为半山亭。

缔岭亭

在无锡县惠山西。宋光禄滕中允建，以花木繁盛若锦缔故名，今听松庵即其遗址。

御亭 在无锡县东南望亭镇，孙吴时立。《晋书·顾众传》：苏峻反，庾冰镇御亭。《咸淳志》：望亭旧名御亭。

万竹亭 在无锡县湖埭中。宋蒋重珍筑堂于此，有亭曰“万竹”，自为记。又有东朱亭，为朱子也。二友斋，尤袤筑，为杨万里、陈亮也。

曲水亭 在无锡县惠山寺。陆羽《惠山寺记》：前有曲水亭，一名歇马亭。

云海亭在无锡县华藏寺前。

读书台 在无锡县惠山寺左，唐李绅读书于此。

历山草堂

在无锡县西七里历山，即惠山也。宋长史湛茂之读书处，其故址今为惠山寺。

仁山堂

在无锡县西溪。元强以德筑以奉母，赵孟顺颜之曰“仁山”，虞集为之记。

锡麓书堂 在无锡县秦皇坞下。宋尤袤读书处。结庐数椽不事雕饰，历四传无所更易。又有遂初堂，孝宗手书“遂初”二字赐焉。后袤十四世孙质重构，明归有光为记。

寄畅园 在无锡县惠山寺左。明秦金建，旧名“凤谷行窝”，其族孙耀易今名。圣祖南巡，临幸是园，赐额二：一曰“松风水月”，一曰“山色溪光”。谕德泰、松龄恭摹勒石。

碧山吟社 在无锡县惠山南。明秦旭建，结十老赋诗，沈周绘图，徐有贞作记。

水居 在无锡县五里湖之滨。明高攀龙归里读书、静坐之地，右曰“可楼”。前曰“月坡”。又城南有止水，即攀龙自沉处。附明攀龙记：漆湖之干有洲焉，可二十步，三分赢一以为广，其外池周之，其外堤周之，又其外山周之，所谓军将漆塘诸山也。主人即洲作居，以水为垣，豁然四达。主人偃息其中，以水为娱，泊然自得。或凭轩而眺，或隐几而瞑，或曳杖而游。目之所赴，意之所遇，魂魄之所安，无非水也。居久之，于是主人阅日月升沉、云霞起灭、草木荣瘁、禽鱼往来，与四时百物相代谢，于一水之间而忘乎其为我。居又久之，于是主人且宅天宇之寥廓，餐元和之膏润，乘浩气而翩跹，上下于无穷之门而忘乎其为水也。或曰：子之乐，微矣、独矣。主人谢不敏曰：夫造化者，固逸余于是夫。吾请问之，及命之泰。筮得节之兑，其卦曰：水泽，其辞曰安节亨。主人莞尔而笑，乃歌曰：可以乐饥，泌之洋洋兮，所谓伊人，在水中央兮。

实界山房 在无锡县五里湖之滨，明王问所居，归有光为记。

澹宁居 在无锡县西溪，马世奇故宅。

龙尾道 在无锡县西龙山北。《越绝书》云：春申君徙封故吴墟开此。

王右军庄 在无锡县西北洛社市，即今开利寺。

菰川庄 在无锡县菰渚之上。户部华云建，沈周有图，今为福城庵。

愚公谷 在无锡县惠山寺右，中有龙缝泉、邹迪光园。

华坡 在无锡县惠山寺之东，晋孝子华宝所居，今有孝子祠。附元高明华孝子故址记：惠山寺之东偏，当泉水之上有三贤寺。按志书，今祠址华孝子所居宅也。初祠久废，吴人王彬始复。倡建既成，则以三贤事刻诸石。且曰初址实孝子故居，孝子之事不可以没而不著，复砻其碑，因以记其事，彰善也。孝子名宝，晋义熙末始八岁。父豪戍长安，且行谓曰“我还，为汝冠”。后长安陷，父歿。宝奉命，至七十不婚冠。或问之，不忍答，辄号恸弥日。建元三年，诏表其门闾。凡史载孝子事若此。盖自西晋以来，尚渊虚，贱名检，教弛法敦，波流风靡，而孝独能笃至行，始终不渝，其诚意惻怛，可以贯金石、干云霓，若与宇宙日月同其久。于此见天之降衷，人之秉彝，不以衰世末俗而有异也。孝子晋人，而谓齐孝子者，盖孝子生于晋，长于宋，歿于齐，当其身而天下三易姓。当时居朝廷有爵位者，朝事司马氏，夕事刘，朝事刘，夕事萧，恬不以为怪。而孝子奉父一言，七十余年未尝斯须忘，以至歿身不替。使当时朝廷有爵位者，其奉君命、恪官守，亦咸若华氏子，则晋当不为宋，宋当不为齐，而孝子宜不曰齐孝子也。凡游于兹者，憩幽林，酌清泉，临风览古，怀三贤之高风，慕孝子之至行，有志者宜加奋勉，其未能者则澄思革心，勉追遐躅，是则某所以树碑之意云耳。夫人性一耳，有为者亦若是，吾徒宜毋自怠。

金莲池 在无锡县惠山寺。其水自第二泉流潄其中，金莲蔓生，叶如荇，花色黄，似莲而香。

投钗井 在无锡县堠阳，元华铉妻陈明淑钗于此。铉卒，或劝明淑他适，明淑拔头上钗掷井誓曰：“妾如失节，有如此钗。”

石床 在无锡县惠山寺内，长数尺，厚半之。旁刻“听松”二字，李阳冰篆。皮日休诗云：殿前日暮高风起，松子声声打石床。”

竹炉 在无锡县听松庵。明洪武间，湖州竹工为僧性海编竹为炉，规制精密，王绂为之图。永乐间，炉归潘克诚。人清后，炉毁、图亦失，顾贞观复得绂图归于庵。高宗南巡，赐“竹炉山房”，额。后图毁于火，御笔为补首图，命皇六子及董绍、弘口午分画二、三、四图，并王绂溪山渔隐图以赐。

汉仆射刘昌墓 在无锡县西南白石山，即今胥山。御史虞仲卿墓，在无锡县朱山。王莽逼为司徒，不从，死之，葬此。光武即位，以朱幡表其墓，因名朱山。荆州刺史顾容墓，在无锡县东南一十八里，俗呼为顾墓。

晋孝子华宝墓 在无锡县惠山寺华坡。

齐光禄大夫王琨墓 在无锡县东北二十五里。

唐刺史滕迈墓 在无锡县新桥门外。

宋赠直龙图阁秦观墓 在无锡县惠山。政和中葬高邮，子湛悴常州迁葬于此，子孙因家焉。弟觐字少章，墓在大坯山。附宋佚名重修墓记：淮海先生秦少游，建中靖国初卒滕，归葬高邮。政和中，迁葬于常州无锡县惠山之原，子孙因家焉。墓故有亭，刻建炎四年追赠龙图阁诰，并山谷送秦少游诗置之亭中。秦氏仕不显，诸孙贫窶，墓四旁地皆为豪右所得，亭亦毁坏不存，山谷诗石归邑好事者，独赠碑荒芜榛杞中。樵苏不禁，墓祭几绝。开禧丙寅，永康应纯之以州判官摄邑事，访问遗迹，慨然兴念，封其墓，取旁近地还之，率邑士大夫合钱建亭，乃立赠碑，且赎回诗石，择秦氏诸孙知学者使肄学职得月给，使具祭祀。仓台黄公、常守汤公，皆助其凡费。应君故从余学，余自澄江召归，道出无锡，应君首及兹事，请余记之，余嘉其志，不待再请，然行役未及作也。至吴门，会淮东漕孟良夫，因论少游醉卧古藤阴下，人谓卒于滕之讖也，独未知一事。少游墓后古松一株，直干高耸，有巨藤自墓穴中出，周匝数四，已乃施于松上，盖覆其墓，此真古藤阴下也。松为人斫去，藤芽暨今仅存耳。良夫信安孙惠山寺功德院也，故知其事。应君来索记，因并及之。

尚书章谊墓 在无锡县开原乡横山。待制李夔墓，在无锡县湛岷山。夔丞相纲父也，先是纲葬母楚国吴夫人，手植松柏数万株，规画甚整。及公卒，合葬焉。先后各庐墓三年。信安郡王孟忠厚墓，在无锡县孟湾。忠厚字仁仲，洛州人，隆祐太后兄子。高宗时，封信安郡王，赠太保。

魏国夫人墓，在无锡县白茅山。夫人姓沈氏，太师洪皓妻，丞相适母。适为文表墓曰“慈莹”。提举喻樗墓，在无锡县回溪里五里泾。

尚书尤袤墓，在无锡县西孔山。

祭酒李祥墓 在无锡县湛岷山。学士尤焞墓在城镇锡县东孔山。

侍郎蒋重珍墓，在无锡县西四十五里谢堰。提辖孟文龙墓在无锡县许岷山。监州麻士龙墓，在无锡惠山。德祐元年，元兵下常州，文天祥遣部将麻士龙、尹玉援之，战于横林，死之，因葬于此。提举强以德墓，在无锡县粲山。以德尝买山四百亩为义冢，其地亦在粲山。处士王仁辅墓，在无锡县惠山，倪瓚为之营葬。

明义士张翼墓 在无锡县章山。处士华兴叔墓，在无锡县鹅湖。兴叔字仲諄，感异梦，即湖中填土筑墓，形家，至今传为奇穴。

尚书张筹墓、尚书俞溥墓，并在无锡县章山。都御史杨璿墓在无锡县长腰山。

都御史盛颐墓在无锡县惠山。赠中宪大夫秦旭墓在无锡县龙山。

布政秦夔墓 在无锡县惠山。尚书秦金墓，在无锡县归山薛墩。

都御史谈恺墓，在无锡县开原乡太平墩。

尚书周子义墓，在无锡县惠山。侍郎炳谟祔。侍郎孙继皋墓在无锡县白茅山。

都御史万象春墓在无锡县大池。尚书严一鹏墓，在无锡县阳溪之南。

都御史秦耀墓在无锡县大浮山。左都御史高攀龙墓在无锡县粲山。侍郎张有誉墓在无锡县马鞍坞。谕德马世奇墓，在无锡县龙山马鞍坞。二妾朱氏、李氏祔。中书龚廷祥墓在无锡县。员外华允诚墓，在无锡县惠山石门。

清参议秦斌墓 在无锡县归山。中允严绳孙墓在无锡县萧家湾。

谕德秦松龄墓，在无锡县开元乡南塘。

大学士嵇璜墓，在无锡县军将山铜坑坞。谕葬。

尚书秦蕙田墓，在无锡县鸭城桥，今迁马鞍坞。

尚书张泰开墓，在无锡县漆塘谢家坞。谕葬。

知县赠兵备道杨梦槎墓，在无锡县兴宁乡寺头。谕葬。

大学士嵇会筠墓在无锡县军将山。御史邵濬墓，在无锡县大池桃花坞。谕葬。

祭酒顾栋高墓在无锡县独山。侍郎赠尚书邹一桂墓，在无锡县马鞍坞。谕葬。

主事吴鼐墓在无锡县萧家湾。

泰伯城 在金匱县东南三十里梅李乡。《吴越春秋》云：城周三里二百步。

鸭城 在金匱县东南四十五里。《輿地志》云：吴王牧凫鸭之地，今有鸭城桥。又麋城在县东十七里，吴王豢麋鹿处。

清闷阁

在金匱县东南梅李乡，元高士倪瓚故居。又有云林草堂，外国使臣皆知其名。

小心斋 在金匱县泾里，顾宪成读书处。

专诸塔 在金匱县娄巷。状如浮图，高丈余，龕其中置主以祀专诸。不详所始。

萧庄 在金匱县东四十里。梁萧侍郎别墅，今之胶山寺。

梁鸿井 在金匱县鸿山东岭。相传鸿适吴，尝居此，井犹存。

商泰伯墓 在金匱县鸿山，高一丈四尺，周三十五步。鸿山即南徐记所谓皇山，晋晋陵太守殷师尝表其墓，复一户护守。

周专诸墓 在金匱县娄巷，有塔曰专诸塔。

南北朝宋中书令王僧达墓 在金匱县胶山南岭下。

唐平章事李绅墓

在金匱县东五里。绅父悟官晋陵令，因家于锡之梅李乡，父子并葬于此。

明高士倪瓚墓 在金匱县芙蓉山。布政使华昶墓在金匱县延祥乡。光禄卿顾宪成墓、主事顾允成墓，并在金匱县梅李乡。
太常卿蔡亨墓，在金匱县周泾口，谕葬。

清处士顾祖禹墓 在金匱县崇德里。

江阴旧城

在今县治东北，梁绍泰元年，分兰陵置。又置江阴郡治。今县治东北有古城巷。

夏浦城 在江阴县西十八里。《太平寰宇记》云名鉴浦城，陈至德初，徙江阴郡县治夏浦。因筑此城。

陶城 在江阴县东三十里，亦名盗城。相近又有閭城、郭城，皆南唐屯戍处。

东舜城、西舜城

在江阴县东七十里，今曰东顺乡、西顺乡。顺讹舜也，今二乡有舜井。

暨阳故县 在江阴县东四十里。《太平寰宇记》：汉莫宠所筑，因名莫城。晋太康初，析毗陵县地置暨阳县于此，今有莫城乡。

利城故县 在江阴县西五十里，晋元帝即海虞北境立利城县。宋元嘉中，西迁武进之利浦，今良信乡有利城镇。按隋志，江阴旧有利城、梁丰二县。《太平寰宇记》：利城战国时所筑，一名若溪。

熙春楼 在江阴县古城巷东。四山拱揖，占登临之胜。宋知军颜耆仲建。

赤石亭 在江阴县长寿镇东北。郭璞云：赤石山下有朱砂，上有周穆王庙，或云穆王曾游此。

翠光亭 在江阴县城北一里君山。

庾冰宅 今江阴县祥符寺。冰子希为徐、兖二州刺史，桓温奉有司劾之，以罪免，家于暨阳。

郭璞宅 在江阴县黄山北长岸村。璞为司农太守，移家于此。

许青旻宅

在江阴县青旻市。旧有许真君庙，相传即青旻宅。又有道成墩，其修道处也。

杜康宅 在江阴县东四里，即旧承天寺址。寺西有杜桥。

郭坡 在江阴县北三十里。晋郭璞葬母于暨阳，去水百步，群讶之，璞曰：即为陆矣。其后沙壅，环墓数十里，成桑田。

放生池 在江阴县东二十里，即伞湖。绍兴中，诏为放生池。中有土阜，名伞墩。

梁武堰 在江阴县七里村，相传为梁武帝所筑。

六射垛寨 在江阴县北，相传为秦皇演射处。宋置寨于此，以控扼江滨。又有小石山寨，在小石山下，亦宋置。

石桥寨 在江阴县东四十里。今有石桥镇，又石桥东有故宁远寨。
安边寨，在江阴县东南四十里。南唐置，今废，明教寺即其故址。

金鹅石 在江阴县沙山顶。列阜三十有二，中有一巨石，相传尝有金鹅立其上。

周吴季子墓 在府治北七十里申港。有石碑，古篆曰：“呜呼!有吴延陵君子之墓”。相传孔子所书。附明都穆墓碑考：吴延陵季子墓，在常州江阴县西申浦。墓故有碑，曰：呜呼!有吴延陵君子之墓。自昔传以为孔子之笔，其大径尺，体势奇伟。考之，唐开元中，玄宗曾命拓其书。大历十四年，润州刺史萧定重刻石延陵庙中。今碑之存者，乃宋崇宁二年知常州事朱彦立。盖刻之者屡矣。欧阳永叔好集古文，其论此碑，本之太史公书。谓孔子平生未尝至吴，不得亲铭季子之墓。又谓其字特大，非简牘所容。后永叔有赵明诚者，录古金石多至二千，而此碑不与，遂使好古之士不能不置疑其间。穆尝读《越纪》，见其中载越王勾践躬求贤圣，孔子从弟子七十人奉先王雅琴治理往奏，则孔子固已历吴至越。其书近古，言似非伪，岂太史公未之见耶?况春秋之时，贤如季子，固圣人之所与。今观十字之间，辞约意博，宛然鲁史之法，有非圣人不能及者。盖不必亲登其墓而后表之，亦未可知也。但观之笔以竹而纸以代简，则自汉始。及观古法帖，亦有是文，大不逾寸，而多二言，庶几竹简之书。宋黄伯思号称博物，定其非伪。今碑字若此，岂真是耶?抑后人转相传摹，扩而大之，又未可知也。虽然玄宗尝命拓本，则唐以前已有刻字，而其来远矣，又岂后人所敢议耶?监察御史谢公球巡历吴中，谓穆吴人颇知稽古，命知县事王君饼考其说，遂著之云尔。

春申君黄歇墓，在江阴县君山。相传在东岳庙陞之下。

杜康墓，在江阴县城内东南隅。

晋郭璞母墓 在江阴县申港八里许。

陈江阴王墓 在江阴县良信乡。陈受禅，奉敬帝为江阴王，殂葬于此。

宋制置使邱公墓，在江阴县由里东南。太常葛胜仲墓，在江阴县由里山南。丞相葛邲墓在江阴县青旻乡。侍郎邱寿隽墓在江阴县敌山。

元廉访副使陆垵墓 在江阴县沙山北。孝子赵铉墓在江阴县沙山。

明江阴侯吴高墓，在江阴县观山。高，江国公良之子。
沙将军墓在江阴县马鞍山下。尚书徐晞墓在江阴县绮山。
大理卿汤沐墓在江阴县由里山北麓。谕德缪昌期墓在江阴县长泾。
御史李应升墓、处士李如一墓，并在江阴县。
侍郎叶茂才墓，在江阴县马镇。无锡人。

孝子吴凤墓，在江阴县夏港东南。阎忠烈公应元墓，在江阴县小石湾。
戚烈愍勋墓，在江阴县城内大街守备署左。

清杨文定名时墓 在江阴县东城外。金孝子犹龙墓，在江阴县南秋村北。
知县李兆洛墓在江阴县观山镇花家坳。

阳羨城 在宜兴县南五里属荆溪汉县。《大明一统志》云：一名蝦虎城。《汉书·高祖功臣表》：阳羨立侯，高祖十二年十日壬寅封。

吴城 在宜兴县西南二十里，一名太伯城。

临津城 在宜兴县西北五十里五贤乡。晋永兴初，分阳羨县地置，属义兴郡。今荆溪北故址犹存。

警楼 在宜兴县太湖滨，明弘治中设以御寇。

章浦亭 在宜兴县西二十五里章浦侧。《晋书》云：周处封章浦亭侯即此。或云周札封此。又东浦亭，在县东三十五里。

泳飞亭 在宜兴县迎华驿前。《南畿志》云：旧名弄舟，宋为放生之所，故名。

浮翠亭 在宜兴县南法藏寺前。宋治平间建亭，面东山，蛟川在其北。

庆源亭 在宜兴县北门外。宋元丰七年，苏轼舣航于此，今迎恩亭其故址。

任公钓台 在宜兴县北一里，临荆溪。梁任昉为守时，垂钓于此。

画溪西堂 在宜兴县西，贮谢康乐累世诗并画像。

保义堂 在宜兴县东一里。明大学士徐溥置义庄，并建堂曰“保义”。

杜牧之水榭 在宜兴县荆溪北。牧之有“阳羨溪头买钓舟”之句，自注云：义兴近有水榭。《南畿志》云：邑人王公辅治地，得巨木亘其中，云是故址。

东坡别业 在宜兴县北四十里隔湖塘头。嘉祐初，坡与蒋之奇有卜邻之约，元丰中自黄移汝，乞居常州。表云：臣有薄田在阳羨，可供值粥。

啸庄 在宜兴县西十五里，义兴太守谢泉居此。

南庄 在宜兴县北五十二里，宋蒋之奇尝置义田于此。

谢公墩 在宜兴县，齐谢朓为宣城太守，尝栖止义兴溧阳间，墩近画溪西堂。

汉云阳乡侯蒋默墓，在宜兴县竹山。函亭乡侯蒋澄墓在宜兴县都山。

晋阳羨侯史韶墓，在宜兴县函山寨西。

陈湘阴侯蒋有政墓，在宜兴县白塔河。函亭侯裔孙也。

宋直学士陈襄墓，在宜兴县箬山。 学士汪藻墓在宜兴县梅林。
枢密王渊墓在宜兴县罗汉山。 丞相蒋芾墓在宜兴县孙墓。 待制岳霖墓，在宜兴县唐门显祖庵侧。忠武王飞子。尚书吴忠旦墓、尚书吴邦翰墓，并在宜兴县莱村。

明都御史杨得安墓在宜兴县小谢。 副都御史杭淮墓在宜兴县百渎。
尚书万士和墓在宜兴县明珠山。 尚书曹三暘墓在宜兴县瑯玕山。
堵文忠胤锡墓在宜兴县虞山。 左都御史陈于廷墓在宜兴县毫村。

清巡检程芳祖墓 在宜兴县张渚虬山岭。

国山城

在荆溪县西南五十里永丰乡，西临章溪。《太平寰宇记》云：晋元帝始置国山县于白石山，成帝移于平地，去旧城七里。

绥安城

在荆溪县西南八十里。刘宋永初三年，分广德、长城、故鄣、义乡、阳羨五县地置县，属义兴郡。

义乡城 在荆溪县东南八十里义山下，晋永兴初分长城县置，属义兴郡。

九斗坛

在荆溪县善权沿山下，高三尺，周广十三步，山有九峰，状如覆斗。梁天监中武帝祷雨，梦神告曰：“阳羨九斗山有神张水曹”，帝遣使筑坛致祭，果得雨。

画乡亭

在荆溪县西六十五里函姥山。后汉封蒋澄为函乡亭侯，即此。宋蒋堂有诗。

射虎亭

在荆溪县南五里。晋周处射南山白额虎于此，后人为立亭。南唐徐铉诗云“斩蛟桥下溪烟碧，射虎亭边路草青”。

西石亭

在荆溪县东南十五里，地产鲜梅，枝干奇古。苏轼诗云“幽香收艾鞠”，陈克诗云“石亭梅花落如雪”，皆指此。

读书台 在荆溪善权山岩前。有巨石文曰“祝英台读书处”，俗呼为祝陵。

双楠轩 在荆溪县城南，宋慕容暉所居。有双楠如盖，苏轼取以命名。

陆相房 在荆溪县颐山唐陆希声解相印，号君阳遁叟，著《颐山录》。

茶舍 在荆溪县罨画溪。唐李栖筠守常州时，有僧献阳羨茗，陆羽以为芳香可供尚方，遂置舍岁贡。卢仝诗云：“天子未尝阳羨茶，百草不敢先开花”。

边庄

在荆溪县南四十五里。南唐疆域止此，营屯戍守，与吴越为交境之备，旧名石门。

兰台聚 在荆溪县东南二十里。梁到溉兄弟居此，时太守任昉与游，号曰兰台聚。

汉阳羡令袁圯墓，在荆溪县君山。太尉许馹墓，在荆溪县南门外周渎。

晋将军周处墓，在荆溪县治英烈庙后。

义兴太守刘超墓，在荆溪县永丰凤飞岭，今福泉庵其墓刹也。

唐将军卫逖墓，在荆溪县许墅，临大溪。丞相李宾墓在荆溪县。

丞相高智周墓在荆溪县葛墟村。

宋通判贺铸墓，在荆溪县筱岭。枢密蒋之奇墓，在荆溪县沧浦。

枢密胡松年墓在荆溪县梅林。枢密郭三益墓在荆溪县横涧。

尚书沈积中墓在荆溪县西坑。参政周葵墓，在荆溪县梅林，周必大撰碑。
太尉王琪墓在荆溪县筱岭。宣抚使胡世将墓在荆溪县横山。
太师姚端硅墓，在荆溪县大芦山。

明大学士徐溥墓在荆溪县南阳山。尚书吴俨墓在荆溪县梅林。都御史胡忠墓在荆溪县凤凰山。尚书卢象昇墓，在荆溪县西洋芥。尚书周鼎墓在荆溪县筱岭。

紫薇宫 在靖江县，吴赤乌元年建。

八角楼 在靖江县孤山巔。

仙人台 在靖江县孤山上，旧传仙人讲道于此。

马驮沙 今靖江县境，故大江中一洲也。《广陵志》云：吴赤乌间，有白马负土入江而成此洲。明嘉靖三年，知县易干循行至西沙焦山港，得断碣云“吴大帝牧马大沙”。隔江一洲，为牧马小沙。盖俗讹合牧马一声，又讹大为驮也。

圣井在靖江县长安寺旧址之北。一名长安井，其泉清冽，与他井异。

孤山碇

在靖江县孤山，俗名石碇。其石颇润泽，周刻法华经三卷，今存其半于土中。

镇江府

京城 即今府治。《文献通考》云：吴主孙权初镇丹徒，谓之京城。《通典》云：南面、西面各开一门，因京岷号为京镇，因名为京口，又曰徐陵镇。《南徐州记》云：京口先为徐陵。《城邑考》云：郡有子城，周六百三十步，即吴所筑。内外皆甃，号铁瓮城。晋郗鉴、王恭镇此，皆更为营缮。南唐林仁肇复修之。

东西夹城 在丹徒县。唐太和中，观察使王播所筑。长十二里，凿隍绕其外。乾符中，周宝为润帅，更筑土城，周二十六里，为门十。明初，耿再成复修筑焉。

丹徒旧县 在丹徒县东南十八里。春秋之朱方邑，楚改名谷阳，秦曰丹徒。始皇因望气言者，使赭衣徒三千凿京岷，故名。

秦始皇驰道 在丹徒县。《金陵志》云：始皇三十六年东游至金陵，断山疏淮，由江东丹徒往会稽。

丹徒宫在丹徒县南，宋武帝微时故宅，后筑为宫。藏躬耕农器于此，以示后。鲍照

有从过旧宫诗。

万岁楼 在丹徒县西南城上，晋王恭为刺史创此。宋人呼为月台，又谓之月观。其西北有芙蓉楼相对。附宋汪藻《月观记》：京口以江山名天下，其来尚矣。而国家屏蔽，尤重于晋、宋、齐、梁之间。观其千嶂所环。中横巨浸，风涛日夜，架百川而东之。其形胜之雄，实足以控制南北，岂直为骚人羁客区区登览胜哉！州治之西有楼焉，并城而出，名曰千秋者，考诸图志始于晋王恭之时。由楼西南循城百余步，忽飞檐曲槛萃然孤起于城隅之上，望数百里见之者，月观也。绍兴八年，吴兴刘岑季高来刺是州。承废乱之后，公私扫地，无复故时。季高鸠集经营，悉复其初，乃即月观之址葺而新之。方时艰难，此州实为襟要，其经理规模，盖有足大者。尝四顾而望之，其东曰海门，鸱夷子皮之所从游也。其西曰瓜步，魏佛狸之所尝至也。若其北广陵，则谢太傅之所筑埭而居。江之中流，则祖豫州之所系楫而誓也。计其一时英雄，慷慨愤中原之未复，反寇之未禽，欲吞之以忠义之气，虽狭宇宙而隘九州，自其胸中所积，亦江山有以发之。今揽而纳诸数楹之地，使千载之事了然在吾目中，则季高之志可知矣。

望海楼 在丹徒府署后。为城中最高处，远眺金山、甘露诸胜如画。宋蔡襄题额。后改为连沧观。

千岩楼 在丹徒县。宋敏求诗“千岩相望蔽松筠”即此。刺史王瑶创。

北固楼 在丹徒县城北一里北固山上。下临长江，三面皆水。晋蔡谟建此以贮军实。梁武帝幸之，登降甚狭。萧正义乃广其路，旁设栏檐。后再幸，遂通小舆。帝悦，赐以束帛。唐李白诗“丹阳北固是吴关，画出楼台云水间”。

千丛楼 在丹徒县。唐天下名楼五，此其一。

多景楼 在丹徒县北固山上。宋太守陈天麟建，唐时临江亭故址。米芾有多景楼呈某使君诗。

得江楼 在丹徒县城内，宋洪适有记。

回宾亭 在丹徒县。梁武帝大同末幸京口，宴帝乡故老于回宾亭。

浮玉亭 在丹徒县玉山之趾。下临江，即钓鳌亭。宋绍兴间，郡守程迈立。每肄习水军，临阅于此。今玉山寺其故址也。

向吴亭 一名通吴楼，在丹徒县治南。唐陆龟蒙诗“秋来懒上向吴亭”即此。

宝墨亭 在丹徒县焦山，以贮王羲之所集右军书陀罗尼经幢及华阳真逸瘞鹤铭。

雄跨亭 在丹徒县北金山寺内，取宋高宗“雄跨江南二百州”之句。陆游《入蜀记》以为跨雄阁、光风霁月亭在府学。

读书台

在府南招隐山上，梁昭明太子读书处。《大明一统志》云：下有福乡井、抚掌泉。

妙高台 在丹徒县北金山上。宋僧了元建。清圣祖有御制妙高台诗。

伎堂 在丹徒县东南，晋谢安立。

积弩堂 在丹徒县唐颍山西二百步。宋武帝攻卢循，军中用万钧神弩，所至摧陷，后积于此。

卫公堂 在丹徒县府署后。唐李德裕为观察使时建，后人因其封爵名之。

玉鉴堂 在丹徒县北金山。宋苏绅诗云“僧于玉鉴光中坐，客踏金鳌胥上行”，盖取此以为名。

刁勰宅 在丹徒县城西南长广航侧。

郗鉴宅 在丹徒县唐颍山南。《京口记》云：鉴宅五十余亩。

谢玄宅 在丹徒县长村东大渚北。

刘穆之宅 在丹徒县。穆之世居京口，隆安中凤凰集其处。

戴颐宅 在丹徒县西南七里，招隐寺即其址。

许浑宅 在丹徒县城南三里丁卯涧，浑诗名“丁卯集”以此。

陈升之宅 在丹徒县范公桥南，与苏颂宅相近。

沈括宅 在丹徒县朱方门外，即梦溪也。附宋沈括自记：翁年三十许时，尝梦至一处，登小山，花木如覆锦。山之下，有水澄澈，极目而乔木翳其上。梦中乐之，将谋居焉。自尔岁，一再梦或三四梦至其处，习之如平生之游。后十余年，翁谪居宜城，有道人无外谓京口山川之胜，邑之人有圃求售者及翁，以三十缗得之，然未知圃何在。又后六年，翁坐边议谪废，乃庐于浔阳之熨斗洞，为庐山之游，以终身焉。

。元事占元年，道京口，登道人所置之圃，恍然乃梦中所游之地。翁叹曰：“吾缘在是矣”。于是弃浔阳之居，筑室于京口之陲。巨木蓊然，水出峡中，渟渟杳冥，缭绕地之一偏者，目之曰“梦溪”。溪之上耸然为邱，千本之花缘焉者，百花堆也。覆堆而庐其间者，翁之栖也。其西荫于花木之间，翁之所憩壳轩也。轩之瞰有阁，俯于阡陌。巨木百寻哄其上者，花堆之阁也。据堆之巅，集茅山舍者，岸花之堂也。背堂而俯于梦溪之颜者，苍峡之亭也。而花堆有竹万个，环而激波者，竹坞也。度竹而南，介途滨河，锐而垣者，杏觜也。竹间之可燕者，萧萧堂也。荫竹之南轩于水滢者，深斋也。封高而缔可以眺者，远亭也。居在城邑而荒芜古木，与豕鹿杂处，客有至者皆顿遏而去，而翁独乐焉。鱼于泉、舫于渊，俯仰于茂木美荫之间，所慕于古人者陶潜、白居易、李约，谓之三悦，与之酬酢于心目之所寓者，琴、棋、禅、墨、丹、茶、吟、谈、酒谓之九客。四年而翁病，涉岁而益羸，滨枢木矣，岂翁将蜕于此乎？

苏颂宅 在丹徒县化隆坊。颂新居诗“版筑多遗址，经营信夙缘”，自注云：旧址乃唐林仁肇故宅。林亦温陵人，而家此。今余居之，信非偶然。

曾布宅 在丹徒县南千石墟之东。布诗云“家居城南千石泉”是也，后为道林寺。

杨一清宅 在丹徒县黄祐街。正德中，武帝南巡其第，赐十二诗焉。

靳贵宅 在丹徒县虎踞门内。武宗幸其第，亲制文以祭之。

西园

在丹徒县放鹤门内，宋韩世忠故园，中有飞盖堂、传觞亭、凌云台、留仙洞。

研山园 在丹徒县千秋桥西灵建寺东，米芾故居，中有致爽轩、宝晋斋。宋绍定初，岳珂为燕游之所。

退圃 在丹徒县，宋睦州悴俞康直所居。

藏春坞 在丹徒县清风桥东。《大明一统志》云：本南唐润州节度使林仁肇故宅。宋郡人刁约因筑此，中有逸老堂、万松冈。

秦潭 在丹徒县月华山下，秦始皇开。宋绍兴癸亥，令天下各置放生池，郡守郑兹即以此潭为之。

白莲池 在丹徒县古竹巷东谷中。池上有断溪庵，宋苏轼诗“白莲池上断溪庵”。

寄奴泉 在丹徒县黄鹄山下鹤林寺中殿前。宋武帝微时所凿，寄奴其小字也。

张僧繇四菩萨画 在丹徒县甘露寺。米芾《画史》云：长四尺一，版广八尺许。

陆探微狮子画 在丹徒县，宋苏轼有赞。

周鼎 在丹徒县焦山，大逾斗，古色陆离。传是魏氏所藏，明严嵩当国，索之不得，将罪之，嵩败得免，魏氏遂以鼎送焦山。鼎内有铭，篆古莫能识。清王士禛游此，属新安程邃译出勒诸石。其铭曰：惟九月既望甲戌，王还于周。口口于图室，司徒南仲右口惠口立中庭，王呼史受册，命口惠日，官司口王口侧口作，锡汝玄衣束带，戈、铉、戟、鎛、珣、彤矢、鉴口盥、旌芒。惠敢对扬天子丕显敷休，用作尊鼎，用享于口烈考。用周簋，寿万年，子孙永宝用。凡蚀二字，疑不能知者八字。何架周鼎记：是鼎也，已历二千余年矣，高一尺三寸二分；耳高三寸；足六寸有一分；一尺五寸八分，为腹之径；口之径，一尺四寸五分；其深也，八寸有二分。篆铭凡十行，其六行，行九字；有四行者，行十字。字共九十有四焉。司勋王西樵、邑宰邹西齐相继译之，知为周宣王以锡南仲者。何其历年之久也？凡物以退藏为可久，而适用为可贵。鼎用以荐宗庙、享鬼神，诚可贵也。是鼎独退藏于深山之佛寺，不以适用于世为可贵，故能常保其可贵者。而历时之久，遂至二千余年。计此二千余年中，鼎之所历，运会升沈，陵谷变迁，及凡物之成败得失不知有几，而是鼎以深自退藏故无恙。使常用于世，为世所贵，则有毁于盗贼水火也久矣。余记之，所以为不能退藏者戒也。

延陵古钟 宋孝建三年四月甲辰得古钟六，南徐州刺史竞陵王诞以献。

东坡、佛印、二铜像 在丹徒县金山。明万历间，金山僧重筑妙高台，得铜比丘像于土中。入城，见市中有高冠长髯铜像，与比丘等尺寸合，并知为东坡、佛印也。又于扬州得铜像二：一童子，一小沙弥，又觉与东坡、佛印赠答事有合，建留玉阁奉之。

狠石 在丹徒县甘露寺。石似羊，诸葛亮曾坐其上与吴大帝谋拒魏，或云汉昭烈尝坐此石。石亡已久，寺僧辄取一石充数。附明庞时雍记：汉诸葛孔明与孙仲谋共议破曹瞒计，曾据此石，后人因名狠石。唐罗隐、宋苏文忠俱有诗。迄今时异世殊物改而石随湮没，寻幽吊古者，止按空

籍而兴遐想。余令此，觅古迹，得石于北固西隅蔬圃积土中。其状如羊者，固宛然在也。睹其石，犹足动忠臣、义士诛奸屏邪之思焉。于是因白之郡守龙溪王公并滕公，碑记移之演武场侧，建亭置匾曰“武侯遗石”，因以鼓三军之气云。

南北朝宋兴宁陵 在府东三十五里雩山，武帝皇考陵也，赵萧二后祔焉。
熙宁陵，在府治，文帝母胡太后所葬。

汉荆王刘贾墓 在府治后圃。

三国吴鲁肃墓在府城东。

晋东海王越墓 在府城南二里。 刺史殷仲堪墓在府城东。

郭璞墓即石牌山江中三石峰也。水涨不能没，如浮玉然。 太尉郗鉴、司空郗愔墓，并在府城东。陈永定中有人发冢，见情尸如生，得古铜器十余。有郑康成所书箴左氏膏肓，愔手注其后云：得之广因邓伯道。 中郎郗昙墓在府城东。太傅褚裒墓在府城南七里。

南北朝宋庐陵王义真墓、衡阳王义季墓，并在府城东。

刺史萧思话墓在府北京口。

南唐徐知谏墓 在府黄社村。 李从谏墓在府南望城冈。

宋转运使苏舜元墓 在府五老山，蔡襄铭。

长史苏舜钦墓，在府石门村，欧阳修铭。 翰林学士苏绅墓在府岷山。

待制苏携墓在府长冈。

丞相苏颂墓，在府五州山北阜，曾肇铭。通判苏京墓，在府长冈，游酢铭。

学士刁约墓在府白兔山。

大中大夫陈汝爽墓在府黄山。朝散大夫俞康直墓，在府京岷山西。

朝散大夫俞希旦墓在府釜鼎山。 丞相陈升之墓，在府五州山。

右丞相王存墓，在府仙风里，曾肇铭。 祠部王介墓在府黄社村。

学士王汉之墓，在府马鞍山，学士王渔之亦葬此。 光禄王罕墓，在府永安里。

礼部员外郎米芾墓，在府长山。

忠简公宗泽墓，在府龟湾。 尚书左丞相邓润墓，在府下凼塘。

秘书郎黄伯思墓，在府招隐山。 侍郎刘逵墓，在府汝山。

学士赵野墓，在府图山之阳。

开府仪同三司詹文墓，在府白兔山，子度学士亦葬此，今其族居缙云。 节度使赵文亮墓，在府朝阳门外转水湾，死事敕葬。知州陈广墓，在府招隐寺东，死事敕葬。

。

元翰林学士青阳梦炎墓 在府定波门外凤凰山。

明安远大将军缪大亨墓，在府城西永兴寺侧，尚书詹同奉敕表墓。

侍郎费阊墓，在府白兔山。 大学士杨一清墓在府西大岷山。

大学士靳贵墓在府长山。

清大学士张玉书墓 在府南尤区村。

曲阿城 即今丹阳县治，古名云阳。秦始皇以其地有王气，凿北冈以泄之，截直道使曲，改曰曲阿县。

荆溪 在丹阳县南五十五里白鹤溪口，旧传汉荆王贾所筑。

刘繇城 在丹阳县西南。汉兴平元年，刘繇为扬州刺史，至曲阿筑城以御袁术。

云阳城 在丹阳县延陵镇南。有东、西二城，相距七里，与句容县接境。始皇易云阳为曲阿，至吴嘉禾三年，复名云阳。赤乌八年，使校尉陈勋凿句容中道，直至云阳西城，号“破冈渚”，即此地也。

吕城 在丹阳县东五十四里，吴将吕蒙所筑。遗址犹存，今为镇。

延陵故县 在丹阳县南三十里。晋太康二年，析曲阿县延陵乡置。《元和郡县志》云：延陵县东至润州一百里，因季子以立名。按《汉书·地理志》云，季札所居在今毗陵，然今县北有季子祠，或当时采地所及。

神亭 在丹阳县延陵镇西三十里。汉建安中，孙策进击刘繇于曲阿，与太史慈遇于神亭，即此处。

王旬宅，在丹阳县市后，今普宁寺。

梁武帝旧宅

在丹阳县塘头村东。帝尝幸旧宅，井上有枣树，帝儿时所植，今井尚存。

萧思话宅 在丹阳县。齐永明中，萧惠基父思话于曲阿起宅，有间旷之致，常谓所亲曰：须婚嫁毕，当归老旧庐。

张祐宅 在丹阳县云阳桥东。

桓彦范宅 在丹阳县北八十里北冈，今于废址立庙祀焉。

权德舆宅 在丹阳县练湖上。德舆忆江南诗有“结庐常占练湖春”之句。又送叔赴晋陵诗序云：“德舆旧居丹阳，去晋陵百里。”

刘宰宅 在丹阳县高牧乡。

陈东宅 在丹阳县石城乡越塘。

夹冈 在丹阳北二十里石潭村。陆游《入蜀记》云：夹冈如连山，盖当时所积之土掘渠以通漕者。有二石人植夹冈上，俗谓之石翁、石媪，实亦古陵墓前物。

陵口 在丹阳县三十一里，齐梁诸陵多在金牛山旁。陆游曰：自常州西北至吕城，又西北过陵口，见大石兽偃卧道旁，盖南朝陵墓也。

金莺池 在丹阳县治后圃。宋夏竦初为丹阳邑掾，一日侍母燕坐，见黄鹂双舞于地，发之得金莺二。其母命瘞之，因筑亭其上。后人发地，求之不得，遂为池。

长冈埭 在丹阳县西南破冈渚，七埭中之一也。

大业、曲阿、废亭、三垒 在丹阳县境，晋咸和二年郗鉴所筑，以拒苏峻。

长冈垒 在丹阳县西南。齐建武中，左兴盛等筑此，拒王敬则。

沸井 在丹阳县季子庙前，二清二浊，鬻沸之声昼夜不绝。齐豫章王嶷拜陵还，过延陵季子庙观沸井即此。

丹井 在丹阳县，有四：湛母丹井在仙台观，葛洪丹井在县东湾头邵巷，焦光丹井在归真观，丁令威丹井在大霄观。

齐永安陵 在丹阳县东北三十里，齐高帝皇考妣所葬。

泰安陵，在丹阳县北二十五里，齐高帝及昭皇后合葬于此。修安陵，在丹阳县东北三十六里金山下，齐明帝皇考妣合葬于此。景安陵，在丹阳县东三十一里，齐武帝所葬。兴安陵，在丹阳县东十四里，齐明帝及敬后所葬。《舆地志》：齐诸陵，在故兰陵东北金牛山。四时公卿行陵，乘舳舻自方山由陵口入兰陵，升安车轺传驿置以至陵所。

梁建陵 在丹阳县东北二十五里东城村，武帝葬皇考文帝于此，献后辛祔。梁大同元年作石麒麟，自京口由曲阿至陵所，近陵二十余步忽如跃走状，时以为瑞。帝不悦，终有侯景之乱。大同十年武帝谒建陵，有紫云阴覆陵上。帝望陵流涕，所沾草皆变色。陵旁有枯泉，至是流水香洁。

修陵，在丹阳县东二十里皇业寺前，梁武帝及德后并葬于此。大同十年帝谒建陵毕，辛丑至修陵，诏曰：朕违桑梓五十余年，展敬园陵但增感恻，园陵职司供事勤劳，各赐一阶，加颁赉。庄陵，在丹阳县西钟离村白鹤山。

汉孙钟墓 在丹阳县西钟离村白鹤山。 董永墓，在丹阳县延陵镇南。

晋司徒蔡謨墓 在丹阳县南四十里石城乡。

尚书左丞董宪墓，在丹阳县东南六十里杨西村，宪永之子。

唐扶阳王桓彦范墓 在丹阳县东下墅村。 处士张祐墓，在丹阳县东北二十里。

南唐沈彬墓 在丹阳县。沈彬晚年手植一树识葬处，后卒掘地得一石椁，举棺就之，广袤中度。 宋学士邵必墓在丹阳县耿冈。

赠修撰陈东墓，在丹阳县尚德乡桐村。

都统制魏胜墓，在丹阳县经山。隆兴二年战死清河口，招魂葬此。

制置使汪立信墓

在丹阳县。元兵南下，立信为沿江制置使，拒守死之，部将金明营葬于此。

三孝女墓在丹阳县大泊西，尝以裙裹土葬母。

明阎圮墓，在丹阳县观音山，有碑。 尚书储懋墓，在丹阳县南千石墟。

尚书沈固墓，在丹阳县东石羊子。 尚书姜宝墓，在丹阳县西三十里。

按察使贺邦泰墓，在丹阳县荆城港。尚书贺世寿墓，在丹阳县荆城港。

湖口城 在金坛县南湖溪村，宋庾业与刘延熙夹岸筑城，今沦于湖。

金山故县 即今金坛治。本曲阿县之金山乡，隋末乡人多保聚于此，因置金山县。

缔衣亭 在金坛县大茅峰西南崖下，汉元寿中立。

武功台 在金坛县治西池中，唐县令姚合筑，合武功人，故名。

八卦台 在金坛县茅洞东。宋绍兴中，待诏陈公甫修道于此，建台演画八卦。

鹤台 在金坛县金茵山后，常有群鹤往来，张伯雨乃筑台居焉。

戴叔伦宅 在金坛县，即今太虚观。叔伦有越溪村居诗。

张纲宅 在金坛县希墟村。纲以参知政事致仕，后于宅内筑喜归亭。

顾况山房、秦系山房 在金坛县菖蒲潭石墨池上。

华阳馆在金坛县南三十里，唐贞观中建。

延陵馆 在金坛县西五十里，唐大历中建。

明秀轩

在金坛县灵济庙前。宋米友仁避地居此，有诗题石轩前，又有湖山伟观轩。

佚老园

在金坛县永仁巷，即王巷宅。其子樵与孙肯堂即其地建宗祠，有敕旌义门。

陶村 在金坛县二十七都，即弘景炼丹处。有丹井，手植银杏尚存。

唐陵村 在金坛县唐安马厂旁。有二处巨石纵横，攒累如山，制度精密，旧传为唐时陵村，以是得名。

钦马池 在金坛县皇业寺东，梁武帝谒建陵饮马于此。

石墨池

在金坛县，费长房学道于此。书符涤砚，润石悉黑，至今用池水合药有奇验。

葛洪井 在金坛县抱朴峰之左。

陶真人丹井 在金坛县华阳上馆前石桥之东。宋政和初，修井掘土得一已泐井栏，环刻大字云：丹阳人姓陶，仕齐，奉朝请。壬申岁，来山栖身，自号隐居。梁天监三年八月十五日，钱塘陈懋宣书。复穿地，又获一圆砚，朱色；一雀尾炉，中有丹一粒。亟欲取之，堕井中。今炉砚亦不存矣。

梁郢尊师石臼 在金坛县茅山八卦台南。累甃为垣，凿石为臼，方丈余，遗窞尚在。久为荆榛所蔽，宋绍兴筑庵方见之。

汉会稽太守左恢墓 在金坛县北十八里。子忠墓在县南十八里。

三国吴高陵侯韦昭墓 在金坛县西北六十里东溪。

晋左思墓在金坛县。太守袁宏墓，在金坛丁十五里。

南北朝宋司空徐羨之墓 在金坛县西南二十五里。

唐御史储光义墓，在金坛县庄城东村。

经略使戴叔伦墓，在金坛县南三里，碑存。宋学士张缜墓，在金坛县方山。侍郎张悫墓，在金坛县上元乡张原。参政张纲墓，在金坛县西希墟。大学士汤鹏举墓，在金坛县东小墟。孝子王康墓，在金坛县王庄村。

明都御史虞谦墓，在金坛县丹阳门外。都御史于湛墓，在金坛县官坊村西。都御史王樵墓，在金坛县南青冈墩。

清布政使于朋举墓 在金坛县。

永世城 在溧阳县南十五里，吴分溧阳置永平县，晋更名永世。

旧县城 在溧阳县西北四十五里。宋绍兴中，得后汉溧阳校官碑于固城湖之侧，故知为汉县治，今谓之旧县村。《汉书·王子侯表》：溧阳侯钦，梁敬王子，建昭元年正月封。《文献通考》：溧阳侯陶谦徐州刺史，以击破黄巾功封。

赵城 在溧阳县东五里。又党城，在县东十五里。梁城，在县西五十里。

平陵故县 在溧阳县。沈约《宋志》云：晋分永世县置。《胜公庙记》云：其地是吴濑渚县地，楚灵王与吴战，遂陷北城，吴移濑渚于溧阳南十里，改为陵平县。及平王，又收吴陵平县，改为平陵。《建康志》云：古固城，在溧阳之西溧水县界，亦名平陵城。又《李贺记》云：为儿时，在溧阳闻白头书佐言，孟东野贞元中为溧阳尉。溧阳昔为平陵县，县南五里有投金濑，濑南八里有故平陵城。新志又谓在县西北四十里平陵山西。

蔷薇亭 在溧阳县东唐兴寺，有唐孟郊诗石。

董平宅 在溧阳县北三十里。

赵葵宅 在溧阳县治南。葵有避暑水亭诗云“水亭四座朱栏绕，簇簇游鱼戏萍藻。六龙畏热不敢行，海水煎彻蓬莱岛。身眠七尺白须暇，头枕一枚红玛瑙。”有侍婢续云“公子犹嫌扇力微，行人尚在红尘道”。又有别墅名“晚香堂”，理宗御书赐之。

常寨巷 在溧阳县西门外。明常遇春守溧阳立寨于此。今俗称为柴场巷。

投金濑

在溧阳县西北四十里。伍员欲报击绵女子，不知其家，投金濑水而去。李白有碑。

汉溧阳侯史崇墓 在溧阳县北三十里埭头村。溧阳侯陶谦墓，在溧阳县西南太石

山之阳。按《大明一统志》徐州府萧县有陶谦墓，谦卒于徐州，封于溧阳，两处均可有墓。但当日江表尚未大乱，其子孙归葬封邑，亦事理当然，故仍之。

三国吴抚陵侯史嵩墓在溧阳埭头村。

晋仆射王舒墓 在溧阳县治。

梁尚书范云墓 在溧阳县东北五十里璧桥。

唐开国侯史静滋墓，在溧阳县东北埭头里。 又溧阳男史务滋墓，亦在埭头里。

宋丞相陈康伯墓在溧阳县丁溪。 丞相虞允文墓在溧阳县下庵村。
丞相马廷鸾墓在溧阳县车门里。 行省副使狄英墓，在溧阳县胥渚村。

元契哈喇普花墓，在溧阳县北沙涨村。 普花封高昌郡公，家于溧阳，后死王事，谥忠愍。其子云中郡侯契文质、裔孙吏部尚书契笃哲、礼部尚书契斯墓并在沙涨村。

清侍讲马世俊墓、翰林史鹤龄墓，并在溧阳县。
大学士谥文靖史貽直墓，在溧阳县徐角，谕祭葬。
礼部尚书任兰枝墓在溧阳县大芥。

第四卷 淮安府扬州府徐州府太仓州海州通州

淮安府

东海国 今淮安府。《后汉书·东海恭王疆传》建武十九年封。

临淮国 今淮安府。《后汉书·临淮怀公传》建武十五年立。

淮陵国 今淮安府。《后汉书·王霸传》建武三十年，定封淮陵侯。

射阳故城 在山阳县东南。汉高祖六年，封刘缠为射阳侯，后为县。

柘塘城 在山阳县西南四十里。《南畿志》云：其城三座，约围一里许。隋炀帝游江都，聚粮于此。

刘王城 在山阳县东南十里运河西，世传汉吴王濞所筑。

西辽城 在山阳县东二里。唐太宗征辽时，驻兵于此，故名。

新城 在山阳县西三十五里，宋成淳间置。

山阳故城 在今山阳县南。晋义熙间置山阳县，兼置山阳郡治焉。

杏坛 在府学大成殿后。宋嘉定间，郡守应纯之植杏为坛。

转搬仓 在山阳县运河之西岸，唐江淮漕运于此转送关陕。北有运河堰，周世宗始置满浦关，以通水路。

宴花楼 在山阳县南，即旧城南门楼。其西门楼曰望云，南唐建。月波楼，在府治旧通判厅。

镇淮楼在山阳县旧城桥西北，宋镇江都统司酒楼。

刘伶台

在山阳县东北七里，临淮水。唐许浑诗云刘伶台下稻花晚，韩信庙前枫叶秋”。

水教亭 在山阳县望云门。宋太守应纯之开管家湖以教舟师，因建此亭。

望淮亭 在阳县西门外旧仁济桥侧。

南昌亭 在山阳县西三十五里。《地道记》注云韩信从亭长寄食。

枚皋宅、赵嘏宅 在府淮阴旧县南。赵嘏诗云“家住枚皋旧宅边”。

老鹳河 在山阳县西七十里。周世宗显德五年伐唐，至北辰堰，齐云舰大不能通过，遂开此水。

紫极宫画 在山阳县城西南隅。宋杨杰记云：尝有仙来游，题诗于壁，刮之不灭。又有李公麟画猿戏马，马惊而圉人鞭之。时称奇笔。

汉楚王韩信母墓 在府西四十里，与漂母墓对。漂母墓在府西四十里。枚皋墓，在旧淮阴县，今失其所。

唐庐国公程知节墓 在府治东南紫霄宫前。绍兴十年，韩世忠筑城，掘地得碑铭。按知节陪葬昭陵事见唐史。掘地得碑，始自宋王象之《舆地记胜》，后人皆仍其误耳。

宋少卿张来墓 在府城北七里，或云在城西旧淮阴县。教授徐积墓，在府东三里塘，有节孝祠。高阳郡主韩涣墓在旧城西门外。刺史赵师旦墓在府城东三里塘。观察使赵立墓在山阳县北辰镇。

明沐阳伯金濂墓 在府东门外五里塘。尚书沈翼墓，在府南平河桥东岸。侍郎杨理墓，在府西钵池山。太子太保叶淇墓在府移风闸西岸。侍郎叶贇墓，在府治丁十里更字铺。侍郎蔡昂墓在府治南包家围。侍郎胡珽墓在府治西石塘。都御史潘坝墓在府平河桥。都御史卢惠墓在府城西安乐乡。都御史杨靖墓在府柳淮乡。赵母墓，在府城西门外。母凤阳人，明太祖微时，母备仪物送太祖至皇觉寺为僧。太祖兴，母近百岁乃卒，谕葬漂母祠旁。

清提学僉事刘芳声墓 在府南杨家庄。知县刘昌言墓，在山阳县城东三里塘。阎若璩墓在山阳县治东南塔儿头学山墩。

文峰 塔在阜宁县城南。

巢城 在盐城县治北百二十里，黄巢屯兵于此。

盐城监 在盐城县南。《新唐志》云：盐城县有盐亭一百二十三所。《太平寰宇记》云：盐城监。古之盐亭也，历代海岸煎盐之所。南唐立盐城监，其后因而不改。管盐场九所，在县南北，俱临海岸，曰“伍祐”、“紫庄”、“南八游”、“北八

游”、“丁溪”、“竹子”、“新兴”、“七惠”、“四安”等。

铁柱冈 在盐城县东门外。《大明一统志》云：相传秦王系马柱，或云濒海多蛟肆，以此镇之。

石人头 出土高四尺五寸，在盐城治北六十里，近海岸一里。

瓜井 在盐城县内。孙钟种瓜处。《南畿志》云：去治东北半里，旱不竭。

宋丞相陆秀夫墓 在盐城县西南。

淮阴故城 在清河县东南五里，秦置。汉封韩信为淮阴侯，后仍为县。晋永和间，荀羨镇淮阴，以地形都要，屯兵无地，乃营立城池，历代为重镇。《水经注》云：淮水东北经淮阴故城即此。

甘罗城 在清河县旧淮阴县治北，相传为秦甘罗所筑。《南畿志》云：雨后常于土中得小钱，篆文不可识，或云即甘罗葬处。

韩信城 在清河县故淮阴城东，接山阳县。《太平寰宇记》云：信，本淮阴人，宅冢处所并存。后受封为侯，因筑此城。

清河故城 在清河县东北五里，宋置。

吴城 在清河县西二十里小清河南岸。东西有二城，相隔五里。宋南渡后尝置县，绍兴二年罢县为镇。

千金亭 在清河县淮阴旧县西。漂母饭韩信，信贵，赐千金，后人因筑亭其上。又有漂母岸，

在淮阴故县南。

三亭 俱在清河县。韩亭在淮阴故县南，枚亭在淮阴故县北，步亭在淮阴故县西桥南。以韩信枚皋步陪得名。宋晁端彦诗云“韩枚步陪建三亭，故显当时将相名”。

韩王 庄在清河县旧淮阴县西北，与庙驿铺相连，旧传韩信生于此。

宋史钦墓 在清河县北金城乡。

襄贲故城 在安东县北。刘宋泰始中，侨置，应劭曰：贲音肥。

淮浦故城 在安东县西，汉置。或曰即今县治。

涟水三城 在安东县。《南畿志》云大城、东城，二所相连，止隔一濠，谓之市河。又有西城，少远百余步。各有城濠，俱宋嘉熙四年知府萧均所筑。

沙将军城 在安东县东北五十里一帆河东。
又有营城，在县北十五里。元末董搏霄所筑。

抱月城 在安东县西二十里支家河西。城抱淮泗之水，形势似月。

金城故县 在安东县北，唐置。《元丰九域志》云：涟水县有金城镇，即故县也，或曰即襄故城。

豹隐堂 在安东县文庙前，宋时建。赵概初馆于涟水守幕，寻以学士知涟水。人名其堂曰豹隐。

佛陀矶 在安东县北五十里。世传娄道者未出家时，取鱼置船，随鱼去住，人以为异，因名佛陀矶。

九阳洞 在安东县治东一里上真观。世传徐依稀修炼于此。

赤岸 在安东县治东十里。西三十里亦有赤岸。

金刚嘴 在安东县治西南三里，当淮水之冲。筑以杀水势，为西城之护。《南畿志》云：或曰残砖上有尉迟恭字。

洗墨池 在安东县治右。宋郡守米芾去官时涤砚处。

学城 在桃源县北二十里。俗传孔子适楚驻此，邦人从学焉。

灵城 在桃源县西北十七里，相传楚灵王所筑。

桃园故城 今桃源县治。《金史》云：泗洲有淮滨县，兴定二年以桃园镇置。元光二年废。元至元十四年复置，曰桃园县。其后乃讹曰桃源。

泗阳故城 在桃源县东，汉置《水经注》云：泗水经魏阳城北，城枕泗川，疑即泗阳故城。魏文帝临广陵所经，因以改名也。

陆城 在桃源县西五里，相传吴陆逊所筑。

古城 在桃源县西北六十里。晋石崇出镇下邳时所筑。

淮阳故城 在桃源县西北。《隋志》云：梁置淮阳郡，东魏置绥化县，后周改县为淮阳。《水经注》云：泗水东南经淮阳城，城北临泗水即此。按晋末有淮阳郡。《魏书·高闾传》曰：去角城十里。当在今清河县界。而《水经注》泗水所经之淮阳，乃在泗阳之上，盖非晋魏之淮阳也。

扬州府

广陵城 在府东北，去江四十里，战国楚邑。《史记》：楚怀王十年，城广陵。秦置广陵县，汉吴王濞都此，后为江都国，又为广陵国，后汉为广陵郡，隋曰扬州。故城西据蜀冈，北包雷陂，外有大城，中为子城，亦曰牙城。周显德四年，韩令坤以城大难守，筑故城东南隅为小城以治之。既而李重进始改筑于故城南二十里。宋建炎三年，郭棣知扬州，以故城凭高临下，四面险固，即遗址建筑，谓之大城。明初，于大城西南隅改筑，而故城废。

江都故城 在江都县西南四十里，汉置。《太平寰宇记》云：城临江水，为水所侵啮，无复余址。

齐陵废县 在江都县东南六十里，齐永平初置。建武五年，遏父陵湖水，立裘塘屯，移县于万岁村。

江阳废县 在江都县。《隋志》云：旧曰广陵，开皇十八年，置县曰邗江，大业初，更名江阳。

宋郊坛 在江都县南门外法云寺。建炎二年，高宗祀天南郊，筑坛在此。

隋临江宫 在江都县南二十里。大业七年，帝升钓台，临扬子津，大宴百僚，遂建此，亦曰扬子宫。宫内有凝辉殿，宫西有县镜亭、澄月亭、春江亭。又有显福宫，在城外东北，详见宋《宝祐志》赵鹤《郡乘》。

宋行宫 在江都县治。宋建炎元年，高宗奉太后至扬州驻此。

扬吴故宫 在江都县旧子城内，久废。

元镇南五官 在府城西北六里。元世祖二十一年，封子脱欢为镇南王，居于扬州。

宋章武殿 在江都县建隆寺，宋祀太祖御容于此。

甲仗楼 在江都县新城，晋谢安建。

文选楼 在江都县太平桥北旌忠寺。大业《拾遗记》云：有梁昭明太子文选楼。王观扬州赋云：帝子久居兮，空文选之楼。

凤凰楼 在江都县广北乡凤凰池侧，《十道志》云隋炀帝建。

筹边楼 在江都县，宋郭棣知扬州建，曰筹边。又即府南门城建楼，曰镇淮。

明月楼 在江都县大街东。元富民赵氏尝宴客楼上，赵孟頫过之，乞作楣帖，题云“春风阆苑三千客，明月扬州第一楼”。主人大悦，彻酒器为寿。

江淮胜概楼 在江都县瓜洲镇。明正统十三年，周忱建，王英记。

骑鹤楼 在江都县大街内，以《太平广记》“骑鹤上扬州”句名。

彭城阁 在江都县。大业《杂记注》云：旧为彭城村，隋炀帝因地名阁。

延和阁 在江都县治内。唐高骈建，高八丈，饰以珠玉，绮窗绡户。每旦焚名香，列异宝，以祈王母之降。罗隐诗云延和阁上干云，小语犹疑天上闻，烧尽降真无一事，开门迎得毕将军”。

观风亭、溯渚亭 并在府城内。《欧阳永叔集》：景祐三年七月扬州，遇秀才廖倚及子聪于观风亭。又与集贤校理王君玉、大理寺丞许元、太常寺太祝唐诏、祠部员外郎苏仪甫会饮于溯渚亭。

玉沟亭 在江都县。唐李夷简镇淮南，于城西南见新月如钩，遂建此亭。

赏心亭 在江都县。唐李蔚镇淮南，于铁马台西建此亭。适薛阳陶至，奏芦管一曲，其声自然如来天上。蔚大嘉赏，赠以诗云“虚心纤质雁衔余，凤吹龙吟定不如”。亭未有名，因名赏心。《春明退录》云：唐成都有散花楼，河中有薰风楼、绿莎厅。扬州有赏心亭，润州有千岩亭，皆胜迹。

竹西亭 在江都县大仪乡，《宝祐志》云：官河北岸禅智寺前。唐杜牧诗：“谁知竹西路，歌吹古扬州”，因名。

风亭 在江都县治内。宋徐湛之为南兖州刺史，以广陵城北多陂泽，水物丰盛，乃建风亭、月观、吹台、琴室，并在官城东北角池侧，招集文士，极一时游玩之盛。又于城南起万岁楼，以望钟山。无双亭，在江都县后土殿西。宋王禹偁《移琼花

诗序》云：后土殿琼花，天下第一株耳。欧阳永叔牧扬州，作无双亭以赏之。彼土人别号八仙花。或曰李卫公所赋玉药即此，非也。详见《辨讹》。又有琼花台，则元人以八仙花补植者。

美泉亭 在江都县治内，宋欧阳修建，郑兴裔重修。

斗野亭 在江都县邵伯棣，宋熙宁二年建。《舆地志》云：扬州于天文属斗野，故名。绍兴元年，郑兴裔更造于州城迎恩桥南。嘉定间，崔之改题曰“江淮要津”。

四柏亭 在江都县。宋元丰中，教授崔浩著四柏赋以见志。淳熙中，重建学宫，教授彭方复植四柏于厅事之南，因以名亭。

借山亭 在江都县九曲池北，宋马仲甫买池筑亭，名曰借山。

劝耕亭 旧在江都县淮海堂后。每岁仲春，郡守出郊劝农，寓于上方寺。宋庆元五年，郭杲改建亭于寺前，遂移旧题额于此。

江山风月亭 在江都县瓜洲镇东南，元熊汉卿别墅，镇南王尝避暑于此。

孔融台

在江都县宝镜巷内。李文饶赋云：广陵东南有颜太师犹子宅，即孔北海故台。

斗鸡台 今失所在。按《拾遗记》，炀帝于吴公宅斗鸡台下，恍惚与陈后主相遇。杜牧扬州诗云“秋风放萤苑，春草斗鸡台”。

昆邱台 在江都县禅智寺侧，欧阳修筑。《府志》云：台名取“鲍照轴以昆冈”之句。明欧大任诗云“地轴横昆冈，上有百尺台”。

戏马台 在江都县。《桂苑丛谈》作戏马亭，《后山诗话》云其下路即玉钩斜。

吴王濞钓台 《大观图经》云在扬州城北十二里，高二丈。

四并堂

宋韩琦于郡圃建堂，取四难并之义。《府志》云：后庆元中，赵玘复建于杏花村。

康山草堂 在江都县新城东南隅，筑土为山，构堂其上。明正德中，康海去官，客扬州，与名流常晏此。董其昌题额曰“康山草堂”。

芍药厅 在江都县治内。《舆地纪胜》云州宅旧有此厅，在都厅之后，聚一洲芍药

绝品于其中，今镇堂是也。

董仲舒宅

在江都县大东门之外，今两淮运司署即其地。内有董井，府志云井上有亭、有碑。

谢安宅

在江都县运司前法云寺内。晋宁康间，安镇广陵居此，手植双桧，至唐犹存。

吕僧珍宅 在府治内。时有宋季雅者，罢郡还，卜居僧珍宅侧。僧珍问宅价，答一千一百万，僧珍讶其贵。季雅曰“百万买宅，千万买邻”。

杨行密宅 即江都县之光孝院。行密于光化间，以宅施为僧院。

李昇宅在江都县春亭寺。

高丽馆，在江都南门外。宋元丰七年，诏京东淮南筑高丽馆，以待朝贵之使。绍兴三十一年，向子固重建，榜其门曰“南浦”，亭曰“瞻云”。

皂角林 在江都县瓜洲镇北。有皂角树三株，相距数里。《南畿志》云在今为递铺。宋杨万里诗有“河边落叶知何树，今古相传皂角林”之句。

万花园 在江都县堡城内。宋端平三年，制使赵葵即统制署为之。

壶春园

在江都县大市东。宋《宝祐志》云。东酒库内有佳丽楼，称郡胜处，即此。

影园 在江都县，明郑元勋别业。崇祯庚辰夏，园中黄牡丹盛开，广集名流宴赋，南海黎遂球作称第一，元勋贻以二觥，一时称盛。

唐郡圃 在江都县。唐开元间，有杏数十株，花时如锦，太守张晏立馆其下曰“争春”，后人号圃曰“杏村”。

芍药圃 在江都县禅智寺前。韩琦守郡，圃中发金带围四朵，非常种也。宴时，王圭为监郡，王安石为幕官，陈升之初授卫尉丞，过此亦与焉，各簪其一。后四公相继登宰辅。

桑里 在江都县西南二十里。宋大明三年，沈庆之攻竟陵王诞于广陵，宋主命于桑里置烽火，即此。

斗鸭池 在江都县，汉江都易王故姬李阳华常畜鸭，斗于池上。

磨剑池，宋《宝祐志》云隋铸钱监在磨剑池之西。

隋堤 在江都县。隋大业初，开邗沟入江，渠广四十步，傍筑御道，树以杨柳，时谓之隋堤。刘禹锡诗“扬子江楼烟景迷，隋家宫树拂金堤”。

龙舟堰 在江都县南二十里扬子桥西。魏主丕临江试龙舟于此，因名。

瓜步井 在江都县瓜步山，相传魏主寿所凿。又炼丹井，在古仪征观后。

王勾井 在江都县蕃厘观后。《名胜志》云昔有黄冠持画轴见守帅，画中字皆云章乌篆不可识。既去，使人尾其后，至后土祠井而歿。乃使狱囚纵下视之，见一洞，署曰“王勾洞天”。

汉广陵王胥冢 在府城东武乡甘泉山。《郡国志》云：岁旱鸣鼓绕冢，辄致云雨。江都王建冢在府境。

三国魏将军张辽墓 在府城西北大仪乡。

南北朝齐褚澄墓 在城北三十五里陈源桥。澄用石十八片为椁，上刻所著修养方，题曰“齐褚澄方”。后冢发，为萧广得之，遗命其子渊复为椁，用石一片，刻前书其上。

陈刺史杜僧明墓 在高邮州临泽镇。

隋炀帝陵

在府城西北十五里雷塘。大业时，葬于西院。唐武德中，奉诏改葬于此。宫人冢，在府城西吴公台下，一名玉钩斜，亦名宫人斜。

唐参军皇甫弼墓 在江都县南郊。尚书王播墓，在江都县官河东。

五代吴将军朱瑾墓 在府城外雷塘侧

。杨行密冢，在仪征县西七十里。吴杨溥僭号，尊其父行密武皇帝，墓号兴陵。

宋侍读吕文仲墓 在府东十里。

直秘阁陈良墓、枢密张康国墓俱在府东兴宁乡。

转运使苏安世墓，在府东兴宁乡马坊村，王安石撰志。司谏陈权墓在府西山。

学士孙觉墓在府善应乡。直秘阁王俊墓在府善应乡。

学士秦定墓，在府西山秦家庄。观之诸父也。光禄陈亚墓，在府同轨乡。

殿中丞徐元榆墓，在府城外，曾巩有志。国子博士李问墓在江都县。

殿中丞王君墓，在江都县兴宁乡马坊村，曾巩有志。
聱隅先生王晞墓，在江都县扬子桥。

元总管陈允忠墓 在府姚家沙大岸，旧有庙。

明镇远侯顾成墓 在府东南三里。尚书高铨墓，在府西十里仙人掌，李东阳撰墓表。尚书王辄墓，在府西北雷塘。侍郎叶相墓，在府北门外。光禄卿安金墓，在府城西十里。大学士李春芳墓，在府城西二十里弘恩寺侧。

总制曾铣墓，在府西金匱山。

尚书史可法墓，在广储门外梅花岭。招魂葬衣冠于此。

郑烈妇墓，在府城南新河口。定西侯蒋云墓，在府城西金匱山庄。

赠太仆少卿房山知县郝景春墓，在府城外金匱山。

邗沟城 在甘泉县蜀冈上。《左传》杜预注云：吴将伐齐，自广陵城东筑邗城，城下掘深沟，谓之邗沟城。岁久荒芜，宋鲍照作《芜城赋》，遂称芜城。见宋《宝祐志》、赵鹤《郡乘》又谓芜城为刘宋时城。附南北朝宋鲍照《芜城赋》：“弥迤平原，南驰苍梧涨海，北走紫塞雁门，拖以漕渠，轴以昆冈，重江复关之陕，四会五达之庄。当昔全盛之时，车挂轂，人驾肩，廛閭扑地，歌吹沸天。孳货盐田，铲利铜山，才力雄富，士马精妍。故能芟秦法、佚周令、划崇墉、剏浚洫，图修世以休命，是以版筑雉堞之殷，井干烽櫓之勤。格高五岳，袤广三坟，率若断岸，矗似长云。制磁石以御冲，糊颊壤以飞文。观基局之固护，将万祀而一君。出入三代，五百余载，竟瓜剖而豆分。泽葵依井，荒葛明途，坛罗虺蜮，阶斗麕鼯，木魅山鬼，野鼠城狐，风嗥雨啸，昏见晨趋，饥鹰厉吻，寒鸱吓雏，伏虺藏虎，乳血飧肤，崩榛塞路。峥嵘古馗，白杨早落，塞草前衰，棱棱霜气，蔌蔌风威，孤蓬自振，惊沙坐飞。灌莽杳而无际，丛薄纷其相依。通池既已夷，峻隅又已颓，直视千里外，惟见起黄埃。疑思寂听，心伤已摧，若夫藻扃敝帐。歌堂舞阁之基，璇渊碧树弋林钓渚之馆，吴蔡齐秦之声，鱼龙爵马之玩，皆薰歇烬灭，光沈响绝，东都妙姬，南国丽人，蕙心纨质，玉貌绛唇，莫不埋魂幽石，委骨穷尘，岂忆同辈之愉乐，离宫之苦辛哉。天道如何，吞恨者多。抽琴命操为芜之歌，歌曰“边风起兮城上寒，井迳灭兮邱陇残，千龄兮万代，共尽兮何言”。

輿县城 在甘泉县，汉置，属临淮郡。

张公城 在甘泉县。汉桓帝时，广陵张婴所筑。张纲为郡守，单骑造垒，示以恩信，婴悦服归降，因号张公城。

新城 在甘泉县邵伯埭。晋太元十年，谢安出镇广陵之步邱，筑城邵伯埭。明欧大任诗云“谢公镇广陵，甘棠人勿剪，君见东山云，何似邵伯堰”。今堰存城废。

宝祐城 在甘泉县，旧名堡城，即隋迷楼故址。宋宝祐四年，敕大使贾似道筑。又有夹城，在西北四里，亦是时筑。

隋江都宫 在甘泉县大仪乡。大业元年，敕王宏大修江都宫，中有成象殿、流珠堂、水精殿诸处。令宫人盛饰，谓之飞仙。今为上方禅智寺。又有十宫，在城北五里阜苑内。曰“归雁”、曰“回流”、曰“松林”、曰“枫林”、曰“大雷”、曰“小雷”、曰“春草”、曰“九华”、曰“光芬”、曰“九里”。

摘星楼 在甘泉县西北城角，即迷楼故址。宋绍圣三年，晁补之修。后为宝祐城楼。府志云：后有摘星亭，摘星台，皆其地。

卷书楼 在甘泉县西北隅。宋高宗驻蹕扬州，以提点廨为尚书省。礼部程俱寓直诗有“夜寒持被卷书楼”之句。

观音阁 在甘泉县，即迷楼故址，旧传为吴绛仙梳粧台。

云山阁 在甘泉县西北隅，即环碧亭旧址。《宝祐志》云陈升之建。《名胜志》云吕公著守扬时建，落成值中秋，宴客其上，秦观即席赋诗，一座叹服。

水亭 在甘泉县北隅，唐独孤及建。南唐徐知诰，引宋齐邱画灰秘谋于此。

延宾亭 在甘泉县，南唐李昇建。以待四方之士，宋齐邱为记。

吴公台 在甘泉县。刘宋大明三年，沈庆之攻竟陵王诞时所筑。

弩台 高十丈，周二百步，陈大建中吴明彻围东广州，增筑之以射城内，故名。府志云：一名鸡台。唐武德中，葬炀帝于吴公台下，即此。其下有路，号玉钩斜，为隋宫女葬处。

时会堂 在甘泉县蜀冈，宋造，贡茶之所。梅尧臣诗云“雨发雷塘不起尘，蜀昆冈上暖先春。烟芽才吐朱轮出，向此亲封御饼新”。

平山堂 在甘泉县蜀冈上，宋郡守欧阳修建，江南诸山拱列檐下，因名。咸淳五年，李庭芝镇扬州，筑城包之。城废，堂亦为栖灵寺僧所据。清康熙二十年，郡守金镇建堂寺右，堂后增楼五楹，额曰“真赏”，祀历代贤郡守于其上。二十三年，圣祖南巡临幸时，御书“怡情”二字。四十四年，又御书“平山堂”及“贤守清风”四字额。又有御制平山堂诗。

谷林堂 在甘泉县，宋元祐中建。苏辙诗“深谷下窈窕，高林合扶疏”。

萤苑 在甘泉县。隋大业末，帝幸江都，大索萤火数斛，夜出游山，放之光遍岩谷，故名。唐杜牧之诗有“秋风放萤苑”之句。

隋苑 在甘泉县大仪乡，一名上林苑。唐杜牧诗“红霞一抹广陵春”，指此。

二十四桥 在甘泉县，隋置，皆以城门坊市为名。后周显德四年，韩令坤筑州城，分布阡陌，别立桥梁。所谓二十四桥者，或存或废，不可得而考矣。唐杜牧之寄韩判官诗“二十四桥明月夜，玉人何处教吹箫”。宋欧阳修诗云“都将二十四桥月，换却西湖十顷秋”。

公路浦 在甘泉县。伏滔《北征记》云：袁术自九江来，奔袁谭于邳经此，因名。

九曲池 在甘泉县。隋炀帝欲幸江都，命乐人撰水调九曲，建木兰亭于池上，接节歌之，因名九曲池。宋太祖南征，驻蹕池上，有龙斗于池，因建九曲亭以表之。

雷塘 在甘泉县，亦曰雷陂，汉江都王建游雷陂即此。唐武德中，改葬隋炀帝于雷陂南平冈上。元苏大年诗云“雷塘春雨绿波浓，古冢寒烟蔓草空。斜日欲沉山色近，行人无处问隋宫”。

蜀井在甘泉县蜀冈上禅寺侧。其泉脉通蜀江，相传有僧洗钵蜀江，失之，从此井浮出，僧游扬识之。水味甘冽，苏轼曾取大明泉较之，以为不如也，题曰“第一泉”。

宋光禄少卿晁宗恪墓 在甘泉县广陵乡，曾巩有志。

左安城 在扬子县西二十里，宋治平中建。地多山溪，旁有崇邱，道出六合，盖昔时戍守处也。

扬子废县 在扬子县东南十五里，汉江都地。隋末，杜伏威置戍守于此，名扬子镇。唐永淳初，置扬子县。

太子院

在扬子县横山西，即禅证寺。梁昭明太子读书，建堂于此，后僧神坚改为太子院。

扬子江楼

在场子县，南唐时建。府志云：宋庆元中郡守吴洪再建于鉴远亭北，更名烦江楼。

烟雨奇观 在扬子县西南大江滨。宋吴机诗序谓江山一景，实仪征胜概，因建此楼，盖取叶石林“半空烟雨”之句。又建中和楼，在朝宗门上。

白沙亭 旧在扬子县白沙洲。唐韦应物有白沙亭逢吴叟歌。宋嘉定间，方信孺移于注目亭故址。

青鸾亭、白鹤亭 在扬子县西小金山。宋祥符间，诏即其地铸圣像，有青鸾白鹤飞绕炉冶之上，因立二亭。

豁阴亭 在扬子县东范氏园。宋苏轼诗云“白水满时双鹭下，绿槐高处一蝉吟。酒醒门外三竿日，卧看溪南十亩阴”。

壮观亭 在扬子县北三里北山之巔。宋政和中，郡守詹度建，米芾题额。芾诗“邀宾壮观不辞寒，玉立风神气上干”。又东有扁岫亭，宋发运使张嗣昌、杨万里有记。

鉴远亭 旧在扬子县潮闸西，宋米芾书额。后建于城西南，曰“注目亭”。庆元中，又建于江楼前，仍名鉴远。

天开图画亭 旧在扬子县西城上，取山谷天开图画即江山之句以名。宋淳熙中。郡守姚恪建，后因甃城而废，以其名揭于烦江楼。嘉定间吴机别建于朝宗门外江滨，又于其后创水竹、喜凉、涟漪、闻凯、传幽五亭。

乐游台 在扬子县北六里城子山，一名东巡台。

东园 在扬子县东翼城内。宋皇祐间，侍御许元建。中有澄虚阁、清宴堂、共乐堂、拂云亭诸旧迹。附宋欧阳修《真州东园记》：真为州，当东南之水会，故为江淮、两浙、荆湖发运使之治所。龙图阁直学士施君正臣、侍御史许君子春之为使也，得监察御史里行马君仲涂为其判官，三人者乐其相得之欢，而因其暇日得州之监军废营以作东园，而日往游焉。岁秋八月，子春以其职事走京师，图其所谓东园者，来以示余曰：园之广百亩，而流水横其前，清池浸其右，高台起其北。台吾望以拂云之亭，池吾俯以澄虚之阁，水吾泛以画航之舟，敞其中以为清宴之堂，辟其后以为射宾之圃。芙蕖芰荷之的历，幽兰白芷之芬芳，与夫嘉花美木列植而交荫，此前日之苍烟白露而荆棘也。高薨巨桷，水光日景，动摇而下上，其宽闲深靓可以答远响而生清风，此前日之颓垣断堑而荒墟也。嘉时令节，州人士女啸歌而管弦，此前日之晦冥风雨鼠生鼯鸟兽之噪音也。吾于是信有力焉。凡图之所载，盖其一二之略也。若乃升于高，以望江山之远近，嬉于水，而逐鱼鸟之浮沉，其物象意趣，登临之乐，览者各自得焉。凡工之所不能画者，吾亦不能言也，其为我书其大概焉。又曰：真，天下之冲也，四方之宾客往来者，吾与之共乐于此，岂独私吾三人者哉？然而池台日益以新，草树日益以茂，四方之士无日而不来，而吾三人者，有时而皆去也，岂不眷眷于是哉！不为之记，则后孰知其自吾三人者始也。予以为三君子之材贤足以相济，而又协于其职，知所后先，使上下给足，而东南六路之人无辛苦愁怨之

声。然后休其余闲，又与四方贤士大夫共乐于此，是皆可嘉也，乃为之书。

梅园 在扬子县西十五里，中有古意亭。宋嘉定间，郡守吴机建。
丽芳园，在扬子县城东水汇处，内有湖光亭，宋知真州孙虎臣所葺。

白沙镇 今扬子县治。南唐徐温自金陵来朝，因改白沙为迎銮镇。

胥浦 在扬子县西十里。源自小铜山东南。流至城西入于江。旧有伍子胥庙，浦因名。俗传伍子胥解剑渡江处，见《吴越春秋》。

欧阳戍 在扬子县东北十里。《水经注》云：邗沟水上承欧阳，引江入埭六十里至广陵城，即此。梁陈间，陈霸先与侯景战屯之地。

宋屯田员外郎柳永墓 在扬子县西七里山下。新城王士禛《分甘余话》以为王安礼葬之于仙人掌，并有诗云“江乡春事最堪怜，寒食清明欲禁烟，残月晓风仙掌路，何人为吊柳屯田”。

侍郎杨汲墓 在扬子县西十里陈公塘。侍郎王琪墓在仪征县。

待制沈铎墓，在扬子县西十五里。弟兵部侍郎锡墓附。

发运使许元墓，在扬子县甘露乡蜀冈，欧阳修撰志。

少宰吴敏墓，在扬子县北五里北山。

太常博士吴祥墓，在扬子县蜀冈，曾巩有志。

处士徵集墓，在扬子县，王安石有墓表。

元东平路教授张须立墓 在扬子县蜀冈三城里，吴澄撰铭。

明尚书单安仁墓 在扬子县旧江口。靖南侯黄得功墓，在扬子县青山。

郭贞妇墓，在扬子县西沙清水潭上，宋濂有诗。

户部员外郎孙济墓在扬子县蜀冈。

清吏部尚书王永吉墓 在扬子县踞蹠寺。知县刘钦墓在扬子县青山。

都御史李楠墓在扬子县带子沟。

新城 在高邮州东北。宋咸淳初，扬州制置使毕再遇筑土城于东北二门外，与旧城相埒。今仅存遗址。（按再遇乃开禧时大将，距咸淳甚远，似应作开禧。）

广业废郡 在高邮州。梁析竹塘、三归二县置。

高邮废县 即今邮州治，秦高邮亭，汉置县，属广陵国。宋秦观诗云：“吾乡如覆

孟，高据阳楚脊。环以万顷湖，粘天如四壁”。故亦名孟城。

临泽废县 在高邮州东北九十里，刘宋置。今为临泽镇。

龙角院 在高邮城内。《舆地纪胜》云：院藏一龙角，其色莹然，与青玉无异，风雨晦暝，则云气常覆其上。

淮春楼 在高邮州西北，宋郡守赵不慊建。

多宝楼 在高邮州北门外太平街西。商贾云集，竞售珍奇，今仅存桥，名宝楼桥。

玩珠亭 在高邮州北一十里樊良镇。宋嘉祐间，天长泽陂有一大珠，天晦多见，后转入璧社湖，或在新开湖镇，当珠往还之处，因建此亭。

文游台 在高邮州东。宋苏轼、孙觉、秦观、王巩同游载酒论文于此，因名，李公麟为图刻于石。清王贻上重修文游台记：“古来风流文采魁梧奇杰之士，其在当时或不遇，或遇矣，而以名高而取忌，守道而丛谤，至不得一日安其身于庙堂之上，甚者播迁江湖岭峤之间，而坎擦以老死。然数千百年后，学士大夫读其书，思慕其为人，至于其所尝游眺憩息之地，必且披榛棘访碑志，往往为流连、感激、太息，凭吊于荒烟断碣之中，岂其遇有幸有不幸欤，抑丰于此则歉于彼，天道乘除固然欤！昔苏长公生宋盛时，以文章而名动天下，试馆阁为侍从之臣，洊历大藩，天子至以宰相器之，不可谓不遇矣，然终以直道见尤；谢景温李定舒亶之属，继肆其弹射，卒至流离惠州儋耳穷海绝峤之滨，不究其用，为天下惜，至并所谓文章亦禁锢之，何其不幸也？考公平生踪迹多在江淮，又尝与孙莘老、秦少游、王定国辈游处最善，而孙秦二君子者皆高邮人，故邮乐得公而显。而文游台在城东北里许，即公与二三子所尝游眺者也。宋淳熙中，王调葺之。嘉泰中，吴铸重新之。其兴废之迹，大略见于应公武、王元凯二记，自明正德迄今康熙又二百余年矣。余以顺治十七年四月来广陵，文书之暇，多泛小舫往来三十六湖之上，因登是台而吊之，嗟其颓废荒落，谋诸州守吴君及州之士大夫，思所以修葺而振起之者，会吴君秩满，擢蜀之龙安守以去。继之者闽海曾君，余复告之，而曾君又以忧归。继之者铁岭李君，余告之如初。盖始辛丑迄甲辰，阅四岁三守，而台之功以成，余因是慨然有感也。方公泊三君子以直道不见容于世，放迹湖海，登是台以啸咏，发舒其无聊不平之气，亦偶然耳，岂尝计及数百年之后斯台存歿，与后之人为之太息、凭吊、感激而流连者耶？余生后公且五六百载，犹得斯登台，拜公祠宇，恨不及四公当日同其游眺登临之乐，而聆其音旨。诗曰“高山仰止，景行行之”，斯台也，亦后之高山景行也。自宋迄今，阅五六百载，所谓金壬者，其人与骨皆已朽，而斯台岿然。公之风流照映于无穷，然则公不可谓不幸也。公尝作太息一篇送少游之弟少章，有感于孔北海之论盛孝章也。其言曰：“英伟奇逸之士，不容于世俗久矣。虽然，自今观之，孔北海盛孝章犹在世，而向之讥评者，与草木同腐。嗟乎，昔之视古，不犹今之视昔乎！台

在泰山庙后，有楼有亭，皆可以望远。登其上，则长湖水漫，风帆杳霭，稻塍柳陌，缔错而棋布，于秋高密云之时尤宜。楼与亭皆不自名而从台者。存古也。”

朱寿昌宅 在高邮州城西小街内。寿昌事母至孝，建有彰孝坊。

四达斋 在高邮州旧治内，宋郡守赵晦之建，苏轼为之铭。

众乐园 在高邮州郡圃，宋郡守杨蟠所作。堂曰“时燕”“丰瑞”“玉水”。阁曰“摇辉”。台曰“华胥”。亭曰“明珠”“四香”“序贤”。庵曰“尘外迷春”。

稽家庄 在高邮州东南十五里。宋末，嵇聿迎文天祥于家，事之甚谨，复使其子与客伴送至泰州，天祥得由通州航海达闽。天祥再至嵇家庄，诗云“小泊嵇庄月正弦，庄官惊问又何船。今朝哨马湾头出，又在青山大路边”。

三阿 在高邮州西八十里，即北河镇。在晋为三阿，谢玄破苻坚将彭超之地。唐为下阿，徐敬业屯兵于此。

玉女井 在高邮州西南。乐徐道人郑道光与一女居井傍炼丹，同日上升。

陈刺史杜僧明墓 在高邮州临泽镇。

宋安抚使陈造墓，在高邮州华村。 学士孙正臣墓在高邮州焦里村。
英烈夫人墓在高邮州城内。

元太师巴剌墓 在高邮州城西三十三里，学士姚燧撰碑。

明都指挥王观墓，在高邮州南车逻镇，赐祭葬。 邵烈女墓，在高邮州小北门外。

濯缨亭、沧浪亭

在兴化县旧税务司前，宋天圣间，范仲淹建。范诗“笑解尘缨处，沧浪无限情”。

拱极台

在兴化县北城，即玄武台故址，县令詹士龙读书处。府志云，昭阳十二景之一。

景范堂 在兴化县厅后。范仲淹尝宰是邑，后人思之，因作是堂。

古香亭，在兴化县丞署堂前。古梅一株，为范文正公手植。

莲花垛 在兴化县安仁乡。旧传有嫂姑刈稻，姑堕水，嫂援之俱溺。瘞道旁，塚忽生莲数朵，里人惊异，视之乃从口出，遂称莲花垛。

周楚令尹昭阳墓 在兴化县西阳山。

元张万益墓 在兴化县东南，学士危素撰碑。

明尚书成璉墓，在兴化县北毕家湾，后迁于城南。
大学士高谷墓在兴化县北十五里。

侍郎杨果墓、提学副使宗臣墓 并在兴化县。

安宜城 在宝应县西南，本汉平安县治，萧齐改置安宜县。

石鳖城 在宝应县西八十里。魏邓艾筑此以营田。晋永和中，荀美镇淮阴，屯田于东阳之石鳖，即此。

金牛镇 在宝应县东南十五里孝义乡。宋熙宁间筑，土色皆黄，形状如牛。

韩王城 在宝应县东南四十里。宋绍兴间，韩世忠镇淮阴时筑。
又高黎王城，在县南八十里侯村乡，宋治平中高黎王筑。

八宝亭 在宝应县城内西南。唐上元中，尼真如于县地获宝以献，肃宗为此改元，邑人建此亭。

鳧舄亭 在宝应县治，宋县令晁补之作诗记其事。又别建引月亭。

读书处 在宝应县西八十里齐兴寺内，旧传梁武帝读书处。

陈琳墓 在宝应县射阳村。

袁术墓 在宝应县治南三百步，墓门有碑。

元户部尚书梁道祐墓 在宝应县永明寺西三里沟。

明东海侯陈文墓 在宝应县治东北一里松原里。
府尹冀琦墓，在宝应县北五里。九江知府朱曰藩墓，在宝应县东五里官庄。

清翰林侍讲乔莱墓，在宝应县箕山。 鸿胪寺卿刘国黻墓，在宝应县城北。

东阳侯国
在泰州。《汉书·王子侯表》东阳节侯，清河王纲子。太始四年四月己丑封。

子城 在泰州城内东北隅。周二里有奇，表里皆璧，周刺史荆罕儒筑今地。

新城 在泰州北。宋端平中，州守许湛修州城，别筑堡城，今湖荡中去城五里，谓之新城。

海安故城 在泰州东一百二十里，刘宋置。明初，常遇春至泰州，遂东筑海客城屯兵，绝张士诚通州饷道。今为海安镇。

海陵废县 即今泰州治，汉置。《元丰九域志》云。东至海一百七里。

建陵废县 在泰州东北七十里，晋义熙中置。

宁海废县 在泰州东南一百里，晋义熙中置，今为海宁乡。又有蒲涛废县，在州东南。今蒲津乡，疑即其地。

柴墟 在泰州南七里。宋岳飞以泰州无险可恃，退保柴墟，即此。
南唐永宁宫，在泰州城内。李昇迁杨行密子孙于海陵，号其居曰“永宁宫”。相传州治谯楼，即其宫阙故址。

淮东道院 在泰州旧治内大厅之东。宋左丞陆佃为守时，以海陵地僻事简，谓之道院。后嘉定间，郡守李拱始加淮东二字。

海陵监 在泰州东北百二十里，五代煮盐之务也。南唐异元初，于海陵置州，以辖其监，管盐场八，南四、北四。宋开宝七年，置监于如皋县。

海陵仓 在泰州，东汉吴王濞所置太仓也。枚乘传所谓海陵之仓，即此。

望京楼 在泰州，宋咸平中曾致尧建。

景范楼 在泰州迎恩门内，范仲淹旧行衙也。

清风楼 在泰州旧治内，又名清风阁。

浮香亭

在泰州旧治藕花洲之后。有古梅，秦太虚诸人唱和黄法曹梅花是也。宋绍兴初，

陈垓守泰州，镌茂陵御书额及秦观、苏轼、苏辙诗于上。垓又建亭种竹，与浮香亭对，名曰“须友竹”、“必友梅”也。又建归鹤亭，在洲东七里响林异真观内。每岁二月劝耕，坐亭中劳父老以酒果，或与客觞咏竟日。

海屿亭 在泰州西南，宋建炎间将迎所也，米芾书额。

溪光亭 在泰州西溪镇。迎宾亭、避湖亭、奉先亭距此不远，俱宋范仲淹建。

仰止亭 在泰州西溪镇北中洲山，有宋范仲淹遗迹。

南风亭 在泰州西溪镇西南，宋晏殊建。

思贤亭

在泰州西溪镇东寺塔院。宋吕夷简植牡丹于此，后人思之，因建亭曰“思贤”。

宝丰亭 在泰州治东。明嘉靖十五年，蝗不为灾，知州邓诰筑宝丰亭以志。

三至堂 在泰州治内，宋曾肇建。肇祖志尧咸平中知泰州，父易占知如皋，肇复典是郡，因立三至堂。堂后有六咏亭、积翠亭。

文会堂

在泰州旧治内。宋天圣间，滕宗谅为郡从事建，与范仲淹、富弼、胡瑗唱和其中。

读书堂 在泰州东北八十里景德寺东廊。宋天圣中，富弼随父任，与胡瑗、周孟扬同读书于此。时范仲淹、滕宗谅俱官海陵，谓三人皆公辅器，厚遇之，后果然。

瞻衮台 在泰州北城上。宋绍兴间，韩世忠移军于楚州，命提举董畋筑于高沙。都督张浚尝次于此处，因筑台，名曰“瞻衮”。

海春馆 在泰州迎恩门外。宋范仲淹监州西溪盐税，有海角亦逢春语，后人因以海春二字名其行馆。又筑景范楼于馆内。

郭栳潭 在泰州东北十八里港口市。相传唐时有郭栳二氏居此，相为婚姻。栳于积薪下，得卵壳大如斗，以贮米、钱皆不竭。郭假之不还。一日，栳氏釜中跃生鱼，卜之，家当陷，晨具舟逃去，而风雷大作，惟遗一织女与郭氏俱陷，其地遂成潭。每闻潭下有织机声，后为立龙鱼庙。

澡丝井 在泰州东台场西溪镇。相传汉董永偕天女往佣时，汲此井以澡丝，水源广不竭。每蚕熟时，井有白草根长丈余，如丝然。

宋直讲胡瑗墓 在泰州东南一百五十里安定乡。瑗葬乌桓，子志正葬衣冠于此。枢密院使晏殊墓，在泰州东北大宁原。

明侍郎储嵯墓、侍郎徐蕃墓，并在泰州。 兰州指挥使于光墓在泰州耕茶场。
孝子董永墓，在东台县西溪镇北。

徐州府

彭城 在府东南。尧封彭祖于彭城，号大彭氏。后汉有彭城王恭，三国魏有彭城王琚，皆国于此。项羽为楚王，都彭城。《水经注》云：大城内有金城，东北又有小城，小城西又有一城，大司马琅琊王所修。魏有彭城王勰，北齐有彭城王澈。《元和郡县志》云：州内城，贞观五年筑。其外城，即古大彭氏国也。

舞阳城 在府西北五十里。汉封樊哙为舞阳侯，城此，或曰即濮阳之讹。

浥城 在府北三十里，北面临泗水。《元和郡县志》云：故浥城在彭城北二十六里，或曰古崇侯国。州志云：今谓之荣城。明嘉靖末，黄河北徙，城遂为漕黄交会之冲，后河口东移，荣城乃为内险。

吕梁故城 在府东。《元和郡县志》：吕梁故城，在彭城县东五十七里，即故吕县也。城临泗水，其东二里有三城，一在水南，一在水中东上，一在水北，并高齐所筑，立镇以防陈寇。又吕城东十里吕梁洪上有二城，一曰云梦，一曰梁王，土人谓云梦为韩信，梁王即彭越。又洪西岸有尉迟城，唐尉迟敬德督徐州，尝凿吕梁洪，因筑此城。

曹公故城 在府东南六十五里吕梁东岸。或曰曹公筑此以图吕布。西岸又有城临水，是布之所固也，号曰“ 吕布固 ”。《魏书·地理志》云：吕布自下邳与曹公相持，筑城于此，城上有战台，亦布所筑。

弥黎城 《水经注》云彭城西南有弥黎城。新志云：县南太山傍有迷刘城，盖弥黎之讹也。

小市门 即府城通汴门。《北史》云：世祖至彭城，登亚父塚以望城内，遣宋队主蒯应至小市门，宣诏劳问江夏王义恭，即此。

阳平故郡 在府北。《魏书·志》云南阳平郡治沛南界，后寄治沛城。《隋志》云周并南阳平郡入彭城。

西楚故宫 在府治内，宋时犹存，俗呼为霸王殿。

利国监 在府东北盘马山下，接沛县界。汉元封初，从桑弘羊请，于沛县立铁官。唐置秋邱冶，宋初升为监，以董其事。旧志谓苏轼所建，误。

宝丰监 在府治东。宋元丰六年，置铸钱局于此，八年废。

燕子楼 《大明一统志》云：在城西北隅，《南畿志》云在州廨中。唐贞元中，徐州节度使张悟妾关盼盼所居。

黄楼 在府城东门上，宋熙宁中苏轼建。附宋苏辙《黄楼赋》：熙宁十年七月乙丑，河决于澶渊，东流钜野，北溢于济，南溢于泗。八月戊戌，水及彭城。余兄子瞻适为彭城守，水未至，使民具畚钟、畜土石、积刍茭、完罅隙穴，以为水备，故水至而民不恐。自戊戌至九月戊辰，水及城下者三丈八尺，塞东西北门，水皆自城际出，两昼夜不止。子瞻衣裘履屨，庐于城上，调急走发禁卒以从事，令民无得窃出避水，以身率之，与城存亡，故水大至而民不溃。方水之淫也，汗漫千余里，漂庐舍、败塚墓，老弱蔽川而下，壮者狂走，而无所食，槁死于邱陵林木之上。子瞻使习水者浮舟楫、载饘饵以济之，得脱者无数。水既涸消，朝廷塞澶渊，未暇及徐。子瞻曰：澶渊诚塞，徐则无害。塞不塞，天也。不可使徐人重被其患，乃请增筑徐城。相水之冲，以堤防之。水虽复至，不能以病徐也，故水既去而民益亲。于是即城东门为大楼焉，垔以黄土，曰土能胜水，徐人相劝成之。辙方从事于宋，登黄楼，览观山川，吊水之遗迹，乃作黄楼之赋。其辞曰：子瞻与客游黄楼之上，客仰而望、俯而叹曰噫嘻殆哉！在汉元光，河决瓠子，腾蹙钜野，衍溢淮泗，梁楚受害，二十余载，下者为汗泽，上者为沮洳，民为鱼鳖，郡县无所。天子封祀泰山，徜徉东方，哀民之无辜，流死不藏，使公卿负薪以塞宣房。瓠子之歌，至今伤之。嗟维此邦，俯仰千载。河东顿而南泄，蹈汉世之遗害。包原隰而为一，窥吾牖之摧败。吕梁龃龉，横绝乎其前。四山连属，合围乎其外。水迴洑而不进，环孤城而为海。舞鱼龙于隍壑，阅帆樯于睥睨。方飘风之迅发，震鼙鼓之惊骇。诚蚁穴之不救，分间阎之横溃。幸冬日之既迫，水泉缩以自退。栖流楫于乔木，遗枯蚌于水裔。听澶渊之奏功，非天意吾谁赖？今与我公冠冕裳衣，设几布筵，斗酒相属，饮酣乐作，开口而笑，夫岂偶然也哉！子瞻曰：今夫安于乐者，不知乐之为乐也，必涉于害而后知之。吾尝与子凭兹楼而四顾，览天宇之宏大，缭青山以为城，引长河而为带。平阜衍其如席，桑麻蔚乎旆旆，画阡陌之纵横，分园庐之向背，放田渔于江浦，散牛羊于烟际。清风时起，微云霏霏，山川开阖，苍莽千里。东望则连山参差，与水背驰，群石倾奔，绝流而西，百步涌波，舟楫分披，鱼鳖颠沛，没人所嬉，声崩震雷，城堞为危。南望则戏马之台，巨佛之峰，岿乎特起。下窥城中，楼观翱翔，巍峨相重，激水既平，渺莽浮空，骈洲接浦，下与淮通。西望则山断为块，伤心极目，麦熟禾秀，离离满隰，飞鸿群往，白鸟孤没，横烟淡淡，俯见落日。北望则泗水炭漫，古汴入焉，汇为涛渊，蛟龙所蟠，古木蔽空，乌鸟号呼，贾客连樯，联络城隅，送夕阳之西尽，导明月之东出。金镇涌于青嶂，阴风为之辟易。窥人寰而直上，委余彩于沙碛，激飞楹而入户，使人体寒而战栗，息淘淘于群动。听川流之荡潏，可以起舞。相命欢饮千石，遗弃忧患，超然自得。且子犹不见夫昔之居此者乎？前则项籍刘备，后则光弼建封，战马成群，猛士如林，振臂长啸，风动云兴，朱阁青楼，舞女歌童，势穷力竭，化为虚空，山高水深，草生故墟。盍将问其遗老，既已

灰灭而无余矣。故吾将与子吊古人之既逝，悯河决于畴昔，以变化之无在，付杯酒于终日，于是众客释然而笑，颓然而醉，酒倾月坠，扶携而出。陈师道黄楼铭：熙宁十年，京东路安抚使臣某、转运使臣某、判官臣某稽首言：河决澶州，南倾淮泗，彭城当其冲。夹以连山，扼以吕梁。流渊不时盈溢。千里平地，水深丈余，下顾城中，井出脉发。东薄两隅，西人通洫，南坏水垣，土恐不支，百有余日而后已。守臣苏轼念惟流亡，为天子忧，夙夜不怠。以劳其人，兴发戍兵，固敝应卒，外为长桥，乘高如虹，以杀其怒；内为大堤，附城如环，以持其溃。筑二坊于南门之外，以适南山。以安危疑，发仓庾，明劝禁，以惠困穷。以督盗贼，宣布恩泽，巡防内外。吏民响化，兴于事功，法施四邑，诚格百神，可谓有功矣，宜有褒嘉以扬郡县。十月二日甲子奏京师，明年元丰正月甲子制诰谕意。臣轼惟念，祈承谟训，人神力同，敢曰为功，以速大戾而明扬褒奖。无以报称，乃作黄楼于东门，具刻明诏以承天休而有德意，使其客陈师道为之铭。臣师道、伏惟吕尚南仲内抚百姓，外平诸侯，诗美文武。伊甫召虎，南征北伐，功歌宣王。君能使人以尽其才，君子明也。臣能有功以报其上，臣之义也。君臣各尽其道，以惠斯民，国之福也，世之幸也。臣师道又惟感而通之者，道也。行而化之者，德也。制法明教者，政也。治人成功者，事也。昔之诗人歌其政事，则并其道德而传之，声名而播之，后王有则，可举而行之。顾臣之愚，何与于此，诚乐其君臣之尽道云尔。不佞昧死上黄楼铭。其词曰：“皇治惟戒，修明法度，协和阴阳。十有一年，天灾时行，河失其防。齐鲁梁楚，千里四达，溃乱散亡。皇仁隐忧，临遣信臣，以惠东方。羸老不穷，安慰抚养，发散积仓。流人如归，居人亡危，完聚靡伤。天叙地平，明圣成能，入神效祥。灵平告戒，百谷丰盈，历邦乐康。郡县祇畏，允迪圣谟，终事无荒。皇功不居，归休臣民，迺昭远扬。守臣拜乎，夸大休嘉，使民不忘。改作黄楼，以临泗上，述修故常，庶民无佞。原始要终，铭之石章，以告成功，以扬德声，永永无疆。”

快哉亭 在府城东南，即唐薛能阳春亭故址。宋熙宁中，李邦直持节徐州建此，郡守苏轼易名曰快哉。

放鹤亭 在云龙山西麓，宋张天骥筑。右有古井，名饮鹤泉，苏轼有放鹤亭记。

苏墨亭 在府东南百步洪洲上。明成化中，主政尹珍于洪东崖乱石间得石刻一，上书“郡守苏轼山人张天骥诗僧道潜月中游”十六字，盖轼守徐时笔也，因建亭百洪之洲，名曰“苏墨”。嘉靖间，李汝兰葺之。

戏马台 在府城南一里，项羽因山筑台，以观戏马。晋义熙中，刘裕在彭城，九日大会宾僚，赋诗于此。今为台头寺，有故塔在焉。

逍遥堂，在府治后，苏轼为守时，与弟辙会宿于此，各有诗。

楚山堂 在府城北，元钱光弼为平江路总管时建。

彭祖宅 在府治西北隅，。宅旧有井，唐皇甫井诗“旧井莓苔近寝堂”是也。又城东为彭祖楼，《方輿胜览》云，汴泗二水经彭城县彭祖楼之侧。

大彭馆 在府西南，唐时驿传所经，亦为迎饯地，以古大彭国为名。咸通间，庞勋陷彭城，执观察使崔彦会于彭馆，即此。廉里，在府西北，有龚胜宅，汉书云龚胜居彭城之廉里。

彭城三里 彭城刘氏同出楚元王后，宋武帝时刘氏分为三里，以别帝族。左将军刘怀肃居安上里，豫州刺史刘怀武居丛亭里，宋氏帝族居绥舆里，萧县有绥舆山即其地。

孟徙里 在彭城，一名渎上，汉韦孟所居。

悬水村 在府吕梁洪。庄子云吕梁悬水三十仞，故名。

雍门村 在府东南五十里。战国时，雍门周弹琴见孟尝君，此其故居。

寒山堰 在府东南十八里。梁萧渊明伐魏，尝于此壅泗水以灌彭城。

苏堤 在府城东南。宋苏轼守郡时，河决汇城下，筑长堤障之。

楚王井 在府西楚王山之南，汉楚元王时凿，其井九十有九。

楚将范增墓 在府城南里许，一名亚父冢。

汉丞相王陵母墓

在府城西南二里。楚项羽取陵母置军中招陵，母伏剑死，因葬此。

留侯张良墓，在府北七十里留城之南。舞阳侯樊哙墓在府城北九十里。

中垒都尉刘向墓，在府城西北二里。墓侧旧有祠，以文学名。

光禄大夫龚胜墓在府城东南三里。华陀墓，在府城南山川坛侧，有墓碣。楚元王墓，在铜山县西二十里楚王山。《北征记》彭城西二十里有山，有楚元王墓。又有古冢数十。相传为子孙墓。

元总管钱光弼墓 在府九里山，有碑。

明都督山云墓 在留城。云镇广西卒，正统四年敕葬于此，有神道碑。

学士权谨墓，在府城北团山之阳。

万崇德墓，在府城南太山东奎山西，子寿祺墓与相近。

曹马城 在萧县旧城西北，中有古塔，相传曹操曾驻马于此。

郭城 在萧县西南二十五里，相传后周太祖所筑。《南畿志》云方二千三百步。

扶阳城 在萧县西南五十里，汉丞相韦贤封邑于此。《后汉书》扶阳侯韩歆，建武十三年封。

萧子国城 在萧县治西北，《左传》杜预注：萧宋附庸国，城临古汴。《城邑考》云：古萧国城一名黄阳城，亦谓北城，在旧城北二十里，古县皆治此。宋时河决，徙治南城，明万历五年没于水，乃迁今治，去旧城十里。

杼秋城

在萧县西七十里，汉置。《后汉书》云杼秋县名，属梁国，光武封刘般为侯于此。

永固旧县 在萧县东南四十里永固山下。元至大间置县于此，今为永固镇。

拱翠堂 在萧县圣泉山中，窦敦礼建。

红亭乡 在萧县西北。《左传》云昭八年，大搜于红。杜预注云，萧县西有红亭，《水经注》谓之鸿沟亭，因鸿沟水为名，《太平寰宇记》谓之洪亭，皆声相通也。《汉书·王子侯表》：嬴懿侯刘富，楚元王子，孝景元年封红侯。闵子村在萧县城南。

孝感泉 在萧县旧城中。唐主薄宋思礼事继母孝，大旱，母羸疾，祷此得泉，饮之得愈。尉柳晃为刻石，颂其孝感。

周先贤颢孙师墓 在萧县南三十里，春秋致祭。先贤闵子墓在萧县。申详墓在萧县崛坊村。楚大夫宋玉墓在萧县西南三十里。

三国吴孱陵侯吕蒙墓 在萧县西南六十里。按萧在魏境，吕蒙不得葬此。

明郑恕墓 在萧县白茅山。明靖难兵至萧，不屈死，葬此。谢祐墓在萧县白茅山，祐为县教谕，卒葬此。诸生每以清明日奠之。

狐父城 在砀山县西南三十里。《史记》云：曹参击秦将司马尼于砀东，破之，取砀狐父即此，亦名狐父聚。

梁城 在砀山县城山。汉以秦砀郡为梁国，梁孝王增筑之。今县治居其东北隅。

殽县故城 在今殽山县南，秦置。即今永城界之保安镇。

下邑故城 在今殽山县东三里，秦置。

安阳故城 在殽山县东北二十五里，春秋时麻城也。后魏置。

安阳县 《魏书志》云。安阳县治麻城是也。今为麻城集。

香城 在殽山县南，《水经注》云殽陂中有香城。

黍邱亭 在殽山县南。《左传》云：宋围曹，曹伯阳筑五色于其郊，有黍邱。《杜预注》云：下邑县西南有黍邱亭。

平台 在殽山旧县东。汉梁孝王大治宫室，为复道，白宫连属于平台三十里。唐为燕喜台，《南畿志》云：城东五十步、台上有石刻三大字，相传唐李白笔。按李白有秋夜与刘殽山泛燕喜亭池诗。

梁园 相传在殽山县平台下，梁王育养禽兽之所。李白诗作梁苑，枚乘赋作菟园，谢惠连赋、高适诗作兔园。

午沟里 在殽山县东北，接丰县界，后梁太祖始生之地，尝改为锦衣乡。

秦陈王胜墓

在殽山县。胜至下城父，其御庄贾杀胜降秦，葬殽山，汉高祖为置守冢人。

五代梁广王朱全昱墓 在殽山县北一里，梁太祖兄。

宋太尉党进墓 在殽山县南三十里。进马邑人，为太祖时名将，有碑记。

元中丞曹甫墓 在殽山县北三里。侍御史曹伯启墓在殽山县北三里。

赠上谷郡伯成克敬墓在殽山县城东二里。

司马城 在丰县西北三十五里，汉浮阳侯司马耀所封邑，有铁碑。

邀帝城 在丰县西南二里，汉高祖征黥布过沛地，沛父老送丰西，力请复丰，高祖从之，因名其城曰邀帝，亦曰邀驾城。

偃王城 在丰县北五十里，相传宋偃王所筑。

厌气台 在丰县城内县治东。始皇东游，筑以厌王气者。附宋王禹偁厌气台铭：古之王者筑灵台，视雪物，察气候之吉凶，知政教之善恶。苟理合天道，垂休降真，则必日新其德以奉之；化失民心，为妖作沴，则必夕惕其躬以惧之。如是则变祸福而反灾祥，不为难矣，乌有筑高台厌王气，行巫覡之事，御天地之灾者乎？嬴政之有天下也，始以利嘴长距、鸡斗六国而擅场，复以钩爪锯牙，虎噬万方而食肉，终以多藏厚敛，蚕食兆民而富国。然后戍五岭，筑阿房，驱周孔之书，尽付回禄。惑神仙之术，但崇方士，收大半之赋，则黔首崩分。用惨刻之刑，则赭衣栲比。鲸鲵国政，蝼蚁人命，原膏野血，风腥雨膻。六国嗷嗷，上诉求主，天将使民息肩于炎汉，故望气者云，东南有天子气，于是祖龙巡狩，筑台以厌之。殊不知民厌秦也，诉之于天，天厌秦也，授之于汉，秦独厌天厌民而自主呼？向使筑是台，告天引咎，迁善树德，封六国之嗣，复万民之业。薄赋敛，省徭役，销戈镞兵，最稼穡，除高斯之暴政，修唐虞之坠典，下从人望，上答天意，则王气而不厌自销矣，刘项之族何由而兴哉？某游丰沛之间，观台之旧址，思故览今，怅然有怀，洒翰濡毫为之铭曰：台之筑兮，救秦之衰，厌之不得，为汉之基。气之厌兮，虑汉之昌，厌之不得，速秦之亡。秦之厌汉，其惟一身，汉之厌秦，乃有万民。高台巍峨，王气氤氲，秦政已矣，汉德为新。泱泱前古，茫茫后尘。故国芜没，荒台草蓁。行人环竦，惻怛斯文。

汉高祖旧宅 在丰县中阳坊。《汉书·高帝纪》云沛丰邑中阳里人，《述征记》谓在丰水东九十里，当作九里。萧何宅，在丰县东门城下。

卢绾宅 在丰县城西北隅。绾与高祖同里，封燕王，宋建炎中改为永宁寺。

朱陈村 在丰县城西北二十里。宋苏轼有题朱陈村嫁娶图之诗。

粉榆社 在丰县东北十五里。《汉书》：高祖初起，祷扮榆社，后四年天下大定，诏令丰治粉榆社以时祀之。颜师古注云。以树为社神也。

伏道 在丰县东北城下。秦始皇东游，埋宝剑、丹砂以厌王气。至丰地，汉高祖即自疑，乘夜而潜出，遁于芒砀山，至今道中之荆棘顺生。

柳公井 在丰县西门外。公名毅，旧立庙，有碑。

试剑石 在丰县汉高祖庙内。有石高三尺余，中裂如破竹，不尽者寸余。

绛侯周勃墓 在丰县东北十二里。丞相周亚夫墓，在绛侯墓左二里，勃次子。什方侯雍齿墓，在丰县北九里。

宋参政李若谷墓 在丰县北五十里。

元翰林学士袁遵道墓 在丰县华山西北，墓碑赵孟书。
遵道子丞相焕墓，与父墓近。侍郎曹中墓在丰县城西。
徵士秦英墓，在丰县城东南三里许。

仲虺城 在沛县南四十里，一半属于府境，相传仲虺居于此处。晋《地道记》云：
仲虺城在薛城西之三十里处，俗名谓之斗城。

逼阳侯国 陨侯国，今亦在沛县。《汉书·恩泽侯表》建成侯吕释之。又杨乡侯
国与扶德侯暨合阳国皆在沛县。

广戚故城 在沛县东五里之地，泗河之东，汉以为广戚侯国。莽居摄元年，奉孺子
婴续为汉嗣，改县名曰力聚。明嘉靖中叶，又于此地筑城，名
曰沽头城。此处旧有沽头闸三，今皆圯焉。

泗水旧城 在沛县治东，秦以沛为泗水郡治。

湖陵城 在沛县西北五十里，与山东鱼台县接界。故宋邑，秦置县，今为湖陵闸，
去庙道口十八里，运河所经也。又有灌城，在县西北二十里，相传汉将灌婴所筑。
又泗河东岸有旧城，相传张士诚所筑。

留县故城 在沛县东南五十里。《春秋》曰：襄公元年，楚子辛侵宋吕留。杜预注
云：彭城郡之吕城留城也，而秦置县。汉封张良为留侯，国于此。

沛县旧治。在今沛县北，商世国。秦置县，为泗水郡治。汉为高祖汤沐邑。后以属
沛县，谓之小沛。后汉有沛献王辅，魏有沛穆王林，晋有沛顺王景，皆建国。《水
经注》云：泗水经沛东合黄水，又南经小沛县东，《太平寰宇记》谓微山下有故沛
城，即小沛也。

沛宫，在沛县东南二十里。汉高祖宴父老于沛宫，即此。《史记》云孝惠五年，以
为高祖原庙。附唐柳宗元沛上原庙碑铭：昔在帝尧，光有四海，元首万邦。时则舜
、禹、稷、高佐命垂统，股肱天下。盛德未衰而内禅，元臣继天而受命。四姓承休
，迭有中邦。五神还运，炎德复起。周道消灭，秦德暴戾，皇天畴庸，审厥保承，
乃命唐帝之后，振而兴之。又俾元臣之后，翊而登之。所以绍复不绩，不坠厥祀。
故曲逆起为策士，辅成帝国。吐谋洞灵，奋奇如神，舜之胄也。汝阴脱帝纲，摧陷
暴气，扶乘天休，运行嘉谋，禹之苗也，酈侯保綏三秦，控引汉中，宏器郭度，以
大帝业，高之裔也。淮阴整齐天兵，导扬灵威，覆赵平魏拔齐，殄楚平阳，破三秦
，收魏玉，绛侯定楚地，固刘氏，皆稷裔也。克复尧绪，昭哉甚明。天意若曰：建
大德者必唐帝之胄，故汉氏兴焉。翼炎运者必唐臣之孙，故群雄登焉。是以高帝诞
膺圣祚，以垂德厚，探吴穹之奥旨，载幽明之休韦占，杀白帝于大泽，以承其灵。

建赤方芹于沛邑，以昭其神。假手于嬴，以混诸侯，凭力于项，以离关东。奉纘尧之元命，而四代之后咸猷其用，德乘木之大统，而秦楚之盛，不保其位。既建皇极，设都咸阳，抚正四方，训齐天下，乃乐沛宫。以追造邦之本，乃歌大风。以昭武成之德，乃奠旧都。以壮王业之基，生为汤沐之邑，没为思乐之地。且曰，万岁之下魂游于此，惟兹原庙，沛宫之旧也。祭蚩尤于是庭而赤精降，导灵命于是邦而群雄至。登布衣于万乘而子孙得以纘其绪，化环堵为四海而黎元得以安其业。基岱岳之高，源洪河之长，蓄灵拥休，此焉发迹。盖以道备于是而后行之天下，制成于是，而后广之宇内。天下备其道而神复乎本，宇内成其制而心怀其旧。宜其正名以表功，用成其始，俾生灵尽其敬焉。陈本以宅神，用成其终，俾生灵尽其慕焉。故高帝定位，建兹闾宫，惠皇嗣服，爰立清庙，绵越千祀，至今血食，此所以成终而成始也。且夫以断蛇之威，安知不运其密，用佐岁功以流泽欤。以约法之仁，安知其不流其祀眷，相旧邦之遗黎欤。以绍唐之余庆，统天之遗烈，安知不奋其神化大佑于下土欤。然则展敬乞灵，乌可已也。铭于旧邑，以迪天命。其辞曰：荡荡明德，时维放勋。登翼炎运，唐臣之孙。秦纲既离，鹿骇东夏。长蛇封豕，蹈跃中野。天复尧绪，钟韦占于刘。赫矣汉祖，播兹皇猷。扬方芹沛庭，约从诸侯。豪暴震叠，威声布流。总制虎臣，委成良畴。剿殄霸楚，遂荒神州。区宇怀濡，黔黎辑柔。表正万国，炎灵用休。定宅咸阳，以都上游。留观本邦，在镐如周。穆穆惠皇，宗禋克承。崇崇沛宫，清庙是凭。原念大业，肇经兹地。方专元命，亦举严祀。建旗衅鼓，遂据天位。魂游故都，永介丕祚。焕列唐典，严恭罔坠。勒此休铭，以昭本始。

啮桑亭 在沛县西南。《战国策》云张仪及齐楚之相会于啮桑亭，即此。徐广曰啮桑在梁与彭城间。

泗水亭 在沛县东南里许。汉高祖为亭长，即其地。附汉班固沛水亭碑铭：皇皇圣汉，兆自沛丰。乾降箸符，精感亦龙。承魁流裔，袭唐末风。寸天尺土，无俟斯亭。建号宣基，维以沛公。扬威斩蛇，金精摧伤。涉关陵郊，系获秦王。应门造势，斗壁纳忠。天期乘祚，受爵汉中。勒陈东征，剽擒三秦。灵威神佑，鸿沟是乘。汉军改歌，楚众易心。诛项讨羽，诸夏以康。陈张画策，萧勃翼终。出爵褒贤，裂土封功。炎火之德，弥光以明。源清流洁，本盛末荣。叙将十八，赞述股肱。休显运祐，永永无疆。国宁家安，我君是升。根生叶茂，旧邑是仍。于皇旧亭，苗嗣是承。天之福祐，万年是兴。

歌风台 在沛县治东南。旧有亭在泗水西岸，碑刻汉高祖大风歌。亭久圯，明成化间移于县东南。

射戟台 在沛县南门西。后汉袁术攻刘备于沛，吕布驰往救之曰，诸君观布射戟，中小枝。便当解去，一发果中，台以此名。台上有蜀先主庙。

樊巷

在沛县歌风台北，即樊哙所居，断碑犹存。又有樊井在东门外，相传屠狗处。

玻璃井 在沛县，深不可测，其味甘冽，世传汉高帝所凿。

古鼎 明万历二十八年秋，沛县北朱氏掘得。鼎中注五铢钱甚多，因舁置学宫。

石刻竹 宋苏轼笔。刻竹二枝于二小石上，今嵌沛县学宫大门东西壁上。

商相仲虺墓 在沛县南四十里虺城内。微子启墓在沛县微山。

明知县颜环墓 在沛县城西二里。永乐时父子死节。蔡楫墓在沛县蔡家庄。
张贞观墓在沛道东郭内。

下邳城 在邳州东三里，春秋时邳国。应劭曰，邳在薛，后徙于此，故曰下邳。秦置下邳县，汉封韩信为楚王，都此。后汉有下邳惠王衍，晋有下邳献王晃。《太平寰宇记》云：下邳有三城，大城、中城，吕布筑，小城石崇筑。

薛 本在鲁地，奚仲迁于邳。鲁庄公筑台于薛，即薛旧都，已迁于邳，又以邳为薛。后又为上邳。《汉书·王子侯表》：上邳侯郢客楚元王子葛绎、归政皆侯国，均在邳州。《史记》建元以来侯者表，葛绎侯公孙贺。《隋书》李穆传：穆子直封归政侯。

良城故城 在邳州北六十里。《春秋》云：昭公十三年，晋侯将会吴子于良是也。汉封鲁安王子文德为良成侯，国于此，后为县，北齐省。《隋志》云：有良城县，乃故武原县，非良城也。

武原故城 在邳州西北百里胜阳山西泖口社。汉侯国功臣侯表：乃故武原侯卫胘，高帝八年封。

祖口城 在邳州东北。《春秋》云：诸侯会吴于祖，是也。《水经注》云：流水东南经祖口城，东合祖水。

余行城 在邳州北八十里受贤乡。元季平章王信筑，俗称为余行省城。

白门 即邳州大城之门。《元和郡县志》云，下邳县古邳国城，城有三重，大城周围十二里半。魏武擒吕布于白门，即大城之门也。中城周四里，吕布所守。小城累砖坚峻，周二里许，晋北中郎将荀美、郗恬所治。西南又有一城，石崇所筑也。又徐州南门，亦号白门。《唐书·崔融传》：张玄稔攻徐州，徐吏路审中率死士应官

军，启南白门，与邳州之白门为二。

高迁亭

在邳州界，后汉封尚书令周承为高迁亭侯。《十三州志》云。下邳县有高迁乡。

升仙亭 在邳州治南。相传州人刘纲于此仙去，后人筑亭立祠。

圯桥 在邳州治东南隅，年久水没。《元和郡县志》云下邳有沂水，号长利池，池上有桥，即黄石公授书之地。东楚谓桥为圯。《汉书》云张良步下邳圯上。俗呼圯桥，叠文之误也。

焦墟 在邳州东。宋泰始三年，沈攸之援下邳，屯军于焦墟，即此。

葛洪井 在邳州葛峰山顶，世传葛洪炼丹于此。又旧州治西南有项羽井，州北有漆井，相传石崇所凿。

周宋偃王墓 在邳州徐山。

三国魏记室陈琳墓 在邳州。按宝应县又有陈琳墓，不知孰是。

明义士王台辅墓 在邳州城北四十五里象山巅。

下相城 在宿迁县西界。《舆地广记》云宿迁秦下相地，应劭曰相水出沛国相县，于水下流置县故曰下也。今县西七里有下相社。《史记·高祖功臣表》有下相严侯冷耳。又有项王故城在运河西三里。

凌县故城 在宿迁县东南五十里。秦置凌县，汉为泗水国。《水经注》云泗水东经凌栅南，即旧凌县治也。

宿预故城 在宿迁县东南，本周公犹国。汉置公犹县，晋改置宿预。

司吾故城 在宿迁县北，春秋时钟吾国，汉置司吾县，应劭曰钟吾国即司吾也。魏时讹曰峒晤。《水经注》云司吾城在司吾山东。《太平寰宇记》云峒嵒镇在今县西北七十里司吾故乡。

高平侯国

在宿迁县。《汉书·恩泽侯表》齐平戴侯王逢时，皇太后弟河平二年封。

樊阶城 在宿迁县西北，亦作樊谐。《通鉴》云：宋泰始元年，沈攸之退保樊阶城

是也。晋宁故郡，在宿迁县东南，晋置。

伍员里 在宿迁县北七十里桃沟崖。

项羽里 在宿迁旧县治北一里梧桐巷。

石崇闸 在宿迁县东南三十里，故址尚存。

明葛姑墓 在宿迁县治南四十里。姑明末流寓洋河镇，事母不嫁，里中奉为女师，九十余卒，众共为营葬。至今妇孺岁时往祭之。

古城 在睢宁县西北七十里，俗名瞻王城。《南畿志》云，在宿迁治西五里，相传项羽所筑。又有新城，在县西北五十里。《南畿志》云，韩平章守御邳州所筑。

蒲如商世国 在睢宁县。又淮陵汉侯国亦在睢宁县。

九成城 在睢宁县东北二十五里，有东西二城。

取虑城 在睢宁县西南，秦置县。汉志云：汝南步游张为取虑令，即此。

晋太保王祥墓 在睢宁县南二里。按祥琅琊临沂人，葬地未有确据，此地有墓者，盖因祥封睢宁公故也。

唐英公李勋墓 在睢宁县黄山社。按勋墓在陕西醴泉县，详《辨讹》。

明忠义冢 在睢宁县东南陵城集，明古达可、戴国柱墓。

双烈墓，在睢宁县东五里，正德中徐雪梅、严锐儿二女拒贼死葬。

太仓州

涂松城 在州东北三十五里七浦南，旧为涂松镇。宋元丰间，去镇为市。张士诚筑城设营于此。今废。

太仓 即今州治，相传孙吴置仓于此，旧名东仓。元至元十九年，建海运仓于此。是时海外诸番交通市易，谓之六国马头。旧无城，张士诚始筑城守御。明洪武中置太仓卫。弘治十年，始割昆山、常熟、嘉定三县地置州，即今酒库司为州治。按太仓缘始，旧说各异详见《城池》。

墨妙亭 在州淮云寺。元顾信得赵孟书，即摹石构亭覆之，名墨妙。赵书有《归去

来辞》、《送李愿归盘谷序》，石刻在儒学内。

芝秀轩 在州元马廷玉所居。虞集书额，李光孝撰记，杨维贞撰歌辞，时称三绝。

团溪鱼乐 亦名乐隐园，在州沙头镇，元瞿边祥隐处，维贞记。

周氏园 在州普福寺后，周棠创。又筑七冈，在双凤。

菽园 在州城西南隅明德坊，周参政陆容所构。
相近又有锦溪别墅，明参政陆昶建。

东园 在州东门外。王锡爵家园。水石亭榭皆一时名流所布置，其孙时敏加葺焉。

梅村 在州太仓卫西。王士骥旧业。本名贲园，清吴伟业拓而新之，易今名。

归村 在州西十二里，王时敏别业。附吴伟业《归村躬耕记》：吾友王烟客奉常治西，田于归泾之上。归泾者，去城西十有二里。或曰先有归姓者居焉，或曰以其沿吴塘而北，可归也，故名之。烟客自号归村老农，筑农庆堂以居，而以告其友人曰：吾年六十，盖已老矣，将躬耕乎此。闻者疑之曰：古之为耕者，以其有耕者之乐也。土膏陆海，亩乃一钟，芍陂曰渠，灌及万顷，故有筑堤作塘，开田引渎，役使数千家，此美田上腴者之乐也。若夫陆军山中，褒斜谷口，平畴广野，出于孤峰叠嶂之巅，屏弃世事，隔绝人代，架幽壑以立屋，焚深林而粪田，此高山穷谷者之乐也。烟客自奉常谢政，幅巾里门，有城中赐第，以安起居，有近郊别墅，以娱杖履，图书足以供朝夕之玩，宾客足以接谈笑之乐，又何必去城市、谢朋旧，以乐此躬耕为也？烟客曰：不然，此田是先朝禄赐之所遗也，是先相国文肃所以贻子孙也。往者神庙之世海内为安，生民不见兵火。大江以南大臣之致政家居者，美田宅，盛邸舍，厚自奉养。而吾祖惟得海滨寝邱之地，以供值粥，萧闲杜门，不知家人生计。性爱田野，嗜花药，开种竹之圃于东郊，筑艺菊之亭于北郭，而犹患过客之迹我也。晚岁玺书存问，郡邑大夫执板而贺谒者车填马咽，而吾祖命小舟、携短策，逍遥于南陌北阡，遇者不知为三公也。即今三十余年，而韦相之庄，离落犹存，陆生之田桑麻如故，旧老遗民尚有过而叹息者。吾为人子孙，忍使弗而不治乎？且吾受前人之余泽，奉车省闼，陪祀陵园，以及亲郊视学，大阅藉田，无不具簪笏以从。已而持节衔命，渡钱塘、入豫章、涉沅湘、逾闽峤，足迹几半天下。世故流离，衰迟颓暮，犹得守先畴之畝亩以送余齿，退而与田夫野叟谈升平之遗事，叙生平之旧游，不已幸欤！若夫歌舞陆博，通饮食，侈游观，下至逐什一之利，竞锥刀之末者，非吾之所乐也。吴伟业闻之曰：不忘先朝，忠也。追述祖德，礼也。保素节而出流俗，义也。其为躬耕也，大且备矣，是不可以不记。

黄姑村 在州张泾关渡东南三里。相传牵牛、织女二星降其地，织女以金簪画河水

涌，牵牛不得渡，土人因立祠，俗呼织女庙。庙西有水，名百沸河。

晋瞿研先生墓 在太仓州直塘市。其地有广安寺，浚塘得古冢砖刻。瞿研先生字鹊子，广州人，隐居不仕，葬于东陵武安寺重冈之原。武安盖广安之旧额也。按史称瞿研先生隐居宜城文脊山中，其墓不当在此。

宋宋家坟 在州茜泾南一里。相传宋高宗渡海而妃卒，葬此，至今封丘高起。按《宋史》高宗驻平江三日，晚次吴江，遂幸临安，无至此地事，墓疑误。寺丞郑直墓，在州大北门内，今呼为大夫坟。朝散大夫郑升卿墓，在州樊泾北官道东。今为民居，神道柱石犹存。

明教谕殷奎墓，在州大北门外盐铁塘之原。

尚书毛澄墓，在州城北盐铁塘东南。庶吉士张溥墓在太仓州。

孝子瞿兴嗣墓，在沙溪镇北横沥东原，宋濂志。

兵部尚书陈洽墓，在太仓州十六都法轮寺右。其北为孝子陈河墓，王锡爵表。

孝子王在复墓，在太仓州北门外东一都。嘉庆初年，知州康基田封墓立碑。

浙江副使张振之墓，在太仓州盐铁塘西蔡泾之原，王世贞志，王锡爵表。

右都御史李继贞墓，在太仓州十二都三图。

陕西参政黄元勋墓，在太仓州沙溪镇，文震孟志。子安吉知州翼圣祔。

安道先生陈瑚墓，在太仓州二十九都六图。祔父庄介先生墓侧，汤来贺志。

孝子吕云孚墓，在太仓州二十八都。吕云奇墓在涂松，黄与坚志。

清苏贞烈妇郁氏墓，在太仓州十五都八图，李大还志。

冯策勋聘妻王烈女墓，在太仓州璜泾定心潭上，泾县朱琦有诗。

娄曲草堂 在镇洋县武陵桥下，殷奎所居。又有春水船最胜，为奎读书处。

江雨轩 在镇洋县东北五十里茜泾，元偶桓所居。

弇山园 在镇洋县隆福寺西，明王世贞家园。广七十余亩，中叠三峰曰“上弁、中弁、下弁”，极亭榭卉木之胜。又有澹圃，世贞弟世懋所筑。

杨将军墓 在镇洋县六窑塘之北。相传宋理宗时，有杨将军战死于此，藁葬焉。后人见其墓有光怪，因立庙。

元孝子秦玉墓 在镇洋县吴塘之原。昆山知州王安贞墓，在镇洋县茜泾。安贞知州事，多德政，升饶州，治中卒，州人思之，迎葬茜泾河滨。

朱节妇茅氏墓，在镇洋县寿山桥北，知州揭傒斯表之。

明太常陆忬墓，在镇洋县盐铁塘东南。侍郎王倬墓，在镇洋县麋场泾北。
都御史王忬墓，在镇洋县杨林塘。子尚书世贞少卿世懋祔。
孔氏始迁祖墓，在镇洋县吴泾之原。
江西按察使黄元会墓，在镇洋九都致和塘，姚希孟志。
太常少卿王时敏墓，在镇洋县二十四都三图。
尊道先生陆世仪墓在镇洋县十八都。
贞介先生盛敬墓，在镇洋县南门外章泾，沈受宏志。

清侍郎王原祁墓在镇洋县五都。大学王校墓，在镇洋县二十都三图，惠士奇志。
烈尼周凤姑墓，在镇洋县小西门内。乾隆八年，巡抚陈大绶勒石表墓，题
曰血凝白璧间。同治九年，署知州蒯德模修葺碑亭，撰记勒石。

坞城 在嘉定县南。《越绝书》云：娄门外有鸿城者，故越王城也，去吴县一百五十里。《姑苏志》谓在嘉定县南五十里吴淞江南，相传吴王所筑，鸿、坞字相类，道里亦相近，盖即一城也。

陂城 在嘉定县南门外，即唐之陂城乡也。元设教场于此，名陂塘。又避吴越王讳，遂易名曰娄塘。

汧渎城 在嘉定县西南四十里。晋隆安二年，袁山松为吴郡太守时筑，以备孙恩。今半毁江中。

后军厂 在嘉定县东南三十五里，宋韩世忠曾驻军于此。

畏垒亭 在嘉定县安定镇，归有光读书其中，名曰畏垒，自为记。

农隐堂 在嘉定县黄姑塘，龚昱与陆游、刘过吟咏唱和处。

嘉树堂 在嘉定县北三十里练祈塘，宋强氏所居。强先世斌自汧居吴，手植嘉禾如皂荚，二百余年物也。

致美堂 在嘉定县，归有光所居也。堂前有二石，归有《二石歌》。

瑞竹轩 在嘉定县集仙宫。元大德中，道士孙应元以枯竹架蔷薇，竹忽丛茂成林，因名其轩曰“瑞竹”。

柜园 在嘉定县晏海门内，侯峒曾之东园也。

周公村

在嘉定县西南乡，巡抚周忱常步村舍。有老妪预知将至，治饌饷之，今遂名其村。

新丰乡 在嘉定县南三十六里。宋成淳中，里民筑土，得石刻曰“唐新丰乡”。今之黄渡即其地。

练祁市 今嘉定县治，本昆山县之春申乡也。宋嘉定间，割昆山西乡之安亭，并东乡之春申、临江、平乐、醋塘凡五乡，就练祁要会之地置县，以年号为名。

仙人踪 在嘉定县南马陆村。有池如人迹，水旱无盈缩。

鹤迹石，在嘉定县南翔讲寺。相传里人掘地，得石径丈，常有二鹤飞集其上，寺以是兴，人谓来鹤之祥。

娄塘古松 在嘉定县娄塘镇北野田中。大可十围，横互数亩，相传是宋时物。

西隐双松

在嘉定县西隐寺大殿前。有罗汉松二株，大可合抱，今殿毁，松荣茂如故。

古梧桐 在嘉定县七都浦陈氏墓。大可两合抱，高十丈，数百年物也。海船在洋中百里外即见此树。

宋宣抚使朱存仁墓，在嘉定县十一都发字圩。

邑令高衍孙墓，在嘉定县夜字圩。裔孙刑部郎中高聪祔。朝散郎孙察墓，在嘉定县集仙宫旁。按察奉命使金，候二帝起居，死于北土，此墓疑藏衣冠之所。

郎中龚宗元墓在嘉定县南峰。

元将军苏良墓，在嘉定县横泾东岸。总管张武墓在嘉定县大场镇东。

明都御史乐徐瑄墓 在嘉定县合浦门外。

尚书龚弘墓，在嘉定县北浦华塘之原。

都御史孙元化墓，在嘉定县赵泾之东罗泾。

钱氏义冢 在嘉定县大场。武肃王锡所建，方广数亩。附明沈辣培封古墓记：嘉靖乙未，实为滇南雯岩李公视篆之明年，政平治成，百废具举，慨然有思古之怀，遍询诸父老，考求境内古墓，乃封之、树之，而祭享之。于是于宋墓而得其八焉，于元墓而得其二焉，于国朝墓而得其十焉。若当涂令孙岳、朝议大夫孙偁墓，则得之合浦门外护国寺后。偁为载之父，邑志皆误以为载墓。载之孙泰州司法墓，则得之邑治集仙宫西阊门。寄班祗侯洪公墓，则得之朝京门西北守信乡。濠州定远尉承节郎赵应龙墓，则得之县东北二十里萧泾之原。录判天定墓，则得之县西北吕墅泾阳

。护国忠惠侯杨铤墓，则得之县西十里外冈镇西南。朝奉大夫谭公墓，则得之晏海门外三十六里月浦塘之北。皆宋墓也。文学瞿梅严先生墓，今在朝宗门外百步许。苏将军墓，今在儒学左畔横沥之东。是则元墓也。袁司训铭墓，于社稷坛右杨泾之原得之。黄太守米墓，于邑治西广储库右得之。钱太守铉墓，则于斜泾之阴得之。陆司训墓，则于练祁塘北得之。顾同知海墓，则得之于城隍庙后。彭参政慎墓，则得之于邑治南张马弄之墟。苏医士墓，邵知县墓，皆得于朝京门外剑字圩。儒士金声墓，则得之于邑治东清镜塘之原。章居士墓，则得于走马塘南孙滨之南，是皆国朝墓也。呜呼！上下四百年间，诸墓之在兹土者，湮没于荒沙蔓草，供牛羊之践履，为樵牧之踣躅者，何可胜恨！今得李侯为之增修培筑，表其姓名，是盖令名考德，固群公之懋昭，而封墓泽骨，则李公之仁政也。旷百世而相感，实所以永其传者欤。乡民杨岩董治斯事，具述其详于余，故为之记。

高邑知县金洲墓，在嘉定县漳浦，归有光志。

抚州训导唐钦尧墓，在嘉定县西城何家浜，归有光志。尚宝少卿须之彦墓，在嘉定县张二十二图藏圩，侯峒会志，文学龚用广秀水教谕龚用圆墓，在嘉定县潜二图杨吕泾，人称双忠坟。进士黄淳耀墓，在嘉定县二十四图剑圩。弟文学渊耀祔。陈瑚墓，乾隆五十四年邑人金以塾等捐资赎归墓田，知县于一芳给示禁止采樵侵占。

清孝子陆九韶墓，在嘉定县沙冈东三里马鞍山之阳。

文学张锡爵墓，在嘉定县光十四图火圩，钱大昕志。

少詹事钱大昕墓，在嘉定县李十五图火圩，王昶志。

谭氏园 在宝山县月浦上。亭馆卉木俱胜，朝散大夫谭友文别业。

杨泾 在宝山县西四十里。土人杨九娘性至孝，父命夜守桔槔，为蚊啮，不易其处，竟以羸死，里人伤而祀之。其地广九里，今绝无蚊。

佛耳泉 在宝山县月浦镇净信讲寺内。宋宝庆间建寺，有僧道嵩凿井，得髹木佛耳，甚异之，因名佛耳泉。今存。

菊花泉 在宝山下杨泾。泾下有泉涌出，饮之令人寿。

古桂 在宝山县侯氏宅。高数丈，大数围，可荫四五亩，花时香闻十里外。

明处士章黼墓 在宝山县项泾东。都御史张任墓在宝山县广福镇南。

孝子沈辅墓在宝山县六和桥。福建参政侯尧封墓，在宝山县殷行南虬江南口。子孔诏、孙给事震昞、曾孙通政峒曾、太学岐曾祔。东祔玄孙洵、演、洁、澣及妇夏氏、姚氏、龚氏、盛氏。铭曰节孝阡。

镇国将军张涵墓，在宝山县厂头许家桥北。涵殉难扬州，以衣冠葬此。

清孝子朱渐仪墓，在宝山县罗店西南洪五十六图。

孝子李维煌墓，在宝山县殷行周十六图。

孝子严允中墓，在宝山县大场芥十六图。

孝子黄上林墓，在宝山县杨行。子文学维章、维玉、通理祔。

崇明旧城 在崇明县治东北。本通州海滨地。唐武德间，海中涌出二洲，谓之东西二沙。所积高广，渔樵者依之，遂成田庐。杨吴因置崇明镇于西沙。宋天圣三年，续涨一沙，与东沙接。建炎间，姚、刘二姓避居之，因名姚刘沙。建中靖国初，又涌一洲于南北，即今之三沙也。嘉定中，于姚刘沙置天赐盐场。元至元十二年，升姚刘沙为崇明县，改崇明镇为西沙以属之。后县治凡五迁，其前三治城郭里居半归烟海，惟平洋沙城遗址犹仿佛云。李重发隐居在崇明县姚刘沙。

水格分涛 在崇明县大洋中。水分盐淡，淡水色白，盐水色黑。淡水自西来，盐水自东至。每潮转涛分，两水相击，声若雷霆。

蝦港 在崇明县东三沙，俗传宋高宗南渡至此。有大蝦二，涌水挟船出海，因名。按宋史高宗南渡未尝至此，疑误。

枷栲双钟 元至正中二钟随潮至崇明东沙岸旁，相击作声，土人取之，一置寿安寺，一置慈济寺。晨昏叩之，皆作枷栲音。

明都御史顾达墓 在崇明县西门沙。清嘉庆三年海坍，迁袁家沙。

御史施一德墓，在崇明县平洋沙青龙港东。赠光禄寺丞知县唐一岑墓，在崇明县平阳沙城西。清雍正九年海坍，邑人樊鏐改葬于蟠龙镇之东皋，刘萃乾志。

海洲

胸县故城 在州东孔望山之西，秦置。《汉书志》注云。秦始皇立石海上以为东门阙。《太平寰宇记》云：古卢王城，在县西九里，即汉旧胸县。梁天监中，魏将卢昶屯据此城，故以为名。

艾不城

在州东北。田横避难，汉使艾不追横所筑。后晋移赣榆县于此，北齐天保初省。

钟离昧城 在州南。《史记》云项王亡将钟离昧家在伊卢，《后汉书·志》云胸县有伊卢乡。《元和郡县志》云在胸县南百里，其城即昧所筑。《太平寰宇记》云伊卢乡亦名中卢，卢石在东，句卢在西，故曰中卢。

古州城 在州城东。前接高山，后枕积水，其山半垒石为城，东南面海。地理新书以为即古海州。其山之巔为孔望山，明御史黄国用建亭于上，曰“孔望亭”。《南畿志》云。下有龙洞，东有浴龙池。古今题咏石刻甚多。

海西故县 在州南，汉置。

曲阳故县 在州南，汉置，今为曲阳村。

东安故县 在州治西八十三里，汉置。

东海故县 在州治东北，古郁洲也。《水经注》云。朐县东北海中有大州，谓之郁州。《后汉书》注云：《山海经》曰鬱洲在海中，一曰郁洲。郭璞云在县界。世传此山自苍梧徙来，上皆有南方树木。《博物记》云：县东北海边植石，秦所立之东门。刘宋泰始六年置西海郡，东魏武定七年，改曰东海。旧有大小二城，宋贾似道筑，今为东海营。

望海楼

在州治北。宋王圭诗“城外沧溟日夜流，城南山色近城楼”。后名枣香亭。

景疏楼 在州治东北。石延年通判海州，以州西北二古墓为二疏墓，刻碑其旁，后遂收入图经。建有景疏楼，皆仍延年之误也。详见辨讹。

龙且故垒 在州治东北。有大小二垒，韩信下齐，项羽遗龙且筑垒于此。

圣化亭 在州治西五十里夹谷山。

海口故垒 在州之黑土海湾口，有古营垒。

大营 在州治西五里，元阿鲁尚书攻围海州时筑。

东海大松 在州东大海中，相传三代时物。秀异奇古，宋徐积有诗。

汉丞相于定国墓 在州东海旧县。孝妇墓在州东海新县北二里。
太傅严彭祖墓在州境。

梁刺史马仙埤墓 在州治西南八里。

元孙公墓 在州境张家店河西，相传为元时总兵，失其名。

明兵部侍郎李桢墓，在州新县村南山下。
辽东广宁参将曹杰墓，在城北临洪滩。征蛮将军王鸣鹤墓在当路村。

清安徽宁国府教授凌廷堪墓
在州泊洋河南岸墩琅庄。廷堪为歙县进士，世居海州，卒葬此。
山东平阴县知县许乔村墓，在州南埠墟庄。举人乡贤许桂林墓在州南埠墟庄。
广东阳春县知县陶应荣墓，在朐山东陶蛎湾。
海州查都司石龙章墓，在凤凰城外东岳庙后。龙章御捻阵亡，葬此。

纪鄆城 在赣榆县东北七十五里。《左传》云齐伐莒，莒子奔纪鄆。杜预注云赣榆县东北有纪城，即纪鄆也。南北朝为戍守处。《水经注》云：游水自赣榆，又东北经纪鄆故城南，又东北入海。

祝其城 在赣榆县西南四十二里。《水经注》云：游水自羽山，又北经祝其故城西，县东有夹谷浦。

莒城 在赣榆县西十五里。《水经注》云：游水自祝其，又左经即邱故城，莒子始起此，后徙莒，世谓此为南莒。

赣榆故城 有二，一在赣榆县东北三十里者，汉县也。《元和郡县志》云亦名盐仓城。一在故东海县北四十九里青山之阴者，唐县也。《元和郡县志》云隋末土人臧君相筑。

利成故城 在赣榆县西六十里，汉置，《水经注》云：游水自朐县，又北经利城故城东，故利乡也。又曰武阳沟水东出仓山，山上有盐官城，即故利城也。

虎坑城 在赣榆县西南，北朝置戍处。

抗金城 在赣榆县西南五十里，宋时筑。

界墙城 在赣榆县北六十里，东际海、西连山。

武陵故城 在赣榆县南五十九里，魏置。县南有洛安镇，即故洛安县也。

义塘故郡 在赣榆县西北，近莒州界。东魏武定七年置义塘郡，治黄郭城，领义塘、归义、怀仁三县。《太平寰宇记》云：归义，在县北二十五里。怀仁，在县西二十三里，古辟阳城。

晒书台 在赣榆县西三十里子贡山，俗传端木子读书于此。

秦始皇碑 在赣榆县东。《地道记》云：海中去岸百九十步。有始皇碑，长一丈八尺、广五尺、厚八尺三寸，一行十三字。潮水至，加其上三丈，去则三尺见也。

落星石 在赣榆县北四十里。陨星化石高一丈，白如玉。

宋参政胡松年墓 在赣榆县西南一里。

中城 在沭阳县西。《左传》云成九年城中城。杜预注曰：厚邱县西南有中城，或曰即建陵县。

厚邱故城 在沭阳县北六十里，汉置。

建陵故城 在沭阳建陵山下，汉为侯国，后魏置建陵县。

阴平故城 在沭阳县西北六十里，汉置。

怀衣故城 即今沭阳县治，本汉后邱县地，东魏为沭阳郡，兼置下城、临渣、怀衣、服武等县，后改怀衣为沭阳。旧县城在沭阳县南二里。宋元嘉四年，筑土为城，即下城废县。

浮营城 在沭阳县西二十五里。 又南营城，在县东南十五里。

黄军营城，在县西南五里。 黑军营城，在县西十五里。

东营城，在县南十里。

西、北营二城，在县西北十里。新兴营城，在县西北三十里。皆元至正间筑。

升仙墩 在沭阳县治东南二里。紫阳真人升仙处。

通 州

静海故县 今通州治，本汉海陵县地。后周显德中，置通州以静海属焉。

海门故县 在州东。《续文献通考》云：海陵县东境，其地为东布洲，杨吴为东布镇，南唐置县，元明间，历经江海侵逼，三徙治所。清康熙十一年，县城圯于海，遂废入通州。

海山楼 在州治南城上。宋大观中，州守朱彦建。前有绿漪亭，陈博古诗云“门外海涛奔铁骑，槛前山背拥金鳌发”。

望江楼 明正德中州守夏邦谟建。后郡人尚书马坤重建于州南二里许，名曰“望江”。

”，以备倭也。

栖云阁 在州狼山西，宋咸宁中建。《舆地志》云：阁后即望仙桥，宋王覲记谓仙人吕洞宾卧于云中腾空去，州人翹望之，阁名以此。

三会堂 在州狼山东。北顾巨海，南瞰长江，吴楚胜概一览可尽。宋提刑薛球、太守臧师颜、通判吴天常三人皆旧好，会此因名。后圯，明嘉靖中同知舒纓于其址建萃景楼。

利丰监 在州南三里，古煎盐之所。宋太平兴国中升为监，管西亭、丰利、永兴、吕四、石港、利和、金沙、余庆八场。

放鹤田 在州吕四场境。相传吕洞宾四游于此，故以名场。放鹤田即其游处。

海门岛 在州东南海中。宋初犯死获贷，多配是岛。

布洲峡 在州南三十里。《舆地记》云：通州有东、西二布洲，为海沙所涨而成，尝有布机流出，因名。

唐临海丞骆宾王墓 在通州东门黄泥口。

宋兵马都监金应墓

在西门雪窖，丞相文天祥记之。清顺治十六年，知州彭士贤移葬狼山之南。

明尚书李敬墓在通州西门外。御史戈斌墓在州永兴乡。

太常姚继严墓在州狼山乡。都御史凌相墓，在州西门外天生港南。

尚书刘坤墓在州铁线河。侍郎崔桐墓在州海门乡。

侍郎陈尧墓在州西门外。义勇曹顶墓，在州境狼山东路。

孝子夏旻墓在州南转水泓。尚书陈大科墓，在州境狼山东路。谕祭葬。

清闽处士刘名芳墓 在通州狼山麓。

巡按徐宗干墓，在通州盐河桥，谕赐祭葬。

赠道衍钱文伟墓，在南望仙桥，谕赐祭葬。

临江故县 在如皋县南，本海陵县地。晋安帝置，后周并入宁海县。

古郟邑 在如皋县北。《春秋》云：哀公十二年，卫侯会吴于郟，公及卫侯宋皇瑗盟。杜预注云：郟，发阳也。海陵东南有发阳口，今县北立发口盖其地。又县东十

里有会盟原，相传吴楚会盟处。考春秋之世，吴楚始终不闻会盟，惟有卫侯会吴一事，会盟原当指此。

胡瑗宅 在如皋县南十里，俗名胡家庄。

芙蓉园 在如皋县南一里，宋史声奉其父逸叟居此。

万花园 在如皋县治东三里，元镇南王世子建堂，植万花于此。

水绘园 在如皋县，冒氏别业，饶水竹之胜。

集贤里 在如皋县儒学东。宋王惟熙、王观、王觐、王俊又相继登第，乡人荣之，因名其里。

状元坡 在如皋县西北十里，宋状元王俊又读书院前地也。

连珠池 在如皋县西北二十里，数池相接如连珠。

度军井 在如皋县西十里许，宋岳飞镇通泰，引军数千人过此，饮之不竭，因名。

三国吴大司马吕岱墓 在如皋县东南。

宋待制王觐墓 在如皋县。知县赵昌标墓，在如皋县南门外。丁母忧，贫不能归，以毁卒，县人怜之；并其母葬焉。司谏陈巖墓，在如皋县东十五里蒋家庄。孝子丁天锡墓，在如皋县西北五里。

明府尹钱藻墓 在如皋县。纪将军墓，在如皋县城西南隅。镇国将军朱显忠墓在如皋县西芹湖。知县冒守愚墓在如皋县南逢家湾。孝子吴儒清墓在如皋县东白蒲镇。赠太仆寺卿许直墓，在如皋县高家桥，清顺治间赐祭。尚书沈岐墓，在如皋县白蒲镇东，清谕祭葬。

清尚书戴联奎墓，在如皋县江潮港，赐葬祭。孝子卢崇孝墓在如皋县宗家庄。孝子沈文旭墓在如皋县沈家港。孝子徐文楷墓在如皋县徐家湾。孝子马中骝墓在如皋县东门外。

泰兴旧城 在泰兴县西北。南唐升元初，析海陵置县，距今县治四十里。

敕书楼 在泰兴县治厅前，宋元丰中建，宣和中重修。

宋妃子墓，在泰兴县。宋南渡时，有宫嫔从行，死者葬此。
孝子顾昕墓在泰兴县黄桥。赠保义郎死难孙益墓在泰兴西城下。

明尚书李俨墓 在泰兴县姜溪河。 侍郎张翮墓在泰兴县东城外。
孝子张猷墓在泰兴县城西二里。

第五卷 历代城郭官廨

历代宫室苑囿

吴

太初宫 《建康实录》：吴大帝迁都建业，徙武昌宫屋材瓦，缮太初宫，即长沙王策故府也。赤乌十年作，十一年功成。周回五百丈。南面开五门，正中曰公车门，次东升贤门，更东左掖门，次西明阳门，更西右掖门。东面正中曰苍龙门，西面正中曰白虎门，北面正中曰玄武门。北直对台城西掖门前，路东即古御街。

南宫 《建康志》：吴太子宫在南。《吴志》：赤乌十年，帝适南宫即此。一作东宫。(见《舆地志》)。

安定宫 《待徵录·引禁篇》：亮妻朱氏居。

升平宫 《待徵录·引禁篇》：皓母何氏居)。

昭明宫 《建康志》：始谓之新宫，周五百丈，与太初宫相望，榜曰“昭明”。《吴志》：后主甘露二年六月，起新宫于太初之东。制度尤广大，开苑囿，起土山，作楼观，加饰珠玉，制以奇名。

建业宫 文选《吴都赋》云：作离宫于建业。

神龙殿、临海殿、赤乌殿 《吴志》：孙皓以赤乌见，遂起赤乌殿。《吴都赋》：抗神龙之华殿，施荣楯于捷猎。崇临海之崔嵬，饰赤乌之。(注：神龙、临海、赤乌皆吴大帝作)。

中堂 《建康志》：吴建，在都城宣阳门内路西。

弯碕门、临碕门 《吴都赋》：左称弯碕，右号临碕，注：并宫门名也。王荆公诗“残暑安所逃，弯碕北窗北，伐翳作清旷，培芳卫崇寂”，指此也。

天渊池 《方輿纪要》引《宫苑记》云：天渊池一名天泉池，相传吴宝鼎中，于元武湖侧凿大窦，引水入宫城为此池。池内、池南皆有亭台。

北渠 《金陵览古》：吴后主引北湖水入宫城，循绕殿堂，穷极机巧，功费万倍。

芳林苑 《吴都赋》注：吴有芳林苑，在建业东北十里。

西苑 《建康志》：在太初宫西门外，吴宣明太子孙登所创，谓之西苑。

落星楼、桂林苑并见落星山。

御道 《方輿纪要》引《宫苑记》：吴时自宫门南出，至朱雀门七八里。府寺相属，亦名御街。

晋

显明宫 即吴昭明宫也，晋避讳改曰显明宫。

咸和新宫 《建康志》：一名建康宫。晋成帝咸和七年新宫成，开五门，南面二门，东西北各一门。内外殿宇大小凡三千五百间。十二月，帝迁居之。明年正月，朝万国于新宫。

洪训宫 羊太后居。

崇德宫 《晋书·穆帝纪》：升平元年，皇太后居崇德宫。

崇训宫 《晋书·孝武帝李太后传》：太元十九年，尊为皇太后，称崇训宫。

崇化宫 王太后居。

太元新宫 《晋书·孝武帝纪》：太元三年，作新宫。

弘化宫、东宫 《晋书·孝武帝本纪》太元十七年秋八月，新作东宫。

永安宫 《建康志》：即吴东宫。在台城东南。《方輿纪要》引《宫苑记》云：晋太元二十一年，以东海王第作东宫。安帝立，何皇后居于此，谓之永安宫。又东晋《疆域志》引《哀帝纪》：穆帝皇后何氏称永安宫。

太极殿 《建康志》建康宫内正殿也，晋初造。以十二间，象十二月。高八丈，长二十七丈，广十丈，内外并以锦石为砌。次东有太极东堂七间，次西有太极西堂七间，亦以锦石为砌。更有东西二上阁，在堂、殿之间，方庭阔六十亩。《六朝事迹编类》：谢安作新宫，造太极殿，欠一梁，忽有梅木流至石头城下，因取为梁。画梅花其上以表嘉瑞。《宫苑记》：太极殿前有二大钟，宋武帝平洛所获，并汉魏旧器。殿前有相风鸟。《南史》张永晓音律，太极殿前钟嘶，孝武以问永，永答钟有铜滓，乃扣钟求其处，凿而去之，声遂清越。《丹阳记》：太极殿周制路寝也，秦汉曰前殿，今称太极。东西堂亦魏制，于周小寝也。

式乾殿 《晋书·康帝纪》：帝崩于式乾殿。

显阳殿 《晋书·康献褚皇后传》太元元年，崩于显阳殿。

含章殿 《晋书·孝武帝纪》：太元五年六月，震含章殿四柱。

清暑殿 《晋书·孝武本纪》：太元二十一年春正月，造清暑殿。《建康志》：殿前重楼复道，通华林苑。爽垲奇丽，天下无比。虽暑月，常有清风，故名。何尚之清暑殿赋云：“却倚危石，前临浚谷。涌泉灌于阶户已，远风生于曲槛”是也。

徽音殿 《晋书·安喜王皇后传》：义熙八年，崩于徽音殿。

中堂 《晋书·明帝纪》：王敦复反，帝屯于中堂。《晋书·孝武帝纪》：以太学在秦淮南，去城悬远，权以中堂为太学，亲释奠焉。

南皇堂 《晋书·明帝纪》：王含之来，帝帅诸军屯南皇堂。

乐贤堂 《建康志》：明帝为太子时建。成帝时，苏峻之乱，宫室皆焚，惟此堂犹存。咸和中，彭城王铉上言，乐贤堂有先帝手画佛像，宜敕作颂，蔡謨不可，乃止。

螽斯则百堂 《晋书·孝武帝纪》：太元十三年十二月丙申，螽斯则百堂灾。

延贤堂 《晋书·符瑞志》太元十九年，华林园延贤堂西北，李树连理。

积弩堂 《方輿纪要》：在台城北，晋隆安五年孙恩窥建康，豫州刺史司马尚之入卫京师，径屯积弩堂。

广室 《晋书·周凯传》：元帝召凯于广室。

秘阁 《晋书·徐广传》：孝武帝时，校书秘阁。

华林园 旧志：华林园本洛京旧名，晋南渡，即吴西苑址建，在台城西。自晋以后，常临华林园听讼，为六朝故事。《世说新语》：晋简文帝在园，谓左右曰，会心处不必在远，翛然林木，便有濠濮问趣，觉鸟兽禽鱼，自来相亲。

西池 见覆舟山。

覆杯池

《建康志》：晋元帝中兴，颇以酒废政，丞相道奏谏，帝因覆杯于池中以为戒。

天泉池 龚颖《历运图》：晋孝武帝太元十年大旱，井渎皆竭，大官供膳皆资天泉池。池在台城西。

听讼观 《晋书·元帝纪》：大兴元年，新作听讼观。

通天观 《建康志》：引《金陵故事》：晋孝武帝讲孝经于通天观，仆射谢安侍座，尚书陆纳侍讲，黄门侍郎谢石、吏部侍郎袁宏执经，丹阳尹王琨读句，论者荣之。

宋

未央宫、长乐宫、建章宫、长杨宫 《南史》：宋前废帝景和元年，以东府城为未央宫，石头城为长乐宫，北邸为建章宫，南第为长杨宫。

宋东宫 即晋永安宫，元嘉十五年改。

弘训宫 武悼杨后祠所。

欣乐宫 本吴南宫地，刘宋置欣乐宫于此，见《方輿纪要》。

永乐宫、崇宪宫、永训宫并宋作，（《待徵录·引禁篇》）。

西殿、合殿 即晋清暑殿也。《宋书》：高祖受命，无所改作，所居殿曰西殿。文帝时谓之合殿。

风光殿、华光殿、兴化殿并在华林园。宋元嘉二十二年造，（见《方輿纪要》华林园注）。

正光殿 《宋书·孝武帝纪》：孝建元年春正月，起正光殿。

嘉禾殿 《建康志》：宋孝武帝大明五年，清暑殿西薨鸱瓦中生嘉禾，一株五茎，改清暑为嘉禾殿。

玉烛殿 《武帝本纪》孝武帝大明中，坏上所居阴室，起玉烛殿。与群臣观之，床头有土障，壁上葛灯笼麻蝇拂，侍中袁凯盛称上俭素之意。孝武帝不答，独曰：“田舍公得此已为过矣”。

紫极殿 《宋书·良吏传》：晋室诸帝多处内房，朝宴所临，东西二堂而已。永初即位，悉仍晋旧。孝武嗣统，追陋前规，更造正光、玉烛、紫极诸殿，雕梁绮节，珠窗网户。一说紫极殿宋明帝作，珠帘绮柱，江左未有。

正阳林光殿 大明中造(详见覆舟山)。

含章殿 《方輿纪要》：宋孝武帝女寿阳公主日卧于含章殿檐下，梅花落额上，拂之不去，时人竞效之，谓之梅花妆。

曜灵殿 谢庄有侍华林曜灵殿八关斋诗。

清曜殿 宋立，在台城内，(见建康宫阙簿)。

正福殿、仁寿殿、文昌殿、景福殿、正光殿、徽光殿并见《待徵录·引禁篇》。

景阳楼 《輿地志》：宋元嘉二十二年，修广华林园，筑景阳山，始造景阳楼。孝武帝大明元年，紫云出景阳楼，状如烟，回薄久之，诏改为庆云楼。《宫苑记》作景云楼。

乐游苑 (详见覆舟山)。

青林苑 宋文帝作。《輿地纪胜》引《宫苑记》：在篱门亭北路，西枕后湖。

上林苑 《南史》：宋孝武帝大明三年，于真武湖北立上林苑。杨隋之诗注云：其苑连鸡笼山。

南苑 宋明帝多忌讳，张永请南苑。帝曰：“且给三百年，期满更请”。即此。

听讼堂 《方輿纪要》：在宫城北华林园内，本名延贤堂。宋元嘉三年，帝临延贤堂听讼，自是每岁三讯，皆于此，因名听讼堂。

螽斯堂 《宋书·符瑞志》：元嘉十四年二月，螽斯堂梨树连理。

连理堂 《宋书·孝武帝纪》：芳香琴堂双橘连理，遂改芳香琴堂为连理堂。

中兴堂 宋孝武帝有幸中兴堂餞江夏王诗。

芙蓉堂、竹林堂 《宋书》前废帝子业射鬼竹林堂，寿寂之等谋弑之是也。

醴泉堂、云堂并在华林园内，见《待徵录·引禁篇》。

西射堂 谢灵运有晚出西射堂诗。

武帐堂 (见幕府山)。

永福省 《方輿纪要》：永福省在台城中，刘宋时太子所居。

层城观 《建康志》：在华林园景阳楼东，宋元嘉建。

玄武观 《建康志》：在玄武湖上，一名玄武馆。《宋书·文帝纪》“帝临玄武馆阅武”即此馆也。

迎风观 旧志：宋大明间建，在建康宫西。

望耕台 《建康志》：宋文帝尝登此台，以观公卿亲推之礼。又引《宫苑记》云在籍田坛东。

一柱台、景阳台 大明中作，并在华林园，见《待徵录·引禁篇》。

凤凰台 (见凤台山)。

日观台 《建康志》引《宫苑记》云：台城直鸾掖门西，有日观台。《祥符图经》云宋司天台也。

都亭 在华林园。孝武帝与群臣联句于此，效柏梁体。

华萼池 元嘉中作于华林园，见《待徵录·引禁篇》。

驰道 《六朝事迹编类》：宋孝武帝作驰道，自阊阖北出承明，抵玄武湖十余里，为调马之所。

齐

青溪宫 本齐高帝旧宅，武帝生于此。永明中，望气者言青溪有天子气，诏筑青溪旧宫。二年，车驾幸旧宫小会，设金石乐以衅落之，见《南史》。

宜德宫 太后居，见《待徵录·引禁篇》。

世子宫 (见石头山)。

显阳殿、昭阳殿、寿昌画殿、乾光殿、风华殿、灵曜殿 《建康志》：齐有显阳、昭阳二殿，太后、皇后所居也。永明中，无太后、皇后，羊贵嫔居昭阳殿西苑，贵嫔居昭阳殿东，宠姬荀昭华居风华殿，宫内御所居寿昌画殿。南阁置白鹭鼓吹二部，乾光殿东西头置钟岩，两厢皆宴乐处也。又永明十一年，诏以内殿风华、寿昌、灵曜三处，此吾所治，奢俭得中，慎勿坏云。

灵和殿 《六朝事迹编类》：在台城内，齐武帝时益州献蜀柳，帝命植于殿前，三年柳成，条如丝缕，帝尝叹曰：“此柳风流可爱，似张绪少年时”。

招婉殿 《齐书·郁林王本纪》：毁世祖招婉殿，乞阉人徐龙驹为齐。

仙华殿、神仙殿、玉寿殿 《南齐书·东昏侯纪》：帝大起仙华、神仙、玉寿诸殿，刻画雕彩，青栳金口带，麝香涂壁，锦幔珠帘，穷极绮丽，执役工匠自夜达晓，犹不副速，乃别取诸寺佛刹殿藻井、仙人骑兽以充足之。

含德殿 在华林园，齐东昏侯被弑处。

华光殿 谢朓有侍宴华光殿曲水诗。

层城观、穿针楼

《舆地志》：齐武帝七月七日，使宫人集此，是夕穿针以为乞巧之所。

景阳楼 《建康志》：齐武帝时，以宫内深隐，不闻端门鼓漏声，置钟于景阳楼上，宫人闻钟声悉起妆束，名促妆钟。

青漆楼 《齐书》：世祖兴光楼上施青漆，时人谓之青漆楼。东昏侯曰：“武帝不巧，何不纯用琉璃”。

丽日楼 齐世祖作。(见《待徵录·引禁篇》)。

商飏馆、九日台 (见钟山)。

朱雀台 齐作。(《待徵录·引禁篇》)。

芳林苑 (见水考)。

娄湖苑 武帝永明元年作娄湖苑。

新林苑 《齐书·武帝纪》五年冬十月初，起新林苑。又《明帝本纪》：建武元年，诏省新林苑，先是民地悉以还主，原责本直。

博望苑、灵邱苑。《宫苑记》：齐武帝立，梁天监中以其地为法王寺。

芳乐苑 《南史》：齐东昏侯即台城阅武堂起芳乐苑，山石皆涂以五彩，跨池水立紫阁诸楼观。又于苑中立市肆，以潘妃为市令，自为市吏录事。帝小有过失，潘则杖之。开渠立埭，躬自引船，埭上设店，坐而屠肉。百姓歌“阅武堂前种杨柳，至尊屠肉，潘妃酤酒”者也。

东田馆 (见锺山)。

玄圃 《建康志》：齐文惠太子性奢丽，宫内多雕饰，精绮过于王宫。开拓玄圃与台城北堑等。其楼观屋宇多聚奇石，妙极山水。虑上望见，乃旁列修竹，内施高障，造游墙数百间。又引《舆地志》云：玄圃内有明月观、宛转桥、徘徊廓，内作净明精舍。

金莲石 《金陵览古》：在台城内。齐东昏侯嬖潘淑妃，刻金莲花于石，令潘妃行之，自言步步生莲花。

梁

建康宫 《梁书·武帝纪》天监元年夏四月丙寅，高祖即帝位于南郊，礼毕，备法驾即建康宫。

金华宫 《舆地志》梁大同中所筑，昭明太子蔡妃所居，在青溪东。

东宫 《通鉴》武帝太清二年十月，侯景使宋子仙据东宫。又景于东宫置酒作乐，太子遣人焚之。

安德宫、乐修宫、乐安宫 并梁作。见《待微录·引禁篇》。

显阳殿 《梁书·简文帝纪》：天监二年十月丁未，生于显阳殿。丁贵嫔传为贵嫔居于显阳殿。

寿安殿 《梁书·昭明太子传》：天监八年九月于寿安殿讲孝经。

乐寿殿 《通鉴》：天监十年，尚书左仆射张稷自谓功大赏薄，尝侍宴乐寿殿，酒酣，怨望形于颜色。

太极殿 《梁书·武帝纪》：天监十二年春二月，新作太极殿，改为十三间，以象闰数。十四年，冠太子统于此。

慧义殿 《梁书·武帝纪》：天监十四年，于宫内别立慧义殿。普通元年四月，甘露降于慧义殿。

武德殿 《梁书·冯道根传》：天监十六年，为豫州刺史。将行，高祖引群臣宴别道根于武德殿。召工视道根，使图其形像。又《南史·昭明太子传》：子欢，欢子栋，简文帝见废，侯景奉以为主。及即位，升武德殿。

至敬殿 《通鉴》、天监十六年冬十月，起至敬殿、景阳台，置七庙座。

琬琰殿 《梁书·武帝纪》普通二年五月，琬琰殿灾，延烧后宫屋三千间。

文德殿 《梁书·王规传》：普通六年，高祖于文德殿饯广州刺史元景隆。《太平御览》引《舆地志》：文德殿，梁武帝移张衡浑天仪置北殿。

临云殿 《梁书·丁贵嫔传》：普通七年十月庚辰薨，殯于东宫临云殿。

华光殿 《太平御览》引《舆地志》：华光殿，梁武帝大通中施与草堂寺，取珠货值百万，以其地起重阁九间。《建康志》、《舆地纪胜》作“光华”。

五明殿 《南史》：大同末，魏使崔敏来聘。传瞻儒释，知天文医术。帝选十人于此殿推论三教、百家、六籍、五运九十余日，敏亡精丧神，伤心呕血，未及竟而卒。

德阳殿

《梁书·康绚传》：高祖幸德阳殿戏马，敕绚马射。抚弦贯的，观者悦之。

宝云殿、慧轮殿 《建康志》：并梁武供佛事处。

元光殿 《补梁疆域志》：帝于元光殿坐狮子座，讲金经文。

清暑殿 梁武帝有同群臣清暑殿效柏梁体联句诗。

静居殿 《梁书·武帝纪》：太清三年五月丙辰，高祖崩于静居殿。

崇正殿 《南史·昭明太子传》：子欢，太子薨，遣中书舍人臧欢，追欢于崇正殿，解发临哭。

玉衡殿 《梁书·张齐传》：引见玉衡殿。

昭阳殿 陶宏景诗“夷甫坐放诞，平子坐谈空，岂意昭阳殿，化作单于宫”。时俗沿西晋竞谈元理，故宏景云尔。其后侯景篡位，果在昭阳殿。

嘉乐殿 刘孝威有襋饮嘉乐殿咏曲水烛影诗。

风光殿 《建康志》：在旧台城内。

披香殿 《六朝事迹编类》引杨修之金陵诗注曰：在台城后宫。庾信诗“宜春苑中春已归，披香殿里作春衣”指此也。

永福省 《梁书·简文帝纪》：侯景废太宗为晋安王，幽于永福省。又《昭明太子传》东宫官属文武皆入直永福省。

仪贤堂 本延贤堂，梁天监六年改名仪贤。《至正金陵新志》：仪贤堂在故都城宣阳门内路西，梁时策孝廉、秀士于此。

德阳堂 《梁书·武帝纪》六年秋九月，改阅武堂为德阳堂。中大通二年，改封魏汝南王悦为魏王，饯于德阳堂。即此。

宣猷堂 《梁书·武帝纪》：皇太子于东宫宣猷堂及扬州廨开讲五礼。

太极东堂 《通鉴》：武帝太清三年三月，侯景使于子悦屯太极东堂。

太极西堂 《通鉴》：元帝承圣元年三月，王僧辩军士遗火焚太极殿及东西堂。

乐贤堂 《梁书·刘孝绰传》：时昭明太子起乐贤堂，使画工先图孝绰焉。

集贤堂 刘孝绰有侍宴集贤堂应令诗。

正阳堂 沈约有正阳堂宴劳凯还诗。

朝日楼、夕月楼 《建康志》：在华林园内，梁武帝建。阶道绕楼九转。又引《宫苑记》云：景阳山次东岭起通文观。观前又起重阁，上重曰重云殿，下重曰光严殿，殿前当阶起二楼，左曰朝日、右曰夕月，巧丽无匹。

观稼楼 《建康志》在城东二十五里，梁武帝造。

重云阁 《南史·梁武帝纪》：白雀一见于重云阁前连理树。

寿光阁 《梁书·沈约传》：范云自外来，至殿门不得入，徘徊寿光阁外。

总章观 《梁书·武帝纪》天监元年五月乙亥夜，盗入南北掖，烧神兽门总章观。

青云观 《金陵故事》：在台城内，梁武帝立。

层城观 《建康志》：梁于台城中立层城观。

兰亭苑 《梁书·武帝纪》天监三年二月丁未，南兖州刺史南康王会理帅江州之众屯于兰亭苑。

江潭苑 (见水考)

建兴苑 梁天监中建，即刘宋苑地。侯景之乱，柳仲礼立营，据建兴苑是也。

上林苑 《建康志》引《宫苑记》：宋孝武帝西苑，梁武帝改曰上林。

善泉池 《建康志》：一名九曲池，在台城东东宫城内，昭明太子作于玄圃，周回四百余步。又引《金陵故事》云：梁昭明太子所凿，中有亭榭洲岛，极幽深之致。太子泛舟池中，尝曰：何必丝与竹，山水有清音”。

流杯池 魏使李同轨聘梁，梁主宴于乐游苑。庭设钟悬及百戏殿，上流杯池中行酒。其进梁主者题曰御杯，其余各题官姓之杯，至前即饮。又图象旧事，随流而转，始至讫于坐罢，首尾不绝也。见《客座赘语》。

漾汜池 《建康志》：在台城内，梁陈龙舟嬉游之所。

东齐 昭明太子有东齐听讲诗。

华林园 《梁书·武帝纪》天监四年四月甲寅至壬戌，甘露连降华林园。又《一统志》引《南史到溉传》：斋前山池有奇僵石，长一丈六尺，帝戏与赌之。溉输。石既迎置华林园宴殿前，移石之日，都下倾城纵观。所谓到公石也。

玄圃 《梁书·昭明太子传》：性爱山水，于玄圃穿筑，更立亭馆，与朝士名素者游其中。《梁书·简文帝纪》：高祖所制五经讲疏，尝于玄圃奉述。

延香园 《客座赘语》：梁简文延香园：大同十年，竹林吐一芝，长八寸。头似鸡

头，实黑色，其柄似藕，内通干空，皮质皆纯白，下微红，鸡头实处似竹节，脱之得蛻。自节处别生一重，如结网罗，四面周可五六寸，围绕周匝，以罩柄上，相远不相著也。其结网众，自轻巧可爱，其柄又得蛻也，验仙书与威喜芝相类。

龙天王井

《建康志》：在台城前，梁武帝为郗后立龙祠井上，号龙天王井，梁陈皆祀之。

石阙

《梁书·武帝纪》：天监七年，作神龙、仁虎阙于端门大司马门外，陆倕有铭。

南阙 《梁书·袁峻传》：武帝雅好词赋，献文于南阙者相望。

焚衣街 《六朝事迹编类》：齐东昏侯自制服为四种冠、五私袍，梁自襄阳出师废之，焚奢淫服六十二种于御街中，因名。

陈

安德宫 《建康志》引《宫苑记》：在宣阳门外直西，即都城西南角，宣帝为文帝皇后筑。隋平陈，移江宁县治于此，有古池，人呼为安德宫池。

弘范宫、慈训宫 并陈作，见《待徵录·引禁篇》。

乐安宫 阴铿有新成乐安宫诗。

太极殿 《陈书·高祖纪》：永定二年秋七月，起太极殿。初侯景之平也，火焚太极殿。承圣中，议欲修之，独阙一柱。至是有樟木大十八围，长四丈五尺，流泊陶家后渚，监军邹子度以闻，诏以造殿。冬十月殿成。十二月帝于太极殿东堂宴群臣，设金石之乐。

显德殿 《隋书·五行志》曰：陈天嘉中，盛修官室，起显德等五殿，称为壮丽。

柏梁殿 后主柳太后居之。

求贤殿 后主沈皇后居之，见《陈书·后妃传》。

丽晖殿 后主有上巳宴丽晖殿诗。

乐脩殿 后主有七夕宴乐脩殿诗。

光璧殿 后主有宴光璧殿遥山灯诗。

临芳殿 江总有侍宴临芳殿诗。

瑶光殿 江总有侍宴瑶光殿诗。

重阳殿 张正见有重阳殿成金石会竟上诗。

昭德殿、乾明殿、有觉殿、嘉德殿、永正殿、温文殿、文思殿、三善殿、长春殿、胜辨殿、寿安殿、承宣殿并陈作，见《待徵录·引禁篇》。

临春、结绮、望仙三阁 《建康志》引《宫苑记》云：在华林园天泉池东光昭殿前，高数丈，并数十间。其窗牖、户壁、栏槛之类，皆以沉檀为之。又饰以珠玉，间以珠翠，外施珠帘，内设宝帐，其服玩瑰丽近古未有。每微风至香闻数里。朝日初照，光映后庭。其下积石为山，引水为池，植以奇树，杂以花药。后主自居临春阁，张丽华居结绮阁，龚贵嫔居望仙阁，并复道交相往来。又以营人有文学者袁大舍等为女学士，后主每引宾客江总等游宴，使女学士与狎客赋诗，采其尤艳丽以为词，被以新声。其曲有玉树、后庭花、临春乐等。大抵皆美贵妃之容色，丽华聪慧有神采，尝于阁上靓妆临轩槛，宫中遥望，飘若神仙。

承香阁

《陈书·后妃传谕》：后主初即位，始兴王叔林之乱被伤，卧于承香阁下。

乐脩堂 江总有乐脩堂应令诗。

宣猷堂 江总有三日侍宴宣猷堂曲水诗。

德教堂 《陈书》：隋军东下，贺若弼置后主于德教堂。

独足台 《建康志》引览古诗注云：陈将亡，有一鸟独足上宫城台外，以觜画地，书云“独足上高台，茂草化为灰，欲知我家处，朱门傍水开。”后国乱，迁洛阳，赐第于洛水傍。

齐云观 在台城内。《六朝事迹编类》：后主祯明二年建，人歌曰“齐云观，寇来无际畔”。

青露观 后主作，见《待徵录·引禁篇》。

白虎阙 《南史·陈武帝纪》：绍泰二年五月丙申，齐兵至秣陵故城。乙亥，帝率

宗室王侯及朝臣于大司马门外白虎阙下刑牲告天，以齐人背约。

景阳井 《建康志》：一名胭脂井，又名辱井，在台城内。陈末，后主与张丽华、孔贵嫔投其中，隋军出之。其井有石栏，多题字。旧传云栏有石脉，以帛拭之作胭脂痕。或云，石脉色类胭脂，故名。曾子固有井铭。又《集古录·江宁县丞王震井记》云：井在兴严寺，其石槛铭有序，称“予”者，晋王广也。

南唐

南唐宫 《五代史》：梁清泰元年，徐知诰治私第于金陵。《南唐书》：先王建号，即金陵府为宫，惟加鸱尾栏槛而已，终不改作。今内桥北卢妃巷羊市桥一带，皆是宫址。

崇德宫

《十国春秋·南唐烈祖纪》：升元四年十一月乙丑，宴群臣于崇德宫旧第也。

避暑宫 见石头山。

德昌官 《方輿纪要》内府库藏之所。

延英殿、升元殿、雍和殿、昭德殿、穆清殿 《南唐书》：升元四年，改崇英殿为延英殿，凝华内殿前为升元殿，后为雍和殿，兴祥殿为昭德殿，积庆殿为穆清殿。

小殿 唐余纪传曰：中主接群臣如布衣交，间御小殿，以燕服见学士，必先遣中使谢曰：“小疾不能著帻，欲冠褐可乎！”其待士有礼如此。又《本纪》，帝在位常构一小殿，谓之gui头居。

光政殿

钓矶立谈，后主天性喜学问，常命诸臣分夕于光政殿与相剧谈。至夜分而罢。

瑶光殿 《十国春秋·周后传》：后工书史，善歌舞，尤工琵琶。创为高髻纤裳，又首翘髻朵之妆，人皆效之。后殂于瑶光殿之西室，后主谀之，有烟轻丽服、雪莹修容、纤眉范月、高髻凌风，又有弦尔清商、艳尔醉盼、丽尔渥月、婉尔清扬，语词极哀艳。

玉烛殿

在南唐宫内，宋为升州治。庆历八年，江宁大火，延烧殆尽，惟玉烛殿存。

柔仪殿 《清异录》：李煜长秋周氏居柔仪殿。有主香宫女，其焚香之器曰：梔子

、莲垂、云凤、折腰、师子、小三神山、互字、金风口、罍玉、大古容华鼎，凡数十种。

移风殿 《清异录》：卢山僧舍有麝兰花一丛，色正紫，号风流，后主诏取数千根植于移风殿，赐名蓬莱紫。

清晖殿 金陵诗汇：刁衡仕南唐为集贤校理，直清晖殿。

百尺楼 《建康志》：南唐宫有百尺楼。又引《宫类说》云：南唐主于宫中建高楼，召群臣观之，众皆叹美，萧俨曰：“恨楼下无井耳”。南唐主问其故，对曰：“以此不及景阳楼耳。”南唐主怒，贬于舒州。

饮香亭 保大二年，幸饮香亭观兰。《清异录》：中主赏新兰，诏苑令取汴渚美土为馨烈侯拥培之具。

千春阁。 《江南余载》，元宗置，于延英殿，以生日在孟春也。

绮霞阁 徐铉有绮霞阁饯邓王出镇宣州诗。

红罗亭 《十国春秋·继国后周氏传》：后主尝于群花中作亭，幕以红罗，押以玳瑁，雕镂华丽，而极迫小，仅容二人，每与后觞咏其间。

罗江亭 《古今诗话》：李煜作罗江亭，四面栽红梅，作艳曲歌之。韩熙载和云：“桃李不须夸烂漫，已输了春风一半”。

澄心堂 在南唐宫之左，后主建藏书撰述之所。造澄心堂纸为世所珍。

月台 胡宿《高斋记》：在子城东，南唐李氏因城作台望月，人呼为月台。

北苑 《建康志》：徐铉、汤悦、徐锴有北苑侍宴赋。铉序云：“望蒋峤之嵌峯祝为圣寿，泛潮沟之清浅流作恩波”是也。

金陵苑 《十国春秋·后主纪》：甲戌岁，金陵苑中鹿作人语，叱牧者：明年此日，女等作鬼物。又云：苑囿荒凉，安能拘我。

延宾、崇英、宣猷、文理、清讼、光政诸院 并南唐立，见《待微录·引禁篇》。

金波园、摩诃池 后主有摩诃池避暑词。

锦洞天 《清异录》：后主每春盛时，梁栋、窗壁、柱棋阶砌并作隔筒，密插杂花，榜曰锦洞天。

南唐御街 旧志自天津桥至南门，诸司庶府拱夹左右。

南宋

行宫 《舆地纪胜》引《中兴小历》：建炎三年，帝至江宁府驻蹕，改为建康府，以保宁寺为行宫。绍兴二年，即建康府治为行宫，以备巡幸，置行宫留守。内东宫在宫之左。

寝殿 在宫内。朝殿在寝殿之南。复古殿在寝殿之后。孝思殿在内东宫之后，大射殿在御教场之北。进食殿在复古殿西北。

罗本堂 在复古殿之后。

资善堂、天章阁 在皇城门内宫门外东南隅。

凉馆 在御教场内，有元符间元时敏石刻。

高斋 在宫之东北隅，有庆历间胡宿记石刻。

直笔阁 在朝殿之右。

南位 在内东宫之左，御苑之右。

走马廊 在进食殿之西北隅。

御苑 在皇城东门之内，御马苑之北，南位之左。

八仙台 在御苑东北。

养种园 在行宫东门外。正堂名“熙春”，梅堂曰“玉雪”，四面堂曰“面面云山”，杏堂曰“清华”，牡丹亭名“怀洛”，百花亭名“芳润”。以上并见《建康志》。

明

乾清宫、坤宁宫 《大政记》：丙午作新宫于钟山之阳，丁未吴元年新宫成，前曰

“乾清”，后曰“坤宁”，六宫以次序列。

奉天殿 《纪事本末》：洪武四年春三月，始策试贡士于奉天殿。又十年丁亥冬至，合祀天地于奉天殿。

华盖殿 《纪事本末》：吴元年癸卯，新宫内三殿成，正殿曰“奉天”，奉天之后曰“华盖”，华盖后曰“谨身”。

谨身殿 《五行志》：洪武十三年，雷震谨身殿。又《纪事本末》：十五年正月，宴群臣于谨身殿，始用九奏乐。

奉先殿 《大政记》：洪武三年十二月甲子建奉先殿，四年二月成。每日朝晡，上及皇太子诸王二朝。皇后率妃嫔日进膳、月荐新。

文华殿 《明史·太祖纪》：二十六年秋七月，选秀才张宗浚等分直文华殿，侍皇太孙允炆。

武英殿 《待徵录》引《金陵世纪》：文华左顺殿，武英右顺殿。

白虎殿 在旧内，今王府园有庵名百福，其遗址也。

东阁 《大政记》：帝退朝御东阁，顾朱升等论周礼六梦。又洪武三年二月，上御东阁，学士宋濂侍讲，王进讲大学传十章。

忠勤楼 《大政记》：癸卯五月，忠勤楼灾。

午楼 《大政记》：洪武六年十一月，帝御午楼，诏赐陈宁、宋濂甘露浆。

文华堂 《大政记》：洪武六年，以举人张唯等为编修，入文华堂肄业。诏宋濂为之师，帝亲品其优劣。每食，太子诸王迭为主。

大本堂 《待徵录》引《金陵世纪》：太祖建，取古今图籍充其中，以教太子、诸王公侯子弟。时赐宴赋诗，命诸儒作钟山龙蟠赋。又自作时雪赋，赐东宫官，制大本堂玉图记赐太子。

西苑 《太祖实录》：癸卯十二月，帝阅武鸡龙山，退坐西苑，论诸将兵法。

内花园 《五行志》：孝宗元年，南京内花园火。

西鹰坊 《青溪暇笔》：“太祖御奉天门外西鹰坊，观海东青张泚明大内诗，西鹰坊已失遗踪”。指此。

戟门 《纪事本末》：吴元年秋七月，上御戟门观雅乐。

午门 《大政记》：午门外建亭立碑，刻国家政事可为定式及政令之善者，著为法。又《太祖本纪》：洪武元年冬十月，诏儒臣更直午门，为武臣讲经。

承天门 《五行志》：建文二年，承天门灾。

端门、奉天门

《明史·成祖本纪》：永乐二年，帝御奉天门录囚。又五年，御奉天门受安南俘。

东华门、东上北门、东上南门、西华门(待徵录：西华门并刻光禄徐尚宝、赵崇祜十五年造)。西上南门、西上北门、元武门、北上东门(《五行志》：英宗五年，南京大风雨，坏北上门脊。)北上西门、左掖门、右掖门、东安门、西安门(《五行志》：英宗后七年，南京西安门木厂火)北安门、左小门、右小门、中左门、中右门以上十八门皆明作，见《待徵录》引《金陵世纪》。

历代郊庙

吴太庙 《吴志·孙亮传》曰：五凤二年冬十二月，作太庙。

长沙桓王庙、太祖庙、清庙 《宋书·礼志》：孙权于建业立兄长沙桓王策庙于朱雀桥南，子亮代立。明年正月，于宫东立权庙，曰“太祖庙”。孙皓追尊父和曰“文皇帝”。宝鼎二年，立庙京邑，号曰“清庙”。

晋太庙 《晋书·礼志》：太庙殿正室十四间，东西储室各一间，合十六间。栋高八丈四尺。又《建康实录》：元帝渡江，郭璞卜置太庙，在御路之东，淮水之西，与台城远，孝武帝欲改建于宣阳门内，王珣以为龟筮弗可违。乃于旧地更开墙埤，后俱因之。

宣太后庙 《晋书·孝武帝纪》太元二十年二月，作宣太后庙。

梁太庙 《梁书·武帝纪》：天监十二年夏六月癸巳，新作太庙，增基九尺。

小庙 太祖太夫人庙也，非嫡，故别立庙。《南史》：侯景入寇，命江总权兼太常守小庙，因有摄官梁小庙诗。

南唐太庙 《袁志》：在翔鸾坊。宋开宝中，以其地置乾明尼寺。

宋太庙 《乾道志》：在嘉瑞坊，本吴景德寺，绍兴七年建。《六朝事迹编类》作建炎元年。

明堂宫

《南史·宋孝武帝纪》：大明五年，起明堂于太学丙己之地，墙宇规范拟则太庙。

陈明堂 《陈书·宣帝纪》：大建五年夏六月，治明堂。

南郊

《宋书·礼志》：孙权始都建业，不立郊兆。至末年太元元年十一月，始祭南郊。

晋社稷坛 《晋书·元帝本纪》：建武元年三月春，立宗庙社稷于建康。《天朝事迹》：在县口二里。

南郊坛

《晋书·礼志》太兴二年，立南郊于已地。《六朝事迹编类》：在宫城西十五里。

北郊坛 《晋书·礼志》成帝咸和八年正月，于覆舟山南立北郊。《建康实录》：在县东八里潮沟后，东近青溪。

雩坛 《通典》：晋穆帝永和中，有议立雩坛于国南郊之旁，依郊坛远近。

祿坛石 《通典》：江东太庙门北有石，文如竹叶。陆澄以为晋孝武时郊祿石，则江左亦有此礼矣。

宋南郊坛 《南史》：晋南郊坛在台城已位。宋大明三年，诏移于牛首山西，直宫城之午位。未几复故。

北郊坛 《宋书·礼志》：北郊坛，晋世本在覆舟山南，宋太祖以其地为乐游苑，移于山西北。后以其地为北湖，移于湖塘西北。其地卑下污湿，又移于白石村东。其地又以为湖，乃移于钟山北原道，西与南郊相对。后罢白石东湖，北郊还旧处。

先农坛、御耕坛 《宋书·文帝纪》：元嘉二十一年，司空、司农、京尹、令尉，度宫之辰地八里之外，整制千亩。立先农坛于中，阡西陌南。御耕坛于中，阡东陌北。

亲蚕宫

《南史》：宋大明三年，立皇后亲蚕宫于西郊。《輿地纪胜》：在耆阁山前。

蚕所蚕观 《隋书·礼仪志》：宋孝武帝大明四年，始于台城西白石垒为先蚕设兆域，置大殿七间，又立蚕观。

社稷坛 《宋书·礼志》未言坛之所在。

齐社稷坛 《南齐书·礼志》未言坛之所在。

梁雩坛 《隋志》天监九年有事雩坛，遂移于东郊，在藉田之域内。

南北郊坛 《梁书·武帝纪》：普通二年夏四月乙卯，改作南北郊。丙辰诏曰：夫钦若昊天，历象母违。躬执耒耜，尽力致敬。上协星鸟，俯顺民时。平秩东作，义不在南。前代因袭，有乖礼制。可于震方，简求沃野。具兹千亩，庶允旧章。

藉田坛 《隋志》梁普通二年，移藉田坛于建康北岸，别有祈年殿。蔡宗日《金陵赋注》：在青龙山前。

社稷坛 《隋志》载梁社稷有太社、帝社、太稷，凡三种。

陈方明坛 《陈书·宣帝纪》：太建十年秋七月乙巳，立方明坛于娄湖。甲寅，舆驾幸娄湖，临誓。

南唐南北郊坛 《南唐书·烈祖纪》：升元三年春正月甲午，作南郊坛行宫千间。夏四月，作北郊坛于玄武湖西。《吕志》或云：牛头山有废宫址，即南唐郊宫也。

宋建康府社坛 《建康志》：旧在城南，庆元留守张杓移置秦淮南。

元郊坛 在故丹阳郡城东。

府社坛 在城西南绿春园之西。

明天地坛 《吕志》在洪武门外。坛制辟四门，缭以朱垣，内复为垣。上为大祀殿，前为斋宫。大垣之右列神乐观，为郊庙大祀习乐之所。有醴泉亭，相传洪武时大乐成，井中出醴三日，故建亭以覆之。又有来鹤亭，何湛之《疏园集注》：王忠铭摄太常篆校乐观中，有鹤来翔，遂止不去，因构此亭，见《待徵录》。

鬼神坛 《南都察院志》：在神策门外，即今泰厉坛也。

祭江坛 《南都察院志》：在外金川门外。

历代官署

吴钱监 《吴志》：黄龙五年，设钱监。

扶南乐署

《建康实录》：吴赤乌七年，扶南国献乐人于此，置舍以教宫人。在县北二里。

学宫 《吴志·景帝传》：永安元年，诏置学宫，首立五经博士。

司徒署、大监署 《吴都赋》注云：吴自宫门南出苑路，府寺相属夹道七里也。吴有司徒、大监诸署，非一也。

晋国子学堂 《晋书·会稽王道子传》：元显退屯国子学堂。

建康令廨 旧志：建业县城即台地，魏晋间或曰金陵、或曰秣陵、或曰建康，皆更名而不更治。及太康分水北为建业，仍治此城，后元帝以为台城，而建康令廨乃移在城外。

陶官 见凤台山。

七尉治 《东晋·疆域志》：江尉在三江渚，西尉在延兴寺后巷北，东尉在吴大帝陵口，今蒋山西门，南尉在草寺北湘宫寺前，北尉在潮沟村，左尉在清流溪菰首桥，右尉在沙市。

扬州刺史 署在西州城。

丹阳尹署 在淮水外。

廩牺署 《晋志》：在东府城东。

宋纸官署

《舆地志》：宋永初立，后齐帝于此造银光纸，以赐王僧虔。在县东十五里。

四学 儒学在钟山麓，玄学在鸡笼山东，史学、文学在耆阁寺侧，并宋文帝立。

学士馆 《齐书·王俭传》：永明三年，省总明观于俭宅，立学士馆。

铜螭署 《六朝事迹编类》：在台城刻漏署西，本洛阳之旧物，宋平姚秦迁于此。昔魏明帝为太子时，戏以玉手板刺螭口中，因入不出，后人常见白蛆蜒在其腹中。梁元帝移之江陵，后遂不复见。《金陵故事》又曰刻漏院。

锦署 《六朝事迹编类》引《祥符图经》云：在县东南十里，宋迁百工于此。

梁士林馆 《梁书·武帝纪》：大同八年，于宫城西立士林馆。延集学士，增广生员，立五馆，置五经博士。天监初，则何佟之、贺、严植之、明山宾等覆述制旨，并撰吉、凶、军、宾、嘉五礼，凡一千余卷。高祖称制断疑。

五省 《待徵录·引禁篇》云：梁以尚书、中书、集书、门下、秘书为五省。《舆地纪胜》引《金陵故事》云：在三台路北，齐谢朓有始出尚书省直中书省诗。

文德省、寿光省 见梁书周兴嗣传。

三市令 三市丞廨 《通典》梁有太市、南市、北市令，太南北三市丞。

公车府 《南史》侯景入宣阳门，据台城门外公车府。

中庶子坊 王筠有寓直中庶子坊赠萧洗马诗。

扬州法曹 何逊有扬州法曹梅花盛开诗。案：梁扬州治在建康。

南津校尉 《梁书·江子一传》：出为戎服将军、南津校尉。《方舆纪要》：以督察秦淮南岸而名。

陈南北狱 陈武帝令尚书删定郎苑，果定律令。又令徐陵等知其事，以廷尉寺为北狱，建康县为南狱，见《客座赘语》。

进奏院 在府治西南。

婚第 《陈书》：六门之外有别馆，以为诸王冠婚之所。

三台 《舆地纪胜》引《金陵故事》云：兰台、谒者台、御史台在台城东南一里。

乘黄署 《舆地志》：在东府之西北，五辂及朝车凡驾马者之所。

博士省 一名诸生省。《建康志》引《宫苑记》：博士省在国学南。

秘阁、直庐、典客省，祠部、大匠、太府、大舟、典书署，符节署并六朝立，见《待徵录·引禁篇》。

隋蒋州署 《隋志》：平陈，诏更石头城置蒋州。

江宁县署 旧在城西南六十里，隋开皇十年移于冶城。

唐上元县署 《肇域志》：唐始置署于永寿宫东，后徙凤台山西。

南唐国子监 《南唐书》：滨秦淮开国子监。《建康志》：今镇淮桥北、御街东，旧比较务即其地，里俗呼为国子监巷。《至正金陵新志》：宋齐江宅在古国子监巷。

江宁县署 《肇域志》：南唐迁北门清化坊。

宋建康府学 《建康志》：雍熙中，有文宣王庙在冶城。天圣七年，徙于浮桥东北。景祐中，又徙于府治之东南。有大成殿、御书阁、讲堂、议道堂、正录位、直学位诸职事位。齐舍新祭器库、旧祭器库、客位公厨、学廩、义庄仓、射圃诸名。南有状元坊。

织罗务 熙宁三年十月，诏江宁府织罗务，自今并三班差人。

转运司 《建康志》：在行宫西，绍兴八年建，有戏彩堂。嘉定八年，真文忠将母出使，葺而名之。又有忠宣、筹思、四老诸堂。范忠宣公祠在旧转运司。真文忠公祠在筹思堂南。

总领所

《建康志》：在行宫西南、都酒务北，绍兴十一年建，有使华堂、仁本堂。

左司理厅 有式敬斋。

知录厅 有存爱轩。

御前诸军都统制司 《建康志》：在行宫北，绍兴十二年建。

侍卫马军司 《建康志》：在城西门天庆观右。

提领江淮茶盐所 嘉熙八年八月建。

创置司幕官厅 《建康志》：景定五年，马光祖建，在青溪上两贡院之间。

学士院 《建康志》：在皇城门外、宫城外东南隅。

建康府署 《建康志》：在行宫东南，秦淮水北。凡留守、知府、制置使、安抚使、宣抚使、兵马都督皆治于此。有清心堂、忠实不欺之堂、静得堂、玉麟堂、喜雨轩、有竹轩、锦绣堂、忠勤楼、紬书阁、钟山楼、镇青堂、川泳轩等处。又有二井，叶石林铭，详《金石志》。又有金山亭、芙蓉堂，并在旧府治，即行宫内，王荆公有诗。安抚司金厅，有芙蓉堂。制置司金厅，有筹胜堂、君子堂。府都金厅、通判厅，有思政堂、朝阳亭。以上四署并在府署内。

上元县署 《輿地纪胜》：今县治，与城东门相近，距行宫一里。

江宁县署 《輿地纪胜》：今在行宫西转运司西北。

都酒务 《建康志》在总领所之北。

提领建康户部赡军酒库所御辇院 见《肇域志》。

元建康宣抚司 即宋府治。

江东道宣慰司、枢密行院
治金厅君子堂内。至元二十一年，以宣慰司为枢密行院。

御史大夫廨建康路总管府 治西锦绶坊后。为御史大夫廨，即今府治。

集庆路总管府 即今县治。

江宁县署 至元十四年，改治城外越城侧。都税务在宽征坊。明应天府署凤字铺。上元县署张字铺。明太祖丙申，移治淳化镇。明年，还旧治，即今署也。督学察院署，斯字铺。东察院署系巡按临京驻扎。工部宝源局爱字铺。

户部府军仓钱厂 泰昌元年造。工部府军仓钱厂，万历十二年造。

工部芦政分司巡逻坐营厅，维字铺。巡逻把总厅，奉字铺。太医院东惠药局，形字铺。坊司内府外酒局房，克字铺。兵部武学，兄字铺，洪武年造。应天府都税司，间字铺。茶引所，门字铺。文思院织染所，后改铸钱厂，问字铺。印马察院，洪武年造。工部营缮所，覆字铺。宝钞提举司，当字铺。以上诸署并在中城，见《南都察院志》。

操江察院、中城察院、凤阳仓察院诸署，俱太平门对字铺。

下江察院、京仓察院 俱太平门肆字铺。

后湖厅刑部都察院、大理寺署 俱太平门外达字铺。刘树声《闻见杂录》云：明时三法司大狱皆在太平门外。盖贯索星所临照，有牌坊曰贯城，其路曰孤凄埂。

宗人府、翰林院、詹事府署，俱柳树湾禽字铺。

吏部、户部署，俱柳树湾笃字铺。

礼部、兵部、工部署，工部看库公署，俱柳树湾盘字铺。

太医院署，柳树湾笃字铺。 东城兵马司署，柳树湾据字铺。旧五城兵马司，头牌有印无牌，二牌五牌皆有令牌，夜间巡城则执牌，指挥使以下见牌皆跪。尚宝司坐厅日，兵马司送查，以物击之，以验不坏。牌铜铸，身圆如镜，上如荷叶，有孔以击绳。一面楷书大书“令字”，一面符篆“夜巡牌”三字，两旁楷书某字几号四字。

中府、左府署，俱长安街神字铺。

右府、前府、后府、太常寺署，俱崇礼街意字铺。 通政司、钦天监、鸿胪寺署，俱长安街神字铺。行人司、总督部院、总巡厅公署，俱长安街动字铺。

内守备衙门，柏川桥转字铺。以上诸署并在东城，见《南都察院志》。

南城兵马司署 在凰台街千字铺土门冈。 宣课司署，在涧子桥曲字铺。

工部木厂，在通济街感字铺。

典牧所，在驯象门外。以上诸署并在南城，见《南都察院志》。

督税分司署 楚字铺。 西城兵马司署，途字铺。

新江口坐营厅、把总厅、抽分猪羊公署，并子字铺。

造船厂、江济二卫收木厂，并赤字铺。 江济二卫拨船厂，驰字铺。

龙江把总厅、龙江抽分公署，并泰字铺。

龙江提举司署、工部督造分司署，并州字铺。 神宫堆砖瓦厂，宁字铺。靛园厂、黄船厂，并誉字铺。以上诸置并在西城。见《南都察院志》。

上江察院、南城察院署 俱金吾后卫虑字铺。

屯田察院署，金吾后卫左字铺。国子监，金吾后卫嘉字铺。

督储公署、北城兵马司署，豹韬左卫纺字铺。

鲋鱼厂、冰窖，俱观音门外永字铺。以上诸署并在北城，见《南都察院志》。

君子卫、舍人卫 《客座赘语》：太祖选文官子侄居君子卫，武官子侄居舍人卫，昼则侍从，夜则直舍更番。

历代营卫

晋领军营、护军营、左卫营、右卫营、骁骑营、游击营 是为六军，皆在京邸。又有屯骑、越骑、长水、射击等校尉，是为五校。并见《晋书·职官志》。

刘宋南蛮校尉营 《宋书》：孝武帝时迁南蛮校尉营于建康。

南宋侍卫马军营 《建康志》：凡六军，选锋军在城西门崇道桥；前军在城南门外虎头山；右军在城南门外黄家塘北；中军在城南门外黄家塘南；左军在城南门外阴山之东；后军在城东门外蒋山南。

驻扎御前诸军营 《建康志》：凡六军，游弈军在北新街清化坊；前军在桐树湾以北；右军在高阳楼及城东门外；中军在保安寺街；左军在北门里大街东；后军在上元县西景阳台南。

厢禁军营 《建康志》：武雄第一指挥在广济新仓。东威果第十三指挥在行宫北证圣院。西威果第十四指挥在证圣院，东威果第十五指挥附，威果第十四营全捷第六指挥附，威果第十四营忠节第一指挥附。威果第十三营、威果第四十四指挥在转运衙西。全捷第十一指挥在太平桥北。有马雄略第十一指挥在清化市南下街西，横江水军三指挥、一军附，威果四十四一军附，有马雄略营一军附。全捷十一营忠义指挥，在总领衙后。又厢军效勇第一指挥、牢城第一指挥、牢城第二指挥、剩员指挥、一营，并坐落在城内西北隅。

沿江制置司游击军寨 《建康志》：凡五所，前军在武定桥南，右军在北门内，中军在桃源洞，左军在武定桥西北，后军在桃源洞。

游击军新寨 《建康志》：在沿江制置司署东，开庆元年马光祖建。

防江军寨 《建康志》：在北门外耆阁山下。

效用军寨

《建康志》：三所，一在府直街能仁寺后，一在武定桥南，又小寨在罗帛市。

破敌军寨 《建康志》：在大西门里。

精锐军寨 《建康志》在都统衙后。

亲兵左右部 《建康志》：在鹿苑寺侧。

策胜军寨 《建康志》：中军在城里东北角，右军在北门城内。

制效军寨 《建康志》凡二所，一在城南门外虎头山，一在城里杏花村。

龙安游击水军寨 《建康志》：在靖安镇。

靖安唐湾水军寨 《建康志》：在古龙湾茆草冈。

义士军 《建康志》：有游击中、左、后三军屯泊。

雄武军。《建康志》：在北门，游击军屯泊。

江东安抚司亲兵寨 《建康志》：乾道五年，史正志建，在府治东，后废。淳熙初，刘琪复建为两寨，一在宫城东，一在宫城北。庆元初，张杓重修。

淮西江东总领所总效军寨 《建康志》凡四所，一在江宁县北真圣庙南，一在兴严寺北，一在马司选锋寨东，在报恩寺东北。

亲事营 在宋行宫内。

明神机营 洪武初立，在画字铺。

新江口营 洪武初立，在会字铺。

沙洲屯营 万历元年建，在圩内假字铺。

太平营 万历三十年建，在太平门肆字铺。

标营 万历三十六年立，在柳湾观字铺。

金吾营 在金吾后卫遥字铺。神策营在本卫执字铺。府军营，本卫玩字铺。以上三营并万历三十八年建。

龙虎左营 在本卫敕字铺。鹰扬营在本卫艺字铺。陆兵营，金川门外曦字铺，万历十九年建。以上诸营并见《南都察院志》。

镇南卫 来字东铺。虎贲左营，始字铺。龙虎石卫、豹韬右卫，并恭字铺。金吾左卫、金吾右卫，并字铺。藩阳左卫，白字铺。羽林前卫，投字铺。龙江右卫，分字铺。羽林右卫，寸字铺。龙江左卫、豹韬左卫，并河字铺。虎贲右卫，有字铺。以上诸卫并在中城，见《南都察院志》。

锦衣卫、旗手卫 并钦天监卮字铺。府军卫，崇礼街好字铺。金吾前卫，柳树湾据字铺。府军右卫，长安街满字铺。留守左卫，崇礼街爵字铺。羽林左卫，朝阳门丙字铺。金吾后卫，太平门纳字铺。孝陵卫，朝阳门外。以上诸卫并在东城，见《南都察院志》。

留守前卫 在驯象街功字铺，案本卫隶南城，见《南都察院志》。

济川卫 在直江口土字铺，案本卫隶西城，见《南都察院志》。

府军后卫、骁骑右卫、府军左卫、兴武卫、天策卫，并金吾后卫求字东铺。

留守右卫、留守中卫、龙骧卫、鹰扬卫、神策卫、水军左卫、水军右卫、广洋卫、江阴卫并求字西铺。案以上诸卫并在北城，见《南都察院志》。

历代仓库

苑仓 《实录》：苑城有仓，名曰苑仓。

石头库

《吴都赋》：“戎车盈于石头”，注云石头城中置府库贮军储，故曰盈于石头。

东仓、石头仓 《唐六典》：东晋有东仓、石头仓。

常平仓

即石头仓也，晋曰常平，南朝因之。《梁书》：侯景破台城，仓石头常平仓。

太仓 《建康志》晋咸和中，苏峻反，王师连败绩，时太仓惟有烧余米数石，以供御膳。太仓在苑城内。

武库 《南史·梁武帝纪》：太清三年正月戊辰，有流星长三十丈堕武库。

荚库、荻库、箬库 《隋书·百官志》：梁司农有管荚库、荻库、箬库丞。

酒库 《梁书·侯景传》：太宗崩，殓用法服，以薄棺密瘞于城北酒库。

龙首仓 《隋书·食货志》：京都有龙首仓，即石头津仓也。

县仓 《建康志》：唐武后移县仓以实石头，神龙二年移仓于冶城。

转般仓 《建康志》：淳熙六年置，在上水门外淮水北岸。

平余仓 《建康志》：隶转运司，嘉定八年，真德秀创置。嘉定十四年，岳珂复置，淳祐十二年，舒滋复置。

平止仓 在广济仓之左。嘉定中留守余嵘建。

桩积库 《建康志》：凡四所，一在府治；一在府治之南，刘琪建；一在府治东，陈俊卿建；一在府治东南，钱良臣建。

军器库 《建康志》：在经武桥东，宝祐五年马光祖修。

礼尚库 《建康志》：在府治西厅，马光祖立，家之巽记。

公使酒库 《建康志》：在天津桥侧，马光祖建。唐烁记。

广济东仓 《建康志》：在武雄营侧。

广济西仓 《建康志》：在大军仓后，崇道桥南。

宋广济新仓

《建康志》：在广济西仓北，乾道四年留守史正志建，转运副使赵彦端记。

大军仓 《建康志》：在下水门内，北接广济仓。

制置司仓 《建康志》：附广济仓内。又有小仓三所，曰东仓，曰西仓，曰中仓，并在南门里沙窝一带。

建康府 圣节从物库 《建康志》：在府治西廊。

节仪库 《建康志》：在玉麟堂东廊。

都钱库 《建康志》：在府金厅之北，常平库、军资库、节制库、修造库、节用库、经总制库、公使库皆附焉。

醋库 《建康志》三所，一在旧米市，一在安乐庐侧，一在举子巷。

杂物库 《建康志》在军器库侧。

鞍辔库 《建康志》在节仪库侧。

淮土典库 《建康志》在大木头街。

封桩甲仗库 《建康志》：在府治都钱库内。

沿江制置司库 《建康志》：在府治都钱库内。

都受给库 《建康志》：在军器库侧。

回易库 《建康志》：在斗门桥西。

抵、当两库 《建康志》：一在御街锦绣坊之南，一在宽征坊。

惠军典库 《建康志》：在十三丈街。

江东安抚司军需库 《建康志》：系安抚司库，在军资库之侧。

淮西总领所大军库 《建康志》：在总领所。

都钱库 《建康志》：在大军库西廊。

激犒库 《建康志》：在大军库东廊。

桩备库 《建康志》：在淮西总领所都钱库之侧。

抵、当两库 《建康志》：一在旧米市，一在鸡行街。

公使库 《建康志》：在总领所西厅之西。见钱库，《建康志》：在饮虹桥下保宁坊西。江东转运司钱物库，《建康武》：在转运司东。杂物库，《建康志》：在大厅西廊。公使库，《建康志》在杂物库侧。典库，《建康志》：在转运司衙之东。凤台酒库。《建康志》：在天津桥南。镇淮酒库。《建康志》：在御街建业坊相对。嘉会酒库，《建康志》：在大木头街。丰裕酒库，《建康志》：在南门外西街。龙湾酒库，《建康志》：在龙湾市。防江酒库，《建康志》在北门外。东酒库，《建康志》在上元县之西。北酒库，《建康志》：在太平桥南。元大军仓，即宋平糴仓也。常平仓，至元五年，立常平仓于旧广储仓所，在录事司之西北隅。广运仓，在龙湾。永丰库、大军库，在西锦绡坊。明旗手东仓，贞字铺。旗手西仓，坐字铺。留守左仓，听字铺。虎贲左仓，推字铺。锦衣大仓，朝字铺。骁骑仓，佟字铺。虎贲右仓，唐字铺。常平仓，系应天府振济饥民，夜字铺。留守右仓，上字铺。羽

林右仓，若字铺。府军仓，后改铸钱厂，端字铺。以上诸仓并在中城，见《南都察院志》，备振仓，《南都察院志》：在会同馆内，东城。羽林右卫养虎仓，《南都察院志》：在本卫辅字铺地方。南城。水军左卫仓，绵字铺。龙江左卫仓，南字铺。上元预备仓，赏字铺。豹韬西仓，贡字铺。豹韬东仓，孟字铺。豹韬左仓，孰字铺。天策南仓，中字铺。天策北仓，史字铺。鹰扬仓，稷字铺。以上诸仓并在西城，见《南都察院志》。府军左卫东仓、府军右卫，委字铺。府军右卫西仓，府军右卫的字铺。府军右卫西仓，府军左卫，易字铺。兴武卫南仓，本卫，宴字铺。兴武卫北仓，本卫，足字铺。江阴卫仓，本卫，牒字铺。广洋卫仓，本卫，康字铺。留守中卫仓，本卫，射字铺。龙骧仓，本卫画字铺。府军右卫东仓，本卫，芥字铺。神策卫仓，本卫，详字铺。府军后卫仓，本卫，绛字铺。金吾后卫南仓，本卫组字铺。金吾后卫东仓，本卫，嘉字铺。金吾后卫西仓，本卫，林字铺。军储仓金川门里兴武卫，足字铺。以上诸仓，并在北城，见《南都察院志》。供应库，今日：库上，见《待徵录》。

历代馆驿

任子馆 《吴志》：诸将屯戍，并留任子，为立一馆，名任子馆。《建康实录》注在覆舟山南。

客馆 《建康志》引《丹阳记》：吴时客馆在蔡洲上，以舍远使。

四方馆 《建康志》：宋初置南北客馆，主四方宾客，后为四方馆。

贡计馆

《舆地纪胜》引《宫苑记》：在舟子洲上，郡贡上计及士人预计皆憩此馆。

六馆 《舆地纪胜》引《宫苑记》：国馆六，一曰显仁，处高丽使，二曰集雅，处百济使；三曰显信，处吐蕃使；四曰来远，处蠕蠕使；五曰职官，处干院使；六曰行人，处北方使。五馆并相近，而行人在篱门外。按《南史》：梁天监五年五月，置集雅以招远学，似别是一馆，不在六馆之例。

梦笔驿

《建康志》引《唐溪诗话》云：梦笔驿江淹旧居，即梦郭璞索笔处也，在冶亭。

临江驿 《吕志》：旧说临江旧县，因以名驿，即故江宁县也。岑参诗：古戍依重险，高楼见五凉，山根盘驿道，河水浸城墙。即此。案五凉二字不可解。

石头驿 《吕志》：在石头城，张九龄有候使石头驿楼诗，李白有答裴侍御光行至石头驿诗。

永宁驿 《建康志》：旧基在南唐仪仗院，后为待漏院，而驿徙置总领所西闪驾桥之南。绍兴十五年晁谦之记。

金陵驿 《建康志》：亦名蛇盘驿，在上元县长乐乡蛇盘市。淳熙十二年，留守钱良臣建。续志又有佘婆冈市，在城东北二十里，疑即此。蛇盘，佘婆音之转也。王安石有重过佘婆冈市诗。

通江馆 《建康志》：在赏心亭东，即月亭旧基，后为回易库。马光祖改立通江馆，以待四方之宾客。

横江馆 《建康志》：在水西门内赏心亭侧，马光祖创，袁志又有江宁馆，制使姚希德重建。

秣陵驿 《建康志》：在江宁县南五十里。

江宁驿 《建康志》：在江宁县西南五十里。

明会同馆 在会同桥南。

江东驿 《南都察院志》：西城会字铺。

秣陵驿 《南都察院志》：在夹冈门外，旧城治南。

大胜驿 《南都察院志》：在大城港口。

江宁驿 《南都察院志》：古江宁县地，后徙置县驿，原名为站，今复名驿，路达采石至太平。

大行宫 《吕志》：向为织造廨。圣祖南巡时驻蹕于此。乾隆十六年，大吏改建行殿，有绿静榭、听瀑轩、判春室、镜中亭、塔影楼、彩虹桥、钓鱼台诸胜。

芦政街 有慈愿庵，旁为方氏祠堂，敏恪公家祠也。敏恪与弟待诏观永仿宋范氏立义庄，以贍族人，自书条教，泐石于壁。

二郎庙 祠蜀清源神，江澜撰碑，见《南都察院志》。

祠堂巷、草纸苑、吉祥街 本名义祥，俗曰吉祥。

小驴子巷 旧有离子巷，兹故以小名，言驴者伪也。

铜井巷 旧说铜井庵在东，庵有井，以铜为底，下通大江，井中水如鼎沸，鱼鱗随水上下焉，疑即此处。

銮驾库 国朝何左车李居此，有依绿园，见《金陵诗汇》。

花牌楼 常府西牌楼也，一名雍睦里。道光中李太守璋煜以其守更严肃，改是名。

党公巷 以内监党存仁名，见《待徵录·引盛敏耕轩轩居集》。有督标左营游击署，详见《白下琐言》。党公巷李姓宅，有楼极高，相传即百尺楼遗迹。乾隆初犹存，后毁于火。

双塘 延龄巷。

[官宇]

吴都佳丽，自昔所闻，建炎兵烬，所存惟觉报小寺及子城角天王祠。今州宅、官廨、学舍、仓庾、亭馆之类，皆中兴后随事草创，不能悉如旧观。辄考故事，并异时名额识之，以备考古。

谯楼 绍兴二年郡守席益鸠工，三年，郡守李擢成之。二十年郡守徐兢篆平江府额。然止能立正门之楼，两旁挟楼至今未复，遗基岿然。

戟门 绍兴元年郡守胡松年建，榜以平江军额，徐琛书。

设厅 皇祐中李晋卿以兵部员外郎守郡，尝修大厅。蒋堂为记，叙厅之所始甚详。今题名逸李姓名，晋卿是其字也。后嘉祐中，王琪以知制诰守郡，始大修设厅，规模宏壮，假省库钱数千缗。厅既成，漕司不肯除破。时方贵《杜集》，人间苦无全书，琪家藏本雋校素精，即俾公使库镂版印万本。每部为值千钱，士人争买之，富室或买十许部。既偿省库，羡余以给公厨。兵火之后，绍兴三年，郡守宋伯友更建今厅。高宗皇帝巡幸，尝以为正衙，制度差雄。

黄堂 《郡国志》在鸡陂之侧，春申君子假君之殿也。后太守居之。以数失火，涂以雌黄，遂名黄堂，即今太守正厅是也。今天下郡治皆名黄堂，仿此。

郡圃 在州宅正北，前临光亨大池，后抵齐云楼城下，甚广袤。按唐有西园，旧木兰堂基正在郡圃之西，其前隙地今为教场，俗呼后教场，疑即古西园之地。郡治旧有齐云、初阳及东、西四楼，木兰堂、东西二亭、北轩、东斋等处。今复立者，惟齐云西楼东斋尔。余皆兵火后一时创立，非复能如旧闻。

东楼 唐有之，今废。

初阳楼 在郡中池上，既曰初阳，宜占东城，今废。

东亭 唐有之，今更它名。

西亭 唐有之，今西斋是其处。

西园 在郡圃之西隙地直子城，甚袤。唐谓之西园，今以作教场。

北轩 在郡宅之后。

北池，又名后池 唐在木兰堂后。韦白常有歌咏，白公桧盖在池中，皮陆亦有木兰后池、白莲重台、莲浮萍三咏。今池乃在正堂之后，而木兰堂基正在其西，后无池迹。岂所谓木兰堂基者非唐旧耶，或旧池更大连木兰耶？本朝皇祐间，蒋堂守郡乃增葺池馆，赋北池宴集诗及和梅挚北池十咏。后十二年，复守郡，遂作北池赋。按堂赋咏池中有危桥虚阁，今池皆不能容，则知承平时更大矣。

双莲堂

在郡治木兰堂东，旧芙蓉堂也。至和初，吕济叔大卿守郡，以双莲花开易此名。

池光亭 在郡宅后池北。绍兴十七年，郡守郑滋重建。池旁有小山二，东曰芳坻，郡守蒋璨建，飞白书其额。西有桧，郡守洪遵访故事植焉。唐有白公桧，已不存。淳熙六年，郡守司马假以亭名犯曾祖及祖讳，暂以木兰堂榜之。

木兰堂 在郡治后。《岚斋录》云：唐张搏自湖州刺史移苏州，于堂前大植木兰花。当盛开时，宴郡中诗客即席赋之。陆龟蒙后至，张联酌浮之，龟蒙径醉，强执笔题两句云“洞庭波浪涉无津，日日征帆送远人”，颓然醉倒。搏命他客继之，皆莫详其意。既而龟蒙稍醒，援毫卒其章曰“几度木兰船上望，不知元是此花身。”遂为一时绝唱。按旧堂基在今观德堂后，古木犹森列，郡守数有欲兴废者，而卒未就。承平时，堂近有治平二年郡守陈经所刻御书飞白碑，揭于木兰堂之新阁上，今不复存。

双瑞堂 旧名西斋，绍兴十四年，郡守王唤建。前有花石小圃便坐之佳处。绍熙元年。长洲有瑞麦四歧及后池出双莲，郡守袁说友葺西斋，以双瑞名堂以识嘉祥。

平易堂

在小厅东挟，绍兴间郡守蒋璨立。自书扁榜，淳熙五年郡守单夔易以隶书。

思政堂 旧名东斋，绍兴三十年郡守朱翌建。隆兴间郡守沈度更名复斋，绍熙三年。郡守沈揆更今名，自书扁榜。

思贤堂 旧名思贤亭。以祠韦应物、白居易、刘禹锡。后改曰三贤堂，绍兴二十八年郡守蒋璨建。三十二年郡守洪遵又益以王仲舒及范文正公二像，更名思贤。

瞻仪堂 旧在厅事之东，绍兴三十一年郡守洪遵建。吴俗贵重，太守来者必绘其像，春秋则陈于齐云楼之两挟，令吏民瞻礼。至是洪公恐为风日所侵，故作此堂藏之，绍熙三年郡守沈揆始迁诸像于后圃旧凝香堂中，并其名迁焉。

齐云楼 在郡治后子城上，绍兴十四年，郡守王唤重建。两挟循城，为屋数间，有二小楼翼之，轮奂雄特，不惟甲于二浙，虽蜀之西楼，鄂之南楼、岳阳楼、庾楼皆在下风。父老谓兵火之后，官寺草创，惟此楼胜。承平时，楼前同时建文武二亭。淳熙十二年，郡守邱崇又于文武亭前建二井亭。西楼在郡治子城西门之上，唐旧名西楼，后更为观风楼，今复旧。绍兴十五年，郡守王唤重建，二十年，郡守徐琛篆额，下临市桥，曰金母桥，亦取西向之义。唤初落成，郡人竞献诗，以进士耿元鼎所赋为最。

四照亭在郡圃之东北。绍兴十四年郡守王唤为屋。四合各植花石，随岁时之宜，春海棠，夏湖石，秋芙蓉，冬梅。

凝香堂，在思贤堂西，面临池。绍兴三年，迁太守画像于此，堂更名瞻仪。

逍遥阁 在旧凝香堂后，盖取韦应物逍遥池阁凉之句。此阁旧观复堂也，逍遥额郡守蒋璨书，后守韩彦古欲更名，乃除去旧额，而迄不果更名。

云章亭 在旧凝香堂西南，故有此亭，绍兴三十一年，郡守洪遵始命名。亭有仁宗皇帝赐陈经御书飞白。端敏宝文阁佛字石刻，及奖谕陈经敕赐丁谓诗，并太上皇帝御书千字文。

坐啸斋 在四照亭南，绍兴二十七年郡守蒋璨建，并书额。

秀野亭 在坐啸斋西，绍兴三十一年郡守徐琛建。

凉渚 本流杯名，旧在凝香堂后，今徙于池光亭后。

观德堂 在教场，唐西园地也。绍兴二十一年，郡守徐琛建。西又有射亭。

扶春池 光亭后醅醢洞也，绍兴二年郡守沈揆名之，且书其榜。

颁春、宣诏二亭 绍兴十四年郡守王唤建，知信州吴说书额。亭之侧东西二井亭，乾道四年郡守姚宪建。

介庵 庆历八年郡守梅挚建，在木兰堂南凌云台下，挚作铭刻石。后庵入通判东厅，久亦废，而铭石尚在。盖兵火更张，官廨多失其旧也。

通判东厅 在郡治之西，绍兴九年通判白彦悖建。介庵旧在郡圃，后入通判厅，今庵亦废。厅西有琵琶泉，小邱嵌岩曰“西施洞”，皆传为往迹。泉清冽，可酿酒。淳熙十一年通判魏仲恭葺洞门，作捧心亭。今更名舞雪。

通判西厅 在城隍庙后，依子城东南角城上，有小楼，见西山，名涌翠。

签判厅 在仪门西。教授厅在府学之东。节推厅在通判东厅之西。察推厅在平桥南。府院在谯楼东。司理院在谯楼西。司户厅并府院西。司法厅在平桥南。路铃衙，在子城内府西楼下东偏。州铃厅在状元坊内。路分厅在路铃衙南。转运衙旧在郡治西偏。后徙余杭。

[仓库场务]

府仓在饮马桥西。常平仓在府仓内。户部百万仓，在阊门里。开禧三年创，以府职曹官兼。嘉定二年，始命官专掌，以都司提领宪司措置。归仁仓、报功仓，淳熙元年郡守韩彦古创建，专储年计并存府仓内。甲仗库在设厅西廊。军资库在仪门东。公使库，公使酒库并在设厅东。架阁库在设厅西廊。作院，在教场西。乾道四年，郡守姚宪建。监仓厅，在姑苏观前。粮料厅在谯楼西。四酒务，在平桥南。初郡有酒务四，合而为一。故名曰四酒务。

激赏西库在景德寺东。激赏南库在盘门里。望云馆在阊门里。三所并绍定二年郡守李寿朋创。

清风楼在乐桥南。黄鹤楼在西楼之西。跨街楼在西楼之西。花月楼在饮马桥东北。丽景楼在乐桥东南。花月丽景，皆淳熙十二年郡守邱崇建，雄盛甲于诸楼。

[城社]

县之有城，盖不多见，华亭邑于海蠕，或者因戍守备御而有之。绍兴乙亥岁，酒务凿土，得唐燕胄妻朱氏墓碑，以咸通八年窆于华亭县城西一里，乡名惰竹。是唐之置县，固有城矣，废兴之由，墓得而详，疆域仿佛可识云。

县城 周围一百六十丈，高一丈二尺，厚九尺五寸。

古城 在县西南六十里。按《祥符图经》载：古城今未详所在。

社坛 在县西北二里。

[镇戍]

华亭 襟带江海，上而吴晋，近而吴越，尝筑城垒、置防戍，所以控守海道者至矣。今沿海镇寨倍于他邑，是亦捍置上流之意云。

青龙镇 去县五十四里，居松江之阴，海商辐辏之所。镇之得名，莫详所自，惟朱伯原《续吴郡图经》云：昔孙权造青龙战舰，置之此地，因以名之。国朝景祐中，置文臣理镇事，以右职副之，今止文臣一员。政和间，改通惠，高宗即位，复为青龙云。

管界水陆巡检司 在青龙镇中。金山巡检司，在县东南九十里。戚漈巡检司在县东南一百里。杜浦巡检司，在县东北七十里。

[廨舍]

县自宰贰而下邑僚凡十五员，四盐场、四巡检之居邑外者不与焉。公宇之视他邑亦盛矣，旧有提举市舶廨舍，在县之西。乾道二年，并舶司归漕台。今废。县治在市东北五十步。因大门为之楼，其手诏亭、颁春亭，皆在门外之东偏正厅之前。因中门为敕书楼架阁，有东西楼在两庑间，东庑分列诸吏舍，西庑则诸库分隶焉。

县丞廨舍在县西一十步。主簿廨舍在县西七十步。县廨舍在县东二百三十步。监盐廨舍在县西南三百步。监酒廨舍在县西三百步。造舟舩场官廨舍，在县西南五百四十步。市舶务监官廨舍，在县西南二百九十步。监税廨舍在县西七百十一步。支盐官廨舍在县南二百一十步。

[治所]

《祥符图经》载：官舍除州治外，凡十二处。通判在州衙西偏，推官在州衙南门外西偏，州院、司理院并在州衙南门外，兵马监押在州衙西南，清酒同监、清酒监、茶税同监、税监、织罗务并在州衙西门外，监堰在州西南二里，迴车院在西北一里，盖是时郡寮之数止如此。其后寝多，始时别乘一员，今增为两员，其下又有签判矣。始时都监一员，今增为五员，而其上又有钤辖矣。始时推官一员，监当官共七员。今推官分为节、察二员，而监当则有监仓、监库、监酒、监税、监闸及排岸巡铺、作院等官矣。兵官监，当员众无定居，不能尽述。

[郡治]

总领所 在府治西南月观之下。

供军堂 隆兴二年总领洪适建。

花信亭 洪适建。

得江楼 洪适建。记曰：江出岷山，行万里，至于朱方。受浙引淮，益大以肆，冲激洄折。过海门而东之。潮生洲灭，不见垠赚，骇涛静练，瞬息异状。金焦二山屹然中立，形势雄绝，于是为最。昔人谓长江当百万之师，而曰天隔南北，得其险也。至于转漕得之，则陈陈衙舳，费减流马。浮家者得之，则布帆千里，朝登夕届。行商得之，则捆载奇货，什一可逐。骚人得之，则可以导词源，助予墨。渔者得而网罟，耕者得而溉灌，算计见效，随其所得，江固自若也。予官寺占铁瓮之西，登墉以望，巨浸横前，境与心远。有地数亩，窳阨高下，吏卒散处，犹蜂房然。会羽书不驰，官事少间，徙茅茨，去芜秽，立屋其颠，以得江扁之。右为供军之堂，左为花信之亭，堂言职，亭言景也。当沈迷钱谷之间，神耗思滞，揽镜自叹，非复故吾。伺隙一至，如起宿疴，如逃醉乡，长川遥岑，寄我清啸。阴晴朝暮，无时不胜，岂直吞八九云梦而已。顾瞻裴回，以今鉴古，考战争之陈迹，愤侵陵之近事，饮马之役，春秋所必报。予再书下考，视荫怀归，天开风竞，中流击楫，后之人将于此而观之。

仁亭 乾道元年总领曹逮建。

爱山堂 淳熙二年总领文惠、钱良臣建。

紬书堂 淳熙八年总领宇文子震建。

小蓬莱 宇文子震建。帅幕邓谏从上梁文。

山春亭、杏亭并宇文子震建。右供军堂、花信亭、得江楼、爱山堂、杏亭，钱仲彪重修。

一笑亭 嘉泰三年，总领梁季秘建。取黄鲁直诗“坐对真成被花恼，出门一笑大江横”而名。

丹徒县向吴亭 在府治之南三里，唐陆龟蒙诗“秋来频上向吴亭”。其更号通吴驿，不知始于何时。乾道庚寅，守臣秘阁蔡洸给公帑缗钱，命丹徒宰韩元老重建，仍复唐旧名揭之。

丹阳县三贤堂

令徐文度立，郡贰校书陈谟记，国录李琪制迎送神辞。苏庠勉陈东赴京手帖在焉。

金鸚池（缺）

金坛县监税厅 旧寓慈云寺，嘉定中，宰黄朴、监务廖昌绪创建。

[仓]

丹徒县转般仓 绍兴七年，每上江粮运至镇江，冬则候潮闸，占舟而防摺运，纲兵亦复侵耗，运使向子湮乞置仓，以转般为名，诸路纲至，即令卸纳，从之。在太围桥西北，前临潮河，后枕大江。淳熙戊戌，守臣待制李大异增为五十四敖，逮今约储米六十余万石外，续纳米，敖少不足以容。司庾者拟于总所大军仓借敖交受，然以朝家桩积寄之，他司出混淆，两皆不便。嘉定甲戌，守臣待制史弥坚念滨江积贮，最为利济，要须储蓄百万，以便转输。仓后隙地尚可展拓，新开归水澳，去仓密迩，就运澳土，积成敖基，力省功倍，乃以借敖增敖利害谕于朝，奉旨起盖敖字二十座，以乙亥五月庚申鸠工，八月甲午竣事。

都仓 在府治之东南，即学宫故址也。旧敖八岁久倾摧，所贮无几。守臣待制史弥坚增创仓屋，并葺其旧而新之，越数月始毕。记曰：直子城东南隅，是为都仓，岁久弗葺椽桷朽蠹、垣壁隤缺、上雨旁风，储峙弗严。庾氏司出纳，无一席之地以莅事，执笔循除而坐，俛首尘坵中，尚何望会计当耶？西成既秩，民租麋至，旧敖褊隘，不足以受所委，则假他司空廩而寄藏焉。发敛无定所，输受者始交病矣。嘉定癸酉九月，余来守是邦，怪而问之，属秋入方殷，黽勉故罢。明年夏，因稍给之隙，始先葺新而规广之，筑土增高，使绝浸润，疏剔芜壅，以去流潦，甃砖级石，累甃层度，砉密刚壮，俾利永久，列为十有二敖。因旧而增葺者半之。官厅、神祠、门关之制，向所阙典，今悉备具。肇工于次年四月二十八日，断手于十月二十二日。屋以间计合六十，费羨余之泉凡千二十万，米一百五十五石。民不知役，而仓已新。夫积贮有邦之先务，盖藏有司之常职。靳小费、苟岁月，而时假寓以为安，是隳常职而慢先务也。余为郡不能自闲，补罅疏壅，扶僵植坏，政条稍举，乃以余力而营斯仓。仓成，会岁大稔，复斥公帑，采粟实之，以备不虞。于积贮先务，讵能补万分一，庶其不废有司之职云尔。

户部大军三仓南仓 在范公桥东，北仓在子城西，西仓在江津，岁久弗葺。嘉定壬申，总领钱仲彪次第修盖，阅再期，而三仓一新，积贮充判。

丹阳县常平仓 在县东北一里普宁寺北。

金坛县常平仓 在县治东南五十步。

[库]

丹徒县户部大军库 在榷货务之北。

甲仗库 在丹徒县东，绍兴十二年建，以封桩御前甲仗库名。嘉定壬申，总领钱仲彪重修，官沟界至旧为民冒占者，复归于官矣。

四酒库 中库，在长桥之北。西库，在果子巷内。西上库，在绿水桥之西。江口库，在京口闸之西。

寄桩库 在府治西，旧为新仓。

效土上酒库 在军资库南。效土下酒库，在南山亭之东。守臣待制史弥坚创。

公使钱库 在架阁库前。

户部赡军库 在竹杆巷西。

酒库、八仙库 在大围桥之东。八角楼，在小围桥之西。眉寿、中山二库，在县桥南。清和楼，在刁家巷。双望库，在仁和门里。酒海，在朱方门外。诸楼亦各有库。

丹阳县 常平库在县衙内。

金坛县（缺）。